

DE

ANTONII GENUENSIS

In Regia Neapolitana Academia jam Ethices, nunc Œconomices Professoris

DISCIPLINARUM METAPHYSICARUM TOMUS QUARTUS QUO CONTINENTUR

*Principia Legis naturalis, & Officiorum
hominum ac civium.*



NEAPOLI MDCCLXXIV.

EX TYPOGRAPHIA SIMONIANA

Superiorum Auctoritate ac Privilegio.

*Quid leges sine moribus
Vanæ proficiunt*

Horat. lib. 3. ode 27.

VIRO PERILLUSTRI,

Atque Ornatissimo

NICOLAO VIVIANO

Φιλανθρωπῳ

ANTONIUS GENUENSIS

S. P. D.



UARTA haec pars, NICOLAE VIVIANE, finem faciet Metaphysicarum lucubrationum, qua ego in parte ea de re, quam tu ex omnibus maxime probare, misserui. Prae-
re enim tibi admodum sensi, & ex vita ratione a te ab ineunte aetate suscepta, &

ex multis sermonibus nostris, hoc debere esse praecipuum philosophorum officium, hanc diligentiam, ut omnibus rebus posthabitis, tota se in optimo vitae statu exquirendo collocent, & quatenus possunt, sibi & aliis probent: vero, qui in iis rebus occupantur, quas ab omni vitae humana usu remotas, etsi fortasse jucundas, nullius tamen scire interest, & iners esse Telluris pondus, & plurimum aliis nocere posse, quos exemplo suo ad subtiles inanisque acroaseis pertrahant. Ex multis autem partibus, multisque a causis optimus hic vitae status existit, sed a nulla aequae, quam virtute. Quare veterum doctissimi omnem in eo curam operamque posuerunt, ut virtutem ad beate vivendum seipsi esse contentam suis persuaderent (a). Quod etsi difficile est probatu propter tam

A 2

varia

(a) Virtutem hic dico, ita vires ingenii, corporisque, ac naturae

varia & tam multa tormenta fortune (a) ; tale tamen est, ut elaborandum sit omnibus, quo facilius probetur. Quid enim est omnium, quæ in philosophia tractantur, quod gravius, magnificentiusque dici possit? Quid porro ad effrenes atque stultas cupiditates comprimendas validius? Quid tandem ad pacate, ac propterea beate inter mortales vivendum accommodatius? Nam ego sic semper habui, idque Tu, ut es in tota vetustate peritissimus, ex humana historia sæpe animadvertisti, ita esse natura comparatum, ut insipientiam, vitia, & scelera miseria inseparabilis comitetur: sapientiam vero & virtutem beatitudo. Equidem eos casus, in quibus me fortuna non leviter exercuit, mecum ipse considerans, constantius huic sententiæ adherere incipio: nam quum nullius rei mihi conscius essem, quamobrem animo angendum mihi esset, meque a tempestate actum in philosophiæ portum recepissem, magna ego, ac talia, quæ a nulla alia mortalium rerum sperarem, solatia a virtute petii, & exoravi. Quare factum est, ut me vehementer puderet præterita ætatis, quam ego in sterili rerum contemplatione pene totam consumseram, totumque me deinceps in id studium convertere, quod, ut præter ait Venusinus,

Æque pauperibus prodest, locupletibus æque,

Æque neglectum pueris, senibusque nocebit.

Sed Te in primis auctore ac exemplari sum usus. Nam & Tu sæpe gravis monitor fuisti, & cohortatus es pluries, ut quoniam ego hanc inter nostros philosophiam, quæ neglecta pene jacebat, & squalida, haud pridem excolendam.

turæ sensationes & affectus impetusque moderari, ac eatenus naturæ obsecundare, ut nec nos infelicitemus, nec ullum alium: ita uti frui, ut & nostras faciamus utilitates, & non perdamus aliorum: ut nihil nobis vere utile existimemus, quod honestum non sit, hoc est cum nulla aliorum injuriæ conjunctum, reputemusque sedulo, quod ait apud Homerum Telemachus

Θεμιστοκλή
'Ἦτ' ἀνδρῶν ἀγορᾶς κλέν λυαί, ἥδε καὶ δίκη

Themidem hominum comitiis præesse debere, ut ea congreget, ea separaret. Themidem vero esse, cujusque quod suum est velut Deo imperante servare libenter.

(a) Sed & tot scelestorum impiorumque conatus, virtutem aut deridentium, aut convellentium.

lendam suscepissem, non voce tantum ad eam adolenscentes impellerem, sed scriptionibus maxime; & Te in illo Bartholomaei nostri Interii (viri ornatissimi, & de gente nostra plurimam promeriti) Musarum domicilio, ita de virtute & pietate saepe differentem audivimus, ut existimaremus, nihil esse, quapropter aetas nostra veteribus Aristides, & Coruncanos invideret. At vero difficile dictu est, quid in Te prius, aut magis admiraremur, vimne sententiarum, qua Tu nos totos concutiebas, an Atticam illam eloquentiam, qua non permulcebas modo animos jucundissime, sed quacumque velles pertrahebas, aut istud denique incoctum, ut ille inquit, generoso pectus honesto, quo sentiebamur, ea, quae disputabas, non, ut in philosophorum plurimis, oratione tantum contineri, sed totam & mentem & animum occupare, esseque in naturam conversa, ut ne si velles quidem aliud sentire, aut loqui posses. Nam Tu ita quum virtutis, aut nomen audiebatur, aut spectabatur imago, totus concitabatur, ut facile esset animadvertere, in Te virtutem non in cortice herere, sed totum pervadere. Quare effecisti, ut non intelligeremus tantum, sed ipsi oculis nostris videremus id, quod Socrates dicere solebat, Virtutem si sine velo se nobis ostenderet, incredibiles in nobis amoris flammās excitaturam. Itaque ego quum alias, ~~in hoc~~ praesertim exemplo vehementer iis subirascor, qui aut imprudenter, aut, quod similis vero, per summum scelus dicere solent, virtutem nihil esse, tumque id esse nomen inane, quo otiosorum Scholae Doctorum personant. Vituperare quisquam patris vitae parentem, & hoc parricidio se inquinare audet? & tam impie ingratus esse, ut eam accuset, quam venerari deberet, etiamsi minus consequi potuisset? Sed, ut opinor, hic error, & haec indoctorum scelestorumque animis offusa caligo est, quod nec tam longe retro respicere possunt, ut eos, a quibus vita hominum instructa primis sit, fuisse a virgine armatos discant: nec, praesentium rerum aut inscii, aut incuriosi, intelligere, eas, quibus brutis plurimum & feris nationibus antecellimus, commoditates, ab una virtute esse & procurari. Quid enim non modo nos, sed omnino vita hominum sine ea esse potuisset? Ea urbes peperit: ea dissipatos homines in

societatem vite convocavit : ea illos inter se primo domiciliis , deinde conjugis , tum litterarum & vocum communione junxit : ea inventrix legum , ea magistra morum fuit . Sed in eo isti sibi videntur triumphare , quod nullam esse in nobis virtutem rentur , quæ non a nostri amore & utilitate profisciscatur : qua re fit , inquiunt , ut virtutem mentiri possimus , habere nequeamus . Quos quum sine indignatione audiri nequeant , tum Tu etiam , ut es humanissimus , ridebis tamen , qui infinita iis ex veteri memoria exempla asferre possis eorum , qui pro virtute omnibus fortunæ telis sese obicere non dubitarunt . Quamquam quam isti virtutem sibi confinxerunt , commenticia est , quamque nemo sapientum , ne ii quidem , qui plurimum illi tribuerunt , ab ullo mortalium exegerit , aut repossere possit : nam eam nos virtutem prædicamus , quæ quum singulorum , tum totius hominum generis delicias & felicitatem facere possit ; quæ si a singulorum utilitate & felicitate sejuncta sit , nec ulla est , nec si sit , virtus esse potest , quæ nec singulis , nec toti hominum generi utilis ullo modo est . Quomodo enim si singuli homines pro aliis sese interficiant ; deserta sit hominibus Tellus necesse est ; ita si se vitam , fortunasque suas , beatitudinem denique quisque contemnat , quo se aliis virtute probet , nemo omnium ~~beatissimus~~ non modo felix , sed ne erit quidem : ita fiet , ut , ea inuenta virtute , delendum sit hominum genus . Itaque Tu ita sæpe disputasti , ut facile nobis persuaderes , divina & providentiâ comparatum esse , ut sibi primum hominum singuli , deinde aliis , propter se natura ipsa conciliarentur , & ut essent , & ut bene & reque essent , idque esse in Natura pulcherrimum , & quo virtutis ut necessitas , ita magnæ utilitates continerentur , ut hominum nemo non solum bene beateque esse , sed ne esse quidem posset , nisi ita vitæ suæ rationes instituerit , ut una ipse cum aliis esse , ac bene beateque esse velit . Quod qua ratione faciendum sit , Tu quidem probe nosti : sed patieris tamen , me , qui Tibi uni omnium optimo iudici instituti mei rationes reddendas suscepi , paullo altius repetere , præsertim quum hæc non ut vellem , in hoc , quem tibi mitto , libello explicata & digesta , sed ut erant aut ex tempore dictata , aut carptim scripta festinan-

si interpellantique moleste Bibliopola edenda dederim, retexturus, novaque via & ratione exornaturus, si vita suppetat (a).

Quum ego hominem contemplor, quinque in eo principes & natura ipsa insitas propensiones inesse sentio, quarum quidem tres cum omnibus animantibus nobis communes sunt, duæ vero propriæ. Habet nempe a Naturâ & ut sit, & ut bene sit, & ut genus suum servet propagando, & ut postremo beatus; estque gloriæ, qua ceteris sui generis emineat, & ab omnibus distinguatur, percupidissimus (b). Sunt ex non tam cum natura ipsa conjunctæ & copulatæ, quam commixtæ, ac tota fusæ, ut tum demum persentiri a nobis, nosque concitare & pertrahere desinant, quum & ipsi esse desinimus (c). Itaque non in eo est a philosophia ponenda opera, ut eas stirpitus eradicet, quod quoniam fieri nequit, non potest

A 4

nisi

(a) Quatuor libris, De homine, jure ac lege naturæ, & officiis, deinde egimus; qui, si labascens jam valetudo sinat, propediem in lucem prodibunt.

(b) Tres Plato (de leg. vi.) *εὐχότας* ingenitas propensiones agnoscebat, cibi, potus, veneris: eo spectare leges oportere contendit. Sed duæ illæ primæ *τῷ* ut sit continentur. Ad illam vero, ut bene sit, pertinent commoda.

(c) Me non latet, esse quosdam, eosque magni nominis philosophos, quibus placet, hominem ita generari, nascique, ut nullam in partem natura ipsa propendeat, esseque has, quæ prædicantur, propensiones nobis connatas, ingenii nostri commenta, ex iis confecta, non quæ sunt in natura *πρωτα*, prima, sed quæ vitæ consuetudine accessere. Nam, ajunt, quum sine ullis rerum rationibus gignamur, id quod est confectarium, nullos rerum ululatum cum natura nostra connexus id temporis percipimus; ac inde porro, ut nullam in partem natura ipsa inclinemus. Atque isti ita disputant, ut magis quæstionis ignari esse videantur, quam naturæ humanæ. Nam quum quæritur, sint ne naturales in homine propensiones, non id quæritur, persentiscamus ne eas omnes statim atque procreati sumus, quod esse nequit; sed hoc, simus ne ita natura comparati, ut statim ac nostri existentiam ac naturam animadvertere possimus, dolorem aut voluptatem persentire, rerum, quæ nos ambiunt inter sese ac nobiscum connexus videre, ita naturaliter modificemur, ut & esse, & bene beateque esse, ac cetera ejusmodi velimus? Id quum constet ex tota hominum historia, qui in dubium vocat, in hominum physiologia hospes sit necesse est.

nisi stulte pertentari ; sed in hoc potius , ut ita componat , ut , quo sunt a natura data , toti hominum generi sint utiles . Id quum fit , virtus existit , non ea quidem , quam Stoici velut nulla cum ceteris hominibus cognatione juncti depradicant , sed hæc , quæ ex ejus , qua præditi sumus , naturæ moderatione esse potest , quæque sola esse hominibus utilis queat , quia ea sola efficere potest , & ut esse propagarique possint : & ut bene , idest sine maximis doloribus : & ut beate , idest cum maximis voluptatibus : & tandem ut cum vera gloria , idest cum iis ornamentis , quibus tantum sine ulla simulatione concelebrentur . Qua ex re intelligitur , quanto ii opere a vera ratione aberrant , quamque supervacaneum laborem in se suscipiunt , qui homines ad civilem beatitudinem efformaturi , humane naturæ inscii , & negligentes , ea pertrahere nituntur , qua illa tota ire vetat , quaque si eat , non minus stare possit , quam quæ adverso flumine devehuntur naviculæ . Ac ego quidem persuasum semper habui , dixique sapius , ut , quoniam ab omni naturæ nostræ imbecillitate , dicam etiam dehonestamento , ac undequaque perfecta & absoluta virtus haberi nequit , nisi a Deo , qui rerum universitatem potentissime moderatur & procurat , ab eo ~~et~~ ^{pendam} , sperandamque . Sed quum ne Deus quidem providentia sua rerum naturas evertat , sitque illud in ~~universæ~~ ^{universæ} gubernatione pulcherrimum , ut aliæ aliis nexæ iis legibus regantur , quarum nulle aliæ queant esse illarum naturis magis consentaneæ ; par est , ut hoc exemplar ii imitentur & sequantur philosophi , ac legumlatores , qui suis præceptis aut legibus quidquam se naturæ humanæ beandæ afferre posse confidunt ; alioquin vitæ lapsi , quo feruntur concitatus , eo hominum generi nocentiores esse possunt . Sed eo , unde digressa est , redeat oratio nostra .

Prima , quæ ut in brutis animantibus , ita in homine persentitur magis , quum animadvertitur propensio , est , ut sint . Quum ex tota rerum natura , omnibusque ejus qualitatibus , tum vero ex nulla magis , quam ex hac , Dei erga nos providentiam æstimare disco . Nam qui rerum universitatem & ut esset , & ut pulcherrima esset , præcreavit , sapientissimus ille omnium artifex & modera-

tor, hunc rebus singulis impetum & quasi sensum indidit, ut illa tota natura sua, ac vi naturæ suæ equali, idest maxima, ut esse conarentur, utque nulla causa posset ab iis, ut ne esse vellent, impetrare, nisi quæ ut ne essent quoque, eadem opera efficere quivisset. Inde vero hæc in omni animante animadvertere licet: principio ut nihil prius, nec quasi ex arbitrio, & electione, animique consilio, sed ex ipsius naturæ necessitate quadam ament, quam ut sint: deinde ut nihil eadem naturæ vi nec prius nec magis metuant, quam ut ne sint: tum ut nullam ob rem aliam totam naturæ vim adhibere sint perpetuo parata, quam ut ea omnia a se removeant, quibus ut ne sint effici potest: tandem ut eadem vi incredibiles labores & dolores ultro subeant, & fortissime tolerant, si ita eis sit persuasum, non aliter servare sese vitam posse. Quibus ex rebus fit, ut & nulli magis cum natura pugnent, quam qui impie ad genus humanum tollendum ingenii & naturæ vires præpostere adhibent; & nulli de ea magis promereantur, quam qui & docent, neminem, ut in fornice, ita in hominum genere, esse posse, nisi quo natura impetu fertur, ut sit, eodem conetur ut sint ceteri; & ipsi doctrinis ac præceptis suis sic consentaneæ vivunt, ut intelligere possimus, humanam naturæ consentaneæ esse velle. Est hæc prima eaque maxima, quæ in hominibus esse potest, virtus, ut principia ita singuli sibi persuadeant, & ut esse velint a natura omnes habere, & neminem esse posse, ubi alter, ut ne alii sint, cupit: deinde ut sic se resque suas moderentur, in eoque omnes intendant, quo non ipsi tantum, sed ceteri quoque omnes sint. Ex quo aliud etiam conficitur, nullam naturæ humanæ majorem esse perversitatem, nullum scelestius vitium, sed ne ullam quidem scædiorem amentiam, magisque cum ipsa nostri naturæ & utilitate pugnantem, quam ita esse affectos, ut nobis tantum, veluti si soli in Tellure simus, studeamus, amemusque esse etiam cum totius humani generis perversione. Sed videtur, inquiunt, a nostra utilitate tota ea proficisci virtus; quo fit, ajunt, ut ne virtus quidem sit. Quasi vero velle & studere quisquam possit, ut alter sit, qui non modo nolit, sed ne sentiat quidem se esse! Itaque ita isti disputant, ut aut

omnem

omnem omnino ab homine extirpatam virtutem velint, aut eo impudentes regrediantur, ut agnoscant, nullam esse posse non modo humanam, sed nec divinitus inditam, quæ a suæ felicitatis cura sit sejuncta: nam ex in primis, quibus divinitus ornatur, virtutes, ad nostri, eamque veram felicitatem promerendam nobis præcipue traduntur. Nullius autem virtutis hominem capacem dicere, nescio utrum sit toti hominum historiæ adversari: impium certe est, & ad omnem Dei beneficentiam & providentiam tollendam comparatum. Quare concludamus hoc nunc, homines ad hanc virtutem, etiamsi ad id nulla nec divina, nec humana lege adigantur, a sua ipsorum conscientia impelli, esseque non modo impios & scelestos, qui contra, quam natura poscit, adnituntur, sed prorsus amentes. Præterea & illud animadvertamus, virtutem cum natura congruere semper, idest eam perficere, & ad finem, quo tota tendit, ducere, eorumque, quæ huic repugnent, accessione fieri pejorem.

Alter autem item cuique animanti insitus, quique non magis, quam prior ille, ab eo separari potest, impetus; est, ut bene sint, idest sine dolore, sine agritudine. Postquam animans, ejusque vita in tuto posita est, nihil natura ipsa magis aversatur, nihil metuit horretque magis, quam dolorem, aut quia non naturæ consentientem, aut genus ejus destruentem, aut potius quia naturæ vox quadam est, qua admoneatur, se iis agitari causis, quæ ei interitum afferre possint. Philosophi in primis docti & acuti hinc animantium inflexiones omnes repetunt, ut eo se scilicet semper inclinent, quo dolor & agritudo fert: quod totus dolor, ut subtiliores alii disputant, nihil esse aliud revera videatur, quam voluntas ab eo statu aversa, in quo non secundum naturam sumus. Est quidem hic alter naturæ animalis appetitus priori illo posterior, ut ei tum demum locus sit, quum ille, ut dixi, in tuto est: sed est tamen cum illo copulatus, & eousque tota natura persusus, ut non minus quam ille sit necessarius. Hinc fit, ut naturalis sit minimeque liber doloris metus, horror, aversatio: tum ut qua vi maxima rapimur in vitam conservandam, eadem feramur ad adversandos dolores, nec eis cedamus, nisi quum vitæ conser-

servanda necessarios arbitramur. Itaque & secundum naturam est, sine dolore esse; & virtus item maxima ac naturæ pulcherrime consentiens, adlaborare, ut tum nos, tum alii, quibuscum communem habemus naturam, sine dolore simus. Atque ut nulli sunt de genere humano magis promerentes, majoribusque laudibus digni, quam qui ea in re ingenium dotesque suas intendunt omnes, ut minor sit (nam ut ne ulli sint, quoniam fieri nequit, ne expeti quidem debet) inter homines laborum & dolorum copia; ita nulli magis execrabiles, quam ii, qui in id se esse natos sibi persuasere, ut omnibus modis, laboribus, ærumnis, non necessariis molestiis vitæ humanæ tranquillitatem perturbent: dicam etiam nulli magis stulti, quando res humanæ ita junctæ copulataque sunt, ut nos doceant, hominum fuisse neminem, qui alios miseros efficere voluerit, quin se se fecerit miserrimum. Nam ita natura, ac sapienter, constitutum est, ut in tota rerum universitate nulla sit, quæ homini aut majorem miseriam creare possit, quam homo, si adversetur; aut majorem felicitatem, si suis omnibus partibus alter cum altero conspiret amice. Quamobrem quum duo sint fontes, unde hominum dolores & ægritudines promanant, natura, & hominis ipsius ingenium; facile est advertere, ubi homines hominibus amice copulentur. & mentis corporisque vires jungant, hos quidem, qui plures sunt & majores, omnes determinari: illos vero non modo in pauciores conferri, sed imminui plurimum, esseque non tantum minus tolerabiles, sed quandoque etiam optabiles, quo aut natura virgule constantius adhereamus, aut ne assidue perceptæ voluptates minus delectent: nam sunt naturales voluptates fere semper naturalis doloris consequentes, eoque gratiores, quo illi arriores. Quare & hæc virtus secundum naturam est, ut qui bene esse velit, ipseque sine dolore, & ægritudine, non solum nulli injustum dolorem inferat, sed aut natos, aut illatos auferat, si possit; sin minus, levet & demulceat. Quid quod eo vel nec cogitantes a natura rapimur? Nam omnes ad alterius miseriam misericordia commovemur. Quumque affectus sint quasi naturæ vectes, quibus, ut paullo post dicemus, naturales propensiones sustinentur, ac in natura defensionem

armantur ; nihil esse potest magis perspicuum , quam a natura ipsa nos incitari , non solum ut ne quempiam laudamus (quantula enim id virtutis portio est ?) , sed ut pro virili parte alii aliis opitulemur , quæ nobis hunc omnium pulcherrimum indidit & amoris & commiserationis affectum . Quare ego non tam naturam (divina suffultam ope) quam perversam hominum voluntatem sepe accusare soleo , quæ , quod nobis a Deo tribuitur , aut revellere conatur , ne ullo modo sit ; aut comprimere , quominus in nostri felicitatem exseratur ; aut corrumpere , quo in nostram convertatur perniciem . Qua de re ego te differentem audire malim , mi VIVIANE , quam quidquam dicere , quod Tu pro penitissima , qua harum rerum notitia polles , minus probes . Dicam tamen ut possum . Qui nihil reliqui efficimus , quo naturam pravis studiis perversaque voluntate aut comprimamus , ne , quo tendit , perducatur ; aut corrumpamus , ut alio trahatur ; non solum injuria , sed inscitissime & stultissime de ejus malignitate conquerimur , atque eo tandem evadimus , ut aut inique existimemus , nullo modo per hanc licere esse bonos , quo vitiis & sceleribus nostris , qui honesti esse nolimus , honestas , si diis placet , causas pretendamus ; aut impie suspicemur , non a Deo curæ felicitatem nostram , esse miseriam . Qui si rogemur , qui alios , quum nostra interest , esse velimus justos & bonos , quum tota , ut prædicamus , rerum natura prohibeantur ; animadvertere possumus , nos esse mendacissimos , quum contra quam communi nature sensu persentiscimus , adversus Dei bonitatem disputamus , nec tam esse pravos , quam esse velle , futururos optimos , si quantum in vitiis opere locamus , tantum poneremus in natura , (quæ Adamitica quidem labe obstipa , divinitus tamen , ac altera magnificeque evehitur) ad virtutem flectenda ; eaque , ut dixi , qua par est credere , pollere omnes , Dei ope : quam & precari jus fasque est , & , ut poetæ ipsi ajunt , a Deo esse preces agnoscere (a) ; & animum erectum liberumque in pectore gerere , nec ejusmodi , quas tantopere facimus , tellu-

(a) Vide Plat. VII. de Legib. pag. 632. Fic.

luris bonis adscriptum mancipatumque : nam , ut divinitus ait Homerus , dimidium mentis iis aufert Jupiter , qui servili sunt animo (a) .

Jam tertia totius naturæ animalis communis & naturalis propensio est ea , qua ad suum genus conservandum impelluntur , qua quidquid in terra gignitur , aliturque , ita pervadi & animari videtur , ut , quæcumque sit , non modo animantes , sed stirpes & plantas agitet , quarum rerum nulla est , quæ ubi ad præfinitum sibi a natura tempus pervenit , non invitari se & allici ad sibi similem procreandam non sentiat , tantoque impetu animantes inflammet conciterque , ut impedita furere faciat , compressa extabescere . Sine qua quid esset , nisi deserta & horrida Tellus ? Ut intelligere possimus , tantos naturæ genitricis motus , tam multarum rerum atque tantarum ordines , in quibus nihil unquam tam immensa vetustas mentita est , ab aliqua mente infinitæ intelligentiæ & providentiæ gubernari . Nam seu dicas , esse vim aliquam vitalem & animantem per omnem mundum permanentem , seu anima sui generis singulas mundi res animari & cieri ; quum videas omnium in tanta generationum vicissitudine constantiam , statuas necesse est , præesse mundo Numen præstantissimæ Mentis , a quo hæc fiant & conserventur . Itaque Zeno ~~animantem esse mundum~~ concludebat hac e re nostra nata similitudine . Si ex oliva modulante canentes tibiæ nascerentur , num dubitares , quin esset in oliva tibicinis quædam scientia ? Quid si Platani fidiculas ferant numerose sonantes ? Item scilicet censeris in Platanis inesse musicam . Cur igitur mundus non animans sapiensque judicetur , quum ex se procreet animantes atque sapientes ? Ac recte ille quidem , si vim hanc mundum animantem , atque numerose progredientem , & gignentem , non ipsam per se & natura sua constare , sed ab ejus architectrice & Moderatrice Mente , cujus & sequitur leges , inditam persusu-

(a) Ημεῖς γὰρ τε οὐκ ἀπαμειβόμεθα εὐρυοπῇ Ζεὺς .

Ἀνδρῶν , οἷς αὖτε δουλίον κηρὸν ἔλυσσι .

Quod etsi aliorum dictum , & in his præcipue valet , qui omnium foedissimam hanc corporibus servitutem serviunt .

fusamque, quemadmodum par erat, censuisset. Nam ut est per se perspicuum, nihil horum sine ratione, modoque fieri; ita tantæ mentis vestigia, in rebus præsertim corporeis & brutis, non intrinsecus & a natura sua proficisci, sed a Deo toti rerum universitati præsidente, dubitare non possumus. Sed cœpi secus agere, atque initio constitueram: suscepi enim Tibi, mi VIVIANE, instituti operis rationem reddere, a quo sæpe me pietatis causa longius rapit. Quanquam qui ego id a re nostra alienum esse dico? A Deo enim tota hominis institutio inchoanda est, ejusque numine & vi perficienda. Quod ergo ad eam propensionem, de qua disseruimus, spectat, Tu non dubitas, quin vehementissima ea sit, ac secundum priores illas duas vis maxima. Sed ei locus non est, nisi quum duæ illæ in tuto sunt: itaque ne persentitur quidem, quum aut de vita periclitatur animans, aut magno aliquo dolore angitur. Quum vita in tuto est, nullusque premit dolor, nulla agritudo, si quempiam corripiat, maxima agit vi, quousque aut priores illæ non obstitierint, aut ipsæ per se illam quasi e regione irrumperentes, aut inde deductæ rationes, non compresserint. Quæ si omniæ desint, inania puta cetera impedimenta, nec alio habe loco, quam quo araneorum telas majora habent animantia. Quin eo evadit aliquando roboris & furoris, ut nec mortis metu, nec incredibilibus cruciatibus queat coerceri. Quæ ex re illud animadvertere possimus, esse insitas hujusmodi naturæ (animali vires & propensiones adeo non solum pervicaces, sed brutas, quum frænum ruperint, ut nulla nec vi, nec arte cohiberi possint, totamque humanam vitam perturbent. Ex quo fit illud, ut magnæ sit quum privata, tum publicæ præsertim generis humani utilitatis modum illis imponere. Quod quum item virtute fiat, quantopere sit virtus ad bene beateque vivendum necessaria, quamque mature ea informandi homines, qua educatione, qua legibus, nemo est, qui ipse per se non intelligat. Sed ea de re deinceps.

Duæ, quæ sunt reliquæ hominum naturales propensiones, ita humanæ naturæ sunt propriæ, ut nullam in illis bruta animantia partem habere videantur; quarum
al-

altera est felicitatis, idest maximæ voluptatis appetitus, altera gloriæ cupiditas, qua omni ope inter ceteros nostri generis eminere, ac distinguere nitimur. Nam pecorum natura præteriti immemor, absentium incuriosa, futuri improvida, præsentis tantum indigentia ac dolore commoveatur, nec aut veterum memoria titillatur, aut incenditur absentium libidine, aut futuri metu, vel spe concitatur. Itaque sic nature congruenter vivunt, ut nec intendendo præsentia dolorem augere norint, nec aut imaginatione absentium, aut novarum meditatione voluptatum præsentibus turbare, atque in voluptatis ipsius fruitione majorum desiderio excruciiari. Igitur ubi nec corpus agrum est, nec quidquam periculi imminet, nec aut venter, aut venus exstimulat, humi resoluta, mollioris strati ignara, eoque minus anxiosa, non solum pacata & quieta sunt, sed otiosa & somnolenta, ut nulla sit inter ea ex superfluis invidentia, nullum odium, nulla contentio, nulla bellatitia, nec quiescere patientia, misere afficiant, atque in mutuam perniciem armant. Itaque nos, nature propensionibus abutentes, ac alio inflectentes, quam quo natura tendunt, ne in summis quidem voluptatibus plene unquam nobis satisfacimus: pervigil enim animus aut præteritis revocat, aut novas semper ~~invenit~~ ~~invenit~~ ~~invenit~~ præsentibus minus tangitur, quo majores & jucundiores, quibus caret, sibi confingit. Summam hic appetit, eam nempe, qua ita tunc occupatur natura, ut nihil reliquum aut metui, aut appetitui faciat; nec animadvertit, eo in loco positum, ubi si fuerit adeptus, totus repente otiosus, atque iners sit. necesse est, qui nullo ad quidquam præterea agendum calcari prematur. Inde aut invidia marescit, aut odio furit, nihilque est nec tam difficile & arduum, nec tam sanctum, quo ejus reprimi cupiditas possit. Jam bruta animantia ut nihil supra singularem naturam noverunt, ita nec gloriæ, nec imperii sunt cupida. Quare nec ob ingenium, nec ob vires ulla est inter ea eminentiæ ambitio, quæ homines, cetera futuros contentos, noctu diuque vexat ac urit, non quieturos, nisi humana divinaque omnia commiscuerint, ruinis simillimos, quæ super id, quæ oppressere, franguntur.

Adeon miserrima est ambitio, honorumque contentio? Qui, inquis, hæc cum superiori oratione congruunt? Videris, inquis, naturæ malignitatem, quo penitius retegis, accusare, eoque homines a virtute, quam supra defendendam suscepisti, absterre, quos virtutem cum tantis naturæ vitiis adipisci unquam posse, quis sibi persuaserit? nempe mirifice consentiunt, mi VIVIANE, nec ego a consecranda ac consequenda virtute ullos animum idcirco despondere velim, quod hominum vitia, in quæ incaute trahi nos sinimus, tam studiose depingam: non tam enim naturæ, quam voluntatis ea sunt; quia sunt illæ propensiones humanæ naturæ pernecessariæ, quando constat sine iis vix esse in nobis reliqui, quo brutis præcellamus; ut si iis homines doctè prudenterque uti sciverint, idest intra modum suum continere, esse possunt illi in eo ipso boni & beati, quo se malos & miseros fieri arbitrantur. Nam principio, nisi felicitatis, seu summæ undequaque perfectæ & securæ voluptatis amore tangerentur, præsentis statu contenti, eique, ut ostræ scopulis, affixi, humi proni & ventri obedientes vivant. Quumque natura imbecilli, nudi, omnium indigi, & ignari, segreges denique, nec nisi solis parentibus, ut belluæ, conjuncti, procreentur; nihil invenire, nihil melius commodiusque efficere, nihil nec arte, nec industria perpolire, nihil postremo, nisi perpetuo pecudes esse, nec scient, nec studebunt, tum ne a Telluris quidem consortio, non magis quam stipites, separare se, & æterna consecrari bona unquam poterunt, ad quæ illo felicitatis amore incenduntur, ac rapiuntur. Itaque & hic miseri sint cesse fuerit, & nunquam ejus, qua superi perfruuntur, quæque unice plena & vera est, beatitudinis participes. Porro honorum illa & gloriæ cupiditas, qua ne barbari quidem & immanes homines vacui sunt, effusas olim Tellure gentes ac solivagas cœgit, ut inter se coirent, civitates, jura, ordines, imperia conderent; quorum si quis extrinsecus accersita hominum improbitate vitia accusare velit, is per me accuset; sunt enim quedam & gravia: sed insitam utilitatem & præstantiam ego defendi semper, & defendam. Nam quæ est hominum vitæ, quos nec civitas mansuesfacit, nec ordines jungunt,

nec jura & imperia coercerent? Quare omnia, quæ sunt a perturbata beatitudinis & gloriæ cupiditate mala, quæ sunt certe maxima & gravissima, prava hominum induxit libido; libidinem autem ignorantia & imperitia: hanc neglecta ingenii & nature cultura. Itaque in his omnibus multa est voluntatum nostrarum malignitas, nulla nature. Malignitatem autem dico, mi VIVIANE, non defectum: nam veteri labe multis haud dubium deficiamus. Sed ut nos in omnem vitæ pravitatem sceditatemque ipsa per se impellat natura, cui nulla ope, ne divina quidem, repugnare valeamus, quam nulla arte regere, utque idcirco, quod est malignitatis, ad miseriam geniti esse videamur, in quo isti naturam (a) criminantur, quæ sua honestiora vitia esse videantur; id ego non modo impium, sed stultum quoque esse ajo.

Sed ut hæc sint, inquiunt, magni certe sunt & perpetui naturæ nostræ accusatores affectus, quos nec avellere possumus, nisi naturam radicitus extirpemus; nec ullo modo coercere, quando constat eos natura ipsa ex opinatis bonis vel malis contra omnem rationem erumpere; & si his obsecundare voluerimus, ne nos stylii fuerimus, qui ei rei modum ponere velimus, suapte natura infinitatem spectat, quæque minus coercita perpetua adolescit. Quum autem maxima ~~non minus~~ pars aut a more, aut odio, aut spe, aut metu, aut cupiditate, aut aliis animi perturbationibus magis, quam ratione regatur, ac in id non libertatis imperio feratur, sed naturæ ipsius vi ac in ~~in~~ ~~in~~ fateamur necesse est; naturam in nobis peccare, non rationem aut voluntatem. Quid, inquiunt, quod non fieri quidem potest, ut quum imperfecta & manca in nobis sit ratio, perfecta esse natura intelligatur? Nam nostra omnis vis & natura in animo & corpore sita est, animi vero in ratione & imperio: at quum hæc depravata sint, necesse est ipsa sit corrupta & depravata natura. Sed quam imperite hæc disputant! Nam nul-

Tom. IV. B la

(a) Hic naturam id dico, quod Græci *ἡγεμονία*, Scholæ substantiam: nam *ἡγεμονία* perpetuo naturam vertit Cicero. Qui autem non voluntatem, sed substantiam in nobis peccare ajunt, eos Manichæos decernit esse Augustinus, ac reliqui veteres theologi.

la est totius humanæ naturæ pars (veterum Philosopho-
rum descriptionem sequamur) tam structa sapienter, quam
hæc rationis expers, in qua isti ponunt motus turbidos
tum iræ, tum cupiditatis, contrarios, ut ajunt, inimi-
cosque rationi; id quod ego alio quidem in loco de-
monstravi; sed hic paucis retractabo. Quum homo totius
universi pars una sit, cum toto suo congruat oportet, quo-
niam est illud tum in tota sui immensitate, tum in sin-
gulis partibus ordinatissimæ rationis & discipline. Quare
finite vis & naturæ esse debet: nam quod undequaque
infinite est, & absolutum, ipsum per se unum & to-
tum est, nec ullius alterius rei pars esse potest. Ita fit
ut nequeat ipse ad plenam beatitudinem sibi esse suffi-
ciens. Ergo ut perfici, & beari, ita deterior, quam na-
tura est, & infelicior extrinsecus fieri potest. Ex quo fit
ut & cupiditatis, & iræ, ac metus particeps esse de-
beat, sine quibus nihil extrinsecus sequetur unquam, ni-
hil refugiet, aversabiturque. Necessarium igitur est, ut
hominis natura ex opinatis bonis, & ex opinatis malis
agitetur, quo se ita componat, ut cum ceteris universi
partibus harmonice consentiat, qua ex aqualibritate ma-
gna ejus existit. ita tranquillitas & beatitudo. Agite-
tur autem, non leviter titilletur: neque enim nisi vehe-
mens commotio, in se ire potest, ut naturalem quam-
dam corporis segnitiam, & quasi pondus superare possi-
mus, easque capere stationes, ac tueri fortiter, quæ no-
bis conservandis, & perficiendis ap. e sint. Has com-
motiones affectus appellavimus. Quamobrem. Et sunt
appetitus vehementiores, quibus aut res natura nostra
consentaneas alacres consecemur, aut perniciosissimæ adver-
sas fugiamus. Itaque Stoici, qui mihi videntur in hac
questionē versari acutissime, partes affectuum volunt ex
duobus opinatis bonis nasci, & ex duobus opinatis malis:
ita esse quatuor: ex bonis cupiditatem, & letitiam; ut
sit letitia præsentium bonorum, cupiditas futurorum: ex
malis metum, & ægritudinem nasci censent: metum fu-
turis, ægritudinem præsentibus: quæ enim venientia me-
tiuntur, eadem afficiunt ægritudine instantia. Letitia
autem & cupiditas in bonorum opinione versantur, quum
cupiditas ad id, quod videtur bonum, illecta & inflam-
ma-

mata rapiatur : lætitia ut adepta jam aliquid concupitum, efferatur & gestiat . Sed singulis affectibus partes ejusdem generis plures subjiciuntur, quas ego enumerandas hoc in loco non suscepi . Sunt igitur affectus naturæ quidam stimuli, & , ut ita dicam, machinæ morales rectes, quos qui auferat, totam ille homini vim, qua quum est usus, agamus aliquid, aut fugiamus, abstulerit, eumque trunco, aut crudo lateri similiorē, quam animantem, effecerit . Quare in eo Stoicorum solitum acumen & judicium desideraverim, quod illi hæc sola ratione sine ulla perturbatione, idest sine ulla naturæ animalis commotione, ac constanter prudenterque fieri posse opinantur : ex quo illud efficiunt, nec necessarios esse hujusmodi in homine motus aversos, ut illi putant, a ratione ; & naturæ esse morbos, qui in sapiente, qui cuncta ex ratione placide atque constanter agere debet, locum habere non debeant . Nam ratio si nihil naturæ nostræ cupit aut metuit, tranquilla est & placida, seque contenta, ut contra rationem sit, ullum eo tempore in nobis ciere motum : quum ergo nos concitat, cupit profecto aliquid, aut metuit : cupit autem quod deest bonum, metuit quod providet malum . Qui autem aut illud cupiat, aut hoc metuat, nisi persentiscat ? ~~non enim per se sentiscit~~ est, nisi a natura moneatur . At natura irritatione toquitur, quæ sine affectu esse nequit . Ita fit, ut affectus sint veluti voces quædam naturæ aliquo deficientis, vel quidquam sibi metuentis, sine quibus ratio nequeat in nostris substantiis excitari . Porro semel irritatione excitata non quiescit, nisi quieta & tuta natura . Qua vero voce id significaret rationi natura, nisi voluptate & lætitia ? ergo & hanc quoque sentiamus necesse est . Quod si homini naturam doloris & voluptatis patientem nemo denegare potest, quin & rationis usum omnem auferat ; consequentes vero sint doloris & voluptatis affectus ; efficitur ut affectibus exstimulari debeat humana natura, quo ratio nobis utilis esse possit (a) . Itaque in tota ea disputatione labuntur Stoici .

B 2

Ita

(a) Quare theologorum nemo dubitavit unquam utrumque & in innocente Adamo fuisse appetitum, concupiscibilem, & irascibilem . Non affectus intulit peccatum, aut naturam affectuum patientem, sed imperium abstulit, fecitque, ut falsis perturbaremur.

Ita ne tu, inquis, disputas, quasi nunquam extra virgulam turbidi, inconstantes, aversi denique ab omni ratione prosiliant affectus? Non id ego dico, mi VIVIANE: prosiliunt enimvero ii in Adæ filiis, neque in eo quod omnes patimur, Stoicorum oratione egemus. Sed constituamus hoc in loco id, quod ad Dei erga nos benignitatem adserendam in primis est necessarium, non ita nos procreasse, ut mali & scelerati necessario essemus, nec esse affectus a naturæ humanæ malignitate, sed esse ei necessarios, esseque quasi vectes, quibus aut sustineatur fortiter adversus ea, quibus destrui potest, vel a fine suo revocetur; aut, quum est opus, agatur vehementer ad ea prosequenda, sine quibus aut non esse possit, aut non bene beateque; ac deinceps inquiramus in id diligenter, qua re fiat, ut tantæ sint in maxima hominum parte, ac tam stultæ, & a natura ipsa descipientes affectuum perturbationes. Quod nisi fecerimus, ne illud quidem intelligi poterit, quibus regulis, quave arte ad naturam possint affectus componi: neque enim tales sunt, qui nullo modo infruari possint, quum multi vehementes sæpe cohibeant, quæ admodum ex tota constat hominum historia, nec raro ipsi impotentissimos experti & moderati ~~esse videntur~~, quid illos tam sæpe a natura aversos efficiat, quidque curatu, aut factu sit opus, ut ad rationem exigantur, neque plebejam Terentiani Parmenonis disciplinam vereamur,

..... quæ res in se neque consilium, neque modum

Habet ullum, eam consilio regere non potes.

..... Incerta hæc si tu postules

Ratione certa facere, nihilo plus agas,

Quam si des operam, ut cum ratione insanias.

Nam quid ille stultus, si ita se res haberet, memento Phadriam enecaret,

Proin tu, dum est tempus, etiam atque etiam cogita?

Superius demonstravimus, affectus esse nobis a natura tributos, quo ita iis compozeremur, ut cum rebus, quibus circumdamur, pulchre consentiremus, quæ ex harmonia vitæ nostræ fieret tranquillitas & felicitas: ei quoque

que ut prospiceret & ratio est concessa . Itaque fit , ut
tum affectus cum ratione consentiant , quum natura na-
turaque auctori præpotenti congruunt , idest quum & ex
veris bonis , aut malis nascuntur , & iis æquales sunt,
& consentanei . Ab ea regula quum exorbitant , tum per-
turbationes sunt , non solum non utiles , sed plurimum
noxia : nam quoniam aut nullæ sunt extra nos res , &
quibus proficiscantur , aut iis non congruunt ; ex falsa
honorum aut malorum opinione excitantur : falsis vero ma-
lis natura nostra inutiliter afflicta , nec falsis bonis
perficitur . Duabus igitur ex causis affectus falsi esse pos-
sunt ac pravi , aut quia ex confictis bonis vel malis pro-
gignuntur ; aut quia veris minime pares , ut quum aut
id , quod nusquam gentium est , cupio , vel metuo ; aut
quod est , magis aut minus vehementer cupio , metuere ,
quam id cupere , aut metuere par est . Utrumque item
ex triplici fit causa , ignoratione , errore , difficultate : hæc
vero ex negligentia , & prava educatione intenduntur .
Nam qui & studiosi sunt earum rerum , sine quarum
cognitione nemo bene vivere potest , & rite ac sapienter
educati , ii & recte uti sciunt , nec facile decipiuntur ;
quia quum aliquid ignorant (nihil enim ignorare supra
hominis conditionem est) , judicium actionemque colligere
atque mature deliberare didicerant , ac ^{hi} ubi statim sa-
cto est opus , eam viam rationemque sectari , quæ simi-
lior vero esse videtur . Postremo si de recta labantur ,
quum initarum a se rationum pœnitere se nequeant , non
valde ~~stulti~~ , ut stulti , sese afflictabunt , quin sapientiores
suo periculo facti , gaudebunt etiam . Huc ergo ego regu-
las omnes affectus secundum naturam ad civilem hanc
felicitatem regendi confero , ut & addiscamus , quæ ve-
re sint res ea , quibus circumdamur , quibusque utendum
est perpetuo , ac quatenus nobis bonæ vel malæ ; & ut
a primis vite nostre annis assuescamus iis vivere consen-
taneæ ; quarum regularum prior mentis , altera animi vir-
tutem continet . Qua ex re illud efficitur , ut , quod sæpe
diximus , bene beateque vivere nonnisi cum virtute possi-
mus . Quumque & illa rerum cognitio comprehensioque ,
& hic rebus apte convenienterque vivendi habitus , studio
& disciplina pluribus contigerit , illud quoque velim in-

telligatur, non ita nos esse procreatos, ut virtutis hujus capaces esse nequeamus. Sed quoniam ab illa cognitione rerum, earumque nobiscum consensione, aut pugna, est praeclara vitae disciplina inchoanda, quæ si falsa fuerit, aut prava, depravatus sit animus necesse est, ut ex penitissima philosophia Terentianus Simo dixisse videatur, mala mens, malus animus; videamus quæ sint illius præcipua præcepta, quibus necessaria nobis ad beate in Civitate vivendum virtus continetur, atque, si Dei favor afflaverit, gigni & perfici in nobis potest virtus altera divina, divinæque felicitatis appetens.

Sed illud omnium primum accuratius perquiramus, subesse ne possint mentis imperio & regimini quum illæ propensiones, tum affectus isti & perturbationes? Id nisi constet, frustranea erit opera omnis, quæ in iis moderandis, & ad certam rationem inflectendis ponitur. Possunt autem in eo tria considerari: primum ut ne persentiantur; tum ut ne erumpant, quum necessarium non est; tandem ut loco, tempori, rebus denique, a quibus inflammantur, consentiant. Eorum primum omnino fieri nequit admotis animo rebus, præsertim in primis illis propensionibus: nam sunt, ut diximus, cum natura ipsa animali commixtæ, ac ita necessariae, ut nec esse, nec concipi sine natura possint. Scilicet quum finita sit animantium natura omnis, nec ipsa per se esse & conservari possit, necesse est indigeat, quo sit, rebus omnibus, quibus circumdamur, atque ab iis interitum timeat, si adversentur. Itaque ut ne ex eorum circumfusione amore & desiderio, aut timore & ægritudine afficiatur, non magis fieri potest, quam ut ne sit naturæ totius pars una, aut ut non sentiat, quod sentit. Quare in eo non magis adlaborandum est, quam ut ne agitabilis sit ignis, cujus in eo motu ac concitatione tota est posita natura. Duo reliqua fieri obtinerique posse, ii dubitabunt, qui sibi penitus sunt ignoti. Sed & ratio id confirmat. Namque nec erumpunt unquam, quum non est usus; nec a rerum natura discordant, nec longius, quam necessarium est, prætergrediuntur, nisi aut ignoracione, aut errore, aut quum primus ille fervor concitacione animi inveteraverit, & tanquam in venis medullisque insederit; quæ

quoniam cavere possumus, si sapimus; rationis profecto regimini & imperio subjiciuntur. Idem tota nos docet hominum historia, quæ frequentia ejus, quod dico, suppeditat exempla, eorum, qui & naturales propensiones intra positum iis a natura modum continuerunt, & cupiditati, iræ, metui, sæpe etiam cum vehementissime concitarentur, moderati sunt. Sed suppeditat sapientum, ut id quod superius animadvertimus, intelligere possimus, præclare a Stoicis dictum, omnium perturbationum (quo nomine intelligunt aversas a recta ratione, contra naturam, animi commotiones) fontem esse intemperantiam, quæ est a tota mente, & a recta ratione defectio, sic averfa a præscriptione rationis, ut nullo modo appetitiones animi nec regi, nec contineri queant. Quemadmodum igitur temperantia, quæ aut sapientia est, aut ab ea efficitur, sedat appetitiones, & efficit, ut eæ rectæ rationi pareant, conservatque considerata judicia mentis: sic huic contraria & inimica intemperantia, quæ est ab inscitia & pravo habitu, omnem animi statum inflamat, conturbat, incitat. Itaque & non necessarie agri-tudines, & vani metus, & superflue cupiditates, & reliquæ stultæ perturbationes omnes signuntur ex ea. Quemadmodum quum sanguis corruptus est, aut pituita redundat, aut bilis, in corpore hi ~~corrupti~~ ~~hi~~ ~~corrupti~~ ~~hi~~ ~~corrupti~~ nascuntur; sic pravarum opinionum conturbatio, & ipsarum inter se repugnantia, sanitate primum spoliatur animi morbisque perturbat; deinde non adhibita continuo ratione, quæ sanat, permanat in venas, & inheret in visceribus illud malum, existitque vitium, quod avelli inveteratum non potest, quodque totam deinceps vitam sædit, & infelicitat.

Porro hæc temperantia duabus a causis efficitur, rerum, ut dixi, cognitione & comprehensione, & vita secun-gum eam tempestive acta. In hoc prudens educatio, & præcox totius honestatis studium adhibendum; illud nostri, universi, Dei investigatione continetur. Nostri cognitio in eo præcipue elucere debet, ut quid in nobis sit necessarium, quantaque sit nature nostræ indigentia intelligamus, quo ei congruenter vivere possimus, ut scilicet nec valde turbemur iis, quæ præcaveri nequeunt, nec

careamus necessariis, nec superfluis luxuriemur. Nam & inutiliter iis nimium agitamus, quæ evitari nequeunt; & defectu non necessariorum stulte dolemus; & rerum superfluitate aut inutili cura angimur, aut pondere opprimimur, aut e nobis quasi egressi petulantissime divagamur, incerti quo quieturi. Qua si cognitione omnes peræque ac necessarium est, præditi essemus, essetque illa perpetua meditatione in naturam ipsam conversa, putas tu, mi VIVIANE, aut ambitione nos contabescere posse, aut avaritia excruciarī, aut ulla superflui libidine totos concitari? Putas aut otio, quum labore est opus, posse emarcescere, aut stulta necessariarum rerum effusione nos perditum ire? Sed nec senectus ipsa & mors denique admodum timebitur, quum in id nos esse genitos animadverterimus. Universi vero scientia paranda in id, ut & quæ vere sint, & quantum quaquæ res bonæ sint, vel male, addiscamus; ut nec quæ nusquam gentium sunt, cupiamus, metuanusve, nec plus, aut minus, quam cupisci, metuive merentur. Cujus scientiæ defectu quot stulte se affligere videmus? Itaque eos ridemus, ac jure quidem & merito, qui capripedes Paniscos metuerint: qui porros magnâ religione coluerint: qui Lunæ, vel Solis defectu, velut emortuorum, misere ejulaverint: qui si muros, soleas convolsunt, expaverint: qui avium garrum aut volatu non privatas tantum res, sed ipsas in primis publicas regendas crediderint: qui si aut Sol alter in Cælo emicuerit, aut Cometes apparuerit, aut Septemtriones visi fuerint ardere, aut quidpiam aliud, quod natura fit, fuerint conspicati, toti exanimati contremuerint. Jam Dei, idest supremi naturæ totius artificis & moderatoris, cognitio, ad eam, de qua differimus, temperantiam in nobis procreandam, alendamque, prima est, ac præcipue necessaria, ut nempe sciamus & eum esse, & infinitæ esse intelligentiæ, potentiæ, bonitatis, & ab eo rerum universitatem effectam esse, & sapientissime procurari, nosque ita progenitos, non ut brevi tantum præsentis vitæ curriculo spem omnem vel metum concluderemus, sed ut nunquam interituri aternitatem spectaremus: qua cognitione qui destituuntur, spem omnem metumque intra præsentis vitæ ambitum coercentes, in prosperis quidem

dem rebus toti disfluunt, ac dissipantur; in adversis vero ægritudine & dolore enecantur; utrisque nempe per-eunt miserrime, nec illud præclarum totius vitæ guber-naculum adhibere sciunt, quod Flaccus noster elegan-ter ait,

Sperat infaustis, metuit secundis

Bene præparatum pectus.

Quare ego nihil æque necessarium ad bene beateque vel in presenti vita vivendum esse censeo, quam rite & præclare cum Deo agere; quin ita mihi persuasi, atque ex veteri, aut peregrina historia didicisse arbitror, ne cum hominibus quidem honeste & sapienter eum victurum, qui hominum illum parentem & gubernatorem aut ignoret, aut non, ut par est, tota mente ac animo complectatur, atque ex divinis formulis veneretur.

Hæc, quæ disputata sunt, eo pertinent, ut eos, qui a rerum natura in nobis dolores & perturbationes sæpe progignuntur, aut caveamus, aut, ubi id fieri omnino nequit, in minorem, quoad fieri potest, numerum conseramus, eosque fortiter ferendo extenuemus, quo bene ac beate vivamus. Sed restant infinita pene dixerim mala, quæ non a Natura, sed homini sunt ab homine. Nam non a natura, sed a voluntate est humana, ut mentiamur, circumscribamus alii alios, dolis atque insidiis decipiamus, & spoliemus, ~~id est, ut cum hominibus~~ perpetuo bello simus, & afflictemus: ut ineptissimas etiam causas sumamus, quibus ferociamus, immanes simul-tates & inimicitias geramus, conseramus inter nos bel-las, expugnemus atque evertamus civitates: ut hominum macella, & amphitheatra nobis constituamus, loca sangui-nis & publicæ impietatis, ubi mandi homines cernamus jucundissime, & bestiarum laniatibus dissipari. Brevi, insidia, fraudes, doli, avaritia, rapina, vis, scelus, audacia, obscœnitas, turpitude, flagitium, mala omnia cetera, quæ toto in orbe homines mente noxia pariunt, homini sunt ab homine. Est quisquam, qui in his, ubi nulla etiam sint alia a natura mala, beate esse & vi-vere possit? Quare viro, qui ex recta ratione, non aut ex sensu, aut ex imaginatione felicitatem suam metiatur & sequatur, in eo operam ponere debet præcipuam, ut hæc,

hæc, quod ad se spectat, nulla sint. Id iustitia & amicitia procuratur; quarum altera efficit, ut neminem lædamus, suumque jus integrum cuique esse sinamus; altera, ut quocumque modo possimus, aut consolando, aut consilio, aut re, ut Terentianus Menedemus ait, juvemus. Ac neminem quidem lædimus, quum nulli quidquam iniusti doloris inferimus, ut quum nihil quod ad alterius animum, corpus, famam, bona, justam spem pertinet, deterius efficere studemus: nam inde dolere homines solent. Suum vero jus cuique tribuimus, quum quod quisque aut a natura, aut ab arte sua & industria, aut quocumque modo, quo aliorum jus violatum non sit, habet, eo uti fruique sinimus, atque si læserimus, in integrum restituimus. Omnibus tandem amici sumus, si non dubitemus cum iis, quoad scimus, ac possumus, animi, corporis, fortunæ bona communicare, qua mutua aliorum cum aliis bonorum accessione fit illud in societate prope divinam, ut singuli homines tantum sciant queantque, quantum omnes conjuncti, & copulati.

Quamobrem tute ipse intelligis, mi VIVIANE, quas ego primas atque insitas naturæ rationalis leges habeam; nempe non plures, quam has duas: DEO, TIBI, RELIQUIS HOMINIBUS SUA JURA TRIBUITO: IIS ESTO AMICUS. Sed qui tandem hæc jura tribuemus? nimirum ~~quædam vix~~ nostræ rationes instituerimus, ut Dei, nostri ipsorum, aliorum juribus congruenter vivamus, quod est naturæ, ut ego interpretor, convenienter vivere, sine quo nec esse, nec bene beateque esse possumus. Ut, e. g. quoniam Deus & supremus omnium imperator est, & gubernator, & parens; imperatori serviamus, gubernatori simus obsequentissimi, patrem amemus, ac veremur necesse est, si naturæ congruenter, quod maxime nostra interest, quodque sæpe dictum est, vivere amamus. Cum quandoquidem nihil nobis natura arctius conciliat, quam nos ipsos; fit ut natura ipsa nobis amicissimi simus: amicus vero nemo sibi est, qui non ea, quorum accessione pejor fieri potest, caveat, sequaturque ea, quibus perfici; ac bene beateque esse potest. Tandem ea est nostri natura, ut nec solis nostris ac privatis bonis vivere possimus, nec, si possumus, bene ac beate possimus: ita fit

ut alii aliorum communicatione bonorum egeamus ; quæ esse nequit , nisi ita omnes comparati simus , ut non modo neminem ledere velimus , sed omnibus & esse velimus , atque simus amici . Si quis est omnium qui hæc & sæpe secum consideret , & in succum , ut dicitur , & sanguinem convertat , & secundum ea vitæ suæ rationes instituat , eum ego sapientem esse dico , eamque adeptum temperantiam , sine qua neminem esse posse beatum præclare Stoici docent .

Quibus ex rebus & illud conficitur , esse in natura ipsa regulas , quibus justum ab injusto , honestas a turpitudine secernatur . Nam quin convenienter naturæ vivere totius hominum generis felicitatem faciat , superius demonstrata ne dubitemus nos prohibent : quod vero non singulorum , sed totius hominum generis felicitati conveniens est , id suprema est totius generis humani lex ; cui propterea quod congruit , idest generis humani justum & honestum ; ut quod cum ea pugnat , injustum & turpe . Quemadmodum quum salus publica summa sit cujusque populi lex , quod decemvires Romanorum leges præclare sciscunt ; ea est quoque justæ atque injustæ , honestæ & turpis cujusque populi regula . Quare ut in privatis Civitatibus nequit vera utilitas , idest civitatis felicitas , cum honestate contendere ; ita ne potest quidem in magna totius Telluris Civitate . Itaque accepimus , Socratem jolium exsecrari eos , qui primum hæc naturæ coherrentia , opinione distraxissent . Cui quidem ita sunt Stoici assensi , ut etiam , quidquid justum & honestum esset , id utile esse censerent , nec utile quidquam , quod nec justum , nec honestum .

Nec vero Natura tantum sunt hujusmodi leges , sed divinitus , ut non utilitas modo generis humani ad eas servandas incitare nos debeat , sed in primis pietas & religio adversus Deum . Nam ita Deus totam rerum Naturam construxit , ut ea legibus immutabilibus regeretur , & contineretur . Ejus Naturæ homines portio una sunt : itaque iis naturaliter subjiciuntur . Quum autem rationis sint participes , ut & eas leges intelligere , & ad supremum Dei in tota Natura imperium referre possint ; oportet ut & libenter iis obsecundent , pareantque , ne si

aut contempserint , aut repugnaverint , perduelles sint , magnoque obnoxii supplicio .

Sed quo hæc explicemus distinctius , repetamus paullo altius , ut ita intelligamus apertius , quibus nos Naturæ legibus subditi nascamur , quibus parendum omnino est , ut & esse , & beate esse possimus . Homo & res una est totius universi , & sibi copulatum adnexumque corpus habet : idem & vegetatur , ut plantæ , & sentit vivitque , ut ceteræ animantes : jam & rationis est particeps , & generis humani pars una : postremo peculiaris alicujus Civitatis civis , aut subditus , aut imperans , aut parens , aut liber , aut alio quocumque in situ positus . Hæc , quæ re copulata sunt , cogitatione differunt , suntque ab iis secernenda , qui , quibus Naturæ legibus naturaliter homo subjiciatur , contemplantur . Nam subjicitur quidem pluribus etiam nolens : sed moralibus ut volens ipse se subjiceret oportebat . Ac quia res universi aliqua est homo , rerum legibus metaphysicis subditur naturaliter , ac volens nolens : Hæ leges ad omnes peræque pertinent res , nulla res potest simul esse & non esse : nihil esse aliud potest , quam id , quod est : nulla res ex nihilo suapte natura esse potest , aut in nihilum reverti . His igitur homo , quia res una , natura ipsa subiectus est . Jam quodcumque corporeum est , impenetrabile , indivisibile ac corruptibile , mutabile , grave , iners &c. Eæ sunt genericæ & naturales corporum leges ; quibus , quum & homo corporeus sit , est natura ipsa obnoxius . Tum plantæ nascuntur aut e seminibus , quæ augmentum extrinsecus capiunt , aut ex naturæ quibusdam archetypis & formis , quæ sese externa vi subagitata explicant , & nutriuntur , vegetanturque , & consenescent , ac postremo intereunt : aëri , igni , Naturæque elementis aliis sunt subiectæ . Sunt etiam plantarum leges : iis igitur & nos subjicimur naturaliter (a) , quatenus plantarum similes sumus . Præterea animantium omnium communes leges & a natura positæ , sunt , ut voluptatem & dolo-

rem

(a) Nam primi mortales privilegio ac gratia , non natura exempti . Quo privilegio peccando destituti , in naturam iterum redeunt ipsi per sese .

rem persentiscant , ut qua vi maxima queunt se conservent : ut coitu utriusque sexus genera propagent : amore prolis tangantur : metu , ira &c. concitentur . Ea & homines quoque rapiunt , quia animantes (a) . Postremo mentes ratiocinio omnes utuntur , antecedentia nimirum & consequentia pervident , causas & effectus internoscunt , rerum fines prospiciunt , media eligunt , deliberant , sui juris sunt &c. Sunt hæ animorum leges : at sunt homines quid aliud , nisi animi rationis participes , corporibus utentes ? ergo & animorum legibus subditi natura sunt . Sed istiusmodi homines similes natura procreantur omnes , atque ad mutuam societatem ineundam aptissimi ; ac ita ut sociati sibiique amici , felices esse omnes possint (b) ; segreges atque sibi inimici , miserrimi : iidem soli ex omnibus animantibus sentiunt , quid sit ordo , ac decus in societate ; quid omnibus utile , aut noxium , quid justum , aut injustum , honestum , aut turpe . Quæ hinc nascuntur leges , ad omnes pertinent homines , quarum summa est , totius generis humani felicitas . Ea sunt jura gentium , quæ proinde eos omnes , qui nihil a se humani alienum esse putant , sancte servare , jus fasque est . Ob eandem rem , cives peculiarium civitatum , quarum suprema lex est salus publica , cujus & necessitatem intelligunt . & causas earum Civitatum legibus ita sese subicere debent , ut legibus ejus Civitatis , quæ tota Tellure comprehenditur . Inde quoque fit , ut quorundam singulos hominum status sua jura sequuntur , sintque alia imperantis , alia subditi , alia magistratuum , alia civium , alia parentum , alia liberorum ; iis omnibus apte convenienterque vivant necesse est , ut integræ Natura (quod factu est opus , ubi bene beateque esse velint) congruenter vivant . Servabunt autem hujusmodi leges , si nihil , quod cum illis pugnat , moliantur : contra faciant ea omnia , sine quibus illæ , quod tendunt , ire nequeunt : tendunt vero , mi VIVIANE , quum ad singulorum , tum ad omnium conservationem & felicitatem

(a) Vide quæ dicta superiori adnotatione .

(b) Animalis hominis felicitatem specto , non spiritualis . Hujus ab alto est , præterque naturam . Id quanicquam dictum sæpius , tamen dicendum ad ravim , propter eos , qui male audiunt ,

tatem . Præterea ita servabunt , non quasi fato aliquo rapiuntur , sed ut qui supremo totius naturæ opifici , & moderatori pareant libentissime : nam ab illo sunt posite : ille est earum & auctor & vindex . Quas quum & didicerint accurate , & usu ipso in naturam converterint , tum illi se probe composuisse sciant , eamque adeptos , quam supra diximus , virtutem , & temperantiam , sine qua nemo non modo beatus , sed ne ullus quidem esse potest . Sed videor longius progressus , quam quod per epistolam licebat . Quare te rogo , mi VIVIANE , ut hæc etiam atque etiam tecum ipse consideres : per enim velim tibi sic persuadeas , me nullius hominis , his præsertim in rebus , iudicium pluris facere , ut si probaveris , scito me nulla re magis superbire posse : sin improbaveris , neminem esse , qui severius damnet . Ceterum cura ut valeas , & me ames , & sic habeas , te a me fraterne amari .

Neapoli anno Epocha Christiana 1752.
pridie Kalendas Septembris .

1752. Cal. Sept. 29. 1752.



DISCIPLINARUM METAPHYSICARUM

P A R S IV.

*De principiis legis naturalis, ac de officiis,
quæ inde manant.*

P R Æ F A T I O.



Principiorum legis naturæ perquisitionem ad eam Philosophiæ partem pertinere, quæ Metaphysica appellatur, constat jam inter omnes. Igitur quo pleniorē habeant tirones Philosophi hujuscemodi rerum institutionem, hunc libellum, quem ego plures ante annos in scholæ usum scripseram, velut appendicis loco disciplinis Metaphysicis addam. Brevior is quidem est, quam ut iis facere satis possit, qui paullo sunt in hac scientia versati: sed si opuscula nostra in eorum manus deveniant, ii meminerint, nos adolescentes instituendos suscepisse, non doctos: eos autem satis instituisse arbitramur, ubi primis utilium rerum rudimentis imbuerimus. Sæpe enim edixi, ac dico iterum, quum totam Philosophiam,

tum

tum hanc præsertim subtiliorem , non tam lectione , quam meditatione confici . Ac mea semper sententia fuit , obesse his in rebus plurimam lectionem , qua oneratur magis memoria , quam mens illuminatur . Quum hæc principia in societatem humanam derivanda sunt , usque comprobanda , tum vero tandem naturæ & hominum historia perdiscenda est ; id quod nec fit , nec rite fieri potest , nisi quum non ingenii tantum vires , sed in primis iudicium plurimum adoleverit . Quare fit , quod dixi , pauca , eaque electissima , facillique via & ratione , philosophari incipientibus esse proponenda , ne ingenii nativa vis , ardorque indagandi retundatur . Ea , qui profecerint , longiusque processerint & ætate & doctrina , ipsos per se augere , ornare , & in publicam utilitatem convertere oportet .

Mirabuntur autem fortasse nonnulli , quid causæ sit , cur & de natura Dei in hoc libello disseram , & ab eo jus naturale repetam : nam & de his in superioribus luculenter & copiose actum est , metuoque ne moleste ; & quosdam esse constat , qui quum jus in natura esse docere instituant , adeo sibi confidunt & naturæ , ut cum Atheis rem nullam habere velle aut debere edicant . Sed qui ita prædicant se totius rei , ad quam explicandam aggesserunt , ignaros profitentur . Nam & oportuit hanc tractationem , quam ego alia ratione & via , quam superiora , conscriberam , e suis principiis proficisci ; & nullam esse in natura jus potest , nulla esse a natura ipsa constituta iustitia , nihil natura honestum aut turpe , ubi aut Deus non est , aut rerum humanarum nullam habet procuracionem . Itaque id quum excidisset Grotio , viro alioquin erudito & perspicaci , in doctorum omnium virorum reprehensionem incurrit . Ac vero , nisi vocabulis , quod gravissimis in rebus jamdudum facere consuevimus , nobis illudere velimus , jus illud quod *cogens* dicitur , lex , quæ honesta jubet , vetatque contraria , esse nulla potest toti hominum generi communis , nisi totius humani generis supremus sit aliquis legislator : nec vero , ubi Deum sustuleris , est alius totius hominum generis imperator . Natura enim , quæ dicitur , a Dei vi & imperio

rio segregata , aut cujusque est singularis natura , a qua nemini quidpiam imperari potest ; aut mera mentis humanæ notio effectaque atque a rebus ipsis abstracta ; aut vis & potestas corporei mundi , quæ neminem , præterquam amat & vult , cogit ad officium . Accedit , quod opinio Dei , & legis alicujus naturæ adeo apud omnes homines recipiuntur , ut alterum sine altera nemo unquam abstulerit . Verus insipiens , de quo David , Deum abstulit : inde *corrupti facti sunt , & abominabiles dies ejus* ; quod nullo scilicet jure se teneri amplius arbitratus sit . Theodorus Atheus , de quo plura Laërtius , cum Deos sustulisset , id quod erat consequens , nihil natura turpe aut honestum , nihil justum aut injustum esse docuit . Exterminavit ex mundi cura Deum Epicurus : sed idem posuit , solam esse utilitatem justæ & æquæ matrem . Quocirca perspecte Cicero animadvertit , Deo , aut providentia ablati , ne justitiam quidem ullam ac fidem inter homines esse posse . Idem vero tractationem de Legibus a Deo auspicatur : quod & egerat Plato , quem ille iis in libris imitandum suscepit . Jam novelli homines , qui juri naturæ nervos omnes incidere conati sunt , in primis profani illi Hobbius , & Spinoza , Athei fuisse convincuntur . Ad hæc , nisi Deum esse omnibus in civitate vitam socialem degentibus sit persuasum , parentem pimirum omnium ac dominatorem , non potest , quod per se est perspicuum , nisi sola utilitate justum ab injusto secerni . Qua doctrina nihil est pestilentius , atque ad homines adversus homines armandos accommodatius ; nihil civitati , totique adeo hominum generi infestius . Id quod videmus continenter contingere ubicumque aut in integris societatibus , aut in privatis hominibus , ea prævalet legi & rationi . Itaque constituendum est , justitia & honestate veram quidem utilitatem effici ; sed longius tamen eam repetendam , quam ab utilitate : utilitatem potius ex informati legis naturæ notionibus , idest ex anticipata justitia & honestate finiendam . Quamobrem quamquam mea semper sententia fuit , quæ honesta , eadem esse & utilia , nec turpia & injusta vere utilia ;

tamen ita hæc tradenda sunt , ut intelligatur ab honestate veram utilitatem nasci , non contra , honestatem utilitate metiri ; adeoque regulam honesti & iusti omni esse utilitate antiquiorem . Unde autem ea , nisi a præstantissimo naturæ legislatore repetetur ? Non ignoro esse plerosque , quibus placet legem naturæ esse eas naturæ humanæ *inclinationes* , appetitusque , quibus naturaliter ad objecta nobis naturæque nostræ perficiendæ & explendæ consentanea ferimur : alios , qui *rationis rectæ dictamina* legem naturalem appellant , viros in primis acutos & doctos . Sed quoniam lex proprie dicta nulla est sine obligatione morali ; neque hæc nisi ab imperante ; nec natura sejuncta a Deo imperat quidquam , tametsi plurimum pluribusque modis nos commovere possit ; naturæ illæ propensiones , aut rectæ rationis dictamina , principia quidem esse possunt legis alicujus naturalis *cognoscitiva* , ut vocant : lex certe non sunt , nisi hoc vocabulo turpissime abuti velimus , aut morum leges cum legibus corporum inscite perturbare . Quibus ex rebus conficitur , a natura Dei omnem de lege ac jure naturæ , & moribus , disputationem suscipi inchoarique oportere .

Nostræ igitur tractationis hæc erit via & ratio . Principio in naturam ipsam humanam inquiremus , ostendemusque hominem , qui nunc est , natura ipsa beatum esse non posse , nec sine lege directrice ad beatitudinem seu naturalem , seu alterius vitæ , recta unquam contendere . Tum hanc legem exigere legislatorem sapientissimum . Tertio præstantissimam hanc Mentem existere , atque ab ea toti hominum generi legem insitam , eaque sapienter consultum . Quarto eorum systemata refellemus , qui quum jus naturæ explicare vellent , stirpitus evellerunt . Quinto eorum opiniones super principiis juris naturæ *cognoscitivis* perpendemus , qui maxime celebrantur , probarique a pluribus solent , unaque opera notiones primas legis naturæ expediemus , ac regulas paucas & genericas trademus , quibus legem illam naturæ singulis obvenientibus speciebus adaptare possimus . Quibus omnibus , quasi scilicet pro specimine , alterum libellum adde-

mus ,

mus, quo quemadmodum ex iis fontibus officia ducantur, paucis explicaturi sumus.

C A P. I.

Quod homo, qualis nunc est, solis naturæ suæ viribus nequeat esse plene beatus, quodque egeat ope Entis intelligentissimi, potentissimi, optimi, ut possit ad hanc beatitudinem contendere.

§. I. **Q**Uum Elementorum angustiae prohibeant, quæ super hac re sparsim copioseque alias commentati sumus, in hunc locum conferre, eos oro, qui legunt, ut hujusmodi propositiones ipsi per se latius diducere velint, ac in se & natura sua experiri versareque diu. Nam quamquam nos, quum hæc lucubraremus, naturam ipsi nostram ob oculos haberemus; existimamus tamen nihil nos ab humano ingenio alieni habere: & propterea haud difficile esse ex sua quemque conscientia, eorum, quæ dicturi sumus, uberiores rationes haurire posse.

§. II. Mens hominis non est infinita: brevissima potius est, multiplicibusque erroribus subjecta, atque in eo potissimum decipi potest, ac decipitur quotidie, quod ad cognitionem spectat boni & mali. Itaque in tota hominum vita videre est passim bona pro malis, mala pro bonis traduci. Non est ut hujus propositionis argumenta longius repetamus; intima enim ac domestica cujusque experientia patet. Communi quoque hominum omnium sensu & vita comprobatur. Quod si quis ejus rei plenius convinci velit, una pulcherri-
ma schola humana erit historia.

§. III. Oblatis animo formis boni vel mali, naturaliter in homine appetitus, vel aversiones, nascuntur, & quidem necessario, atque in ratione bonorum, vel malorum objectivorum. Instar axiomatis habeo, quod æque in cujusdam positum est conscientia (a).

C 2

Vi-

(a) Appetitus animalis consequitur formam apprehensam, S. Thomas 1. p. q. 78. art. 1. ad 3. Sancti Augustini dictum est, impossibile est non tangi pulchre visis.

Videri possunt quæ ea super re edisseruimus in tertia parte Elementorum , quo in loco humanæ libertatis imperium , ac fines explicuimus . Ne cui autem scrupulus ex vocabulis incessat , animadvertat quæso , nos desideria & averfationes ab electionibus voluntariis , qua illæ reguntur , discriminare ; ac desideria quidem appellare primas illas naturæ nostræ commotiones atque excitas propensiones erga bona cognita , averfationes , commotiones ac horrores immixtos a cognitis malis . Vocari ab aliis solent *sensitivæ* naturæ affectus . Electiones liberas dicimus voluntates . Desideria , & averfationes ex opinabilibus bonis vel malis concitatas in necessariis naturæ nostræ (hypotheticis) motibus , quibus interdum corripì solemus ante omnem consultationem & liberam electionem , idcirco ponimus ; id quod quum intimo cujusque sensu , tum tota hominum vita , ac magna omnium consensione comprobatur .

§. IV. Desideria & averfationes quum sunt in potestate rationis , sunt voluntatum liberarum motiva . Id patet experimento humanæ vitæ : nemo enim quidquam eligit libere , nisi quia appetit : nemo rejicit , nisi quia odit averfaturque . Ac quando indifferentia eligimus , aut recusamus , si nulla alia adsit nobis boni vel mali ratio , adeoque appetitus , vel averfatio , hoc ipsum eligere , vel recusare appetimus , amamusque . Fallebantur profecto Stoici , cum sapientem sola ratione , nulla vero animi appetitione , omnes actiones suas regere oportere docebant : aut nisi fellebantur , quod similis vero est , imperitis imponebant . At enim ita plene sapientes essemus . Respondeo hujusmodi sapientes nec natura progigni , nec Philosophorum scholis effici : est enim divinæ , non humanæ institutionis . Quid quod ratio ipsa non videtur nos determinare ad agendum , aut cessandum , nisi voluptate , aut dolore , idest præmio , vel pœna propositis ? Id cuique per se intimius exploratum esse potest , si singulas suas actiones perpendat . Ejus autem rei ratio est , quod natura nostra beatitudinem , seu animi perfectam quietem & voluptatem , continenter quærit . Itaque ubi a desiderio vel averfatione sollicita est ,
quie-

quietem expetit, vel ad objectum desiderii sese determinando, vel ab objecto aversationis se avertendo. Quumque nulla objecta finita plene eam perficere possint; inde & illud est, ut perpetuo anxia sit, atque inconstans per plurima divagetur. Ceterum non ita hæc propositio intelligenda est, quasi hæc motiva necessario nos determinent: nam quum objecta desideriorum nostrorum & aversationum, si ipsum bonum, & ipsum malum excipias, finitæ sint actionis, voluntatem cogere nullo modo possunt, quæ infiniti est appetens. Itaque etsi voluntas secundum ea a ratione determinetur; non tamen necessario, sed libere determinatur, magis ut experiatur, quam ut his sibi satisfaciatur (a).

§. V. Actiones hominis liberæ, quum externæ, tum internæ, ad præscriptum liberarum voluntatum nascuntur, neque sine voluntatibus esse aut intelligi possunt. Externas & internas *liberas* memoro: quia machinales quum usum rationis & consultationis prævertant, a voluntate non proficiscuntur. De iis igitur nihil attinet ad nos dicere: legibus enim machinariis, non moralibus reguntur. Porro hæc propositio ex iis est, quæ loco axiomatis haberi debent. Quæ enim actiones non sunt voluntariæ, earum ne ratio quidem principium est: quæ vero sine ulla voluntate & ratione actiones fiunt, mechanice fiunt, non libere.

§. VI. Homo potest operari erronee. Nam potest percipere bonum pro malo, malum pro bono (ex §. II.), indeque exsistere appetitus mali pro bono, boni aversatio pro malo (ex §. III.): & voluntas efficiendi malum pro bono; bonum fugiendi pro malo (ex §. IV.): ex quibus operationes existunt erro-

C 3

neæ

(a) Sunt igitur humanarum æque ac divinarum rerum ii imperiti, qui timent, ne si quid amore vel odio permoti agamus, minus simus liberi. Quod si est, qui Deum oramus, ignem tui amoris in nobis accende? Qui non illud veremur, Qui odit animam suam in hoc mundo, in vitam æternam custodiet illam? In terrea hæc reformidant quidam, iique, si superis placeat, Theologia succenturiati.

neæ (ex §. V.) : idest minime naturæ suæ & finī consentaneæ .

Coroll. Prima igitur peccatorum vitiorumque causa est ignorantia & error : altera falsi appetitus , seu falsi affectus .

§. VII. Beatitudo posita est in conscientia voluptatis undique perfectæ . Axioma est , super quo nulla esse potest Philosophorum controversia . Frustra autem est distinguere inter voluptatem animi & corporis : voluptas enim non est , nisi animi : causas tantum voluptatis ita partiri possumus , ut aliæ ad animum , aliæ ad corpus referantur . Itaque veterum Philosophorum concertationes *de fine* , nisi (quod ego opinor) super causis efficientibus versatæ omnes fuerunt (a) , ineptæ profecto fuere : nam finis hominis non potest alius esse , nisi perfecta animi quies , ac plena & stabilis voluptas . Quæ autem hanc beatitudinem efficiant causæ , id si illi inquisivere contentiosius , operæ pretium fecerunt : est enim humanæ vitæ præcipuam . Quamquam admiratione dignum videri potest , viros alioquin acutissimos non satis sensitisse , certis nos atque in natura nostra infixis miseriæ causis agitari omnes , nullamque habere in nobis , aut iis , quæ nos circumstant , rebus , opem , quæ ita nos ac naturam nostram perficere possimus , ut plene simus beati . Nisi fortasse id senserunt quidem (sunt enim eorum præclara quædam super hac re effata) sed susceptam semel disputationem , ut erant illi ad sese mutuo conficiendos animati , ex usu scholarum magis , quam ex veri amorē persequi voluerunt .

§. VIII. Miseria posita est in conscientia doloris & perturbationis . Eo major autem est hujusmodi miseria , quo dolor & perturbatio majorem habent intensitatem & durationem ; minor , quo minorem . Propositio est , cujus evidentia ex superiore axiomate manat . Quoniam enim beatitudo posita est in conscientia voluptatis undique perfectæ , ac quidquid a beatitudine desciscit , id miseria est ; sequitur , eum esse miserum , qui

ani-

(a) Vide Cic. de Finibus lib. v.

animi dolore, ægritudine, atque quacumque perturbatione agitur. Inde fit, ut quum Deus sit beatissimus, omnia ex illo hæc exulare necesse sit.

§. IX. Homo factus genitusque ad beatitudinem a natura videtur. Homo natura sectatur voluptatem, & vehementius majorem, perfectissimam necessario, idest tota sua natura & vi. Idem vero averfatur dolorem, & quidem majorem magis, maximum necessario; ac tota sua natura. Sunt hæc cuiquam ex intimo sui sensu nota. Quum autem beatitudo sit posita in statu voluptatis undique perfectæ (7), miseria in statu doloris & perturbationis (8); sequitur, hominem beatitudinem quidem necessario, idest tota sua natura, confectari; averfari vero miseriam. At quod tota vi & natura nostra sequimur, & in quod naturaliter tendimus omnes; in id profecto a natura sumus geniti. Cur nemo, inquit aliquis, id adipiscitur, ad quod omnes geniti sumus?

§. X. Qui operatur erronee ac præpostere, non potest beatitudinem aut adipisci, aut conservare, etiam si adeptus fuerit. Nam quum malum pro bono amplectatur, bonum pro malo averfetur, qui erronee perverseque operatur; & dolor, adeoque miseria ex malo, voluptas & beatitudo ex bono nascatur suapte natura (3); is recta miseriam petit, beatitudinem vero fugit, qui erronee operatur.

§. XI. Qua ex re hæc sequuntur confectaria. Primum, ut qui magis errat, magis etiam miseriæ sit obnoxius: minus, qui errat minus. Quum autem qui magis sapiens est, minus erret; efficitur, aut qui magis sapiens est, minus miseriæ sit subjectus. Tum, ut nisi quis sapientissimus sit, ut nunquam erret, is primam hanc miseriæ causam vitare nullo modo possit. Nihil clarius hanc propositionem demonstrat, quam stultarum nationum vita inops, ferox, inhumana, ærumnosa, misera denique.

§. XII. Homo suæ relictus sapientiæ nequit esse omni ex parte beatus: atque hæc est prima miseriæ humanæ causa, eaque cum natura ipsa nostra cohærens. Nam cum homo non sit infinite sapiens (9), ac ne

esse quidem *κατ' εἶδος*, *essentialiter* possit; errori subiectus est, ac propterea miseriæ (10). Est autem prima hæc, ut dixi, miseriæ nostræ causa naturæ ipsi infixæ, &, ut ita dicam, *essentialis*. Quando autem ei *essentialis* esse nequit sapientia infinita; *essentialis* erit defectus a summa illa & absolutissima intelligentia: unde quoniam natura ei adhæret huiusmodi malum *metaphysicum*, ut Leibnitiani vocant: natura quoque hæc illi miseriæ causa adhæret, ac penitus est infixa.

§. XIII. Qui nec in se undique perfectus est, atque *αὐταρκήστατος*, *se contentissimus*, ut nihil sibi desit ad perfectam naturæ plenitudinem; nec infinitæ potentia est, ut possit id omne efficere, quod maxime cupit, ut & se plene perficiat, & adversa omnia potentissime removeat, is hinc quoque miser necessario est, si naturæ & potentia suæ relinquatur. Nam is & non habet in se voluptatis plenæ causas sufficientes; & vi destituitur, qua ægritudinem, dolorem, perturbationes a se amoliri possit. Itaque & natura sua impar sui est desiderio; & omnimodis torquetur affectibus, qui ex natura imperfecta, nisi potentissima vi sustinetur, necessario erumpunt.

§. XIV. Homo, & finita est naturæ, ut non sit sibi ad beatitudinem sufficientissimus; & imbecillis, ut non possit ipse per se mala omnia propulsare: itaque quum sibi plurima deesse persentit, tum plurima cupit, quæ efficere nequit. Quocirca ex binis etiam hisce causis sibi suapte natura adhærentibus, nisi aliunde perficiatur, & juvetur, miser est. Ac necessario miser est: nam nec potest non sentire, quæ sibi desunt; nec, quum beatitudinis, idest infiniti boni, natura sit appetens, non ea cupere necessario, quæ sibi desunt; nec tandem non ea velle propulsare, nec interim posse, quæ ei mala undequaque accidunt, imminere.

§. XV. Confectum est, si quid cerno, hominem, qualis nunc est, ipsum per se necessario esse miserum, & quidem ex triplici fonte. Nam nec infinite intelligens est, ut possit omnem errorem evadere: nec infinite perfectus, ut ipse sibi ad beatitudinem sufficiat:

nec

nec omnipotens, ut queat & quæ concupiscit, omnia consequi, & quæ horret, omnia a se remove (a). Potest is quidem (idque humana sapientia personat) & dare operam, ut minus erret, quominus sit miser: & ad naturæ indigentiam suas cupiditates adducere, quominus torqueatur: necessaria mala fortiter ferre, quominus sentiat: voluntaria vero sapientia & prudentia vitare, ut ne magis etiam miser sit, quam natura est. Sed ut suæ relictus naturæ, nec erret unquam, nec ullis cupiditatibus agitetur, nec mala, saltem necessaria, sentiat, id vero efficere nullo pacto potest. Quam ob rem perridiculi mihi Stoici fuisse videntur, qui eo hominem sophismatibus suis evehere conabantur, quo ire tota resistit natura. Quasi scilicet qui natura & necessario miseri sumus, ut demonstratum est, phantasia, velut noctambuli, beati esse possimus. Re enim, non imaginatione, hæc nobis beatitudo concilianda est, siquidem ullius futura est pretii.

§. XVI. Quibus ex rebus illud fit, hominem, ut sit undequaque beatus, indigere ope Entis sapientissimi, perfectissimi, potentissimi: nam nec finitum intellectum perfecte emendare potest, nisi infinita sapientia: nec naturam plene perficere, ut nihil ei desit, nisi natura infinite bona & perfecta, sibi que sufficientissima: nec mala omnia potentissime amoliri, nisi infinita potentia. Quocirca, si nullum sit in universo Ens intelligentissimum, optimum, potentissimum, omnium animantium, quæ in terra gignuntur, miser-

ri-

(a) Huic adde naturam irritabilem ex singulis bonorum vel malorum ideis: quæ postquam scilicet concitata est, animi impotentes evadimus, solisque occupamur affectibus. Præclare hoc hominis ingenium depingit Euripides in *Medea* v. 108.

..... τι ποτ' ἐργάζεται
 Μεγалоσπλαγχνόν, δυσκαταπνεύστον
 Ψυχὴν, δ' ἡχθιστὰ κακοῖς ;

..... Quid porro facies

Facile multumque irritabilis animus

idemque cogi impatiens, solisque malorum ideis occupatus? Sed vix Græca verti possunt; adeo sunt ὁ ενεργητικὰ, ὁ ε media physiologia exprompta.

rimus sit homo necesse est : quippe qui eas in se miseræ causas habet , quibus ceteræ animantes destituuntur , vagantem rationem , & infiniti appetitum . Nam eæ postquam ventri & veneri satisfacere , nullis fere aliis cupiditatibus perturbantur . Quumque non sint infiniti appetentes , ad naturam , non ad libidinem , ut major hominum pars , vivunt (a) .

§. XVII. Atque idem porro sequitur , si quidem existat in universo Ens intelligentissimum , optimum , potentissimum , sed universi nullam curam , nullamque procurationem gerat , nec ullam habeat humani generis providentiam . Quamobrem Athei , qui omne Numen tollunt , & Epicurei , qui Deum ponunt , sed omnem ei denegant providentiam , si & sui , & hujuscemodi rerum naturæ interdum reminiscantur , nequeunt non esse omnium animantium miserrimi . Nam & insitam cuilibet miseriam non possunt non continenter persentiscere ; & nullum ad eam levandam nec in sese , nec in rebus extra se positis , nec in ulla rerum causa præsidium inesse existimant , ac ultro fatentur . Inde vero est , ut nulla sit in hominum societate gens pestilentior : omnes non possunt non sæpissime aut præ animi cupiditatibus exardescere , aut præ desperatione omnes in partes ægi : ex quo sequitur , ut quidvis mori , ac omnia perturbare , sicubi possunt , parati sint :

*Indomitus veluti quadrupes ubi frenâ momordit ,
Par levibus ventis rapitur celerique sagittæ ;
Expatiat agris , & fossas transilit audax ;
Tum si forte turbam , aut equitis crepitantiâ flagra,
Audierit , cursum ingeminat , fugit ocior Euro ,
Inque leves nebulas volucris pede spargit arenam :
Jussus restrictis tandem subsistere loris ,
Non equitem sentit , non lora ; sed impetu caco
Fertur , anhelantem donec fessumque relinquat
Spiritus , ac timidos vincat labor ipse furores :
Haud secus illecebris diraque cupidine raptus ,
Pectore sacrilego qui sanctum numen abegit ,
Dissimulat quidquid verax & conscia recti*

Alto

*Alto corde monet natura, neque audit habenas:
Exhaustus tandem jactante libidinis æstu
Concidit, incassum suspivans viribus ægris (a).*

C A P U T II.

Exsistere Ens aliquod intelligentissimum, & potentissimum, ab eoque universum procreari, & in eo beatitudinis nostræ spes omnes esse figendas.

§. I. **P**lurima esse in universo, non æterna aut ipsa per se exsistentia, sed genita; eaque aut intelligentia, & potentia; aut inertia & bruta: plurima quoque quotidie gigni & corrumpi, inter explorata ac patentia habemus. Itaque super ea re contentiose disputandum non est. Neque vero regeratur, quæcumque nasci & interire videntur, modificationes esse substantiarum æternarum: nam id primum ineptum est, & absurdum: quippe quum natura æterna sit *immutabile esse*, ut in Ontologia demonstratum est; intelligi non potest, qui tantæ mutationi esse possit subiecta. Deinde quidquid illæ sint, generationes certe sunt rerum a rebus, veluti hominis ab homine, plantæ a planta, ac propterea series & progressiones entium aliorum ex aliis nascentium, ut non minus omnis efficientis moderantisque causæ expertes esse possunt, quam quæ ex nihilo fiunt.

§. II. In generatione, infinita entium genitorum & generantium series repugnat. Nam quum in hac serie nulla statuatur prima, quæ contineat rationem sufficientem ceterarum omnium rerum; tantundem est infinitas rerum series, quarum una ab alia pendeat, ponere, atque statuere effectus infinitos sine ulla ratione sufficiente; quod & ineptum est, & absurdum. Ideni quoque efficitur, si eæ generationes sunt successivæ evolutiones, ut patet: nulla esse potest consequens, nisi sit antecedens; nec ulla certa antecedens, ubi infinitus est progressus præcedens.

§. III.

(a) *Poliniacus in Antilucratio lib. 1. vers. 790.*

§. III. Existunt in universo generationum entium quum viventium tantum, tum & rationalium series (1); id patet exemplo plantarum, brutorum, hominum. Quum autem repugnet series infinita a parte ante (2); consequitur harum serierum omnium primam esse, & independentem causam.

§. IV. Ex nihilo sine ulla externa causa, & sine ulla ratione sufficiente, nihil fieri potest; cuiusque ergo effectus causa existat necesse est, in qua contineatur integra, & adæquata ejus effectus ratio sufficiens.

§. V. Existit principium aliquod æternum activum universi. Est enim aliquid, quod generatur & interit, etiam intelligens & potens (1): id per infinitam generantium, & generatorum seriem fieri non potuit (2), sed per series non infinitas (3): quæ porro series ex nihilo esse non potuerunt, idest sine causa, in qua earum adæquata ratio sufficiens non contineretur (4); ergo est ens aliquod per sese, & æternum, activumque principium universi, in quo serierum omnium entium mundanorum prima adæquata ratio sufficiens contineatur: causa mundi efficiens.

§. VI. Si fingatur existere æterna materia sine motu, hæc a quiete sine causa externa ad motum nunquam transibit (A). Eodem modo si fingatur existere materia cum vi motrice sine ullo intellectu & ratione, nec quidpiam aliud, impossibile intrinsecum erit ex hujusmodi materia emergere posse rationem & intellectum (a). Pluribus aliis propositionibus eadem ratio adaptari potest, omniumque eadem semper erit demonstratio.

§. VII. Existit principium aliquod activum æternum, quod sit intelligens & potens. Nam in seriebus rerum mundanarum quædam sunt intelligentes & potentes (3): si nihil autem esset æternum intelligens & potens, series istæ essent sempiternæ, idest sine ulla prima, quod esse nequit (2); existit ergo ens quoddam

(a) Scholæ est hoc axioma provitum, Nihil reducit in actum nisi per ens actu. Mechanicorum hoc, Nullum corpus suapte natura a quiete ad motum transit.

dam æternum intelligens & potens , in quo sit ratio sufficiens adæquata serierum mundanarum intelligentium ; nisi si dicere velimus , hujusmodi series ex causis non intelligentibus provenisse , quod æque impossibile est (4. & 6.). Quæ quidem , nisi vehementer fallor , perspicue demonstrant , existere mentem æternam , intelligentissimam , potentissimam , quæ sit prima causa creatrix , & conservatrix universitatis rerum . Sed operæ pretium erit hæc aliis quoque ex locis pertractare , atque longius provehere .

§. VIII. Sine mutua quadam attractione singularum materiæ partium , & magnorum globorum mutua aliorum in alios gravitatione , universitatis rerum ordo consistere non potest . Enimvero sine attractione minimarum materiæ particularum corporum unitas nec esse , nec intelligi potest , quemadmodum philosophi ostenderunt : nec sine mutua magnorum globorum gravitatione mundanus ordo aut nasci , aut stare . Quæ res quoniam explorata est , atque a Physicis demonstrata , longiorem orationem nostram non exigit .

§. IX. Vis attractrix particularum minimarum nec infinita est , nec necessaria & unum in modum suapte natura determinata , ut nullius modificationis capax sit . Nam vis attractrix decrescit in ratione duplicata distantiarum , quemadmodum est a Newtono demonstratum ; & varie modificatur pro varietate particularum ; & entia finita pro subjectis habent : quæ autem talia sunt , nec infinita esse possunt , nec necessaria suapte natura , idest unum in modum determinata .

§. X. Si vis attractrix , & vis gravitatis essent æternæ , independentes , eæ & infinitæ essent , & necessariae : nam infinitas & necessitas attributa sunt essentialia entis æterni , quemadmodum Metaphysici demonstrant . Qua ex re conficitur , eas vires a causa aliqua pendere : nam nec infinitæ sunt , nec ita necessariae , ut nullius alterius modificationis sint capaces (9) .

§. XI. Vires hujusmodi provenire nequeunt ab anima mundana , una , individua , & æterna , atque naturæ ipsius necessitate operante , quemadmodum Pantheistæ opinantur . Ita enim & infinitæ essent , & unum

num in modum determinatæ, nullaque esset ea, quam scholæ dicunt, *contingentia*; ut ex superioribus patet: quæ quum sint falsa, ab hujusmodi principio esse nequeunt.

§. XII. Quum ergo vires istæ non sint æternæ, necessariæ, & essentielles materiæ; nec proveniant ab anima mundana; nec ex nihilo esse possint, aut ex serie causarum infinita, ut ex superioribus constat: ac præterea harmonice operentur, totumque universum ordinatissimum efficiant; reliquum est, ut proveniant ab ente aliquo æterno & intelligente, quod libertate, non vero ulla naturæ suæ necessitate, eas creat & conservat.

§. XIII. Axioma est Philosophorum omnium, eorundem effectuum eandem esse causam.

§. XIV. Causa æterna intelligens & libera, qua vires illæ creantur & conservantur, eadem causa est universi, & quidem unica. Enimvero quum universum hoc spectabile duabus illis viribus contineatur (8); eæ vero vires a causa æterna intelligente & libera proveniant (12): eadem illa causa erit universi. Quum vero vires istæ ita universum conforment, ut illæ in eundem finem, atque ordinem conspirent, ut patet vel ex mediocri serum naturalium contemplatione; & eorundem effectuum eadem sit causa (13); conficitur unam hanc intelligentem & liberam (æternam naturam, unicam esse universi causam).

§. XV. Est autem hæc causa non solum ad originem, verum etiam ad conservationem universi necessaria. Nam sine illa nec prima universi stamina, primæque formatrices universi vires intelligi, & esse possunt, nec conservari; quum & finitæ sint, & modificationum variarum capaces, adeoque perturbationis. Super qua re lectu dignissima sunt, quæ Newtonus scribit in scholio generali Principiorum mathematicorum Philosophiæ Naturalis, quæque sæpe adnotat in scholiis Opticæ.

§. XVI. Hoc ens æternum, quod causa est universi creatrix, & conservatrix & intelligentissimum est, & potentissimum; & optimum. Nam hoc ens conservat hunc

hunc præclarum pulcherrimumque universi ordinem (15): qui existit ex structura partium infinitarum numero & varietate, finibusque peculiaribus infinitis: conservari vero is ordo nequit nisi summa intelligentia & potentia; intelligentissimum igitur est & potentissimum. Præterea quum hoc ens æternum sit; nequit non esse perfectissimum: nam quæ existentia & essentia suæ nullas habent causas, ne suæ limitationis quidem ulla habere possunt: quæ vero talia sunt, infinite perfecta sunt. Vide ut hoc argumentum prosequitur Wolfius in Theologia Naturali.

§. XVII. Constat ergo existere ens quoddam intelligentissimum, & optimum, cujus numine rerum hæc universitas creata sit, & conservetur. Quum autem unum hujusmodi ens sufficiens sit, quippe in quo contineri potest ratio sufficiens omnium possibilium: unumque demonstrent ordo, & unitas universi; dubitandum non est, unum illud esse, non plura. Hoc autem ens *Deum* appellare solemus ex adpectu præcipuæ proprietatis, futurorum nimirum intelligentiæ & præscientiæ; ergo existit Deus, & quidem unicus.

Coroll. Cum is sit & intelligentissimus, & optimus; ejus tantum sapientia & bonitate beati esse possumus. Cetera nugæ. Aut igitur omnis felicitatis abjicienda spes, aut in eo figenda tota.

Scholion. In divina natura adferenda argumenta diversorum generum protulerunt philosophi. Præter ea, quæ ex intimâ metaphysica desumuntur, quæque paulo sublimiora sunt, quam ut omnes homines intelligere possint, præclara certe sunt & perspicua, quæ ex rerum naturalium ordine atque structura deducuntur. Sunt ea numero prorsus infinita: nam nulla res est, quam si attente contemplati fuerimus, characterem ac ampla manifesta quæ æternæ hujus mentis non præferat indicia, seu vastissimos universi globos, eorumque perennes, & adcuratas motiones velimus intueri; seu naturam luminis; seu partes telluris nostræ, aërisque atmosphæram & vires; seu totius globi terraquei situm, aquam, montes, plantas, bruta, homines: ex quarum rerum singulis Derham exactissima argumenta exsi-

existentiæ divinæ mentis conrivat in Theologia physica. Sed quum hæc in secunda parte edisseruerimus, præstat pauca observare de unius oculi structura, quæ adeo mirabilis est, ut ea solum omnibus numeris absolutam demonstrationem existentiae Dei præstare posse confidam. Finis oculi est visio. Neque enim cum Lucretio delirabit, puto, ullus, ut oculos dicat non esse factos videndi gratia, sed factos fortuito, usum esse defectum. Jam vero ad eum finem ita partes omnes oculi conspirant, ut manifestum sit ab industri aliquo Artifice esse compositas & conformatas. Nempe ut visio perficiatur, necesse est, ut externarum rerum imagines in oculi fundo depingantur. Depinguntur autem radiorum focus exacte in retinam incurrentibus. At focus hujusmodi nullo modo in retinam cadere possunt, nisi dum ex objectis reflectuntur divergentes, ope aliqua convergentes evadant. Eam in rem conformata est tunica cornea, atque ita dispositi humores, forma extrinsecus convexa, ut radii lucis oculum penetrantes, refringantur refractione ad perpendicularum, atque ita convergentes evadant. Præterea quoniam aut nimia copia lucis, aut nimis parva quantitas efficere possunt, quominus imagines clare & distincte depingantur; idcirco musculus instructus est oculus, quibus pupilla dilatari, aut stringi possit. Tum propugnacula addita sunt extrinsecus, palpebræ, & supercilia. Præterea eo loco locatus est, in quo maxime erat necessarius. Infinita alia hujusmodi adnotant Derham, & Niewentitius, quæ demonstrant aperte non sine curâ supremæ mentis fieri. Concludamus Ciceronis verbis. *Quod si omnes mundi partes ita constitutæ sunt, ut neque ad usum meliores potuerint esse, neque ad speciem pulchriores: videamus, utrum ea fortuita sint, an eo statu, quo coherere nullo modo potuerint, nisi sensu moderante, divinaque providentia. Si ergo meliora sunt ea, quæ arte perfecta sunt, nec natura quidem rationis expers est habenda. Qui igitur convenit, signum aut tabulam pictam cum adspexeris, scire adhibitam esse artem: cumque procul cursum navigii videris, non dubitare, quin id ratione atque arte moveatur? aut cum solarium vel descrip-*
ptum

ptum, aut ex aqua contemplare, intelligere declarari has arte, non casu: mundum autem, qui & has ipsas artes, & earum artifices, & cuncta complectatur, consilii & rationis esse expertem putare? Quod si in Scythiam, aut in Britanniam, sphaeram aliquis tulerit hanc, quam nuper familiaris noster effecit. Posidonius, cujus singula conversiones idem efficiunt in Sole, & in Luna, & in quinque Stellis errantibus, quod efficitur in celo singulis diebus, & noctibus: quis in illa barbarie dubitet, quin ea sphaera sit perfecta ratione? Hi autem dubitant de mundo, ex quo & oriuntur & sunt omnia, casu ne ipse sit effectus, aut necessitate aliqua, an ratione ac mente divina: & Archimedem arbitrantur plus valuisse in imitandis sphaerae conversionibus, quam naturam in efficiendis, praesertim cum multis partibus sine illa perfecta, quam haec simulata sollertius.

C A P U T III.

De summa Dei Bonitate, qua vult omnes beatos, deque legis natura, & necessitate generatim.

§. I. **N**atura intelligentissima, potentissima, optima, idest Deus, sibi est ad perfectam beatitudinem sufficientissima: neque ulla re externa aut perfici potest, aut turbari^(a). Nam quum sit infinite perfecta; nullius externi boni ~~in~~ingere potest ad beatitatem. Quumque ejus sapientia sit infinita, potentia vero & voluntas aequales; nec errore perturbari potest, nec desiderio angī. Itaque nihil ei deest ad perfectam felicitatem.

§. II. Qua ex re consequitur, ut natura haec beatissima nec invidet ulli, nec malefica sit. Nam invidere & irasci imbecillitas sunt naturae alicujus boni indigentis: nullius vero boni indiget Deus. Præterea al-

Tom. IV. D teri.

(a) Herc. apud Eurip. in Herc. fur. extr.

ΔΕΙΤΑΙ Ο ΔΕΘ, ΕΙΠΕΡ ΕΣ' ΟΥΤΩΣ Ο ΔΕΘ,

ΟΥΔΕΥΘ. . . . Nam Deus, siquidem omnino Deus est, nullius rei indiget.

teri malefacere, quin sit ei quocumque modo bonum, aut ex invidentia proficiscitur, aut ex ira, & odio; at nulli invidet Natura beatissima, nulli irascitur; ne malefacit igitur quidem. Itaque quam absurdum est quorundam systema, qui super Deum bonum malum alterum induxerunt, qui quum æque sit sapientissimus, potentissimus, & perfectissimus, in eo tamen suam ponat integram felicitatem, ut aliis malefaciat? Pugnante enim hæc cum natura æterna & beatissima.

Scholion. Sed quæret quispiam, si ita se res habet, qua ex causa tot mala homines perpetuo affligant? Scilicet quemadmodum argumentatur apud Lactantium Epicurus, aut Deus potest auferre mala, nec vult: aut vult, nec potest: aut neutrum. Si primum, invidus est, & malignus; si alterum, imbecillis: si tertium, & invidus & imbecillis. Hæc argumenta effecerunt, ut recentibus temporibus existimaverint quidam defensores unitatis Dei, impares nos esse ad ea super re cum Manichæis disputandum. Petrus scilicet Bælius, quum Manichæorum argumenta ornasset, atque longe lateque propeisset in Dictionario Historico-Critico Articulis *Manichæus*, *Pauliciani*, *Ovidius*, *Origenes*, audacter pronunciat, nulla naturali ratione dissolvi posse. Sed aut ego fallor, aut sunt illa inepta sophismata (a). Quod ut intelligatur, observandum est cum Leibnitio, tria esse malorum genera, quæ in natura humana reperiuntur, *metaphysicum*, *hylicum*, & *morale*. Metaphysicum est defectus a summa perfectione, idque necessario naturis creatis inhæret, quas facere infinite perfectas non potest Deus. Morale vero, idest peccatum, ex metaphysico & libertate originem trahit; neque enim ob alias causas peccant homines, nisi quia finita ratione libere abutuntur: quia omne peccatum est

(a) Quidam ut huic argumento respondeant, omnia mala pernegant. Nulla esse mala Euclides Megaricus docuit, apud Laertium. Stoici sola peccata in malis habent, ut sola honesta in bonis. Vide Cic. Disp. Tusculan. S. Basiliius Hom. 2. in Hexaemeron sola item peccata inter mala numerat: cetera nugæ esse, nec in malis censenda. Vide & Pope An' Essai on man, quæque nos dicturi sumus quinta parte Diff. IV.

est aut ignorantia, aut cum ignorantia conjunctum. Physica tandem mala, si attente expendantur, aut bonis compensantur, ut fames voluptate cibi, labor somno; aut realia sunt bona, ut poenae; siquidem iis homo punitur, ut ad bonam frugem convertatur; aut præparatio ad virtutem, qua vel continetur beatitudo, vel ad beatitudinem itur. Sed cur, inquit Bælius, moralia mala Deus pro summa sua sapientia & potentia non impedivit? Nempe impedire, atque emendare perpetuo studet, quantum natura finit rerum, & ratio suscepti mundani operis ac ordinis: nam, ut ait S. August. lib. 2. sup. Gen. ad lit. cap. 1. & S. Thomas 1. p. q. 86. art. 5. ad 1. *in constitutione rerum naturalium non consideratur quid Deus facere possit, sed quid naturæ rerum conveniat* (a). Vide dicta in III. parte Elementorum.

§. III. Deus nequit velle hominum miseriam, nisi consequenter, idest quin ipsi (ex ordine mundi posse debent) libere sibi consciscant, ac mereantur. Nam quum sit natura optimus, agatque ex bonitate, nequit ulli ex sese velle malefacere; omnia amat: nullum vero majus malum mentibus inferri potest, quam miseria; non potest igitur, salva sua bonitate, creaturarum rationalium miseriam primo & antecedente consilio velle.

§. IV. Deus vult voluntate antecedente hominum beatitudinem. Nam ~~homines~~ creat beatitudinis, & miseriæ capaces, & ita quidem, ut natura ipsa beatitudinem appetant, avertentur miseriam. Quod si nolit esse beatos, nolitque iis media beatitudinis præstare, quum ipsi suapte natura beati esse nequeant; vult profecto antecedente consilio miseros; quod velle nequit. Nec sola ratione id discimus, sed tota religionis revelatæ œconomia: passim enim in divinis scripturis testatur, se amare, velleque omnes homines beatos fieri, atque ad agnitionem veritatis venire.

D 2

§. V.

(a) Hoc axioma fundamentum Theodiceæ fecit Leibnitiuss. Qui Theodiceam horremus, quid Augustino ac Thomæ faciemus? Illud facti est: hoc juris a nostris Theologis effragitabis.

§. V. Ex natura Dei sequitur etiam Deum velle antecedente voluntate perficere hominis intellectum, voluntatem, & potentiam. Nam quum ex natura Dei sequatur, ut velit hominem beatum; nec is esse ullo modo beatus possit, nisi emendatis gubernatisque intellectu, voluntate, & potentia, ex quarum facultatum imperfectione hominis necessario provenit miseria; nisi facultates illas perficere velit, atque emendare, regereque, vult eum esse miserum; quod naturæ divinæ adversatur (3).

§. VI. Deus nequit communicare homini suam infinitam intelligentiam & potentiam, ita ut illa sit ei essentialis. Dogma scilicet est eorum omnium, qui de Deo philosophantur, efficere creaturam non posse, quæ intensitate & extensione perfectionum sibi sit æqualis. Quod & pluribus aliis argumentis confirmari potest, & iis potissimum, quibus aperte demonstratur, naturam divinam esse non posse, nisi unicam, & necessitate naturæ suæ existentem. Præterquamquod pugnantia inter se sunt, quemadmodum perspecte observat Wolfius, naturam undequaque perfectissimam, eandemque dependentem: limitatum enim sit necesse est quidquid non suapte existit natura, sed ab altero: nam non existere semper, nec suapte natura, modus est existentiae.

§. VII. Quoniam ergo homo nequit ipse in se habere *essentialiter* infinitam intelligentiam, naturam, & potentiam; sequitur eum esse non posse suapte natura beatum, sed participatione tantum alterius rationis, bonitatis, & potentiae. Nempe potest Dei supremam rationem sibi quomodocumque revelatam rationi suæ addere, quo illam augeat; aut substituere, ubi deficit: & divina bonitate ac potentia adjuvari.

§. VIII. Nemo, opinor, ambiget, Deum posse hominem perfecte beatum efficere, idque tribus mediis. I. Communicatione supremæ rationis, ne erret. II. Ope eum adjuvando, ut quod rectum & bonum intelligit, opere perficiat. III. Intima bonitatis suæ diffusionem. Nempe quum sit intelligentissimus, potentissimus, optimus; intelligitur perspicue id statim fieri, ac vult.

Scholion. Quærit hic fortassis quispiam, ecquid causæ sit, cur non & in hac quoque vita plene beatos efficiat Deus homines? Nempe ejus beatitudinis, cujus sunt illi ex mundi legibus capaces, dum hic agunt, omnibus media suppeditat: nam & rationem, qua bona & mala discernere possint, natura ipsa omnibus impertitur; & cum ratione prima quædam justî & honesti semina (a): & impetum ad se conservandum, ac suam felicitatem perquirendam indit. Accedit eodem lex altera supernaturali modo promulgata, ac quacunque patet tellus diffusa, cujus summa est mutua hominum caritas, qua maxima, quæ in terris haberi potest, beatitudo continetur. Sed quominus plene hic beatos efficiat, & vetus Adamitica noxa vetat, & naturæ totius ratio positusque ordo: neque enim hujusmodi homines Naturæ, cujus pulchritudo in rerum perpetuo ac ordinatissimo cursu posita est, partes esse possent. Itaque immortales & beati ad alterum & intelligibilem mundum pertinere tantum possunt, non ad hunc corporeum, ac perpetuo, licet harmonice, defluentem. Quocirca, quod Dei benignitatem decet, legibus, in primis naturæ, quæ omnes peræque spectant, aliisque instrumentis, homines, dum in terris degunt, ita moderari, ut & virtutem, & qualemcumque, cujus hic capaces sumus, beatitudinem adipisci possint, id illum efficere porro demonstrandum est (b).

D 3

§.IX.

(a) Vide locum Tullii egregium de Finibus v. 22.

(b) Cur, inquit aliquis, cum mala sublata venerit Christus, ecce qui tollit peccata mundi, tam simus hodie pravi, miserieque, quam olim? Addunt Paulli locum ad Rom. i. 28. Et sicut non probaverunt Deum habere in notitia (de Ethnicis loquitur) tradidit illos Deus in reprobum sensum, ut faciant ea, quæ non conveniunt, repletos omni iniquitate, malitia, fornicatione, avaritia, nequitia, plenos invidia, homicidio, contentione, dolo, malignitate: fures, detractores, Deo odibiles: contumeliosos, superbos, elatos: inventores malorum: parentibus non obedientes: insipientes, incompósitos: sine affectione, absque fœdere: sine misericordia. Qui cum justitiam Dei cognovissent, non intellexerunt, quoniam qui talia agunt digni sunt morte. Quorum omnium quid est, quod & in Christianis ipsis non hodie abunde cernatur? Adeone peccata nostra abstulit? Memini in impuri jam hominis

li-

§. IX. Lex est intellectus & voluntatis finitæ norma ab eo promulgata, qui & sapientissimus sit, ut recte regere possit; & potentissimus, ut adigere ad observationem valeat; & qui jus habeat in eos, quibus dat.

§. X. Et quidem lex ferri nequit, nisi ab eo, cujus ratio præstantior sit. Nam quum intellectum regere debeat, & voluntatem; omni erroris suspicione carere debet; quod esse non potest, nisi promulgetur a ratione sapientissima. Itaque perspecte dictum est a Democrito, *imperare sapientioris esse*. Præclara super ea re observat Aristoteles in Politicis. Inde vir doctus eam distinctionem hominum repetit, ut, si non jure, saltem facto, sint alii *natura servi*, alii *natura dominantes*. Nempe qui stupidi sunt, crudique lateres, quum ratio-

libello hos Euripidis ex Hercule furioso legisse versiculos, quos Amphitruo in Jovem jacet, versu 344.

Σὺ δ' εἰς μέν εὐνας κρυφίῳ ἠπιστῶ μολεῖν,

Ταλλοτέρη ῥέκτρα, δοντος ἔθενος, λαβών,

Σωζεῖν δὲ τερσὺς ἐκ ἐπιστάσχι, φίλος;

Ἀρκῆς τις εἰ Θεός, ἡ δίκαιος ἐκ εἶους.

Quæ sunt scommata ac impia nostrorum cinædorum flagitia, & aliena multo a doctrinæ Evangelicæ fine: non enim hujus vitæ felicitatem facturus venit Christus; quippe quantula vitæ totius ac sempiternæ hæc est particula, quam hic decerpimus? æternum igitur beneficium largitus est: hic tantum beata vitæ, quæ superest, viaticum parare nos jubet. Quod Dei amore omnique virtute fit. Hanc quinimmo vitæ hujus auram odisse præcipit, si ullo modo alteri illi & veræ sit obstaculo futura: qui odit, inquit, animam suam in hoc mundo, in vitam æternam custodiet eam. Peccata vero quum dicitur Christus sublatum venisse, duplicem habet intellectum. I. Ut originalis noxæ reatum piaculari crucis sacrificio expiaret, quod plene, proque omnibus fecit. II. Ut omnibus fidem & gratiam largiretur, quod ex parte sua efficit. Quantum in medico est, inquit Augustinus, venit sanare ægrotum. Si unum semen, inquit idem Augustinus in Psalm. 147. extremo, unus Jacob, unus Israel, & omnes gentes unus in Christo; ergo ad omnes pertinet gentes quod revelavit ipsi Jacob, & ipsi Israel: & illi soli in aliis gentibus deputandi sunt, qui nolentes credere in Christum, nolunt recedere ab oleastro, & inferi olivæ: remanebunt in silvosis rami steriles & amari. Aut qui, si crediderunt, ipsi fidem & caritatem deseruerunt: Deus enim non deserit, nisi deseratur.

ratione directrice destituantur, servire tantum possunt, non etiam imperare; quum contra ii, qui præstante sunt ratione animoque præditi, & se, & alios regere possint. Oportet etiam, ut Legislator potentia polleat impellendi subditos ad obsequium legis; alioquin lex doctrina potius erit, & consilium, quam lex. Sed & oportet, ut jus in eos habeat, quos legibus regere studet, ut legislatio sit justa: nam lex quasi frænum est libertatis, ut injusta coactio videri possit, nisi ab eo feratur, qui jus habet imperandi.

§. XI. Deus habet omnes characteres perfectissimi, & veri legislatoris. Nam & est intelligentissimus, id est infinita ratione præditus, qui idcirco plene comprehendit creaturarum rationalium naturam, vices, defectus; & vias atque rationes omnes, quibus regi eas oportet. Deinde est potentissimus, ut possit ad leges observandas adigere, propositis pœnis, vel præmiis. Tandem quum sit omnium creator, & conservator, jus habet absolutum in omnia, ut idcirco nemo sit, qui queri possit, sibi libertatem naturalem diminutam. Nempe quælibet mens natura ipsa sub Dei imperio nascitur, atque est. Sed & solus Deus supremi & perfecti naturæ legislatoris characteres habet, quum solus sit sapientissimus, potentissimus, optimus, & suapte natura universi Dominus.

§. XII. Quæ quum sint, videamus porro, qua ratione Deus ope legislationis, & gratiæ homines ad veram beatitudinem ducere possit. Atque principio, legislatione, & gratia homines plene beatos efficere potest. Nam quum divina legislatio sit communicatio supremæ rationis divinæ brevi hominis rationi; gratia vero communicatio potentia, & bonitatis divinæ; legislatione & gratia fontes omnes humanæ miseriæ purgare potest.

§. XIII. Vires, quæ sunt in natura, quarum reddere rationem per antecedentes non possumus, sed quarum ratio sufficiens aut in natura ipsa est, aut in Deo, leges naturæ mechanicas appellamus. Ejusmodi sunt vis attractrix in materia universali, vires centripetæ, & centrifugæ Planetarum, quibus universi ordo continetur.

Si quæ sunt ejus generis in natura humana, leges naturæ humanæ machinales habemus. Tales autem sunt vires corporis, temperamentum, instinctus, propensiones &c.

§. XIV. Hominis finis esse alius nequit, nisi perfecta beatitudo (cap. 1. 9.); nam ejus gratia & est, & omnia suapte natura operatur, ita scilicet, ut citius nolit esse, quam non esse beatus. Quum ejus rei rationem ex anterioribus in natura causis reddere nequeamus; fit ut hic in hominibus ad beatitudinem impetus lex sit naturæ humanæ mechanica (13).

Scholion. At enim homo non voluptate permovetur, sed dolore; finis ergo est evitatio doloris. Haud equidem id negaverim: sed hoc conscire sibi, se ab omni dolore atque ægritudine vacare, puraque frui voluptate, plenam perfectamque beatitudinem voco.

§. XV. Homo a sui ipsius natura mōnetur, ut se regat aliqua lege entis intelligentissimi, & potentissimi. Est enim hominis finis beatitudo (ex superiori), ad quam natura ipsa fertur. Quum vero beatitudinem hanc consequi nequeat, nisi perfectione intellectus, appetitus, naturæ, & potentiae (ex superioribus); quæ perficere nequit, nisi ope entis intelligentissimi, & potentissimi; consequitur a sui ipsius natura moneri, ut se lege entis hujusmodi regat. Naturalis hæc est in omnibus hominibus cognitio, idest talis, ad quam natura ipsa impellitur, ut quivis ipse per se intelligere possit, si vel minimam super natura sua & origine contemplationem instituerit. Est autem ~~autem~~ rectionis indigentia prima quædam fax, qua homines omnes regantur in perquisitione *legis naturalis*.

§. XVI. Homo, qualis nunc est, naturæ lumine conjicere potest existere summam hanc legem, ejusque generalissima saltem capita intelligere. Eam propositionem sic demonstro. Nam homo naturali sua ratione hæc intelligit: esse supremam quandam mentem intelligentissimam, & potentissimam: ab eo omnia esse facta, & gubernari; adeoque hominem ipsum, qui universitatis rerum pars est. Agnoscit præterea summam illam mentem, nec invidere cuiquam posse, nec irasci, nec malefacere; adeoque amare non posse ho-

minum miseriam, sed velle beatitudinem. Jam ea beatitudo ut obtineatur, exigitur omnium primum emendatio intellectus, quæ fieri nequit, nisi communicatione summæ divinæ rationis, quæ æterna est, & naturalis lex; ergo naturali sua ratione intelligit existere supremam legem creaturarum atque finitarum mentium directricem. Itaque qui legis hujuscemodi naturalem cognitionem pernegant, ii negare quoque debent cognosci ab homine ea omnia, quæ superius demonstrata sunt (a).

§. XVII. Et quidem præcipua, & generalissima capita naturalis hujus legis homines omnes intelligere possunt, qualia sunt, nos sub Dei imperio nasci; adeoque esse illum nostri creatorem, gubernatorem, benefactorem, eique debere servitutem, invocationem, gratiarum actionem, quæ sunt prima capita, ex quibus virtutes & officia erga Deum sequuntur (b). Itaque & natura ipsa sentimus, & facili ratione efficitur, non posse a virtutibus beatitudinem separari: vitiis miseriam procreari. Tum non esse nostri dominos, sed ~~custodes~~ &

(a) *Quid, inquit aliquis, faciemus populis Atheis? Quid iis, qui inter feras ferarum instar adoleverunt? Illos ego in fabellis habeo, ut alias demonstravi: horum si unus aut alter existit, cum iis facere jubeamus, qui stupidi nascantur, atque adolescunt. Sed & in his esse aliqua occulta possunt Dei consilia.*

(b) *Crederes fuisse theologos, qui negarent naturæ vi atque lumine ea cognosci, mihi ~~quædam~~ docuerim, crimini verterim? Sed id interea tota & vera Ecclesia docet. Deum autem orandum esse, & ejus nomen invocandum, IPSA LOQUITUR NATURÆ VIS INSITA IN HOMINUM MENTIBUS, non solum tradunt divinæ litteræ. Catechismus Romanus parte IV. cap. IV. §. 1. Idipsum vetusti omnes Patres tradiderunt. Ita in hac studiorum luxurie nec vetera jam, nec nova scimus amplius! Sed longum esset, si imperitorum hominum ineptias refellere velimus, ac eorum in primis, quidum sua dogmata tueri student, totius fundamenta pietatis se subvertere non animadvertunt. Sed audiamus hic Sancti Thomæ. 1. par. quest. 79, art. 12. Oportet igitur nobis naturaliter esse indita, sicut principia speculabilium, ita & principia operabilium. Potentia videlicet, non actu: nam is negat species abstractas extrinsecus nobis participari, in eoque Platonem refellit (ibid. art. 3.) To vero potentia est lumen intellectuale, quod Deus animæ participat. Idem ibidem art. 4. in c. extremo.*

& amicos ; adeoque maxima cura debere nos conservare , nihilque efficere posse adversus nostri conservationem ; ex quo capite virtutes & officia omnia erga nos ipsos manant . Præterea ceteros homines esse natura nobis æquales , adeoque quemadmodum nihil contra naturam nostram moliri possumus , ita nihil adversus ceteros : ex quo fonte virtutes & officia adversus alios derivantur . Tota humana docet historia vix ullam esse alicujus nominis gentem , quæ hæc ignoret .

§. XVIII. Accedit eodem auctoritas divinarum scripturarum . Ex iis patet luculenter, Deum , quotiescumque veteres illos mortales ad justitiam & honestatem adhortabatur , ad justi & honesti naturales notiones revocasse , velut conscientia a natura ipsa informatas . Ita Gen. 4. v. 7. Cainum exhortatur : *nonne , inquit , si bene egeris recipies : sin autem male , statim in foribus peccatum aderit ?* Homicidium , quod Cainus meditabatur , velut natura vetitum , ac proinde malum supponit : patientiam vero & mitem animum natura bonum . Eadem divinæ scripturæ in Ethnicis , de quibus sæpe loquuntur , justi & honesti notitiam inesse docent . Pharaö Ægypti Rex indignatur Abrahamo , quod non indicasset Saram suam uxorem esse , quo factum esset , ut ipse in uxorem duceret : id quod testatur , natura ipsa edoctum^e , non licere alteri uxorem eripere . Infinita sunt hujusmodi similia . Pleraque etiam addi possent novi Testamenti loca , quæ diserte id docent , in primis Pauli in ^{epistola} ~~epistola~~ ad Romanos . Quæ idcirco addidi , quod quidam , qui Theologi videri volunt , in eam absurditatem tuendam adgressi sunt , nullo nos naturalis rationis studio ad legis naturæ cognitionem pervenire posse , aut si ad generalem pervenerimus , capita præcipua legis naturæ ignorare (a) . Sed necessarium non est , ut id pluribus disceptetur .

§. XIX. Ex quibus consequitur manifeste , Deum pro-

vi-

(a) *Id quam sit absurdum ex populorum Ethnicorum Civilibus legibus discere possumus , etiam barbarorum : nec enim illa homicidia , mendacia , furta , adulteria , stupra &c. vetant , nisi quia natura & conscientia vetita sciunt .*

vidisse hominum generi promulgatione sapientissimæ legis, qua ducerentur ad beatitudinem. Nempe eam non via tantum rationis, sed revelationis quoque, idque copiosius, manifestavit. Ea ostendit, sola virtute homines beatos esse posse: vitiis non posse esse nisi miseros. Hanc esse voluit mundi legem. Cumque virtus sit Dei, nostri, aliorum justus ac sapiens amor, atque attractio quædam moralis, ut corpora mechanica attractione regi voluit, ita animos amore. Nequit mundus esse corporeus sine mechanica attractione: nec mentium Respublica sine eo amore. Sed libera sit virtus necesse est; itaque ut libere sectentur decrevit: præmia largiturus, si constanter sectarentur: puniturus, si defererent. Interim qualemcumque opem hominibus lex ad beatitudinem præstet; nisi etiam vires humanæ naturæ augeantur, & sustineantur, sola lex per se satis non est ad hominem plene perficiendum: monstrat enim bona potius, quam vim indit ad consecranda. Id ipsi Ethnici intellexere. Hinc illud Medæ, *video bona, proboque; deteriora sequor*. Sed & nemo est, qui non sæpe experiatur, quam interdum facilius sit justa & honesta intelligere, quam affectus, qui contradicunt, vincere. Adde quod lex ac conscientia etsi continenter nos adloquuntur, perstreperantibus tamen affectibus non exaudiuntur. Atque hoc hominem ducit in cognitionem necessitatis divinæ gratiæ; ut idcirco ii, qui eam pernegarunt Naturalistæ, rationi quoque suæque naturæ adversari comperiantur.

C A P U T IV.

Lex natura explicatur distinctius, atque adversus profanos homines iterum asseritur.

§. I. **E**Sse in natura legem, quæ sit actionum hominis liberarum norma, qua summa erga creaturas rationales Dei bonitas ostenditur, superius demonstratum est. Sed sunt illa accuratius uberiusque retractanda, priusquam in hujus legis primas notiones, ac principia, ut vocant, cognoscitiva, inquiramus: super-

pervacaneum enim est legis hujus naturalis partes explicare velle, nisi illa ita contra profanam gentem adstruatur, ut nulli deinceps exceptioni sit obnoxia. Itaque a legis ipsius vi & natura iterum exordiemur.

§. II. Est legis vocabulum ambiguum: nam aut eo significatur norma quæpiam actionum in ratione posita ac infixa, veluti arte, exemplari, &, ut Græci Philosophi dicunt, *Idea*, ac παραδειγματι: aut superioris alicujus imperantis voluntas, qua velit sibi subditos uti in actionibus suis regendis. Si cum priori notione accipiatur, & homini cuilibet sua ratio, & ratio Dei Deo erit lex; eritque extra dubium omne positum, entia rationalia, Deum, Angelos, homines, nihil moraliter agere, nisi ratione duce: nam Deus, & mentes aliæ, ut nihil agunt libere, nisi voluntate; ita nihil moraliter sine ratione; est enim voluntas, ut alibi dictum est, mentis ex ratione appetitus ac determinatio. Tametsi est infinitum inter Deum, & creaturas rationales discrimen, quum in aliis, tum præsertim quod ad hanc rem spectat. Nam Dei ratio summa est, & absolutissima; ut idcirco non egeat alterius ratione, quo recte & sapienter agat: contra vero quum aliæ creaturæ rationales finita sint ratione præditæ, nisi illa suprema Dei ratione regantur, idest æterna regula & lege quocumque tandem modo iis promulgata, longe ab eo fine, quem natura sua spectant & appetunt, quique & universi finis est, ac sublime positus, aberrare possunt.

§. III. Si cum altera notione, quæ ejus vocabuli propria est, dum de legibus differitur, legis vocabulum accipiatur, erunt ejus proprietates *essentiales* omnino quatuor: 1. ut sit ratio summa: 2. ut sit ratio ejus, qui jure imperet: 3. qui ea subditos obligare velit: 4. & possit. Principio enim nisi lex sit summa ratio, indigebit ipsa alia ratione, qua regatur; neque idcirco esse poterit aliorum norma. Deinde nisi is, cujus ratio lex est, jure imperet, jure quoque ei non pareatur; ut si adigere velit ad obsequium, sit injustus. Præterea nisi velit obligare, admonitio potius & consilium erit, quam lex. Tandem nisi possit ad obsequium

quum rebellantes adigere, tota inutilis jacebit. Quibus ex rebus sequitur, solam æternam Dei rationem ejus voluntate & potentia suffultam veri nominis legem esse, & quidem perfectissimam: ceteras vero quantum de illa participant, quod est & a Cicerone observatum. Sequitur quoque falli eos, qui legis naturalis nomine intelligunt dictata humanæ rationis velut a Dei ratione & imperio præcisa abstractaque: sunt enim vero hæc rationis humanæ scita & pronunciata ipsa per se nec summa, nec talia, quæ homini lex esse possint. Informantur quandoque etiam a nostris utilitatibus, ut nihil sit facilius, quam esse erronea. Lex autem & extra omnem erroris aleam constituta sit necesse est, & vim subditos obligandi habeat. Quocirca probare nequeo Richardum Cumberlandum, qui hæc tantum rationis naturalis decreta pro integris legibus naturæ habere videtur (a).

§. IV. Hoc autem modo explicata quæstione, paucis ejus nunc historiam enarremus. Nihil esse natura justum aut injustum, honestum aut turpe, ~~bonum~~ aut malum morale, sed omnia hæc consuetudinibus, & legibus humanis originem debere, plures quum apud veteres, tum præsertim recenti memoria professi sunt. Nam apud Græcos Plato (b), & Aristoteles (c), & Laertius (d), & Plutarchus (e) quosdam ejus opinionis Auctores commemoraverunt. In primis celebre est dictum illud Calliclis in *Gorgia* Platonis, qui quæ Philosophi de justitia veluti ex naturæ fontibus disserunt, vocat *speciosa præter naturam adinventæ*, & *hominum deliramenta*. Aristippi Cyrenaici vox erat, nihil esse in natura justum, vel bonum, vel turpe: verum omnia lege (civili nempe) & consuetudine definiri (f). Eadem fuit Democritorum, & Epicureorum doctrina,

ex

(a) De legibus nature adversus Hobbium cap. 1. §. 1.

(b) Lib. 10. de legibus.

(c) Lib. 1. ad Nichomachum cap. 1. & alibi.

(d) Lib. 2. segm. 16.

(e) In Vita Alexandri Macedonis.

(f) Laert. lib. 2. segm. 143.

ex quorum mente illud scribit Horatius :

Nec natura potest justo secernere iniquum .

Sola est utilitas justī prope mater , & equi .

Lib. i. satyr. 3.

In quo erant systemati suo mundano conformes . Scilicet sublata providentia , ne summus quidem ullus esse potest mundi imperator ; ex quo porro sequitur , ut & communis imperantis reverentia ac metus , & fides , & societas humani generis , & una excellentissima virtus justitia e natura tollatur , quemadmodum perspecte observatum est Ciceroni (a) .

§. V. Nihil hoc in loco dicam de Scepticis ; nam quum eorum schola , nihil sciri , nihil comprehendī posse doceret , non liquere prædicabant , justum ne esset aliquid natura , necne . Videri potest Sextus Empiricus Hypothiposeon Pyrrhonicarum Lib. III. cap. 22. Sed omnium celeberrimus idem & audacissimus fuit Carneades novæ Academiæ conditor , qui in sophisticiæ artis ostentationem , quum Legatus ab Atheniensibus ~~Karar~~ missus esset , apud Senatum uno die pro justitia disertissime disseruit : altero vero contraria disputatione justitiam evertit : quo factum est , ut Cato Censorinus , qui utrique disputationi interfuerat , velut hominem perniciousum cito dimittendum curaverit . Nec vero ab eadem sententia alieni fuere , qui Principes nullis omnino teneri legibus per nefariam adulationem docuerunt , quib^{us} cum Alexandro Magno fecisse Anaxarchum , scribit Plutarchus . Celebratum est Euphemi dictum apud Thucydidem (b) : *Regi , aut civitati imperium habenti , nihil injustum , quod utile .* Et Taciti aliud lib. xv. Annalium : *in summa fortuna id æquius , quod validius . Omnia esse virorum sortium* Gallorum Dux Romanis edictavit . Recentiori memoria , diversa licet via & ratione , in eadem re docenda conspiraverunt Thomas Hobbius , & Benedictus de Spinoza ; quorum ille in libris de Cive , & in Levia-
tha-

(a) Lib. i. de nat. Deorum cap. i.

(b) Lib. vi.

thane ; hic in Tractatu Politico , qui imperfectus inter opera ejus posthuma extat , jus naturali cujusque potentia metiuntur , ut tantum cuique liceat , quantum viribus suis pollet . Cum lex istiuscemodi moralis cum ordine ac mundi providentia copulata sit ; facile apparet , non posse illam tolli , nisi Deo & providentia e mundo ablegatis : una eademque quaestio est . At isti eo tendebant : nam ille corpus esse Deum aperte docuit : alter cum toto mundo perturbavit . Quo in loco licet animadvertere , has ejuscemodi impurorum voces , non e natura esse expromtas , sed ex calida perversaque ratione , qua naturæ sensus reprimitur ; nec generis esse humani , sed eorum (quod dolendum) qui ceteris sublimius sapere videri volunt ; quosque naturalis Civitatis perduelles desertoresque dicere possimus .

§. VI. Sunt vero alii , qui licet & Deum esse ponant , & ab eo sancte administrari omnia concedant , negant tamen natura ipsa quidpiam justum , & honestum aut esse ; aut si quidpiam sit , perspicui discere naturaliter a nobis posse . Qui item in duplici sunt classe : nam quidam non negant in æterna Dei ratione ac intelligibili mundo , unde noster hic est expressus , primas justitiæ , & sanctitatis notiones contineri , quæ sint leges æternæ , normæ quæ primis voluntatis Dei liberæ , tum etiam ceterorum spirituum : sed inficiantur , ejusmodi leges ratione naturali intelligi posse : adque , quod est conlectarium , legibus aut revelatis , aut humanis justum & injustum definiendum esse doceant . Quod tantundem est , atque fateri rotunde , nullam esse naturæ legem , idest talem , quæ ratione hominis naturali ac communi promulgetur , atque inter homines omnes propagetur ; ac proinde nationes Telluris diversas , præsertim diversarum religionum , nulla communi lege teneri , nec sibi mutuo justitiam ullam debere . Ego in hac opinione fuisse censeo Lactantium , virum alioquin disertum , nec indoctum . Alii vero post Okamum celeberrimum illum Nominalium Sectæ conditorem , non pauci e schola , & Renatus ipse

ipse Cartesius (a), voluntatem Dei velut præcisam ab æterna ejus ratione fontem universi juris esse dicunt, ut quod Deo placuit, id continuo sit justum. Hoc ego in erratis pono, non quod non sit justum & sanctum quodcumque Deo placuit; nihil enim ei placere potest, quod naturæ & sapientiæ suæ non sit consentaneum; nec est illius naturæ quidquam consentaneum, quod non sit justum & sanctum: sed quod ante omnem Dei voluntatem (liceat hoc in loco ad mentis nostræ brevitatem accommodare loqui), in ipsa ejus natura & intellectu ratio inest justæ & sanctæ. Itaque inde Dei voluntas, ut ita dicam, informatur, ut nihil velit, nisi quod justum sit & sanctum (b).

§. VII. Pluribus hujuscemodi errores confutarunt olim & Platonici, atque Stoici, & nuper viri doctissimi Hugo Grotius in Prolegomenis ad libros de *Jure belli & pacis*; Cudworthus in libello de æternis justis & honestis notionibus *Systemati Intellectuali* addito; Richardus Kumberlandus de *legibus naturæ* adversus Hobbesum; Puffendorfius lib. II. de *Jure naturæ & gentium*; Huberus de *Civitate*, alique pene infiniti. Nos paucis. Ac principio eos, qui negant posse naturam justo secernere iniquum, uno argumento refutabimus. Deum esse, idest mentem æternam, intelligentissimam, optimam, atque ab eo quum cetera, tum præsertim homines gubernari, ex Superioribus patet. Exigit autem horum gubernatio, ut legibus naturæ singulorum adaptatis regantur, quæque finem suum consequantur; ergo providentiæ divinæ interest, nominem ad finem suum agere legibus, quæ humanæ naturæ aptantur. Constant jam homines duplici vita, ani-

(a) Resp. ad object. sextas. Vide ut cum hominis errorem redarguit Cudworthus de æternis justis & honestis notionibus cap. 3.

(b) In Deo, inquit sæpe S. Thomas perspectissime, sapientia dirigit, voluntas imperat, potentia exsequitur. Est enim voluntas appetitus superior, seu rationalis; concipi ergo nequit sine ratione, in Deo omnis ratio est summa; adeoque summa regula. Qui igitur voluntatem Deo omnis rationis adspersantem tribuunt, ejus omnem funditus subvertunt naturam, ut non immerito pro atheis haberi debeant.

animali, & rationali; quarum nec prior sine legibus mechanicis consistere potest & ad finem suum tendere; nec posterior sine legibus moralibus, idest sine legibus, quæ rationem humanam virtutis & vitii notionibus informant, ac sanctione regant; utrisque ergo legibus homines Deus gubernet necesse est, si quidem & est, & ullam mundi habet procurationem: est autem, & mundum sapienter procurat; utrisque ergo legibus mundum regit. Et priores quidem, idest mechanicæ, quum non in rationem nostram agere debeant; notæ nobis sint, an ignotæ, nihil omnino refert. At posteriores ignotæ inutiles; oportet ergo, ut eas omnibus promulget. Quum ea promulgatio communis esse debeat, necesse est ut natura fiat; quum constet revelationem nunquam fuisse omnibus nationibus, omnibusque individuis factam (a): Regitur autem ratio in iis, quæ vitam hominis moralem spectant, legibus ex fine hominis desumptis; ergo hinc petenda ratio legum naturalium exploratrix atque interpretatrix. Est, porro hominis finis beatitudo: ex hac ergo ~~ratio~~ ~~haurienda~~ est legum naturalium exploratrix, ~~atque~~ ~~interpretatrix~~: nempe Deum vetare quacumque unquam hominem infeliciorem efficere possint, præcipere vero, quæ conservare sunt apta, & beatum facere. Postremo virtu-

Tom. IV.

E

te

(a) *Ac facta quidem fuit stipitibus humani generis Adæ, ac Noë: ex qua haud abnuerim aliquas scintillas ad posteros manasse, quod omnium capere ac docte demonstravit Bochartus in Geo. sac. Sed postquam totum pene hominum genus ad agrestem vitam flexit, & his ejusmodi fragmenta mille fabulis incrustata per-versaque pro integra naturæ lege habeat in barbaris aut profanis nationibus? Itaque quod magno studio, atque apparatu egit Seldenus, ut totam nationum omnium iustitiam, legesque omnes e præceptis Noachidis convivaret, haud ab eo mihi incepto absimile videtur, quo Homerici nostri ab Homeri poematibus scientias exprimere adlaborant; aut quod tanto apparatu egit Huetius, ut omnes Dii, Deæque, ac Semidei Gentium, Moses sint & Sephora. Præsertim cum Rabbinorum scriptis se decipi, vir alioquin magnus, tam sæde sit passus, Talmude, Misnâh, idque genus aliis, quibus ne Græcæ quidem fabulæ sunt mendaciores; quod quis ex Jacobi Basnagii Judæorum historia facile didicerit. Vide & History of the dispersion of the Jews tom. XIII. in 8. of an universal history Anglorum.*

te creatur beatitudo, vitiis miseria cum in integris gentibus, tum in singulis familiis, ac personis; itaque lex exstat in natura, ac cum natura promulgata, qua virtutem sectari nobis præcipitur, cavere vitia. Vide Tullium lib. 1. de legibus. Ita refelluntur ii, qui non natura, sed opinione constitutum esse jus docent. Accedit quod omnibus natura ipsa constat, homines gigni suarum proprietatum conscios amantisque; quod cuique in proprietate est, jus est; cum ingentis ergo nascuntur juribus. Est autem contradictorium, jus aliquod esse in mea proprietate, nec tamen ita meum, ut non vetitum sit aliis mihi illud præripere; vetat igitur summa Dei voluntas jura cujusque invadere. Id natura ipsa discitur, ut naturaliter agnoscuntur jura: ergo naturaliter intelligimus esse legem jurium cuique suorum vindicatrix. Hæc naturæ lex dicitur.

§. VIII. Facillime quoque refelluntur, qui secundo loco sunt memorati. Et ii quidem, qui negant in ratione naturalis ac hominum conscientia esse vim, qua prima saltem legis naturæ capita intelligantur (nam in ceteris non pugno) superiori argumento aperte confutantur: constat enim ex eo, esse in natura humana dictamina quædam rationis, quibus pleraque Dei imperia intelligimus: tum etiam productis legis naturalis principiiis cognoscitivis, ut vocant, quod inferius efficiemus. Ac vero qui ita consent, ii eos omnes, ad quos revelatio aut facta non est, ad fandum nunquam pervenit, nulla lege, nulloque iusti & honesti criterio naturali uti, fateri coguntur, ac proinde ne peccare quidem ullo modo (a): ex quo sequitur, ut injuste ii malis, quæ sunt in natura, saltem extraordinariis quibusdam suppliciis, afflicentur, quæ, ut dictum est, hac ratione cum Dei bonitate componantur si sint poenæ, quibus aberrans hominum voluntas ad leges iusti & honesti revocatur. Qua ex re intelligitur,

(a) Inde natum est monstrum illud peccati philosophici, quod ipsi Ethnici ignorabant; qui Θεινὴν εὐκρασίαν, ut vocat in Medea Euripides, in Numinibus habebant.

tur, hanc opinionem cum Dei bonitate & providentia pugnare, quæ ut non patitur, vitam hominis animale nullis regi legibus mechanicis; ita pati non decet, ejusdem vitam rationalem ac moralem, quæ multo est præstantior, sine legibus moralibus traduci. Quid, inquit aliquis, si, ut in hunc statum devenirent, homines primorum parentum scelere commeriti sunt? Non video id sequi: boni enim & sapientis principis non est, quo vetera scelera deleantur, regulam justii ab injusto discernendi adimere, quo plura & majora admittantur. Accedit, quod recta ratio omnibus constet, saltem in præcipuis vitæ humanæ negotiis, ubi recte homo utatur: nam si ego existimo, humanam rationem non tam natura, quam educatione & vitæ commercio tam esse in hominibus depravatam; seu eam depravationem, quam educatio induit, longius sæpe ire, quam ea est obumbratio, quæ est a natura (a). Igitur perversitate morum lex naturæ obscurari adumbrarique potest ac perverti: funditus deleri nequit, ut nusquam appareat.

§. IX. Ex natura igitur divinæ providentiæ & bonitatis consequitur manifesto, non solum esse debere in natura leges humanæ vitæ directrices, verum etiam principium earum cognoscendarum manifestum & certum, saltem quod ad prima pertinet capita. Nam ut omnes homines in singulis officiis plene instituantur, id e sola cujusque ratione fieri difficillimum esse intelligitur, quum ob alias causas, tum ob hanc præsertim, quod non omnes tantæ animi capacitatis & intentionis esse possint, potissimum a curis vitæ animalis dis-

E 2

tra-

(a) Hæc ejusmodi theologorum opinio pugnat cum ipsis Scripturis, præsertim cum doctrina Pauli in ep. ad Romanos; in qua aperte dicit, omnes Gentes cognovisse το δικαιωμα της Θεας (cap. I. v. 32.) justitias Dei; idque propter legem scriptam in cordibus suis. Illud dicet quispiam, quid istuc est, quod idem Apostolus ait eadem epist. Εγω δ' εζων χωρις νομου ποτε (cap. VII. v. 9.) Ego eram aliquando sine lege. Respondeo το ego hic Judeos significare, qui fuerunt aliquando, nempe in Ægypto, sine lege scripta, seu per Moysen data ac sancta: nunquam vero sine lege in animis inscripta. Quid si illud ποτε, pro quasi positum sit? Sunt enim qui putant.

tracti. Oportet itaque, ut dictum est, esse in natura principium legum vitæ directricum cognoscitivum. Quum autem id principium esse debeat toti hominum generi commune; nec toti hominum generi communis sit revelatio (a); sola superest ratio, cujus via hujusmodi leges hominibus omnibus promulgatae sint. Et conficitur quidem humana ratio duobus, *facultate ratiocinandi*, & *notionibus*, seu *principiis quibusdam*, quæ omnis ratiocinatio inædificatur. Oportet ergo & facultatem circa bona aut mala, justa aut injusta ratiocinandi, & notiones quasdam scientiæ moralis genitrices, seu e natura ipsa humana erumpentes, seu ex natura rerum proficiscentes, seu undecumque tandem delabentes, omnibus esse hominibus communes (b). Id vero sic se habere tota humana historia docet. Nam primum de facultate ratiocinandi qui litem serio moveat esse video neminem: nemo enim hominum est, aut existit unquam, qui seu circa magna, seu parva non sit utatur ratione, sibi que aliquid concludere persuadeat. Quin, nemo est, qui non acutissime & recte ratiocinetur in iis rebus, cum quibus diu versatus est, id quod barbararum ipsarum gentium exemplo constat. Deinde esse notiones quasdam primas & immutabiles, quæ ex mundo, ejusque ordine, & hominis fine, ac convenientia cum natura rationali, deducantur, & ex quibus Dei leges naturaliter percipiuntur, id ex iis, quæ inferius sumus dicturi, ~~est~~ perspicuum. Ut vero multa paucis comprehendamus, atque in antecessum dicamus, quis ignorare potest, qui Dei, sui ipsius, aliorum hominum naturæ non sit plane inscius, oportere esse Deo amicum, a quo est: tum sibi, qui est, ac esse natura sua amat: tandem aliis, quibuscum naturam habemus communem, ac sine quorum societate esse nequimus? Itaque vel barbarus intelligat necesse.

(a) *Psalm. 147.* Non fecit Deus taliter omni nationi, & judicia sua non revelavit eis: seu, ut est in *Hebræo*, jura ejus non noverunt. Hic jura pro *δικαιώμασι*, sanctionibus positivis.

(b) *Habitus practicos vocat S. Thomas, eosque innatos habet, potestate scilicet & vi, non εὐσφραγίστα ἄκτου: nam anima huc venit instar tabulæ rasæ. 1. p. 4. 85.*

cesse est, ea esse efficienda omnia, quibus hæc amicitia & confirmetur & foveatur: & ea evitanda, quibus aut possit extinguï, aut dissipari. Tum quis ignorare potest, *sua cuique jura tribuenda*, jura vero cujusque esse quæcumque in ejus sunt proprietate? Sed hæc postea.

§. X. Constat ergo rationem suam Deum hominibus per creationem communicare, qua vita humana sapienter, juste, honeste transigi possit: nam ea sapientia & factus est mundus, & regitur, ut necesse sit ab homine mundi parte naturaliter sentiatur. Id superest, ut ostendamus, Deum velle his scitis, hac ratione, homines vivere; nisi enim ita sit, longe illa a ratione legis, ut dictum est (§. II.) abest. Id vero sic paucis confici potest. Deum de suo in res omnes imperio nihil remittere, perpetua rerum omnium cura & providentia demonstrat. Ac vero ne decet quidem illum huic imperio renuntiare: pugnat enim non modo cum ejus natura, quæ ut est rerum omnium effectrix, ita non potest non esse conservatrix; sed cum ejus quoque bonitate, quæ iis prodesse amat, quæ ut nequeunt suapte esse natura, ita sua vi bona & perfecta esse non possunt, nec fines suos contingere, nisi a Deo & moveantur, & regantur. Vult ergo Deus, ut creaturæ rationales supremi illius imperii vim & rationem observent, turbaturæ alioquin sui ac naturæ ordinem. Quumque intelligat naturam humanam ita a se esse procreantem, ut voluptate & dolore determinetur, & ad agendum, & ad cessandum; dubitare non possumus, quin ut homines præstantissimam hanc regulam sequantur, pœnis obligare velit, aut præmiis animare: alioquin inutilis tota illa cura futura esset. Non negaverim, si puram naturalem rationem consulamus, in hujusmodi pœnarum & præmiorum cognitione læpe cæcutire: sed id nihil prohibet, quin generatim saltem intelligamus, adesse parata (a), quod fa-

E 3.

tis

(a) *Obligatio integra juris naturæ & ad alteram quoque vitam pertinet, & paullo est sublimior: Civilis vero sensibilis totaque patens. Nam pœne naturali legi adnexæ, aliæ quidem hic sentiuntur.*

tis esse nobis debet, quo in officio perstemus. An enim Deum muneri suo, ac sapientiæ deesse dicemus? Sed vero non deest: nam gentis humanæ historiam legentes, nihil reperiemus manifestius, quum tum perpulchre & beate populos egisse, quum sincere Deo, sibi, ceteris amici fuere; idest cum jura coluere: delapsos vero in vitia ac scelera miseros exstitisse. Id accidit ipsum & familiis, & personis. Nemo miser nisi stultitia, & vitio: virtute omnique honestate beatus. Quod quid potest esse aliud, nisi legis universi confestarium? Est igitur in natura, & manifestum, vitæ beate transigendæ decretum; & palpabilis, ut ita dicam, atque perpetuo vicens sanctio. Sed movet paucorum improborum felicitas, aut miseria proborum. Quæ cur ego falsa habeam & dictum est in tertia parte,

riuntur spectanturque; aliæ nec spectantur, & remotiores sunt. Quum autem homo qualis nunc est, ingenio sit sæpe perverso, illis tantum, quæ perverse sentiuntur, gubernari nequit. Nam & stulti sunt plures, & in dolore perferendo indurvere. Hinc nata necessitas sanctionum Civilium. Interim evadere possunt admodum sensibilia præmia & pœnæ juris naturæ, nosque satis regere, si in animum sæpe revocemus; magnam vitæ tranquillitatem sequi, ubi ex recta ratione & virtute congruenter vivamus; miseriam vero magnam, ubi cupiditates nostras sequi velimus. Nam ego id sæpe, dum nationum historias legerem, observavi, non in cultioribus tantum gentibus veræ virtuti magnos tribui honores, sed etiam in barbaris, ut si non sæpè virtutis cultores præmiis cumulentur, & perituris bonis, quædam vitam agere sinantur, quod primum est virtutis præmium. Neque enim ego veram virtutem dixerim eam, quæ qui præditus sibi videtur, indignetur, se negligi, nec ad prima Reip. munera crebi. Virtutis præmium maximum est, ut a turbis remoti tranquille vivamus; quo qui contenti non sum, falsæ virtutis specie & se & alios deludificant. Id ipsi Epicurei intellexere. Lucret. lib. II.

O miseras hominum mentes, o pectora cæca!

Nonne videre

Nil aliud sibi naturam latrare, nisi ut, quam

Corpore sejunctus dolor absit, mente fruatur

Jucundo sensu, cura semota, metuque?

Ergo corpoream ad naturam pauca videmus

Esse opus omnino, quæ demant cumque dolorem;

Delicias quoque uti nullas substernere possint.

Gratius interdum neque natura ipsa requirit.

te, & dicetur uberius in dissertatione *de origine malorum* tom. v. (a).

§. XI. Est porro Deus potentissimus, qui ejusmodi pœnas exigere possit: justus & incommutabilis, ut velit; suprema ergo ejus ratio homini naturaliter communicata, omnibus, quod ad prima saltem capita, intelligibilis, absolutissima naturæ lex est. Quibus constitutis, particulatim in hujus legis notiones primas & æternas inquirendum est. Sed omnium primum ii confutandi sunt, qui nuper quum legem naturæ explicare videri vellent, totam, ut mihi quidem videtur, stirpitus evellerunt.

C A P U T V.

Systema legum naturalium Thomæ Hobbesii enarratur.

§. I. **A**uctores ego recentium impurorum, quod ad juris naturæ theoriam attinet, duos facio, Hobbesium, & Spinozam, magnæ naturæ civitatis, ut ego quidem existimo, perduelles. Hobbesii nunc dogmata enarremus ac cribremus, mox Spinozam petaturi. Duo edidit Thomas Hobbes opera, in quibus Juris istiusmodi humani generis communis naturam & origines aggressus est explicare, seu in quibus potius jus omne naturale subvertere conatus est: alterum *de cive*, alterum *Leviathan*, seu *de materia, forma, & potestate civitatis*, & *civilis*. Et opusculum quidem de cive pluries cūsum, & recusum est. Leviathan cū ceteris Hobbesii operibus Amstelædami anno 1668. duobus tomis in 4. Liber de Cive viris quibusdam doctis impense placuit, quod geometrica prorsus methodo Philosophiæ moralis principia comprehensa parvo libello tradantur, & pleraque contineantur præclare observata, & demonstrata adcurate. In primis vero Gassendus & Mersennus in Epistolis Samueli

E 4

Sor-

(a) Copiose doctæque totam hanc rem edisseruit Bolingbrokius; qui si crudis quibusdam dogmatibus abstinuisset, rem hominibus fecisset vix ulla encomio satis laudandam.

Sorberio datis librum vocant *aureum*, & dignum, qui omnium, qui altiora sapiunt, manibus teratur: & Pufendorfius copiose laudat præfatione in libros de jure Naturali & Gentium, *velut in quo sint quadam quantivis pretii*. Sed aliter de eo populares sui judicant, quibus scilicet Auctoris scopus notior erat. Samuel Parckerus disput. 1. de Deo & Providentia contendit, Hobbium nihil nobis aliud obtulisse, nisi quod apud veteres in Epicuro reprehensa invenimus. Richardus vero Kumberlandus ex instituto illum & docte confutavit in opere *de legibus Naturæ*. Becherus velut imperitum earum rerum, quas de moribus scripsit, accusat, ejusque nefaria dogmata paucis exprimit. *Justum*, inquit, & *injustum perperam æstimat: legem male definit: principem impie solvit lege: civitatem, quam adornat, aut deformat, aut evertit: paëtorum religione non multum tangitur*. Quæ si omnia sint vera, quid pestilentius in hominum societatem invehi potest?

§. II. Sed explicemus primum hujus hominis systema totum, mox articulatim expensuri. Efficio autem id tanto libentius, quanto hic liber gratior sæculo nostro, ac nonnullis etiam Italorum est, qui redivivum in eo Macchiavellum nescio cur cernere sibi persuasere. Efficiam autem sine ullo partium studio, non dissimulaturus ea, quæ suum habent pretium, quæ certe sunt aliqua. Jus ille primum a lege naturali secernit. Et *jus* quidem *naturale* vocat *libertatem*, quam quisque natura habet facultatibus naturalibus secundum rectam rationem utendi (a). Non id magis, si eam rectam rationem dicat, quæ lege informata est. Legem vero naturæ appellat, *dictamen rectæ rationis circa ea, quæ agenda, vel omittenda sunt ad vitæ membrorumque conservationem, quantum fieri potest, diuturnam* (b). Hæc non satis plene, ut postea videbimus. Ejus vero super his rebus Philosophia huc redit. Hanc scientiam, legis nempe naturæ & morum, exordiendam esse a principiis non ad libidinem confectis, sed veris, & in natura

(a) Lib. 1. de Cive cap. 1. §. 7.

(b) Ibidem lib. 1. cap. 2. §. 1.

tura insitis, quæque ipsi clare persentiscamus, indeque geometrica methodo tradendam: ea vero principia ex intima hominis natura haurienda. Nihil dici potuit ad rem accommodatius, idque non in hac tantum scientia, verum in omnibus aliis faciendum, nisi desipere velimus. Sed quid magni promissor hiatus?

§. III. Pergit: natura humana diligenter examinata, continuo prodit magnum hoc totius rei moralis principium: *Ingenia hominum ejusmodi esse a natura, ut nisi metu potentiae alicujus communis coercerentur, fore ut sibi invicem diffidant, & sese mutuo metuant, & ut propriis viribus singuli sibi cavere cum jure possint, tum necessario velint* (a). Ei principio addit postulata, ut ille vocat, duo; quorum primum est cupiditatis naturalis, qua quisque rerum communium usum postulat sibi proprium: alterum rationis naturalis, qua quisque mortem violentam, tanquam summum naturæ malum, studet evitare. Utrumque verum: sed ita inde flectit, ut utrumque corrumpat. Ab his principiis (pergit ille in Epistola dedicatoria) pactorum & fidei conservanda necessitatem, atque inde virtutis moralis, officiorumque civilium elementa in hac opella clarissima connectione videor mihi demonstrasse. Hæc ille: in quibus clare videre est astutam hominis mentem, qui e natura humana nec prima, & nostris moribus scædata ac depravata, potius, quam ab ejus primis proprietatibus, ac fine, quem recta ratio præscribit, totius naturalis juris fundamenta excitare conetur. Nam cum hac nos natura aut potius naturæ depravatione pene omnes nunc vivere Adæ filios, id inficias ire nequimus; neque super ea re Hobbio controversiam movere possumus, quando & tota id divina scriptura docet, & omnium hominum vita confirmat: sed ut ex hujusmodi adventitia natura, aut ex primæva quidem, sed male flexa, excitentur totius naturæ juris principia, id Aristoteles ipse pessime fieri dixerit (b). Sed ea de re paulo post.

§. IV.

(a) *Præfatione in libros de Cive, seu in Epistola ad Lectorem.*

(b) *Πρωτον ανδρα desiderabat Aristoteles in politicis, nec dum experiebat.*

§. IV. Videamus autem ut inde philosophatur. Principio homines omnes natura esse æquales ponit: deinde & omnes necessitate quadam naturæ non minore, quam qua fertur lapis deorsum, ferri ad appetitionem ejus, quod sibi bonum, & ad fugam ejus, quod sibi malum, maxime autem maximi malorum naturalium, quæ est mors. Vera hæc. Hinc concludit, secundum rectam rationem esse, ut unusquisque omnem operam det, qua se, suæque conservet, & defendat. Quod autem secundum rectam rationem fit, id jure naturali fit; ergo primum est juris naturalis fundamentum, ut quisque vitam & membra sua, quantum potest, tueri possit. Nihil concludi rectius potuit. Sed incipiunt aberrationes. Præterea cui inest jus ad finem, is etiam ad media jus habet: habet autem homo jus ad vitam tuendam; ergo & jus utendi omnibus mediis, & agendi omnem actionem, sine qua conservare se non potest. Nimis hoc amplum. Judicare autem, quæ nostræ vitæ interfunt, non aliorum est, sed nostri (& hoc anceps) ergo secundum suam cujusque rationem peculiarem utriusque potest quilibet jure & mediis vitæ conservandæ & tuendæ.

§. V. His sic expositis pergit ulterius, atque statuit, in statu mere naturali, idest ante, aut extra imperium civile, omnia esse omnium, idest unicuique licere facere quæcumque, & in quoscumque libet, quæ sua interesse putet. Atque idcirco, concludit, in statu naturali mensuram juris esse æqualitatem (a). Hoc nimis crudum, perversumque. Idcirco jus in statu naturali inutile esse censet. Nam quum omnes alii velut natura æquales æquale jus habeant, ac vim æqualem, ob quæ nemini ulla re uti licet tuto; effectus juris nullus est. Ob hoc igitur jus æquale, & ob naturalem hominum proclivitatem ad se mutuo lacerandum, efficitur, ut status hominum naturalis sit status mutui belli. Enimvero bellum est is hominum liberorum status, in quo juris sui persequendi gratia per vim & dolum concertant, quemadmodum Cornelius ipse

Van-

(a) Lib. 1. de Cive, cap. 1. §. 19.

Van-Binchkerfoechius definit (a) : habent autem omnes homines naturaliter jus in omnia , atque ad ea persequenda a natura incenduntur ; tum vi , & dolo concertant , quod Gentium quarundam barbararum , ac extra Rempublicam positarum luculenta exempla docent : in mutuo ergo bello versantur , quoad status ille naturalis perdurat . Et hæc vera , *facto* licet , non *jure* .

§. VI. Jam mutuum hoc bellum , mutuusque metus ad homines conservandum nullo pacto idonea esse possunt . Qui enim conservari possunt in eo statu , in quo ad mutuam perniciem armantur omnes ? Ergo amor ille nostri proprius & necessarius , ex quo , inquit , jus in omnia deducimus , quemlibet docet , ut de jure illo aliquid remittamus , ac de statu naturali concedamus in Rempublicam . Id vero fit per pacem . Nihil enim aliud bello est adversum , nisi pax . Ergo primaria notio legis naturalis , seu primum dictamen rectæ rationis ad nos conservandos est , *quærendam esse pacem , quatenus habendæ ejus spes aliqua affulserit : ubi ea haberi non potest , circumspiciendæ esse belli auxilia* (b) .

§. VII. Ex quo principio cetera peculiararia legis naturæ præcepta derivat , eaque paucis verbis complectitur . Ac principio jus in omnia non esse retinendum ratio dictat , nulla enim inter homines pax iniri potest , nisi ejus juris remissione quadam . Remittitur autem aliquid de *jure* in omnia *pactis conventis* , quæ quædiu duræ facta tecta , tamdiu habetur pax ; ergo inde sequitur manifesto altera naturæ lex , *pactis standum , sive conventionum fidem servandam , tanquam conciliandæ paci necessariam* .

§. VIII. Tertia porro lex est , *ut beneficio beneficium quum possis rependas* . Ea lex ad pacem magis magisque constabiliendam & confirmandam necessaria est : nam a pace ad bellum non subito fit transitus , sed veluti per gradus , quorum primus est , *denegata gratitudo , humanitas , benevolentia* . Quorsum etiam tendit

(a) *Juris publici lib. 1. cap. 1.*

(b) *De Civis cap. 1. §. 15. & cap. 2. §. 11.*

dit IV. lex , *ut unusquisque se ceteris commodum præstet* . Qui enim alteri incommodus & molestus est , cum paullatim ad bellum incitat , quod vitandum , ex superioribus .

Ex eodem porro pacis conservandæ principio , atque imminuendi hostium numeri , sequitur . V. Hobbesiana lex , *oportere alterum alteri , sumta cautione futuri temporis , præteriti veniam , petenti & pœnitenti , concedere* . Nisi enim concedas , bellum te fovere manifesto argumento ostendes ; id vero est , quod naturæ primaria lex vetat .

VI. Lex est , *In ultione , sive pœnis , spectandum esse non tam malum præteritum , quam bonum futurum* : nempe ut præclare Seneca post Platonem , *Nemo punit , quia peccatum est , sed ne peccetur* .

VII. Vero lex est , *Ne quis vel factis , vel verbis , vel vultu , vel risu alteri ostendat , se illum vel odisse , vel contemnere* : nam hæc omnia ad rixam , & pugnam maxime omnium provocant .

VIII. Lex est , *ut unusquisque natura unicuique æqualis habeatur* . Nam inæqualitas , quæ nunc obtinet inter homines , a civitatibus , civilique lege profecta est , eaque a natura ignoratur .

IX. Lex est , *ut quicumque jura unusquisque sibimet ipse postulat , eadem etiam unicuique ceterorum concedat* : alioquin æqualitatem naturæ evertit , & ad bellum irritat animos .

X. Est , *ut unusquisque in jure aliis distribuendo trique parti æqualem se præbeat* : quæ res confectæ uni est duarum superiorum .

XI. Lex : *quæ dividi non possunt , communiter , si fieri potest , utenda esse , idque , si quantitas rei permittat , quantum quisque velit : sin quantitas rei prohibeat , præfinite , & proportionem ad numerum utentium* .

Quod si neque dividi , neque communiter res haberi potest , tum utendum est XII. Naturæ lege , quæ præcipit , secundum Hobbium , *ut ejus rei usus vel alternus sit , vel uni tantum sorte adjudicetur , utque in alterno usu sorte quoque , uter prior utatur , judicetur* .

XIII. Lex : *quomque fors vel sit naturalis , ut primo-*

mogenitura, vel prioritatis occupationis, vel arbitraria, quæ nempe statuta sit consensu contendentium; sequitur inde decimum tertium legis naturalis præceptum. *Quæ neque dividi, neque communiter haberi possunt, aut cedant primogenito, nisi pater jus illud transfulerit, aut sint primi occupantis.*

XIV. Lex est: *pacis mediatoribus præstandam incolumitatem*: nam quum sine iis vix iniri possit pax, nisi ea incolumitas iis præstetur, nullus erit incundæ pacis modus.

XV. & XVI. Lex: In disputatione super applicatione harum legum ad facta servanda est 15. & 16. lex, *oportere utrumque de jure inter se disceptantium submittere se alicujus tertii arbitrio: neminem esse arbitrum sui ipsius*. Nimirum difficillime disceptantes in causa propria æqualitatem juris servare possunt.

XVII. Lex: *neminem arbitrum esse oportere, cui commodi vel gloriæ spes aliqua appareat major ex victoria unius partis, quam alterius*: quod scilicet non possit æqualitatem servare.

XVIII. Lex: *si autem controversia sit de facto, quum alter factum negat, alter ait, arbiter neutri credat, sed ubi signa certa facti non apparent, ibi secundum testes, qui utrique parti videantur æqui, sententiam ferat*.

Ex quibus sequitur XIX. Lex: *Nullum pactum vel promissum intercedere debere inter arbitrum, & partes, cujus vi cogatur in gratiam alterutrius pronunciare*.

XX. Tandem lex est, *ne ebrietate ratiocinandi facultas labefacteretur*. Quæ lex nimis peculiaris est, ut ple-ræque aliæ Hobbesianæ, quæ idcirco in leges naturæ primarias collocandæ non erant. Nam si consuetudina quoque interferere voluit, hoc ipsum XX. præceptum ad omnes affectus extendere debuit, qui æque ut vinum inebriant, ac rationem de loco suo deturbant; atque hanc præ illa præcipere, *modum, nempe ac modestiam, temperantiamque animi in vita servare oportere*.

§. IX. Porro super his legibus hæc censet. i. Eas semper & ubique obligare in foro interno, sive in conscientia, non semper autem in foro externo. Nempe etiam quum extrinsecus observari nequeunt ob neces-

cessaria impedimenta , retinendus adhuc est in illas amor & obsequium , atque perpetua & constans voluntas secundum eas vitam instituendi . Extrinsicus autem minime servandas docet , quum ceteri non servant : tum enim qui observat , cedit in non observantium prædam , atque idcirco contra rectam rationem facit , quæ nos tueri oportere dicitur (a) . Præterea leges naturæ immutabiles , & æternas esse dicit , ut quod vetant , nunquam licitum esse possit ; quod jubent , nunquam illicitum . Quod ita intelligit , non ut nunquam extrinsecus eas violari nequeant ; sed ut nunquam fas sit animatum esse adversus illas (b) . Tandem eas leges , quum sint conclusiones quædam ratione intellectæ de agendis , & omittendis : lex autem proprie & accurate loquendo sit ratio ejus , qui aliquid fieri , vel non fieri aliis jure imperat ; non esse proprie loquendo leges , quatenus a natura procedunt , sed quatenus a Deo in scripturis sacris latæ sunt (c) . Copiose vero cap. iv. demonstrat leges illas in scripturis divinis clare positas esse . His tandem peractis totum Philosophiæ Moralis corpus inde conformare studet .

C A P U T VI.

Hobbesianum systema excutitur : principia falsa consutantur . Leges ex se spectatæ atque e veris principiis ductæ veræ ac pulchræ .

§. I. **A**Tque hujusmodi est systema legum naturalium Hobbesianum , tale scilicet , in quo veris præceptis falsa sunt admixta principia , quæ totam doctrinam moralem labefactare possint . Nos singillatim singula expendemus , ac altera ab alteris discernemus ; tum solidis argumentis quæ sunt falsa refellemus . Principio legis naturalis definitio multipliciter peccat 1. Dictamine rectæ rationis intelligi quidem

(a) *De Cive cap. 2. §. 27.*

(b) *Ibid. §. 29.*

(c) *Ibid. §. 34.*

dem naturæ ordo potest, atque ex eo leges nobis convenientes derivari : at effici nequeunt : seu dictamen rectæ rationis principium esse potest legum naturæ *cognoscitivum*, ut vocant, non obligationum, seu lex naturæ propriæ dicta . Itaque lex naturæ est ratio imperantis Dei dictamine rationis humanæ promulgata, non ipsum humanæ rationis dictamen velut ab illo imperio abscissum . *Lex*, inquit de hujuscemodi lege Cicero in primo de legibus, *est RATIO SUMMA insita in natura, quæ jubet ea quæ facienda sunt, prohibetque contraria* : summam dicit, quæ a supremo dictatur imperante . Hæc igitur duo dum ille miscet, inde eam conclusionem deducit, qua leges omnes naturæ pervertit, nimirum eas proprie loquendo leges non esse, nisi quatenus in divinis Scripturis revelatæ sunt . Quod tantumdem est dicere, atque rectam rationem regulam quidem esse humanæ vitæ qualemcumque, minime tamen quæ legis habeat rationem & vim; quum neque perfecta esse possit ratio humana, nec sibi pœnas minari, sine quibus nulla lex plena est; ut superius demonstratum est . Itaque demonstrandum ei erat, hæc dictamina cum Dei voluntate esse copulata, idque, ut ita dicam, ligamen naturali ratione cognosci posse; eoque evadere illas perfectas naturæ rationalis leges, quod is non ignorabat (cap. 15. §. 3.) . Nam quæ lex sine sanctione esse aut concipi potest? quæ sanctio sine imperante? Qui mundi imperans nisi summa atque æterna ratio, ejus effectrix ac moderatrix?

§. II. Præterea ea verba, *ad vitæ membrorumque conservationem, quantum fieri potest, diuturnam*, nimis arctum temporis spatium, nec totum objectum legis naturæ continent . Enimvero quum duplici vita sit homo præditus, animali, & rationali; sitque rationalis, immortalis; necesse est ut ultra hanc vitam legis naturæ vis & usus extendatur, quo utramque vitam, & quidem pro sui quamque conditione, ea lege ordinemus . At Hobbius, nobiliori vita exclusa, animalem tantum spectat, eamque legibus naturæ procurari contendit . Qui si idcirco facit, quod animos humanos mortales esse credit, ea omnium primum insania re-

pri-

primenda est ; quod a nobis alibi factum est . Sed etiam si demus tantisper mortales esse animos , quum objecta pleraque mentis humanæ diversa sint & distincta ab objectis vitæ corporeæ , non debuit legem naturæ ad solam procurationem vitæ corporeæ restringere : quum bona mentis , quæ Stoici *honestæ* dicebant , longe sint nobiliora , ac ipsa per se amabilia , & *immortalia* , ut ait Sall. Jug. init.

§. III. Scio & Samuelem Pufendorfium in eadem , aut prope eadem , fuisse opinione , non extra ambitum præsentis vitæ disciplinam Juris naturalis pertendere , ac non jurisprudentiæ hujus , sed moralis tantum Theologiæ esse formare hominem ad vitam sempiternam : in quo ille est gravissime a viris doctis reprehensus ; in primis ab ejus interprete Barbeiracio . Nam quum ratio naturalis , cujus lumine disciplina hæc conficitur , doceat etiam , ut ego quidem opinor , animos cum corporibus non interire (a) , non debet ea disciplina ita præsentem vitam spectare , ut alterius obliviscatur ; quia hominis vita non intra breve hujus ævi spatium ab-

(a) Scio esse , qui id a sola revelatione subdoceri existimant . Ego sententiam non mutæ : præsertim cum generis humani sit hæc persuasio . Atque hinc est ut omnes Ethnici Poetæ ac philosophi non hic tantum pro male factis homines puniri doceant , sed & in altera vita , in primis Homerus utroque poetate , & noster Virgilius . Præclare Euripides in *Helenæ* v. 1020.

Καὶ γὰρ τίς τις τῶνδ' ἐστὶ τοῖς τε ἐνερῶν
Καὶ τοῖς ἀνῶθεν πᾶσι νῦν ἀνθρώποις . Ὅ νῦν
Τῶν κατὰχθονίων , ζῆ μὲν εἰς γυναικῶν δ' ἐχσε
Ἀθανάτων εἰς ἀθανάτων ἀδελφὲς ἐμπεσών .

Pœnæ enim manent & eos , qui sub terra conditi sunt , Omnes , & qui hic desuper sunt homines . Animi enim Defunctorum haud ii quidem hanc vitam habent , quam nos , sed sensum tamen retinent

Immortalem , cum immortalī ætheri juncti sunt .

Hæc igitur utcumque ratio ac philosophia novit : sed longe absuit ut & plene nosceret , & eo animo faceret , quo oportuit , & in eum regeret finem , iisque ex causis ac motivis , ex quibus opus fuit . In hoc ergo & manca , & falsa , & sæpe scæda . Præstitit totum hoc theologia . Hujus muneris est hujuscemodi rationem perficere . At aliud est , nihil de altera vita illam aut vidisse aut docuisse , aliud non plene .

absolvitur, sed sempiternitatem spectat. Quare ut nobis fas non est illam dividere, ita eas vitæ rationes inire debemus, quæ ab illa æterna non sejungantur: est enim hæc, quam in tellure agimus, vitæ initium, non vita: nec aliter consideranda, si sapimus. Theologia igitur moralis, & naturalis Jurisprudencia non sine discrepant, ut Pufendorffius putat, sed principiis; quæ illa a divina revelatione haurit, hæc a ratione naturali. Quin ne Auctore quidem: idem enim utriusque dictator, Deus. Quid quod *Evangelica*, *Mosaica*, & *natura lex*, una eademque κατ' εὐλογίαν sunt? non enim substantia differunt, sed modis (a).

§. IV. Veniamus jam ad principia scientiæ moralis, ut ille vocat. Principium illud, *ingenia hominum ejusmodi esse a NATURA*, ut nisi metu potentis alicujus communis coerceantur, fore ut sibi invicem diffidant, & sese mutuo metuant, & ut propriis viribus singuli sibi cavere quum jure possint, tum NECESSARIO velint, utcumque actu verum & consentaneum cum iis quæ sequuntur; nihilominus si ab intima natura, ac naturæ πρῶτος hauritur ab illo, omnem disciplinam moralem frustraneam reddit. Pluribus id ostendit Kumberlandus (b): nos paucis. Principio nego hoc, quod Hobbius dicit, *primum hominum ingenium esse*, ut alii aliis diffidant (c). Metus, diffidentia, odium, sunt affectus reflexi; neque ejusmodi esse primi in natura animali possunt (d). Longa fraudum malorumque experientia indigent ut excitentur, ac nutriantur. Pri-

Rom. IV.

F

mus

(a) *Cathechismus Rom. Part. III. cap. 1. art. 3.* Hanc igitur divinam lucem (legem videlicet naturalem) pene jam pravis moribus & diuturna perversitate obscuratam, cum Deus MOYSI legem dedit, EAM POTIUS ILLUSTRIOREM REDDIDISSE, QUAM NOVAM TULISSE docendum est. . . . Certissimum enim est, non propterea his præceptis parendum esse, quod per Moysen data sunt, SED QUOD OMNIUM ANIMIS INGENITA, & per Christum Dominum nostrum EXPLICATA sunt & CONFIRMATA. Una ergo sunt κατ' εὐλογίαν natura lex, Mosaica, Evangelica, diversimode licet promulgatæ, aliæque alia explanata copiosius.

(b) *Cap. 1. de Legibus Naturæ. Vide l'Esprit des Loix lib. 1. cap. 2.*

(c) *Vide Tull. V. de Finib.*

(d) *S. Th. 1. p. 2. q. 92. art. 1. in c.*

mus ergo naturæ humanæ status est amor similibum. Cautio, & metus, & diffidentia, secundus. Tum nego, necessario nos a natura rapi, ut tales simus. Enimvero si natura ipsa ita comparati simus, ut alii alios metuamus; præterea ut necessario ad nos omnia trahere cupiamus; natura ipsa nostra cum legibus ipsis Hobbesianis pugnat, quarum summa est, *oportere & in commune consulere*; quod sine reciproca confidentia fieri nequit: neque reciproca esse fiducia, ubi talis revocat natura. Quocirca leges illæ, quas deinceps tanto studio evolutat, non magis hominem formare ad societatem possunt, quam animantia suapte natura sibi infesta, lupum & agnum. Jam si id est, inutilis tota illa tractatio Hobbio videri debuit: nec fas erat Philosophum contra animi sensa id suscipere emendandum, quod nequit esse nisi prævum, atque ita hominibus parum acutis imponere velle. Tum violenta & contra naturam omnis est humana societas; quod tantum abest ut sit verum, ut nihil magis cum natura omnibusque hominis propensionibus pugnet, quam solitudo: quippe qua etiam belluæ natura arcentur.

§. V. Ac vero non hanc esse ex origine sua hominum naturam, quam ille depingit, id perspicuum facit, quod hujusmodi ingenium in iis hominibus, qui aut non sunt educatione & commercio depravati, aut nondum a libidine affectuum correpti, nullum deprehendatur. Certe integræ gentes, quo a depravatarum commercio sunt remotiores, eo simplicius atque ex naturæ usu vivere reperiuntur. Minus apud eas cognita vitia, plus virtutis, id est plus ejus simplicitatis, quæ a natura est. Vulgatum est illud Justinii historici, plurimisque aliis exemplis confirmari potest, in primis Groëlandorum (a) & Casrorum, plus profuisse Scythis ad honeste vivendum vitiorum ignorationem, quam Græcis cognitionem virtutis (b). Confirmat hoc ipsum Pufendorffius exemplo infantium, in quibus natura in-

te-

(a) Vide Anderson Histoire naturelle de l'Islande &c. & Kolbi, Description des Huttentots.

(b) Lib. II. cap. 2. Justitia gentis ingeniis culta, non legibus.

regrior est, quique ad mutuam caritatem ab illa videntur facti; quippe qui etiam tum, cum ignoti ignotis conveniunt, in mutuos statim amplexus, & alia amicitiae signa ruunt. Distinguendum igitur Philosopho erat inter ea, quæ naturæ sunt insita, & prima, ac directa, & ea quæ reflexa sunt, & tempore adveniunt. Nam usu vitæ, educatione, abusu mentis, phantasiæ, sensuum, idest pravis judiciis, impetu affectuum, commercio malorum, plurima paullatim crescentibus nobis adsciscit natura nostra, atque insito ingenio admiscet, quæ minus acutis ingenita & prima videri deinceps possint: ex quibus nemo prudens naturam humanam æstimaverit. Alioquin colligere possumus ita a natura nos esse comparatos, ut Bacchanalibus insaniamus, ut faciem pingamus, ut mimos agamus, quod bona hominum pars in his toti aut versentur, aut occupentur. Hæc fiunt, sed non ex primis naturæ. Quid si quis dicat, quum aspexerit sphaeram rivulam, sphaeræ naturam & essentiam in hoc esse positam, ut sit rivida? Quod si liceret in primas naturæ nostræ & insitas qualitates introspicere, si adventitia discernere, hominemque, non qualis esse deprehenditur, sed qualis primum genitus est, contemplari, aut vehementer fallor, aut aliud ejus ingenium sepeiremus, quam quod Hobbius esse arbitretur (a). Præsertim quum simile non sit vero, hominem ad societatem, ut infinita demonstrant, a Deo genitum, iis fuisse instructum propensionibus, quibus ab omni societate non possit non abhorrere. Quod si quis sibi persuadeat, nihil dubito eundem persuadere sibi posse, sapientem Architectum lapides rotundos, atque a se mutuo maxima vi dissilientes, ad fornicem comparasse. Quid quod quæ sunt animantium generi alicui essentialia, ea & omnibus ejus generis individujs communia sunt, & semper, & ubique? quod nunc in hoc hominum ingenio, quod Hobbius prædicat, non obtinet; id quod demonstrat, non naturale esse, sed adscititium. Platoni totum hominum genus

(a) Vide Aristotelem in Ethicis, ac primo Politices libro. Justinum loc. sup. citato.

velut equitatus quidam esse videbatur. In eo corpora equos referunt, mentes equites. Is ut equitatus esset equitibus utilis, necesse erat, ut viribus ac virium virtutibus quibusdam instructi essent equi: sed moderatio equitum esse debet. Corpora nisi & vita, & viribus, quæ vitam comitantur, in primis affectibus, essent prædita, ne agi quidem possent, nec ullius essent imperantibus mentibus usus: sed mentium officium est ita ea moderari, ut ne terminos nostræ felicitati præfixos excurrant. Id regimen ex informata ratione petendum. Informatur autem ratio notionibus virtutum: virtutes regulæ efficiunt: regulas rerum relationes cum fine, quod alibi dicetur copiosius.

§. VI. Accedit eodem, quod si naturam humanam acute introspeciamus, duo in ea in primis, ut indicavimus, affectuum genera inter se diversa reperiemus: quorum alterum affectus continet naturæ *primarios ac directos*: alterum *posteriores & reflexos*. Affectus *primarios ac directos* voco eos, qui adversus bona nos agitant: *secundarios & reflexos*, qui ex opinione malinascentur; sunt enim illi suapte natura priores, quam hi, quos opinio mali excitat. Nam quum natura nostra non ipsa sibi sufficiens procreetur, primi in ea motus sunt ii, quibus in ea fertur, quæ sibi consentanea sunt; nec ut aliter procrearetur, quum minime sibi sufficiens procreanda erat, fieri potuit. Sed quum plura sint, quæ eam destruere possunt, aut infelicitare; necesse fuit, ut ea tam flexilis generaretur, ut deflectere ab iis posset: hi igitur motus secundi in ea esse debuerunt. Nec vero hoc nostro ingenio comminiscimur, sed perpetuo experiri licet, si attente nos, ac res nostras consideraverimus. Infans flammæ veluti per jocum manum admovet, nec ab ea revocat, nisi expertus. Homo homini sese, ac sua credit, nisi fallaciis doctus sit diffidere. Primus ergo motus hominis adversus homines amoris est, ac fiduciæ; hic directus est: metus ac diffidentia reflexus est; non igitur primus. Quis enim vero oderit, nisi malum sit expertus, quod odit? Itaque ingenium hominis ex directis motibus erat æstimandum, non ex reflexis.

§. VII. Nec vero magis acute Postulata constituit. Nam quod ait, naturalem homini esse cupiditatem omnium rerum usum ad se trahendi, id & ambiguum est, & non video probari, nisi exemplis naturæ commercio vitæ civilis, & affectibus depravatæ. Omnia enim ad se trahere nec naturæ hominis animali, nec rationali necessarium est: ex quo satis aperte intelligo, tantam cupiditatem non a natura esse, sed a libidine; hanc ab usu: *quippe*, ut ait Justinus, *ibidem divitiarum cupido est, ubi & usus*: natura nullum animal, nisi ad necessaria rapit. Natura animalis iis contenta est, quæ sibi sufficiunt, ut in omni animantium genere videre licet: ea vero nec omnia sunt, nec multa. Agnovere id veteres omnes, qui *naturæ pauca sufficere* magna approbatione dixerunt. Agnoscunt hodieque quicumque earum nationum mores prope inspexere, qui sine vitæ hujus nostræ tumultu ad naturæ præscriptum vivunt, quæque nondum nostrarum gentium commercio depravatæ sunt. Jam nec rationalis naturæ est hujusmodi cupiditas, si non ex civitatum libidine, sed ex naturæ statu censenda est; talis enim rationalis naturæ cupiditates ex naturæ animalis indigentia, atque ex utriusque vitæ fine dimetiri debet, nisi luxu insanire cœpit. Nunc autem & naturæ animali, ut dixi, sufficiunt pauca; & cum utroque vitæ fine superflua concupiscere pugnat: nam & præsentem tranquillitatem plurimum turbat inutilium ac superfluatorum cura; & ad plenam felicitatem impediores nos reddit. Præclare Horatius:

. Ille potens sui,

Letusque deget, cui licet in diem

Dixisse, vixi (a)

§. VIII. Alterum Postulatum, quod *rationis naturalis* ait esse, in iis quoque locum habet, non qui ex recta ratione vivunt, sed ex voluptate sensuum & rationis libidine, quibus ut nihil optabilius vita, ita nihil formidabilius morte violenta. Contra ii, qui ex virtute, idest ex recta ratione vitam instituunt, cri-

F. 3

men

men magis timent & vitium , quam mortem , quæ non potest esse summum naturæ malum , nisi Epicuri de grege porcis , quorum tota vita sensus est : illis vero non raro maximum est naturæ bonum , non singulorum tantum , sed totius societatis , cui moriendo prodesse pulcherrimum profecto est . Infinitos pene vetus recensque historia suppeditat , qui illustrem pro Religione , patria , libertate , amicis , mortem subiere . Egregie idem Horatius totum hoc virtutis ingenium depinxit (a) .

*Justum & tenacem propositi virum
Non civium ardor prava jubentium ,
Non vultus instantis tyranni
Mente quatit solida ; neque auster
Dux inquieti turbidus Adriæ :
Nec fulminantis magna Jovis manus .
Si fractus illabatur Orbis
Impavidum ferient ruinae .*

Sed & præclare tota hæc res a Cicerone est explicata , quum in primis libris *de Finibus* , tum ex instituto in primis Disputationum Tusculanarum , ut idcirco non egeat oratione nostra . Nec vero ego negare velim ingenitum hominibus vitæ sensum , ac maximum mortis metum ; stulte enim Stoicus videri nolo . Sed quum , ut dixi , tota hæc res , non naturæ tantum sensu ac impetu regenda sit , sed recta ratione ; nego inde ea consuetudinaria confici posse , ad quæ hoc postulatum in Hobbii systemate spectat .

§. IX. Pergit porro Hobbius , atque ex amore nostri necessario concludere sibi videtur , naturæ humanæ Auctorem velle , ut nos conservemus (egregium id quidem & verum) , adeoque inter leges naturæ primarias esse , *ut quisque vitam & membra sua , quantum potest , tueatur* . Et hæc quoque recte , si illud *quantum potest* non de potentia physica , sed de morali accipiat , ut hæc sit sententia , debere nos , aut potius posse , tueri tantum , ac quatenus ut nos tueamur su-

pre-

prema lex vult, non quatenus possumus, & quantum ex privatis utilitatibus cupimus. Nam quum præstantissima illa Dei lex æque velit, ut ceteri omnes conserventur, & quidem civitas magis, quam civis; si me tueri nequeo, nisi civitatis, aut magnæ hominum partis internecione, tueri non possum, nec debeo, nisi dicere Hobbius velit, legem illam naturæ humanæ gubernatricem plus singulos spectare, quam communitatem. Itaque non rite ex illo principio conficit, posse nos quæcumque, & erga quoscumque moliri, ex quo porro nullum est scelus, quod homines velut jure committere nolint. Fingamus sapientem Agricultorem mille lætissimi agri plantis hoc dedisse jus, ut singulæ quantum possunt se conservent & tueantur, non tu illum vehementissime indignaturum putes, ubi pirus, quo se servet, ac faginet, reliquas omnes excindere, aut radicitus extirpare aggrediatur? Singuli homines non sui modo, sed aliorum & ii gratia progignuntur; singulis ergo non sui tantum, sed ceterorum quoque amor & cura præcipitur. Ita ergo se quilibet conservare debet, ut simul conservet alios: ita amare, ut non reliquos omnes oderit. Ac si alterutrum optandum sit, unus ne, an tota communitas intereat, non potest postremum hoc eligere, quin toti rerum naturæ adversetur, quæ partes totius ergo, non totum partis unius efficit. Quæ si cuiquam cum naturæ sensu pugnare videantur, is sit certus, se non rectam rationem consulere, sed intemperantissimum sui amorem. Quare ego veteres Romulidas feris comparare soleo, qui ut se, idest hominum omni vitæ aura indignorum manipulum, conservarent, auferentque, toti Italiæ bellum indixere, suique juris esse crediderunt ceteras gentes funditus excindere. *Tantane molis erat Romanam condere gentem?* Quis non execrabiles Cyrum, Alexandrum, Cæsarem, Gengiskanum, habeat, qui tot gentes, velut pecudes, suæ cupiditati immolarunt? In quos qui encomia scripserunt, mihi illi pecudibus stupidiore fuisse videntur. Heroës ii inter homines habendi, qui populis beandis, non evertendis, nati sunt. *Dens est mortali juvare mortalem, & hæc*

ad æternam gloriam via, præclare inquit Plinius (a).

§. X. Minus quoque accurate cetera struit, quæ sequuntur, ut concludat, statum hominum naturalem esse statum belli mutui (b). Nimirum aut non intelligit, aut ignorare simulat, jus esse quidem homini cuilibet in bona telluris, sed minime illud in omnia & singula. Jus enim est in ea, quæ vitæ conservandæ sunt necessaria: hæc vero non sunt omnia & singula. Ut si Imperator centum millia aureorum exercitui largienda donet, singulis militibus jus quidem in illos est; jus autem non cuilibet in omnes & singulos, ut si valeat, jure alios excludat. Itaque tota hominis argumentatio sophistica est & captiosa: quippe terminos habet conclusio universaliores, quam qui in præmissis positi sunt, ut dialectici loqui amant. Positum est, jus esse cuilibet ad vitam conservandam; idcirco ad omnia, quæ vitæ conservandæ sunt necessaria: quum autem hæc non sint omnia & singula, sed pau-

(a) Lib. I. cap. 7.

(b) Gentes ferme omnes a naturæ statu, seu a libertate naturali ad civilem pacificationem venisse, qui eorum attente historiam legerit, aperte intelligit. Naturalem autem hunc statum inter immaniter adultos homines ac ferinæ vitæ suetos, esse belli statum non ego dubito: nam & sunt singuli nimium sui studiosi ac amatores; & moribus invidi alterius evasere bonorum; & percupidus habendi alieni, & adeo in vindicationem proprii, ut plerique veteres scriptores vindicationem juris naturæ & gentium appellaverint, quorum loca copiose, ut solet, congeffit Grotius lib. 2. cap. 20. Intelligo nec primum id esse, nec insitum humana naturæ ingenium, ac si rationem sectari homines voluissent, alium esse debuisse naturalem statum; sed vicinarum gentium injuriis & prava educatione factum est, ut a natura simul & ratione desciscerent ferinam prope omnes agita-verint vitam. Quæcumque nationes extra imperium civile repertæ sunt, aut ubi imperii vis paullulum elanguit, velut in secunda Italia barbarie, privatas injurias omnes privatis viribus ulcisci compertæ sunt: Quumque injuriæ hujusmodi nequeant inter plures non esse frequentes, frequens prope bellum & mutuum. Tales nunc etiam sunt major pars Americanorum septentrionalium, Afrorum, Insulanorum Asiæ plerorumque. Ipsas Europæ nunc cultissimas nationes ab eodem statu provenisse idipsum in primis demonstrat, quod non solum olim, verum in altera quoque Europæ barbarie vindicationem injuriarum habent privatam, qua fiebat, ut in mutuas cades continenter raperentur. Germani

paucissima, quibus vita est contenta; non rite inferat, jus esse cuilibet in omnia, velut individua, ut nihil sit, quod excipiat. Ex quo porro pessime conficit, homines natura ipsa super eodem velut individua concertare, atque in mutuo bello non tam esse, quam nasci. Quæ quum sint, caput ipsum totius systematis Hobbesiani contaminatum est. Quum vero in eo capite tota Hobbesiana machina inædificata sit, ne stare quidem illa potest.

§. XI. Sed sunt, inquit aliquis, Hobbesianæ illæ leges & perspicuæ, & veræ, & proculdubio divinæ; quod esse non possent, nisi principium, ex quo illæ derivantur, perspicuum esset & verum. Nempe sunt: id ego quoque ajo. At non illæ tamen ex Hobbesiano principio consequuntur, verum ex convenientia cum natura rationali, mundique ordine, quæ de re paullo post dicetur. Veræ sunt scilicet Hobbesianæ conclusiones. (licet non omnes) *συμπεσυχοντα* per accidens (nam ita disputant Dialectici) non ex principiorum

vi,

mirabantur, quum Romæ juris docendi formam conspicerent, injurias Romanos finire judiciis, quæ ipsi armis vindicabant (Vell. Paterc. lib. 2. cap. 224.). Sed & eadem singularia certamina vage Latii gentes habuere antiquitus: habuere Græcæ. Utriusque Gentis Poetæ, qui Heroicam historiam conscripserunt, id satis indicant. Quin in ipsis constitutis Imperiis, nisi summa res ab uno, aut Senatu regatur, perpetuum futurum & mutuum bellum demonstrarunt Resp. populares. Intestina rerum Græciæ publicarum bella narrat historia Græca: Reip. Rom. bella Romani scriptores copiose. Narrat reliquæ Italiæ fata historia Rerump. Florentinæ, Pisane, Lucensis, Genuensis, Venetæ, Mediolanensis, aliarumque. Tum quum plures reguli Italiam & Galliam obtinerent, perpetuo bello dilacerabant. Nec certe aliunde legum civilium sancientiarum facta necessitas. Democritus apud Stob. serm. 28. Non prohibuissent leges suo quemque arbitrio vivere, nisi alter alterum offensum iisset. Lucret. lib. V. v. 1147.

Acrius ex ira quod enim se quisque parabat

Ulcisci, quam nunc concessum est legibus æquis,

Hanc ob rem est homines pertæsum colere ævum.

Constat ergo naturalem statum cum iis, quæ adscivere homines, vitiis, ac perversa, quæ sunt corrupti, educatione, mutui esse belli; nec in eo reprehendam Hobbesium, si eum statum non ex insitis naturæ sumat, nec ex ratione, & jure in omnia, sed ex socialis educationis pravitate,

vi, ac potestate : ut si concludam hominem esse mortalem, quia oculis præditus est, potest illud esse verum, licet non hujus virtute. Quamquam ne omnes quidem Hobbesianas leges legitimas omnique suspitione Epicureismi carentes dixerim. Nam ; ut exempli loco sit, conditio illa in prima lege posita, *querendam esse pacem, quod ejus habendæ spes sit*, mihi elusoria videtur, si cum illa diffidentiae plena natura humana conferatur : quæ enim spes habendæ pacis cum iis, qui natura, ac jure ad bellum incitantur ? Quin perpetuis bellis & discordiis aditum aperire potest, addito, quod ille docet, in his rebus, quæ ad vitam pertinent, in statu naturæ quemlibet esse sui judicem, neminem alterius. Itaque & alia figenda erant principia ; & explicandum quæ esse debeat illa spes, quæ pacem suaderi possit, aut si ea ceciderimus, ad bellum impellere. Non enim hoc ex arbitrio, minus ex nostra libidine finiendum. Sed non ego Hobbesianum librum cribantulum suscepi : principia tantum in examen voco : ea falsa esse ajo. Id mihi videor perspicue demonstrasse.

C A P U T VII.

Enarratur & refellitur systema Spinozæ.

§. I. **M**irum videri alicui potest Hobbium, & Spinozam, insensissimos humanæ libertatis hostes, de jure & legibus naturæ differere, quasi legibus moralibus locus esse ullus possit, sublata electione. Sed qui attente rem expenderit, is intelliget profecto, eam ab illis super naturæ legibus doctrinam vulgatam fuisse, qua eæ funditus evertantur ; quapropter desinet mirari. Et Hobbius quidem non aperte, sed callide, dum leges naturæ adstruere videri vult, penitus substulit, ut superius demonstratum est : at Spinoza audacius, ut solet. Exstat inter ejus opera posthuma liber imperfectus, qui inscribitur *Politicus*, in quo ille juris, & legis naturalis indolem, atque fundamenta, tum originem & constitutionem societatum,

& imperiorum Civilium explicare adgreditur, ac iis quidem consentanee, quæ cum in Tractatu Theologico Politico, tum in Ethica docuerat. Rem igitur universam hunc in modum exorditur.

§. II. *Nulla res* (inquit cap. II. §. 2.) *per se existere, & conservari potest*, sed existit, & conservatur Dei potentia: idest, ut is interpretatur, potentia cujuscumque rei, quæ in natura est, nihil aliud est, nisi ipsa Dei potentia, qua res omnes existunt, & conservantur: qua potentes sunt.

§. III. Jam habet Deus in omnia absolutum jus, quod, inquit, ipsa est Dei potentia: quandoquidem nihil potest Deus physice, quod & moraliter nequeat. Qua in re ille Hobbio consentit, qui jus Dei in homines e potentia irresistibili derivat. Est veterum Græcorum το κρατην παντοκρατορια, *plene imperare*, & παντοκρατωρ *omnipotens*, & late imperans. Ex eo vero concludit, singulas res, quæ sunt in natura, tantum divini juris inde haurire, quantum habent potentia divina: quod nimirum quælibet naturæ res divina potentia potens est (a); ac quatenus potens physice, eo moraliter.

§. IV. Itaque hoc vocabulum *Jus naturale* totam significat Dei potentiam, quæ est in natura, quæque est ipsa natura rerum omnium, ut sæpe ex eo audivimus. Quocirca dicuntur homines jure naturæ, & jure suo quidpiam agere, quum ex legibus suæ naturæ, idest ex legibus suæ potentia, agunt. Nihil ergo quod possunt homines naturæ vi non jure agunt (b). *Jus* ergo & vim, natura adversa, stulte miscet.

§. V. Ex quo sequitur, inquit, ut stulte sibi persuadeant Philosophi, jus naturale esse aut præcipiens, aut vetans: nam quum jus cujuslibet definiatur ejus naturali potentia; jus vetans aut ea vetat, quæ possumus physice, aut ad quæ potentia nostra non pertinet. Primum est contra jus; alterum inutile (c).

§. VI.

(a) *Ibid.* §. III.

(b) *Ibid.* §. IV.

(c) *Ibid.* §. VIII.

§. VI. Quid autem sibi volunt illa vocabula *sui*, aut *alterius juris* esse? nempe, inquit, quum de corpore dicuntur, is *sui juris* est, qui tanta pollet naturæ potentia, ut ceteris resistere valeat, atque agere ex sua potentia, non ex alterius: is vero alterius juris, cujus potentia minor est potentia illius, cui proinde concedere necesse sit (a). Quum autem ad mentem ea transferuntur vocabula, *juris sui* dicitur, qui sua ratione libere utitur, & vivit, quique a nullo alio callide decipitur; atque hi sapientes, qui, ut Stoici quoque docebant, soli sunt liberi; is vero alterius juris, cujus ratio exigua est, quique idcirco ex alterius vivit ratione, aut qui callide decipitur, quales sunt insipientes (b) & stulti, quos & Aristoteles *natura servos* vocat.

§. VII. Ex his principiis portentosa, sed iis consentanea, derivat corollaria, quorum unum, aut alterum referemus. I. Pactorum omnium, & conventionum fidem, qua una societas & vita humana continetur, penitus evertit. Qui, inquit, *quidpiam alicui promittit*, is *naturali sua agendi potentia*, ac propterea *jure minime se spoliatur, ut in illum conferat*; adeoque si possit *promissis resistere, jure suo resistit, nec est, quod de rupta fide, qui minus p̄test, queratur*: quum *queri non possumus, jure naturæ alios agere*. Atque in hoc iterum Hobbio consentit, qui non aperte quidem, sed sua item calliditate pactorum fidem enervat, dum ob metum, ne altera pars defiliat a pacto, neminem stare promissis *jure naturæ debere*, scribit (de Cive cap. II. §. XI.). Nempe hoc illud est de Achille,

Jura negat sibi nata: nil non arrogat armis.
Tum illa barbara Gallorum vox, *omnia sunt virorum fortium*. At non ea generis humani, quo οἰκία, ut vocat Euripides in Medea, Themis colitur, Διὸς τεχνον, Jovis filia, ac sanctissima perhibetur.

§. VIII. Nec minus portentosum & horridum est hoc alterum. Quum tantum sit uniuscujusque *Jus*,
quanti-

(a) Ibid. §. IX.

(b) Ibid. §. XI.

quam potentia naturalis; nec potentia æqualis in omnibus, ne jus quidem æquale. Qui minimam habet potentiam, is minimum habet jus: propterea ab eo, cujus major est potentia, absumi jure posse, timeat necesse est. Timeat quoque necesse est omnes eos, qui æqualem habent potentiam. Quocirca statuit in statu naturali singulos a singulis timere debere, adeoque statum hunc naturalem esse statum mutui timoris, ac mutua inimicitia, in quo & Hobbio consentit, licet ex aliis principiis ratiocinetur (a).

§. IX. Progreditur inde ad originem & constitutionem Civitatis. Quo plures, inquit, homines in eundem finem sociantur, unione singulorum, major eorum evadit potentia, atque idcirco majus jus naturale. Quum status hominum naturalis sit status inimicitia (b), prorsus necessarium est, ut plures simul in eundem finem conveniant, ut collatis potentiis, vita, & bonis suis consulant. Quum convenerint, tum jus omnium, idest omnium conjuncta potentia, imperium civile dicitur, & is, in quem singulorum jus confertur, Imperator. Hic autem quum singulis sit potentior, ob unionem singularum potentiarum in uno, singuli ei obedire tenentur, ejusque propterea voluntates sunt leges civiles. Is vero, cui resisti nequit, & omnia impune facere potest, & omni jure, atque legibus exsolutus est. Paria scripserat Hobbius: nam cap. iv. §. xii. & xiv. de cive bina illa diserte ponit, & quidquid fecerit Princeps

(a) Videre hic licet Judæi hominis ingenium, ferox, ac truculentum, perpetuisque ærumnis, ac dura servitute asperatum. Nam ego, ut hic dicam, cum occasio incitat, nullam gentem hisce nostris Judæorum vagantibus manipulis nec adrogantiorē, nec generi humano infestiorē novi, cujus iras & hic noster expertus erat. Vetusis Dei favoribus, generisque antiquitate adeo superbiunt, ut toti telluri indignentur, se, regendis reliquis natos, servire oportere: suntque iis nobilibus similes, qui antiquorum imaginibus distincti, tametsi & illuvie ac paupertate obruantur, nullaque nec ingenii nec animi dote suos referant majores; jactant nihilominus sese, elataque cervice incedunt, ceterosque omnes mortales tanquam fungos, aut τῆς γῆς λοχσυχτα telluris filios despiciatui habent: nec animadvertunt quam sit perdidiculum superbia ac mendicitatis temperamentum.

(b) §. VIII.

ceps impune esse, & eundem legibus civitatis non teneri. Quis nunc non videat, non hominum ab his jurisprudentiam ac jura tradi, sed belluarum? His enim, ut ait Hesiodus, est hæc a Jove posita lex, ut aliae alias vorent.

§. X. Hæc nunc perpendenda sunt tanto adcuratius, quanto quædam sunt, quæ in corruptis avi moribus veri speciem ementiuntur. Tribus fundamentis inædificatum est stultum hoc systema sibi que pugnans. I. Dei potentiam & Dei jus idem omnino esse. II. Et eandem rem esse potentiam Dei & creaturarum. III. Nec in Deo esse ullam, nec in homine libertatem. Quæ tria profanus homo in primis duabus Ethicæ, ut diximus, partibus demonstrare adgreditur. Tria maxima absurda. Nam principio etsi Dei potentia, voluntas, ratio, una eademque res sint; ea tamen res talis natura sua est, ut, nisi extra omnes ideas humanas philosophari velimus, voluntatis divinæ norma non sit ipsa voluntas, sed divina ratio, seu intelligentia, qua justī & honesti æternæ & immutabiles notiones continentur; potentiæ vero voluntas moderatrix: voluntatis potentia quasi administra, ut sæpe dictum est. Supremum ergo jus, & dominium Dei in res omnes voluntate quidem & potentia exercetur, sed non ipsa divina potentia, quasi sine ratione, constituitur: nascitur enim partim ex æterna Dei ratione, prima mundani ordinis procreatrice: partim ex eo, quod ex nihilo cuncta Deus creavit; quo fit, ut, quæcumque sunt, ab eo sint, & conserventur, ac ita, ut nec si velit quidem Deus, possit a se abdicare jus hoc, & dominium, quod *essentialiter* connexum est cum origine rerum a divina natura. Non recte igitur divinam potentiam cum divino jure in omnia perturbat Spinoza (a).

§. XI.

(a) *Vetus illud dictatum*

Sic jubeo: sic volo: stat pro ratione voluntas, si *eo volo* velut ab omni ratione excisum accipiatur, nequit Deo attribui, nisi impie: Deus enim non est, qui non ex summa ratione ac bonitate cuncta moderatur. S. Basilii adposite hom. in principium Proverb. hoc, ait, Rex a tyranno differt, ut hic nihil, nisi suam utilitatem spectet: ille subditorum se commodo præstet totum.

§. XI. Deinde quum principium voluntatum, & operationum naturæ divinæ sit eadem illa æterna Dei intelligentia, exsecutrix vero divina potentia, quæ est velut instrumentum intelligentiæ; nec potentia divina ulli alteri causæ sublit; profecto Deus, & in mundi creatione, & in gubernatione liberrimus est. Quid enim? A potentiōri cogitur ne causa? Ne ipse quidem Spinoza id dixerit, nec quivis alius, qui qualemcumque Dei informationem habet. A rebus ne externis? At pugnat cum veritate, naturam perfectissimam & potentissimam, ipsamque per se existentem ab ulla externa causa cogi necessario. A sua tandem natura? Scio hoc contendere Spinozam. Sed quis non videat quam sit ridiculum asserere, seipsam naturam ullam, quæ pura sit ratio, posse cogere? Quam vero ineptissimum naturam sibi sufficientissimam perfecteque beatam? Se ipse igitur Deus determinat, plena ratione; summaque bonitate ac naturæ quadam fecunditate commovetur. Quod si quis iis verbis notionem necessitatis tribuat, is ludere videtur: libertatis enim hæc est apud omnes, ipsum quoque Spinozam, notio, ac definitio, ut quis ipse se suapte ratione determinet, nec ab aliena vi determinetur. Constat igitur Deo absolutissima libertas. Sua vero ratione & libertate homines agere, clarissime est a nobis demonstratum in secunda parte. Quamquam id tam esse debet perspicuum, quam nos esse: utrumque enim non ratiocinio, sed sensu animi constat. Quis igitur minime liber? qui nunquam se ratione sua agere sibi conscius est; cum quibus ego non disputo: hominum est hæc philosophia, non belluarum. Primum igitur atque ultimum systematis Spinozistici fundamentum ruinosum est.

§. XII. Secundum superest disternendum, quod quoniam est illi præcipuum, copiosius a nobis efficietur. Principio utemur argumento ad hominem, ut vocant. In Ethica (a) hic homo statuit Dei omnipotentiam *actu ab æterno fuisse*, & *in æternum eadem in actualitate mansuram*, idest quidquid divina omni-

ten-

tentia fieri possibile est, uno actu ab æterno factum esse. Ex quo etiam consequitur, divinam omnipotentiam, quæ sit tota in actu, & indivisibilis, ubicumque est, totam esse; atque inde, ubicumque est, infinitam esse. Quum vero apertissimum sit, singulorum naturæ entium potentiam finitam esse; conficitur perspicue, naturæ potentiam non esse ipsam essentialem Dei potentiam, sed potius divinæ potentiæ effectum. Præterea omnipotentia Dei tota in actu est, ut Spinoza fatetur; ergo ubicumque est, tota est in actu & individua: simplex est enim Deus, ac impartibilis. Non est autem singulis in entibus tota in actu; quum homines, ex. gr. non totis semper suis viribus agant, sed plerumque parte virium; ergo singulorum entium potentia non est ipsa divina potentia, ac necessaria & tota in actu. Tandem ex applicatione infinitæ individuæque potentiæ, sequetur effectus infinitus, non secus atque ex multiplicatione numeri infiniti per finitum, factum existit infinitum: at id falsissimum est, ut inductione probari potest; verum igitur esse non potest singulorum entium naturæ potentiam eandem esse divinam omnipotentiam. Hoc igitur Spinozæ dogma locum habere ullum nequit, nisi in ea philosophia, qua decernitur, Deum nec simplicem, nec mentem esse, ac universi procreatricem, sed stupidam brutamque materiam, cujus vis nec uno loco coarctatur, nec aliter infinita esse potest, nisi quia nequit esse major. Quod si quis tuetur, haud ego prohibuerim hujusmodi esse divinitatis particulam, brutam ipsam & stupidam.

§. XIII. Quid igitur, dicet quispiam? Non participat Deus creaturis singulis suam potentiam, eamque conservat? Participat enimvero: sed ita, ut potentiæ & vires singulorum entium sint effectus potentiæ divinæ, non potentia ipsa. Non alia prorsus ratione, atque vires motrices, quas homines machinis communicant, non ipsæ sunt hominum vires, sed virium humanarum effectus.

§. XIV. At enim: Deus Spinozæ nihil est aliud nisi natura, seu ignea mundi vis, ac mechanice agens;

necessario ergo agit , ac tota semper . Eadem in nobis est , aut ejus particula : & hæc ergo necessaria . Hæc monstra sæpe destruximus , ut necessarium non sit hic retractare . Do interim ; nec tamen is conficiet tam in actu esse & necessariam singulorum hominum potentiam , atque naturæ ; siquidem constat me non semper totis viribus agere ; sed eas ratione , aut affectu moderari , prout mea interesse sentio . Doceat me Spinoza , nunquam me parte virium agere : nunquam ratione . Quod tum , puto , docebit , quum me non esse , dum sum , doceat : nam ego medici egere eos existimo , qui non tam perspicue sentiant se libero uti arbitrio , quam se esse : ut enim cujusque existentia non demonstratione conficitur , sed intimo sui sensu ; ita cogitandi agendique libertas .

§. XV. Quanquam etiamsi vel maxime tantisper demus , potentias singularum rerum ipsam esse Dei potentiam per universam naturam diffusam ; non inde sequetur , jus creaturarum naturale , atque potentias naturales unum idemque esse ; quoniam superius demonstratum est , falsum esse principium , unde hoc confectarium deducit Spinoza , potentiam nempe Dei ejusque jus in omnia unam eandemque rem esse . Undique igitur istiuscemodi dogma corrui .

§. XVI. Quoniam ergo constat , ut in rebus aliis , ita in hominibus suas esse vires , quibus operantur , quæstio de jure naturæ huc redit , an quantum physice , tantum jure possint , seu an ex voluntate Dei sequatur , ut quantum homines physice possunt , tantum possint moraliter ? Ea vero controversia ex mundi lege , & sine humanæ vitæ dirimenda est . Vires agendi homini datas , ut propositum ei finem persequeretur , nullus dubitat : eum ergo in finem vires eas intendat , lex mundi jubet . At quoniam cum iis viribus libertas agendi conjuncta est , ut idcirco non solum parte virium , & quidem plurimis modis , agere possit , sed etiam modis infinitis super infinitis propemodum vitæ objectis ; atque ob eos varios agendi modos possit a proposito fine deviare , & consequenter a voluntate Dei ; sequitur non quantum , & quomodo physice

ce potest, jure etiam, idest moraliter posse; sed jure tunc operari, quum viribus naturæ suæ utitur aptate convenienterque ad propositum sibi finem: contra jus vero, si in agendo ita libertate abutatur, ut a fine desciscat. In hoc igitur posita est divina lex naturalis, ut nimirum ostendat homini, quæ ad finem illum ducant, eaque præcipiat, & obligatione sanctionis eo libertatem flectat: quæ vero devia, eaque vetet, & minis pœnarum absterreat ab iis faciendis: quæ tandem *adiaphora*, idest indifferentiâ, ea permittat, ut possit in his homo integra potentia naturali uti. Itaque jus naturæ non potentia est physica, sed moralis physicæ moderatrix: facultas scilicet agendi, prout lex docet; est igitur fræquum potentia physica.

§. XVII. Atque hunc in modum convulsis Spinozistici ædificii fundamentis, cetera quoque corruant necesse est, ut non sit opus inde consuetaria longius resellere. Hoc omittendum non est, Spinozam, dum de jure & societate hominum ad differendum aggreditur, ita aggredi videri, ut nullum inter homines & bruta discrimen ponere videatur, suamque Rempublicam, ut dixi jam, bestiis magis aptare, quam sublimi huic & rationali animantium generi. In illis enim totis viribus agitur, quæ vires suas ratione moderari nequeunt: homo ut alia natura est præditus, ac in alium finem genitus, ita aliter vivat oportet. Quid autem causæ esse dicamus, ut dum jus naturæ ex natura humana derivare studemus, rationem, quasi ad eam non pertineat, omittamus? Nam inter eas proprietates, quibus humana constat natura, primâ est ac præcipua ratio, qua brutæ animantes carent: ea ergo appetitus, impetusque naturæ regere oportet. At nemo nisi ex regula probe reget: regula prima, æterna, constans lex est naturæ. *Jus* ergo & *vis* suapte natura opposita sunt.

CAPUT VIII.

*Grotii doctrina super principiis juris naturæ
expenditur.*

§.I. **P**ostquam superius impedimenta e medio disjicimus, ostendimusque, ut Dei providentia, ita æterna immutabilique lege mundum gubernari; ac ei cum res aliæ omnes, tum mentes, hominesque in primis subjici; superest ut in *legem ipsam fundamentalem*, & principium totius juris naturæ *COGNOSCITIVUM*, ut vocant, inquiramus. Nam principium *naturalium obligationum* esse non posse nisi Dei imperium, id constare debet inter omnes: id vero non æque constat, quibus ex principiis rationis humanæ id a nobis imperium cognosci possit, ac, quatenus pateat, prospici. Quum lex naturæ sit hominum generi communis; hæc principia e communi hominum ratione depromi debent. Variant autem super ea re gravissimi doctissimique Auctores, ii maxime, qui velut signiferi hujus disciplinæ habentur. Nos præcipuorum sententias in medium proferemus, lectoribusque optionem faciemus. Nam etsi in aliam atque aliam doctrinam sæpe propendeamus; agnoscimus tamen, nullam earum, quas enarraturi sumus, sententiarum esse, ex qua commodissime officia hominum derivari nequeant. A Grotio exordiemur, tanquam ab hujus disciplinæ facile principe. Hugo igitur Grotius, cujus eximia sunt in rempublicam literariam merita, primus omnium in justum corpus prima legis naturalis scita retulit, editis libris tribus de *jure belli & pacis*, in quo opere omnem ingenii conatum effudit. Propositum ei fuit jus illud explicare, *quod inter populos plures, aut populorum Rectores intercedit, sive ab ipsa natura profectum; sive divinis constitutum legibus; sive moribus & pacto tacito introductum*, ut is in Prolegomenis loquitur. Quod a natura proficiscitur, *naturale* est: quod divinis legibus constitutum est, *positivum* appellatur: quod moribus & pacto tacito est introductum, id *jus gentium* vocat Grotius.

§. II. In primis, ut dixi, distinguit vir doctus jus naturæ a jure gentium, eaque hoc discriminat, ut illud *ut*, quod ex natura ipsa humana, & ratione profuit naturali: hoc ex consensu aut omnium, aut plebharumque Civitatum (a). Primi illius juris matrem esse ipsam humanam naturam docet: *ea enim nos*, inquit, *etiamsi nulla re indigeremus*, ad societatem mutuam appetendam ferret (b). Inter ea, pergit, quæ homini sunt propria, est appetitus societatis, idest communitatis, non qualiscumque, sed tranquillæ, & pro sui intellectus modo ordinatæ cum his, qui sui sunt generis (c). Hæc autem societatis custodia humano intellectui conveniens fons est ejus juris, quod proprie tali nomine appellatur (d). Quumque ut talia principia in nobis existerent Deus voluit, tale jus merito Deo adscribi potest (e). Quæ Grotii doctrina, si recte accipio, huc redit: proprietates naturæ humanæ naturales, idest illi congenitæ ac insitæ, ad Deum naturæ totius auctorem, & conservatorem referri debent: inter proprietates autem hominum ingenitas est appetitus societatis tranquillæ & pacatæ: hic igitur appetitus a Dei voluntate est. Voluntate Dei rapimur in societatem tranquillam & pacatam, quum ut tales nasceremur is fecit; vult ergo Deus, ut societatem hanc sancte custodiamus, atque quocumque possamus modo foveamus, vetat vero quolibet modo subvertere. Quod autem ille vult, velle & nos debemus. Ita hæc societatis ingenio humano consentaneæ universi juris fons est. Nam quod ille alterum statuit, *judicium recte conformatum*, illud nisi ad primum hoc referatur, inutile est, quousque non demonstretur, qua regula judicium conformatum sit. Id enimvero hoc in loco quærimus, quænam illa sit norma, qua judicium, quod ad vitam sapienter transigendam pertinet, informatum, rectum sit, sibi que constans.

§. III. Alterum Grotii principium juris naturæ cogno-

(a) In Prolegomenis §. xvi. & xvii.

(b) Ibid. §. xvi.

(c) Ibid. §. vi.

(d) Ibid. §. viii.

(e) Ibid. §. iii.

gnoscitivum est consensus Gentium cultiorum : nam ubi multi diversis temporibus , ac locis , idem pro certa affirmant , id ad causam universalem referri debet ; quæ in nostris questionibus alia esse non potest , quam aut recta illatio ex naturæ principii procedens ; aut communis aliquis consensus : illa jus naturæ indicat : hic jus gentium (a) . Enimvero phænomeni universalis , idest temporum , & locorum omnium , causa item universalis esse debet ; quum oporteat , ut tantundem in causa sit rationis sufficientis , quantum est in effectu . Quum autem aut nationes omnes , aut pleræque idem pro justo aut injusto habent , phænomenon est universale ; non potest ergo a causa peculiari proficisci , sed ab universali ; ejus vero causa universalis esse alia non potest , nisi aut rei ipsius evidentia , Naturæ fonte manans , seu communia rationis humanæ scita ac sensa ; aut populorum in idem consensus item a communi natura expressus : quarum causarum prior *jus naturæ* , altera *jus gentium* , ita Grotio dictum , demonstrat .

§. IV. Plura sunt huic Grotii doctrinæ a viris doctis objecta , quæ paucis complexus est Heineccius in *Elementis juris naturæ & gentium lib. I. cap. 3.* Principio adversus primum Grotianum juris naturalis fontem opponit , officia erga Deum , & nos ipsos pleraque locum esse habitura , etiamsi homo solus extraque omnem societatem humanam in hoc terrarum orbe viveret ; ex quo conficit , illud adæquatum juris , legisque naturæ principium non esse (b) . Opponit præterea principium non esse evidens : nam incertum est , utrum homines societatem ament , quia utilem experti sunt , an quia

G 3

ad

(a) Ibid. §. XI. Addere poterat , aut internus quidam naturæ sensus justus & injustus , honestus ac turpis , quo omnes homines , cum adseverere , percelluntur . Conscientiam vocant , rationalem nempe .

(b) Loco cit. §. 75. Illud gravius veriusque , quod jura , & naturæ leges anteriora sint societate : nam & sub lege naturæ nascimur , quæ ad totum pertingit universum : & nostris præditi juri-
bus procreamur , cumque iis in civitatem immigramus . Ut igitur hæc omni sunt civitate anteriora , ita ex aliis videntur principiiis eruenda , atque æstimanda . Cui id responderi potest , licere a posterioribus , quæ priora in natura sunt , investigare ac dijudicare .

ad eam a natura rapiuntur. Sane in societate appetenda quilibet rei suæ consulit : non igitur constat illud, quod Grotius cum veteribus pronunciat, homines nullius etiam rei indigos ad societatem appetendam agi. Accedit quod hominum adversus homines odia & iræ contrarium videntur probare . Ad rem , inquit, Libanius declamatione ix. : *Nonne mite quiddam animal verborum tenuis est homo ? sed rebus ipsis agreste , & esfrane . Nam quænam Leonum adversus Leones expeditio ? Quod bellum inter ejusdem generis belluas ? Quod apud illos est perjurium ? Quæ pactorum violatio ? Quæ perfidia tanta , & avaritia ? Quod apud illos aurum ? Qui pecuniarum amor ? Quas comessationes , & crapulas noverunt ?* Jupiter apud Statium Theb. I. 214.

Terrarum delicta , nec exsuperabile diris

Ingenium mortale queror

. Tadet scire corusco

Fulmine . Jam pridem Cycloperum operosa satiscunt

Brachia , & Æoliis defunt incudibus ignes .

§. V. Duo potissimum adversus alterum opposuere . I. Quod evidens non sit : II. Quod minime verum . Nam nec possibile est sententias veterum nationum , aut omnium , aut plerarumque super officiis hominum noscere ; nec facile recentium . Illud , quia plerarumque nationum memoria funditus intercidit ; nec nisi in Græcorum , & Latinorum historia extat , neque vero illa omnium temporum , atque locorum . Hoc vero , quoniam quædam sunt nationes inaccessæ ; aliæ quarum non facile mores , & instituta sciveris . Præterea hæc omnia a viatorum fide habemus , quæ in pluribus suspecta esse debet , seu quod scire non potuerint , quæ narrant : seu quod insita quadam levitate mentiantur ; seu quod decepti decipiunt . Quod si ex sensu Græcorum , & Latinorum de opinione omnium gentium judicare velimus , quod Grotius efficit , sophismatis genus admittemus , quod Dialectici Scholastici vocant *a secundum quid ad simpliciter* . His accedit , quod quædam sint , quæ jus naturæ ex Grotii ipsius sententia vetat , quæ apud plures nationes usitata reperias , cujusmodi fuere & *poliandria* , idest unius scemi-

næ cum pluribus viris nuptiæ simultaneæ, & nuptiæ parentum cum liberis; & permiffa fupra; & furta; & privata ultio; & plurium Deorum cultus; aliaque; quorum exempla luculentiffima protulit Pufendorffius.

§. VI. Hæc illi. Non puto tamen hæc tanti effe, ut propterea aut minus veram, aut minus fibi conflantem Grotii doctrinam cenfere debeamus, præfertim fi paucis additamentis illuftratur. Primum illud argumentum, quod verbis Heineccii propofuimus, Grotii fystema non ferit. Neque enim Grotio conflitutum erat, nifi de eo jure dicere, ex quo officia inter populos liberos, atque eorum Rectores proficifcuntur: nec ille Theologiam naturalem, & moralem, aut Ethicam monafticam, idelt quæ pertinet ad mores hominis folitarii, conformandos, fpectabat. Nemo ergo ab illo exigere debuit tale juris naturalis principium, ex quo officia quoque adverfus Deum & nofmetipfos explicarentur. Quod qui fecere, ii Grotii propofitum non videntur intellexiffe. Eft ergo Grotiani fystematis principium illud ad omne jus, quod inter homines, & homines intercedit, expediendum, adæquatum. Quid, quod & ad officia erga nos ipfos & Deum pertinet? Nam qui ex naturæ lege custodiendam & amandam focietatem intelligit, is & fe, qui focietatis pars una eft, custodire & amare oportere; & Deum totius hominum focietatis fupremum imperatorem toto obfequio colgre, facile intelligere poteft: funt enim illa inter fe copulata & connexa, ut a fe fejungantur nequeant,

§. VII. Nec longa judiciorum ferie indiget, ut conflituatur; quum quifque per fe ipfum sentire poffit, hominem nec extra focietatem nafci, nec educari poffe vitalem: ex quo vel idiotæ concludere queant, non poffe Deum non præcipere fanctiffime focietatem colendam, qui velit homines effe & confervari. Uno ergo fyllogifmo tota ea demonftratio abfolvitur. Nec brevior eft Heineccii ipfius ratiocinatio, qua nititur probare, hominem ad amorem generis humani obligari, quem ille amorem principium effe contendit juris naturalis cognofcitivum, evidens, verum, & adæqua-

tum. Quanquam quid, quæso, est aliud societas, nisi mutuus amor? Ut ne hoc intellexisse videatur Halensis doctor, non re, sed verbis a Grotio dissentire.

§. VIII. Quæ vero adversus ingenitum sensum & appetitum societatis opponi solent, partim quidem sunt vera, sed partim falsa. Falsum est, homines non esse natura sua sociales, cum ne animantia quidem bruta sint ulla infociabilia: sed verum est societatem mutuae utilitatis causa iniri. Homines nullius etiam rei indigos societatem appetere, quod ex Cicerone aliisque veteribus acceptum repetit Grotius, id equidem inficior: socialitas enim hominum ex conscientia imbecillitatis nascitur. Sed non idcirco minus verum est, socialitatem esse impetum naturæ omnibus communem: nam communis est propriæ imbecillitatis, & *εναυταρκείας*, ut ita dicam, *insufficientiæ*, sensus. Appetitum societatis anteriorem esse ad omne vitæ humanæ commercium, tam est per se perspicuum, quam est, conscientiam imbecillitatis nostræ omnem societatem prævertere. Idipsum comprobatur ex amore infantium inter se mutuo, ex amore naturali & necessario parentum in liberos; qui amor adeo omnem societatis experientiam præcedit, ut sit etiam in brutis illis, quæ hoc rationali societatis amore non admodum tanguntur; quæ super re præclara quædam scribit Tullius in I. de Officiis. Videri potest ut totum hoc argumentum pertractat Pufendorffius de jure Naturæ & Gentium lib. II. cap. 1. §. 4. Quæ reponunt ex perversis, atque corruptis hominum moribus, nullius sunt momenti adversus Grotianum systema. Principium enim legum naturalium, quemadmodum superius observatum est, non est depromendum a qualitatibus, & vitiis naturæ humanæ adventitiis, nec a sceleribus, quæ tota humana refugit natura, sed a proprietatibus inistis, & essentialibus. Tametsi quum illam Libanii declamationem contemplamur, intelligimus profecto illas omnes adversus genus humanum machinationes ex amore cœtus & societatis, perverso licet, nasci. Hoc paradoxon videtur parum cogitantibus; sed tam est verum, quam nihil horum fieri sine
phi-

philautia: nec esse in homine posse philautiam sine *phil-*
lia, *amicitia*, reliquarum rerum ulla.

§. IX. Quod attinet ad alterum Grotii principium, qui eum oppugnant, ejus mentem plane assequuti non videntur (a). Principio Grotius in subsidium tantum & confirmationem argumentis secundi illius generis utitur: ceteroquin fatetur, fontem hujus juris esse *societatis ingenio humano convenientis custodiam*. Deinde non ignorabat, ægre cognosci ab hominibus posse nationum omnium super variis vitæ humanæ officiis sententias: sed recte tamen opinabatur, sicubi ex sciantur, magnum inde argumentum desumi posse, esse aliquid natura justum, aut injustum. Laudat ille quidem Græcos tantum, & Latinos Auctores, quod ii dumtaxat ex veterum memoria supersint. Ceterum quum constet, Græcos atque Latinos cultiores fuisse reliquis nationibus, merito his in rebus eorum judicium instar omnium haberi potest, aut ceteris omnibus præferri (b). Quod spectat ad exemplum Idololatriæ, in eo quod est caput, unum esse supremum Deum, cui nullus alius sit par, gentes omnes consenserunt, quod plurimis demonstratur a Cudwortho in *Sytemate intellectu-ali* cap. 4. Reliqua superstitio ad rem eam, de qua agimus, minime pertinet, nec idonea exempla suppeditat. Ut nec idonea illa sunt ex flagitiis quarundam gen-

(a) Nihil refert rescire omnium gentium sententias: sed hoc in *historia humana* est certissimum, nullam esse gentem hodie cognitam, quæ ullis civilibus sanctionibus coerceatur, cujus legum summa, si superstitionem demas, non in ceteris cum lege Decalogi ferme consentiat. Ejusmodi legum ubique prima est Dei, aut Deorum cultus: altera, jurisjurandi fides: tum amor ac reverentia in parentes ac patriam: postremo, vetita homicidia, injurie, furta, damna, calumniæ, proditiones: vetita adulterium, rapta, incestus. Hæc vel apud Huttentottos capitalia sunt crimina: sunt apud Canadenses, Tartaros, Mexicanos, Peruanos; ne quid dicam de cultis gentibus. Id constat ex omnibus viatoribus, nec esse potest ignotum, nisi iis, qui nihil externarum rerum novissent.

(b) Quid si postponi? quo enim cultiores, eo minus communis ac ingenuæ habent naturæ, quam poliendo aliam fecere. Sed barbari neglectu, feroque more fecere belluinam. Απορον ἔργον, quod ego a doctioribus, rerumque humanarum peritioribus disputari velim.

gentium depromta : hæc enim flagitia communis hominum ratio improbat , etiam inter eos , in quibus quandoque committuntur (a) . Sunt facinora *sine more*, ut eleganter vocat Jupiter apud Statium I. Theb. v. 238.

§. X. Quæ quum sint , intelligamus , præter eas , in quas ipsi coivimus , Civitates , esse aliam totius generis humani communem , in qua omnes nascuntur , non quam pactis conficiunt ; cujusque omnes natura , non voluntate , sunt cives : & hanc Civitatem esse homini conservando necessariam , non secus atque oculo totum corpus . Itaque quum Deus velit homines esse , & conservari ; velle quoque , ut hæc humani generis mutua societas custodiatur , & quoad scimus ac possumus foveatur . Præclare Alexander Macedo totam telurem *Civitatem suam* appellabat , exercitum vero , cui præerat , *ejus Civitatis arcem* (b) . Qua ex re sequitur I. Hominem omnem operam dare debere , ut se dignum hujus Civitatis civem reddat . Inde arcessenda virtutis excolendæ naturalis obligatio . II. Nihil facere jure posse adversus hanc societatem . Quare injusta bella , seditiones , homicidia , furta , rapinæ , injuriæ , damna , impietas , ac cetera crimina , sunt prohibita naturaliter . III. Nihil moliri posse contra se suamque perfectionem sine injuria totius civitatis , cujus is est civis . Suicidium ergo & hoc quoque comine vetitum . IV. Obligari ad ea omnia agenda , sine quibus hæc societas stare nequit . Hinc lex humanitatis , ac beneficentiæ officia , quæ in parte sunt justitiæ , exoriuntur . V. Par esse (nam id est boni civis) omnia ea efficere , quæ societatem istam facere possint beatior . Inde est heroicus amor , æque virtutes , quæ illum comitantur . VI. Deum supremum hujus civitatis Principi-

(a) *Quidam Tartari uxorum quæstum ut facerent , quando nihil aliud iis suppeteret , quo viverent , rogabant Genghiskanum , summum illum Tartarorum , totiusque Orientis principem , qui ex veteri more adulterium severe vetaverat . Ille invitatus indulgit , ita tamen , ut infames haberi vellet . Historia generalis Anglorum tom. xvii. edit. Gall.*

(b) *Plutarchus in Alexandro . Sed to suam demtum vellem .*

cipem tota mente atque animo colere oportere. Quare αθεϊσμος, & ασεβεια; atheismus, & omnis impietas hac etiam ex causa cum natura pugnat.

C A P U T IX.

Systema Pufendorffii enarratur.

§. I. **S**Amuel Pufendorffius lib. II. de jure naturæ & gentium cap. 1. ut huic tractationi viam faciat, omnium primum ad demonstrandum aggreditur, hominis naturæ non congruere, ut vivat exlex (a). I. homo præditus est libertate, qua ad sui, aliorumque perniciem abuti potest, nisi legibus regatur. II. quum sit animal ceteris sanctius, menti que capacius altæ, ac cognationem quandam cum Deo habeat, requirebat profecto ipsius dignitas, & præstantia, qua ceteris animantibus eminet, ut certam ad normam ipsius actiones exigerentur; quippe citra quam ordo, decor, & pulchritudo intelligi nequit (§. 5.). III. quum major sit ingeniorum humanorum pravitas, quam brutorum; quia illa venter ferme solummodo, & venus sollicitant, quæ ubi placaveris, pacata sunt omnia; hominem vero affectuum, & cupidinum brutis ignotorum colluvies immensa subagitet, nec ad certum tempus, ut in illis, sed perpetuo: is, nisi lege regatur, qualis futura est hominum vita? Luporum, putto, Leonum, Canum inter se decertantium turbam videremus, imo infestius quid; quum nullum sit animans, quod homini plusquam homo nocere possit, & velit (§. 6.). IV. Accedit quod in homine longe major sit ingeniorum diversitas, & varietas, quam in ullo genere brutorum: siquidem, ut præclare Horatius lib. II. sat. 1. *Quot capitum vivunt, totidem studiorum millia*. Quæ nisi lege composueris, ut in Musica, ubi plures & diversæ sint voces, foedus & inamœnus sonus feriat aures necesse est; ita hic summa vitæ humana-

(a) Sed ne concipi quidem potest, ut & rationalis sit, ac in mundo, & exlex: est enim ratio lex quædam infra.

manæ confusio proveniat (§. 7.) . Tandem ceteris omnibus animantibus imbecillius animal homo est ; cui nisi cura & lege subventum fuisset , is etiam omnium fuisset miserrimus (§. 8.) . Ex quibus consequitur , divinæ fuisse providentiæ , naturalem hominis libertatem intra certos cancellos , latis per naturam ipsam legibus , continere (a) .

§. II. Quibus demonstratis , cap. II. in statum hominis naturalem inquirat . Status hominis naturalis is dicitur , in quo homo per ipsam nativitatem constitutus concipitur , prout abstracta intelliguntur inventa , atque instituta humana , aut homini divinitus suggesta , quibus aliam veluti faciem induit vita humana (b) . Is status tum intelligetur clarius , cum fingentur homines e tellure

(a) Hæc videri possunt superflua ; nam pugnat hominem ordinati mundi esse partem , rationalem , liberum , & omnibus interea exsolutum legibus . Itaque Deus , etiamsi velit , tantum monstrum efficere non potest ; ἀπορρον enim esse nequit . Constat igitur , non potuisse a Deo hominem ex legem creari : nam ne corpora quidem extra leges omnes esse possunt in mundo arte divina ordinato . Quid hac tanta loquacitate molitur Pufendorffius ? Probare nempe , quod si homo ordinati mundi pars est , nulla probatione indiget . Illud expediendum erat , quæ sit hæc lex , quod , si Wolfso credimus , non expedivit Lundinensis Doctor .

(b) Ibid. Hominem , qualem nostris in civitatibus reperimus , haud esse eum , quem sola efficeret , fingeretque natura , neminem ego latere existimo . In hunc enim nostrum hominem commoliendum tria adlaborant , natura , experientia , educatio : in illum , quem Pufendorffius querit , natura ferme sola , eaque experientiæ pars , quæ item naturalis est rota . Natura animantis hujus partes explicantur justumque accipiunt incrementum , ac cum istoc incremento animi corporisque vires roborantur . Accedit mox cum illa cognitio , quam sensus deferunt , indeque natæ naturaliter animi considerationes ; tum artuum exercitatio . At domus & civitas iis eum habitibus induunt , quos frustra a natura petiveris ; itaque omnino alium efficiunt , quam quem sola natura fingeret . Licet id cognoscere si Samojedas , aut Lappones cum nostris Italis conferamus ; quanquam ne in illis quidem sola adlaboravit natura . Porro educatio quum sit triplex , domestica , civilis , ecclesiastica ; singula aliquid de suo addunt , quo illum informem naturæ hominem , crude dumque laterem perpoliant , ac seu lambendo , seu premendo , seu flectendo hisce nostris moribus accommodent . Utinam doctæ , præclare , ac e re nostra semper .

ture velut fungi nati, quod & veteres Ægyptii (a) & Epicurei docuere (b). In eo naturali statu nunquam universum genus humanum simul & semel existit, quum sciamus primos mortalium a Deo creatos, sitosque in societate conjugali, & qui inde nati sunt, sub paterno imperio natos, & commoda vitæ a Deo doctos: sed veteres Auctores (ut & nonnulli recentes) nullum dubio locum relinquunt, quin sequentibus temporibus plurimi mortales a veteri vita desciscientes in statum pene naturalem abierint (c). Tum adversus Spinozam, & Hobbium differit, ostenditque statum hunc naturalem non esse belli, & inimicitiae statum, sed pacis (d): repetendum nempe esse hunc hominis statum non ab impetu, & inclinationibus animæ sensitivæ, quasi nulla esset in homine ratio, sed a ratione, quæ præcipua hominis pars est, quæque habet in ceteras facultates regimen (e): quæ ratio tantum abest, ut statum illum præseferat, ut amorem potius & pacem suadeat (ibid. §. 9.) Quod confirmari potest exemplo puerorum, earumque nationum, quæ a veteri vitæ simplicitate, quæ multum habet pueritiæ, nondum discefferunt, neque eorum commercio depravatae sunt, qui rapere omnia, & avare imperitare solent (f). Qua de re superius dictum est.

§. III. Interim nihil eo statu miserius esse demonstrat. *Finge* (inquit lib. I. de Officio Hom. & Civ. cap. III. §. 3.) *hominem citra omnem ab aliis hominibus accedentem curam & culturam ad robustam ætatem proventum, cui nihil sit scientiæ, nisi quod ex proprio*
in-

(a) Diodorus Sicul. lib. 2.

(b) Lucretius lib. 5.

(c) Thucydides, Aristoteles sæpe, Cicero, Horatius &c. Pene addidi: nam sine familiis nemo mortalium vitalis est. Cum tamen illæ familiæ sparsæ vivunt, agrestes sunt, ac belluina. Vide apud Dampier vitam moresque Australium hominum.

(d) Ob conscientiam nempe imbecillitatis timide hominibus viventibus. Vide Groelandiam Anderfoni.

(e) At hujusmodi mortales, quos fingit, sensu plurimum, ratione nihil ferme pollent. Vide quæ de Magellanicis retulit Anson.

(f) Kolbi Descriptio Promontorii Bonæ spei.

ingenio velut ultro pullulavit, eundemque ab omni aliorum hominum ope atque consortio in solitudine destitutum: sane vix miserabilius animal deprehendetur: elingue nimium ac nudum; cui nihil aliud relictum, quam herbas radicesque vellere, aut sponte natos fructus legere (a): sitim fonte, flumine, aut lacuna obvia levare: repellendis aeris injuriis antra subire, aut musco, gramineve corpus utcumque tegere: tempus tediosissimum per otium exigere (b): ad quemvis strepitum, aut alterius animantis occursum exhorrescere (c): denique, fame, frigore, aut per feras bestias perire (d).

§. IV. Quæ quum sint, ut genuinum fundamentum legis naturalis intelligatur, docet ipsam hominis naturam conditionemque, & inclinationes accurate contemplandas (e). His vero pensitatis facile patescere, quæ Cicero de Finibus lib. III. de omni animante scribit, ea quoque in homine locum habere, simul nempe atque natum est animal, ipsum sibi conciliatur, & commendatur ad se conservandum, & ad suum statum, & ad ea, quæ conservantia sunt ejus status, diligenda: alienatur vero ab interitu, iisque rebus, quæ interitum videntur afferre. Ex quibus duobus, miseria nempe hominum in statu naturali degentium, & amore sui, fundamentum hujus scientiæ eruit. Est scilicet homo animal sui conservandi studiosissimum, per se egenum, sine sui similium auxilio conservari ineptum, ad mutua commoda promovenda maxime idoneum: idem tamen sæpe malitiosum, petulans, & facile irritabile; atque ad noxam inferendam promptum, & validum. Ejusmodi igitur animal ut salvum sit, bonisque fruatur, quæ in ipsius conditionem cadunt, necessarium est, ut sit SOCIABILE, idest ut conjungi cum suis similibus velit, & adversus illos ita se gerat, ut ne isti ansam accipiant

(a) *Andersoni Groelandia. Maupertuisii Laponia.*

(b) *Groelandi quum otiantur frequenter suspirant. Anderson.*

(c) *Veluti lepores. Dampier.*

(d) *Plerique sine ignis usu reperti etiam in gelidis regionibus. Alibi dictum. Toto Septentrione carent lignis.*

(e) *De juve nature, & gentium lib. II. cap. 3. §. XIV.*

piant eum lædendi, sed potius rationem habeant ejusdem commoda servandi, & promovendi.

§. V. His positis (pergit ille de Offic. homin. & Civis lib. II. cap. III. §. IX.) apparet fundamentalem legem naturalem esse hanc, *cuiuslibet homini quantum in se est colendam esse & servandam SOCIALITATEM*. Socialitatis autem nomine earum virtutum complexum intelligit, quibus homines ita conformantur, ut in unum harmonicum corpus jungi quum velint, tum possint. Nam quemadmodum ut ex pluribus lapidibus fornix struatur, non quævis lapidum figuræ aptæ sunt, sed eæ tantum, quibus singuli singulis copulari possint, & teneri conjuncti; ita non quivis animorum habitus & formæ aptæ illæ sunt ad societatem ineundam & arcte continendam, sed eæ tantum, quibus facile alii cum aliis coeunt. Totum id socialitas est. Ex quo consequitur, ut quoniam qui vult finem, vult etiam media, sine quibus finis obtineri nequit; omnia, quæ ad hanc socialitatem ineundam & conservandam necessario, & in universum faciunt, jure naturali sint præcepta: quæ eandem turbant, aut abrumpunt, vetita intelligantur. Reliqua autem præcepta sunt velut subsumptiones sub hac generali lege comprehensæ, quarum evidentiam lumen illud naturale hominibus insitum insinuat. Ut autem probet ea præcepta vim legis propriæ dictæ habere, pergit eodem loco ostendere a Deo illa manare. Nam quum non possit Deus non velle, ut homines iis viribus, quas sibi præ brutis peculiares esse sentiunt, ad naturæ suæ incolumitatem utantur; neque id obtineri queat, nisi servatis iis legibus, quæ socialitatem colendam dictant; inde concludit, intelligi ab omnibus, obligari homines ad eas leges servandas.

§. VI. Quivis nunc ipse per se intellexerit, socialitatem tribus præcipue contineri, *justitia*, *humanitate*, *pietate*. Ac primum socialitatis leges poscunt, ut & neminem ullo pacto lædamus; & jus cuique suum tribuamus integrum. Nam qui lædit, aut jus negat, vel intercipit, lædit profecto societatem, quam homo cum homine habere oportere natura dictat. Deinde
qui

qui nulla alios benevolentia excipit, nihil juvare paratus est, neque, ut ait ille, *consolando*, neque *consilio*, neque *re*, inhumanus est, nec societate aliorum dignus. Sunt scilicet quædam non *injusta* quidem, si rigorem juris spectes, sed *inhonesta* tamen: *Δικαιὰ μὲν*, inquit ille apud Euripidem: *καλῶς δ' ἔστω*, quæ alios ab aliis sejungant. Quanquam, ut præclare ait Cicero, & hæc quoque in parte sunt justitiæ illius, quæ non in civilibus legibus, sed naturalibus constituta est. Postremo impietas divinique cultus negligentia communem summi parentis ac Regis metum abigit ab animo; quo habitu qui præditi sunt, difficulter cum aliis sancte uniri, ac sociati vivere sciunt aut possunt.

§. VII. Quæ adversus Pufendorffium objecta sunt ad duo capita referri possunt. I. Non esse id principium evidens, ut etiam idiotæ inde officia derivare possint. II. Nec esse adæquatum; quum officia hominis erga seipsum, & Deum, ægre ex illo deduxeris. Parum autem utrumque adcurate. III. Quod ex culti homines faciunt, quum ex artis principiis consequentia vitam spectantia deducunt, id idiotæ velut habitu quodam naturæ efficiunt: vim nempe præceptorum naturalium sentiunt, etsi principia ipsa disciplinæ non intelligant. Quomodo Mathematicus & idiota quidquam cum proportionem efficere possunt, quanquam posterior proportionis regulas ignoret. Ita Zabaglia ille noster mechanices vim & usum tenere potuit, non solum totius ignarus mechanices, sed etiam litterarum omnium rudis. Natura ipsa quivis sentit, hominem solum & imbecilliozem esse, quam ut bene beateque esse possit; & *in adjutorium mutuum generatum esse* (a).

ut

(a) Cur si ita est, dicit aliquis, nemo hominum est qui non se pleris facit, quam alios, quique aliis non omni modo invidet, atque insidietur? perbellum hoc Angeli Politiani e. istolium in invidum epist. lib. 7. epist. 23. Invidet omnibus omnia, præter invidiam: sed & hanc invidet tuo compari: qui magis invidus etiam, quam tu. Sic invidiam tibi non invidet, quam tu illi tamen invidet. Atque hæc est generis ferme totius humani natura. Ego magnam hujus scditatis partem a prava educatione deduxerim: ea factum est, ut non satis ex natura bona partiti simus. Inde & invidia excita, & accensa cupiditas, & oborta insidia, ac fallacia, & cetera ejus generis crimina Groelandis ignota.

ut loquitur Seneca lib. I. de Ira cap. V. Sed non omnes intelligunt hujusmodi societatis primas, & altas rationes. Quod non efficit, ut minus sint illæ veræ: nihil enim pronunciandum est falsum, quod ejus rationes idiotæ non intelligunt: hisce enim in rebus regula veritatis est rerum natura, non hominum imaginationes. Si ad stultorum captum dijudicanda est veritas, non video quid superesse potest veri in scientiis sublimioribus.

§. VIII. Quod spectat ad alterum, officia hominis adversus seipsum ex illo principio recte derivantur, si observaverimus socialitatem ita demum posse coli, si quis ita sit formatus, ut sciât queatque facile cum aliis concorditer vivere, iisque esse utilis. Sic vero formari nequit, nisi in omnibus officiis, quæ sibi debet, instructus sit, & compositus: nisi animi corporisque vires ad regulam exegerit ac informaverit. Officia vero adversus Deum præclare ex eodem principio deduxeris, si animadvertas, Deum esse hominum omnium & parentem & principem summum, quocum omnium perfectissima & intima societas ac amicitia excolenda est. Quanquam si concedamus, quædam esse adversus nos ipsos officia, quæ non facile ex illo principio derivare possimus, ut nec officia adversus Deum, non idcirco minus perfectum erit Pufendorffianum opus; quum ille juris naturæ, quo gentes continentur, præcepta explicare voluerit, non Ethicam, nec Theologiam tradere. Quum itaque totum opus fini Auctoris respondeat, perfectum omnino censendum est. Scio Wolfium contendere, neque a Grotio, neque a Pufendorffio principia hujus naturæ juris ita esse demonstrata, ut extra omnem dubitationem posita sint. Sed & scio principium *socialitatis* ita esse suapte natura perspicuum, ut demonstratione non egeat: tam enim intimè persentitur, quam conscientia, ut dixi, imbecillitatis. Utinam sancte servare doceremur, sancteque institueremur!

CAPUT X.

De principiis legis naturalis ex Cumberlandi mente.

§. I. **Q**Uo tempore Pufendorffius Lundini in Suecia, qua in urbe docebat, *Corpus juris naturæ & gentium* vulgavit, idest anno 1672. ; eodem prorsus anno Richardus Cumberlandus Anglus edidit Londini *Disquisitionem philosophicam de legibus naturæ, in qua etiam Elementa Philosophiæ Hobbianæ refutantur*. Eo libro summopere delectatus est Pufendorffius ipse, ususque passim in sequentibus operis sui editionibus. Natus est Cumberlandus anno 1632. humili prorsus loco. Litteris operam dedit primum Londini, mox Cantabrigiæ, versatusque est accuratissime in Philosophicis præcipue, & Mathematicis disciplinis. Studiis attritus extinctus est paralyti anno 1719. ætatis suæ 87. Opus de Legibus naturæ novem continetur capitibus, ordineque Geometrico compositum est. Barbeiracius edidit Gallice anno 1744. , qua lingua legendum Auctor fuerim : habet enim latinum opus dictionem incomptam, atque asperam, plurimisque in locis Delio natatore indiget.

§. II. Cumberlandus igitur legem naturæ *fundamentalem* ex creaturarum rationalium fine repetendam censet. Is igitur systema omnium spirituum, seu creaturarum rationalium, mente excogitavit, atque comprehendit, velut unam urbem ac civitatem : deinde ex fine hujus systematis legem naturæ primam, ac ceterarum fontem perquirat. Ut omittamus quæ ad totum systema intellectuale animorum pertinent, quæque nescio quem Platonismum sapiunt, quo ejus ævi philosophi plurimum oblectabantur, ad hominum propria properemus. Finis hominis heic agentis ex ipsius natura intelligitur esse qualiscumque, cujus capax est, beatitudo. Beatitudo autem, quæ homini in terris degenti contingere potest, in duobus posita est, ut corpus

corpus sine dolore, & animus sine ægritudine sit (a): ergo his duobus totus præsentis hominum vitæ finis absolvitur.

§. III. Jam is finis, quo natura ipsa nostra, velimus nolimus, necessario contendit, non potest esse nobis propositus, nisi ab auctore generis nostri, idest Deo: quæ enim naturalia sunt, ea Deum habent auctorem (b), Jam vero quum exploratum sit, qui vult finem, vel le media, præsertim si causa sit sapientissima; dubitare non possumus, quin Deus velit adhiberi ab homine ea omnia media, quæ eum finem spectant, vetetque contraria. Quumque Deus sit summus hominum Imperator, est hæc ejus voluntas, qua præcipiat, qua vetet, suprema creaturarum rationalium lex. Quæ autem natura vetat, aut præcipit? Is codex discendus.

§. IV. Ut autem ejus codicis præcipuum fundamentum cognoscatur, inquirendum in id est, quo servato, finis ille obtinetur; neglecto, longe ab eo aberratur. Nam quum ad nostram felicitatem efficiendam ordinatæ sint leges naturæ, id certe eorum omnium erit fundamentum, quo posito felicitas nostra obtinetur; ablato, amittitur. Id autem sequente ratiocinio detegit. Ponamus omnes creaturas rationales mutuâ sese benevolentia, quoad intelligunt, & possunt, complecti, atque commune totius systematis bonum in omnibus spectare, ea ab iis habebitur felicitas, qua majorem nullam ipsæ sibi præstare possunt; nam nulla earum alteri quidquam mali faciet, & omnem, qua pollet, opem alteri feret. Ex. gr. si ea hypothesis ad homines tantum restringatur, carebit vita humana iis malis, quæ homini sunt ab homine, quæ numero, & intensitate omnium sunt maxima; & e contrario

H 2

frue-

(a) Devexarunt quidam hanc naturalis felicitatis definitionem, velut Epicuream. Imperite: nam felicitatem cum causa felicitatis efficiente turbaverunt, quas res oportet esse secretas. Felicitas in conscientia voluptatis posita est: quæ causa id efficiat, investigandum est philosopho per diligentem. Sola eam vera virtute ducere obtineri posse in III. parte demonstravimus.

(b) August. in Joan. Quod audis, homo, Deus fecit: quod audis, peccator, ipse homo fecit. Tract. XII.

fruetur omnibus iis bonis ; quibus præstantiora a nullis aliis naturæ causis sperare potest . Ergo dubitare non possumus , quin si omnia hujus systematis intellectualis membra mutua se benevolentia complectantur , eam hic felicitatem habitura sint , cujus ipsa sunt capacia . Ponamus item hæc membra sese mutuo laceffere ; in mutuo esse bello & inimicitia ; nihil miserius eorum vita excogitari poterit . Demonstrant id bella nationum civilia , eaque Europæ tempora , in quibus nihil erat ulla in parte quieti , nihil sancti , nihil cuiusque . Ex quibus conficit Cumberlandus , mutuam hanc benevolentiam primum esse fundamentum felicitatis vitæ humanæ , atque idcirco primum quoque fundamentum legum omnium naturalium , quæ hanc felicitatem spectant . Ita ratiocinatur Cap. I. laudati operis §. IV.

§. V. Neque vero aut arbitraria est ea hypothesis , aut obscura & ignota mortalibus . Nam nulla evidentior demonstratio proferri potest , qua ostendatur causam aliquam esse veram , nisi hæc , quod ea causa posita , effectus, reapse sequatur ; ablata , auferatur . Quum autem ea benevolentia & communis boni generis humani cura posita , alteque infixæ humanis pectoribus , singulorum nascatur felicitas ; ablata , amittatur ; est ea causa vera & certa . Quinimmo quum non alia ratione finis ille obtineri possit , uti per se perspicuum est ; est quoque causa necessaria . Ita ratiocinatur eodem in cap. §. VII. Quomodo regula solvendi geometrici alicujus problematis , quod uno modo solvi potest , vera quidem est , si ea adhibita problematis solutio efficiatur : & necessaria , quando nulla ejus solvendi alia superest via : Deinde nemo est , qui non intelligat , totum hominum genus esse corpus unum , quod nec sanum esse potest , nisi membra integra sint & sanà ; nec rite functiones suas peragere , nisi membra omnia harmonice conspirent in eundem finem . Nemo est , quem latere possit , bonum totius hujus corporis in membra defluere , nec proinde membra tranquilla esse posse , ubi totum a se ipsum dissidet . Experientia quoque omnes docet , nec solitarios ho-

homines commode vivere posse, imo ne vivere quidem: nec in societate sine mutua hac benevolentia & boni communis reciproca cura ac præsidio (a).

§. VI. Ex ea doctrina potissima legum naturalium capita facile quivis derivaverit. Paucis id præstat Auctor noster §. XXIV. ejusdem capituli. Principio quum servari totum nequeat concisis partibus; inde sequitur Lex illa, quæ est totius Justitiæ humanæ fundamentum, & qua sublata, nullo modo vita hominum consistere potest, *neminem innocentem læseris; si feceris, in integrum restitue*. Læditur autem quisque, quum quod suum est quocumque modo aut turbatur, aut corrumpitur, aut deterius efficitur. Suum cujusque appellatur quodcumque bonum, seu ingenitum, seu adquisitum rite, aut ad mentem, aut ad corpus, aut ad fortunam pertineat: ex omnibus enim his bonis existit illud, quod *suum* cujusque dici solet. Egregie hæc explicat Henricus Koëklerus in dissertatione prolusoria ad Elementa juris naturalis. Innocentem autem dixi: nam quum læsio alicujus publici boni ergo fit, quod contingit, quum puniuntur, qui alicui crimini obnoxii sunt, quod crimen in damnum societatis vergat, seu ut ad meliorem frugem convertantur, seu ut aliis exemplo sint, ne similiter peccent, proprie lædi non dicuntur, sed vindicari delicta (b). Posterior legis pars ex priore consequitur: nam qui læsit, nec damnum reparare studet, is lædere continuat; quod natura vetat,

H 3

§. VII.

(a) At enim, civitates velut omnium pravorum facinorum, immanitatis, injuriarum, ac nefandorum flagitiorum architectrices & scatebras sunt qui traducunt. Rousseau Emilie, ac Du contract social. Cui primum respondeo, esse quidem in societate mala, quæ tamen multis bonis compensantur: in naturæ statu vix esse, quod bonum dicas: nam illa, quæ dicitur libertas, mere est precaria, si cuiquam licet impune auferre; aut si est ulla, beluarum est: hominis alia sit vera libertas necesse est, ut alia natura. Tum, ea flagitia invaluisse cum, ut ait in Jugurtha Sallustius, coepit nobilitas dignitatem, populus libertatem in libidinem vertere: sibi quisque ducere, trahere, rapere.

(b) Quin utinam & expeditæ essent in reos pœna, & pro malefactis dura. το γαρ πανουργον εις εν ην πολυ, haud enim tot essent scelera, ut cogitare ait ille apud Sophoclem, Elect. v. 1540.

§. VII. Deinde ut publica felicitas obtineatur, non
 a fficit abstinere ab inferenda injuria : nam vita hu-
 mana non suis tantum bonis contenta esse potest, sed
 communicatione indiget aliorum . Itaque majori cum
 indigentia nascimur, quam ut ei ipsi per nos satisfac-
 cere possimus ; quod non sine ratione fit . Ergo lex
 illa fundamentalis Cumberlandi nos etiam docet, ut
 quocumque modo possumus, seu consilio, seu viribus,
 seu opibus nostris, in commune consulamus, idest, ut
 ceterorum bona pro virili promoveamus, & quæcum-
 que nobis fieri ab aliis volumus, id aliis & nos facia-
 mus . Dicitur non potest quantopere humanæ vitæ mu-
 tua tranquillitas hac caritate corroboretur, quantum-
 que in nos ex nostra erga alios beneficentia bonum re-
 dundet . Nam quemadmodum quum corporis membra
 alia aliis serviunt, singula bene valideque se habent ;
 ita quum homines alii aliis, quoad sciunt, & pos-
 sunt, opitulantur, nemini quidquam deest, quo esse,
 & vivere possit beatus (a) . Vide Tull. Lib. I. de Le-
 gibus .

§. VIII. Præterea, qui bonum commune in omni-
 bus suis actionibus spectat, is ita se componat oport-
 tet, ut præcipuis publici boni causis efficientibus, aut
 publicis rectoribus, in primis Deo, principibus, aliis-
 que Imperatoribus supremis, ac ministris, placeat ;
 quod fit obsequio, atque amore erga illos . Accedit
 quod

(a) Itaque Christus dominus noster Dei & proximi amore to-
 tam legem contineri voluit . Sed id & philosophorum præclariores
 intellexerunt . Lex fuit Pythagoræ, omnes homines mutua caritate
 complectendos, ut docuit Jamblicus in vita Pythagoræ . Seneca
 epist. 95. Omne hoc, quod vides, quo divina atque humana con-
 clusa sunt, unum est : membra sumus corporis magni . Natura
 nos cognatos edidit, cum ex iisdem & in eadem gigneret . Hac
 nobis amorem mutuum indidit, & sociabiles fecit

Iste versus & in pectore & in ore sit,
 Homo sum, humani nihil a me alienum puto . Lucanus lib.
 II. v. 380.

. . . hæc duri immota Catonis
 Secta fuit, servare modum, finemque tenere,
 Naturamque sequi, patriæque impendere vitam,
 Nec sibi, sed toti genitum se credere mundo .

Vide ut hac copiose edisserit Huetius in Alnetanis lib. III. cap. 17.

quod Deus supremus ille omnium Imperator nos impense amat; id quod ostendunt innumera & continua ejus in nos beneficia, animi, corporis, rerumque externarum: ergo monstro simile est eum non reamare, a cujus amore tanta in nos bona conferuntur. Hinc deduci possunt in Cumberlandi systemate officia omnia, quæ Deo debemus, quæ duobus continentur, OBSEQUIO, & AMORE. Neque enim est aliud pietas, nisi Deum amare, ejusque voluntati esse obsequentissimum: quicumque enim Deum amat, ac veretur, cetera quoque ei officia, quum interna, tum externa libentissime præstat. Quid quod ille amor necessarius est ad nos rite amandos? Difficile namque est se mutuo fratres amare, qui communem patrem non ament. Itaque amor & reverentia erga Deum efficit, ut nos veluti ex communi patre prognatos, ac propterea fratres, diligamus, amemus, atque alii aliis utiles & benefici esse studeamus. Ceterum hanc partem Philosophiæ Moralis paucis attingit Cumberlandus, velut qui aliud spectabat. Propositum enim illi erat leges societatis regendæ explicare, & Hobbessianam oppugnare Philosophiam; non vero omnia religionis ac legis naturalis dogmata tradere.

§. IX. Tandem ex eodem principio sequitur, ut quilibet sibi conservando, perficiendo, ornando, quoad fieri potest salvo communi bono, studeat: cura enim totius consistere nequit sine cura singularum partium. Et quomodo, si oculi cogitent, intelligant profecto nec se esse, & vivere posse, ubi totum corpus intercidit; nec rursus corpus absolutum esse, ac perfectum sine oculis, ac proinde oportere duplicem in se curam suscipere, totius & partis, ita tamen, ut altera alteri non adversetur: eodem modo singuli homines, & toti generi humano conservando, atque perficiendo studere debent, certi, quod partes tranquillæ esse nequeant, ubi totum perturbetur; & sibi, quum nec quietum, nec perfectum totum esse possit sine singulorum perfectione, & quiete (a). Ea autem cura tri-

H 4

plex

(a) *Vide Sen. laudata ep. 95.* Societas nostra lapidum fornicatio.

plex habet objectum, *animus, corpus, & externa corporis bona* : nam ab iis tota nostri tranquillitas pendet. Animus virtute instruendus est : corpus robore : bona paranda nec plura, nec pauciora, quam pro viatico satis sint. Virtus patientia : robur exercitatione & temperantia : bona honestis artibus comparantur. Superfedeo nunc ab iis enarrandis, quæ vir doctus ea super re edisserit plurima. Merentur ea apud Auctorem ipsum legi. Nam etsi nonnihil habet Cumberlandiani operis lectio laboris, ob arctissimam & pene geometricam ratiocinationum seriem ; utilitas tamen qualemcumque eum laborem non compensat modo, sed longe vincit.

C A P U T XI.

De Heineccii systemate super principiis legis naturalis.

§. I. **P**Lurima Cumberlando ac Coccejo debet Heineccius quod ad hanc rem spectat, etsi vix ullam ille Cumberlandi mentionem habet. Hic igitur Auctor in I. Libro Elementorum Juris Naturalis & Gentium cap. III. profligatis, ut putat, aliorum opinionibus (a), §. tandem 77. ut quid sibi rem omnem accurate expendenti in mentem venerit, perspicue ostendat, alte repetit. Principio reputat, Deum tanquam ens infinitæ sapientiæ & bonitatis nihil aliud velle, quam ut homines, quos condidit, vere felices sint, ac beatissimi (b). Quum enim ipse tanquam ens per-

rioni simillima est ; quæ casura, nisi invicem obstarent, hoc ipso sustineretur.

(a) *Ut Othmanorum scilicet in morem, trucidatis fratribus, solus imperitaret.*

(b) *Hic ne etiam? Sunt qui id negant: est enim hæc visa militia: in illa caelesti Republica pax ac felicitas futura. Sed haud dubito quin & hic eam velit felicitatem, cujus capaces sumus. Sen. eod. loco. Quæ causa est Diis benefaciendi? natura. Errat, si quis putat illos nocere velle. Non possunt. Nec accipere injuriam queunt, nec facere. LÆDERE ENIM LÆDIQUE CONJUNCTUM EST Ceterum castigant quosdam & coercent, & irrogant pœnas, & aliquando specie boni puniunt.*

perfectissimum nulla re indigeat; homines, qui soli ex rebus creatis nobis consuetudine notis felicitatis capaces sunt, non sui ipsius felicitatis causa condidit, sed ut eos veræ felicitatis participes redderet (a). Vult ergo, ut homines libertate sua ita utantur, ut eam felicitatem semper præ oculis habeant. Est autem Dei voluntas fons juris universi, ac justitiæ; ergo lex & jus naturæ in hoc totum tendit, ut actiones hominis liberæ ad veram felicitatem regantur.

§. II. Jam vero felicitas in fruitione boni, malique privatione consistit; ergo lege naturæ eo intendit supremum Numen, ut vero bono perfruamur, malumque evitemus (b). Quandoquidem autem bono perfrui non possumus, nisi per amorem (c); inde porro infert, Deum lege naturæ nos obligare ad amorem (earum nempe rerum, sine quibus beati esse nequimus); eumque amorem, & principium juris naturæ, & ejusdem veluti compendium esse (ibid. §. 79.). Quod mox confirmat scripturarum sacrarum auctoritate attestationeque. Nam Christus Servator noster aperte docuit; ex amore Dei super omnia, & proximi sicut nostri, universam legem pendere (d). Paullus vero caritatem vocavit *summam legis*, & *legis impletionem* (e) & *finem præcepti* (f).

§. III. Porro amor ei est appetitio boni conjuncta cum voluptate ex ejus perfectione & felicitate; quem amamus, percepta: odium vero averfatio mali conjuncta cum voluptate hausta ex ejus infelicitate, quem odio habemus. Itaque, inquit; ex ejus rei, quam amamus, præstantia & felicitate voluptatem capimus, eamque rem, quantum in nobis est, amplificare & conservare connitimur. Quod contra odio prosequimur id infelicissimum potius, quam felix ac beatum esse cupimus (g).

(a) *Seu hic, seu alibi, ajunt.*

(b) *Ajo.*

(c) *Perfrui utique, quum adest, an etiam adipisci, quum non adest?*

(d) *Matth. 12. v. 37.*

(e) *Ad Romanos 13. v. 9. 10.*

(f) *1. ad Titum cap. 1. v. 5.*

(§. 80.). Ex quo consequitur, amantem nihil ægre velle facere ei, quem amat; nam id est odissa; sed velle potius omnia in eum bona, quoad potest, conferre.

§. IV. Objecta autem, quæ amari a nobis possunt, ac debent, ut simus beati, tria omnino sunt, *Deus*, *Nosmetipsi*, *Alii*: nam sine horum amore infelices sumus necesse est. Deus amore *devotionis* amandus: nos amore *amicitiæ*: alii item *amicitiæ amore*, ut æquales. Qui itidem amor vel est *justitiæ*, vel *humanitatis*, ac *beneficentiæ*. Amor devotionis, seu obedientiæ, est amor entis præstantioris, perfectiorisque, cujus præstantia ac felicitate ita delectemur, ut illud omni veneratione atque obsequio prosequendum censeamus. Amor justitiæ est is amoris amicitiæ gradus, quo quem amamus nullo modo lædere parati sumus. Amor vero benevolentiae is amoris amicitiæ gradus, quo quem amamus, quocumque modo possumus juvare studemus.

§. V. Quibus definitis, tum progreditur ad propositiones fundamentales legum naturæ & naturalium officiorum expediendas. Ac primum Deus est ens perfectissimum, & a quo toti pendemus; ergo lex naturæ jubet omnibus animi viribus colendum, eique perfectissimum, ac intimum in primis cultum præstandum (§. 91.). Quo⁶ ex axiomate omnia, quæ Deo debentur, officia late deducit eodem libro cap. V. Deinde nostrorum ipsorum amor non potest aliter esse comparatus, quam ut ad perfectionem & felicitatem nostram consequendam, & pro virili conservandam, & amplificandam obligemur, dummodo id facere possimus salvo amore, quem Deo & aliis debemus. Itaque axioma, quo officia omnia erga nos continentur, est, *Homo nihil eorum, quæ ad suam perfectionem, & felicitatem adsequendam, conservandam, amplificandam pertinent, prætermittere tenetur, dum id sine amoris Dei, & proximi violatione fieri potest (a)*: Ex eo vero principio officia erga nos ipsos pluribus prosequitur eodem lib. cap. VI.

§. VI. Tandem quandoquidem homines nobis natu-
ra

(a) *Ibid.* §. 93.

ra æquales sunt ; illa vero naturæ æqualitas æqualia etiam amoris officia exigit : consequens est , ut alterius felicitate non minus , quam nostra delectari oporteat , ac proinde ita alios amare , ut nos ipsos . Unde tertium existit axioma , quo officia omnia erga alios continentur , *Homo hominem non minus quam se ipsum tenetur amare , nec alteri , quod sibi fieri non vult , facere ; contra illi facere omnia , quæ sibi ab altero fieri cupit*. Quæ autem hujusmodi sint officia , fuse explicat novem sequentibus ejusdem libri capitibus.

§. VII. Quilibet nunc ipse per sese facillime intelligit , Cumberlandi , & Heineccii systemata super legibus naturæ unum idemque omnino esse : uterque enim *amorem* hominibus natura ipsa præceptum docet ; eumque esse principium *cognoscitivum* jurium & officiorum naturalium . Uterque præterea demonstrat , nos ad amorem obligari ex nostri *sine* , idest *felicitate* . Paullo latius eam doctrinam deducit Heineccius , atque altius repetit : concinniores tractationem , ac faciliorem adornat , quod in Cumberlando desideratur . Accedit id quoque discriminis , quod Cumberlandus systema nescio quod spirituum animo concipit , cujus partes omnes , *velut magni corporis membra* , benevolentia mutua inter se connecti vult : tum in Platoniorum quasdam notiones , ut illa ferebat ætas , propendit : quæ ambo haud admodum curat Heineccius .

§. VIII. Interim viri docti dum giganteo more veteres hujus disciplinæ Auctores perditum eunt , ut soli regnent , vim quæstionis non satis dilucide explicuisse videntur , in primis Heineccius . Itaque iis primum opponunt , non hic quæri tantum , quid nostra utilitas , quæ recta ratione gubernatur , exigat in vita hac ducenda : nemo enim negaverit exigere nostri beatitudinem , &amque consistere non posse sine communis boni communi cura : nam ipse id Hobbius , quem illi oppugnant , docet , qui idcirco de jure omnium in omnia demtum aliquid vult , quod eo jure , dum nihil in commune consulitur , & singuli pereunt . Sed non statim sequitur id , quod recta ratio e re nostra esse docet , *lege æterna & naturali præcipi* , contrarium vetari : non illa

illa enim mundum propter nos; sed nos propter mundum salvos esse vult. Tum ex solo amore voluntaria sequi ajunt officia, quæ extorquere tanquam ex jure non liceat. At hominis ea natura est, ut non voluntariis contenta esse possit officiis: exigit enim & ea, quæ vel ab invitis præstentur (a): *jure cogente* regendus est. Nam ita, ajunt, comparati sumus, ut propter philautiam, seu nostri ipsorum amorem, *mali* plerique omnes ipsa natura sponte simus: *boni* vero non nisi vi & fræno. Deinde quum uterque conetur probare, existare voluntatem Dei, qua benevolentia, aut amor præcipitur, adeoque lege naturæ nos ad benevolentiam, & amorem obligari; ab utroque exquirunt, cadere ne semper sub lege possit amor, aut odium, non quatenus præstationes sunt, aut denegationes officiorum, quod nemo negaverit; sed quatenus animi appetitus atque affectus? Si sibi consentanei esse volunt, negabunt; quum diserte fateantur, lege morali solas actiones humanas, idest liberas, non etiam mechanicas & necessarias regi posse; affectusque omnes sæpe esse necessarias naturæ humanæ commotiones, *quæ apprehensas formas sequuntur*, ut ajunt Scholæ; quas ratio quidem & voluntas gubernare possunt, non autem excitare, aut excitatas cohibere, nisi bonorum, aut malorum formis, ac repræsentatione; sub lege ergo aut præcipiente, aut vetante cadere ipsi per sese, ac *immediate* non posse videntur.

§. IX. Sed quoniam pulcherrimum hoc verissimumque systema, ac homine dignum fovendum omnino est, & quoad in nobis est, promovendum, conabimur paulo clarius principium istud *benevolentiae & amoris* expedire, atque confirmare, ac a superioribus objectionibus vindicare. Renatus Cartesius part. 1. epistolar. epist. xxxv., quæ data est ad Canutum Reginae Sveciæ Administrum, præclare distinguit inter amorem pure *intellectualem*, sive *rationalem*, atque eum amorem, qui naturæ animalis commotio est. Prior, inquit, non

(a) Vide Koeklerum in exercitationibus de jure naturæ differt. prolusoria.

mihî videtur aliud esse, quam quod ubi anima nostra bonum aliquod sive præsens, sive absens, percipit, quod sibi conveniens esse judicat, se cum illo voluntate conjungit, hoc est se ipsam cum bono: hoc considerat veluti totum aliquod, cujus illud est pars una, ipsa vero pars altera. Deinde si præsens est, hoc est si illud possidet, aut denique cum ipso conjuncta est, non solum voluntate, sed etiam realiter, & de facto eo modo, quo ipsi convenit conjungi; motus voluntatis ejus, qui eam cognitionem comitatur, qua scit hoc esse sibi bonum, est ejus lætitia. Si vero absens sit, motus voluntatis ejus, qui eam cognitionem comitatur, qua scit se illo privari, est ejus tristitia. Motus autem ille, qui cognitionem istam comitatur, qua scit acquisitionem ejus fore sibi bonum, est ejus desiderium. Omnesque hi voluntatis motus, in quibus consistit amor, lætitia, desiderium, quatenus sunt rationales cogitationes, non vero quatenus passionēs, possunt in anima nostra, quamvis corpore nudata, locum habere. Hæc ille (a). Inde vero Cumberlandiano systemati lumen & vis addenda est.

§. X. Scilicet lex naturæ, quod sæpius a nobis dictum est, quæ Dei æterna ratione, & voluntate constat, non alia ratione homini est necessaria, nisi ut contententi illi ad beatitudinem, cujus appetitus est ei naturaliter insitus, brevis ratio, affectuum turba, & voluntatis inconstantia non obsint. Appetit quidem homo beatitudinem suam naturaliter; neque ut eam amet lege ulla, præter insitam, indiget, quippe ad quam necessario rapitur: sed, ut recte amet, id nisi illa accedat summa ratio, non habet a natura, cujus ratio brevis est, & depravationi obnoxia. Ergo, ut rite, atque recte amet, præcipit lex naturæ: recte autem amat quum intelligit, quæ sint vera media, quibus illa obtinetur, atque ad ea media motus suos voluntariis dirigit, ac voluntariis appetitus sensitivi motus

(a) Eadem docuere, aliis licet vocibus, Scholæ. Duos illæ homini appetitus tribuunt, rationalem, quem voluntatem vocant, & sensitivum; duo igitur genera affectuum. Vide S. Thom. 1. p. q. 80.

tus regit : ea ergo media ut lex naturæ explicet necesse est. Sunt autem ea media amor Dei, amor nostri, amor aliorum, & quidem *amor rationalis*, qui in animæ superiori parte dominetur, ac ejus naturæ, quæ a Cartesio explicata est. Hic amor sub lege ista cadere potest, quæ tum præcipit, quum docet vera bona, atque, ut ad ea feramur, sanctionem adjungit. Ad triplicem igitur amorem illum lex naturæ nos obligat. Quumque postquam eum amorem docuerit, idest ostenderit ex eo tantum nobis felicitatem provenire posse, cujus nobis naturaliter sensum appetitumque indidit; nisi amemus, cognitione, & voluntate nostra abutamur; jure crimini nobis verti poterit ejus amoris violatio, & ob eam violationem juste plecti possumus. Quare hujusmodi amor & *cogentis juris principium* esse potest. Atque ad hunc modum prius objectum refellitur.

§. XI. Opponunt deinde, in hoc systemate omnes naturæ leges ex utilitate nostra derivari. Scilicet eo totum spectat, ut nos felicitatem nostram adipiscamur. Omnia autem ad utilitatem nostram conferre, periculi, & perturbationis humanæ vitæ plenum est (a). Sed huic objectioni non est necesse, ut pluribus respondeamus, quando constat, utilitatem nostram veram non esse, ubi aut publicam utilitatem prodimus, aut de obsequio in Deum supremum nostri legislatorem quidquam imminuimus. Quod quoniam per se perspicuum est, demonstratione nulla indiget. Non igitur Cumeberlandi, & Heineccii systemate leges naturæ omnes ex privata nostri utilitate derivantur, sed ex communi: nec privatam spectant, sed publicam. Hanc communem utilitatem lex naturæ præcipit; ea honestas est; honesta igitur est utilitas privata, quæ ex publica est, eique conjuncta. Id ne Cato quidem inficias iverit, qui, ut ait Lucanus

. *Urbi pater est, ubique maritus*
Justitiæ cultor, rigidi servator honesti.

§. XII. Quæret autem hoc in loco quispiam, quomodo

(a) Vide Tull. de off. lib. II.

modo ex superiori systemate in singulis vitæ humanæ actionibus intelligi poterit, quæ sint iusta aut iniusta, honesta aut turpia? Nempe facili negotio. Nam quum aliquid agendum occurrit, tum consultabimus I. necessarium ne sit ad amorem erga Deum conservandum, an ei adversetur, an neutrum? Nam si necessarium esse deprehendetur, agendum est: si contrarium, omitendum: si neutrum, dum ne amoris nostri aut aliorum adversetur, permissum intelligemus. II. Necessarium id sit ad rectum nostri amorem, contrarium, neutrum? Primum imperatur faciendum: alterum ne fiat vetatur: tertium permittitur, modo ne Dei, & aliorum amoris sit adversum. III. Necessarium item sit ad amorem erga proximum, contrarium, an neutrum? Primum præcipitur: alterum si amoris iustitiæ adversetur, vetatur ut iniustum: si beneficentiæ, & humanitati, prohibetur ut turpe: si neutrum, dum ne Dei aut nostri amoris rationali officiat, permissum est. Sed hæc latius diducere eorum est, qui de officiis differunt.

C A P U T XII.

Superius systema nova ratione adornatur, ac inde notiones primæ & genericæ legi naturæ moralis iterum exponuntur.

§. I. **P**AUCIS ego nunc superiora confirmabo, atque natura ipsa ejus amoris ac benevolentiae doctrinam expromam, quo constet non fictitia hæc esse & precaria, sed toto ab universo tradi, nobisque esse adeo conjuncta, ut necesse est simus infelices, ubi minus aut noverimus, aut excoluerimus. Conferam autem rem omnem in hæc theoremata, latius, si vita suppetat, olim diducturus in Ethicis.

§. II. *Prop. 1.* Homines natura æquales nascuntur omnes. Est id inter perspicua, si naturam humanam in infantibus, in quibus tota & sola inest, contemplari velimus. Nam quod in adultis est discriminis, ab educatione, arte, & vitæ commercio totum est: naturæ enim constitutio, veluti corporis machinatio ac vires,

res, tum vires, appetitus, & propensiones animi, ac si quid est aliud, quod a natura proficiscitur, in omnibus infantibus eadem deprehenduntur; nisi quod discriminis tum quod ad corporis temperiem aut habitum formamque exteriorem, cum ad animi ingeniique vim ac solertiam, climata faciunt; quod tale non est, ut idcirco ad plures species homines pertinere, in quo magni quidam Philosophi ineptiverunt, affirmare possimus. Hujus ergo rei testem do totam generis humani historiam: nationum enim omnium infantes, utcumque habitu corporis aut temperamento discriminati, omnes easdem habent insitas propensiones, eorundemque capaces affectuum, iisdem mentis aut corporis habitibus apti. Promptius quidem alii, alii tardius: nemo tamen non omnino (a).

§. III. Prop. 2. Homines ad mutuam societatem a natura generantur. Argumento est, principio, quod omnes imbecilles nascantur, & suæ imbecillitatis conscii; cupidi tamen existendi. Deinde quod instrumentis societati aptissimis generentur omnes præditi & non modo ad loquendum apti, quod profecto esse nequit, nisi societatis ergo, ut acute vidit Aristoteles (b); sed etiam iis affectibus obnoxii, qui nisi in societate hominis

(a) *Diverse animantium species secum non coeunt, nec coeundo generant. Buffon. At homines omnes cum omnibus sese propagant. Nam quod retulere quidam, steriles esse Europæorum ac Lybicarum nigrificantium nuptias, in fabellis habeo.*

(b) *Bruta non loqui, quia sine societate educuntur, existimat l'Ametrie: physicus nempe, nã magnus. Nos docuisset, qui instituendi canes, aut equi, ut loquantur. Loqui autem dico & articulatum, & ut homines. Quid jam vero illud, gregatim, ac quatuor pedibus ire, nisi duobus ingredi assuescant? Velim scire, quæ tandem agrestis gens reperta quadrupes? Ac si omnes bipedes, qui primus cunctos mortales duobus potius, quam quatuor pedibus, incedere docuit? Sed illa graviora, qui manus, ac brachia non ad ambulandum, sed ad agendum instructa? Qui centrum gravitatis eo locatum, ut ne si velint quidem adulti homines quatuor pedibus conari possint, quin capitibus deorsum ruant? Nam qui ad id aggrediuntur, genibus se sustineant necesse est. Quis est eiusmodi philosophorum furor, ut invita natura nos belluas esse imperent? Me haud piget hominem esse natum. Quos piget, nemo vobis invidet.*

minis cum homine locum habere nequeunt ullum, qualis amor, gloria, misericordia, ceteri. Sed hoc ipsum infantium item natura, quæ nondum nec adultis affectibus, nec pravis moribus, falsisque opinionibus est depravata, aperte declarat. Statim enim infantes, ubi alii aliis ignoti conveniunt, primum in mutuam admirationem rapiuntur; tum in complexum ruunt; ac tandem socialem vitam instituunt; id quod esse nequit, nisi a natura, quæ homini hominem, similem simili, conciliet. Quod si objecto infantibus præmio individuo animis dissociantur, ac in partes diversas distrahuntur, id non inde est, quod integrum singuli obtinere velint, sed quod æquam partem, quam ubi singulis tribueris, pacati statim sunt & amici. Quod demonstrat ita singulos se suaque amare, ut æqualem aliis curam amoremque non invideant, obstaturi alioquin majori, quæ sibi nocere possit. Ita sibi natura cavere, ut securitatis conscii, nemini unquam insidientur.

§. IV. *Prop. 3.* Homines sunt natura cupidi vitæ, bonorum, gloriæ. Constat id ex communi sensu. Id autem sic ut procrearentur necessarium erat: nam quum sint natura imbecilli, suæque imbecillitatis conscii, nisi naturam haberent cupidam earum rerum, quibus bene esse possunt, vitales non essent; quia sine cupiditate nulla re tangerentur, nec quoquam moverentur, nec agerent quidquam, nec pericula vitarent, non magis, quam statux (a).

§. V. *Prop. 4.* *Socialitas*, & *cupiditas* sunt duæ leges insitæ ac physicæ corporum politicorum, quarum illa centripeta est, hæc centrifuga. Nam leges physicas naturæ humanæ voco eas propensiones, quæ omnibus hominibus sunt communes, omnique tempore eos agitant, quæque rationem omnem, & consilium anteverunt. Huiusmodi autem sunt *socialitas*, & *cupiditas*: nam & in omnibus insunt hominibus, & semper; & ita cum natura ipsa humana commixtæ ac concretæ sunt, ut usum omnem rationis & consilii prævertant.

Tom. IV.

I

Porro

(a) *Quin etiam illa apud Gelli ostrea, pigritia sibi beata, causa tamen cupidaque reris est.* Gelli Circe.

Porro socialitas, quoniam homines alios cum aliis conciliat, ut una esse velint & possint, lex est *centripeta corporum politicorum*: ea enim civitates parit. Sed quia sine cupiditate homines nulla actione essent præditi, nec magis moverentur, quam stipites; vocari cupiditas potest vis *centrifuga* Civitatum; ea enim efficit, ut industrii sint, & commodorum acerrimi perquisitores. Ea artes & disciplinas progeniit, ea alit.

§. VI. *Prop. 5.* Civitas naturalis est hominum inter sese coëuntium, vita & bonis fruendi causa, multitudo. Ad Civitatem ergo pertinent quicumque & sociales sunt; & imbecillitatis suæ conscientia persentiscunt, sibi vitam in tuto non esse, nisi in societate aliorum hominum; & qui ejus societatis natura sunt percipidi. Non igitur solis pactis initur societas, ac civitas naturalis constituitur, sed natura, & facto (a). Certe etiam in privatis civitatibus infantes & socii sunt, & cives, utcumque pactorum ignari.

§. VII. *Prop. 6.* Totum ergo genus humanum unum est veluti corpus, cujus singuli homines membra sunt: una civitas, cujus singuli sunt cives, Deus vero imperator supremus. Nam & ad mutuam societatem facti sunt; & in eundem finem destinati; & communium vitæ humanæ utilitatum gnari; & similibus propensionibus, viribus, habitudinibus instructi; ita tandem comparati, ut alii ab aliis segreges vitam agere nequeant, nisi miseram, sibi que nocere plurimum possint; conjuncti vero possint sibi prodesse plurimum, ac esse, quoad natura humana patitur, beati. Itaque natura ipsa & facto unam civitatem naturalem constituunt. Nam quo ego altero argumento conficiam, plures lapides ad eundem fornitem spectare, aut plura membra ad idem corpus, nisi quia video, iis ea esse figuris deformata, ut & in unum coire possint; & natura sua poscant ita copulari; & separata inutilia, conjuncta tandem aliquid sint?

§. VIII.

(a) *Aberrant a natura Hobbius & Rousseau, qui civitates pactis tantum conventis deberi arbitrantur: est & plurima natura pars, quod acute vidit Aristoteles.*

§. VIII. *Prop. 7.* Tota hæc civitas cum ad communem, tum ad singulorum felicitatem constituta est. Nam & hanc felicitatem singuli natura ipsa & necessario appetunt: & conferre ad eam plurimum possunt, ubi in mutuam opem & vitam conspiraverint. Quare falluntur protecto ii, qui in mutuo bello homines nasci putant, idest in mutuam perniciem a natura armari: id enim si esset in mutuam societatem homines non generarentur, quæ in communi omnium cum omnibus bello esse nulla potest. Bellum igitur, quod ajunt, est excessus vis centrifugæ supra centripetam; ac propterea non naturæ est, sed libidinis: accedit enim usu vitæ ac educatione (a).

§. IX. *Prop. 8.* Finis hujus civitatis obtineri nequit, nisi temperatione duarum illarum virium, *socialitatis*, & *cupiditatis*. Scilicet perspicuum est ubi altera alteram vincit, totam civitatem funditus perdi. Nam si cupiditas vicerit, dissolvetur defectu vis centripetæ, velut olim Roma: si socialitas cupiditatem oppresserit, ut in nimio luxu, ac defluente voluptate, marcescet defectu actionis, opprimeturque a cupidiori, ut XIII. sæculo Sinensium imperium; olim Assyrium, aliaque. Temperatio igitur utriusque illius vis civitatem efficit beatam.

§. X. *Prop. 9.* Hæc ita esse a Deo constituta, dubitare non possumus: nam leges, quibus systema mundanum compactum est & regitur, a Deo sunt, ut ex superioribus constat. Itaque huic ordini & nos consentaneam vitam agere debemus, ne supremo Dei imperio adversemur, frustra que nitendo nihil aliud, nisi calami-

I 2

lami-

(a) Si quis querat, cur Baniani, India veteres incola, pacifici sint, & a bello, non cum hominibus modo, sed cum belluis ipsis abhorreant, atque abstineant? Cur in America Pensilvani? Quid aliud respondeam non habeo, nisi quod ita educati ac sueti sint. Cur autem nequeant reliqui? In eadem America septentrionali pacifici sunt Islinenses, ac belli refugientes: cruces & inhumani Chirokensenses. Ab assuesfactione item. Romani magni fuere bellatores, quia Marte geniti; quod ego sic accipio, ut ab initio bello coaluerint, creverintque. Non natura igitur bellatores sumus, sed educatione.

linitatem & miseriam nobis consciscamus. Nam quid aliud agit, qui naturæ adversatur? Hoc ergo summi Imperatoris imperium lubenter agnoscere debemus, eique læti parere. Et quanquam ad id ipsum nostra quoque natura & utilitate rapimur; confert tamen plurimum ad id incitari reverentia Principis ipsius, qui cogere queat: quandoquidem fieri non potest, ut qui civitatis alicujus Principem nec reveretur, nec amat, communia civitatis jura servet.

§. XI. *Prop. 10.* Ea dictamina rectæ rationis, quibus illa temperatio (prop. 8.) fit & conservatur, sunt leges naturæ morales. Nam lex naturæ moralis est dictamen rectæ rationis, quo homines ad felicitatem reguntur, cum imperio supremi naturæ legislatoris Dei, ut late superius explicuimus: dictamina autem rectæ rationis, quibus temperatio virium illarum fit, & servatur, ad humanam felicitatem tendunt (ex prop. 8.); quumque eæ vires a Deo sint (9) & a Deo nobis felicitas pro fine sit proposita; dubitare non possumus, quin cum imperio Dei nobis a communi ratione promulgentur; ergo sunt leges naturæ morales.

§. XII. *Prop. 11.* Recta ratio nobis dictat, ut præstemus Deo primam & maximam amicitiam, sed eam, quæ præstanda est supremo omnium domino, benefactori liberalissimo, providentissimo gubernatori, patri amantissimo. Nam Deus & supremus dominus telluris Civitatis est, & benefactor, & gubernator, & pater. Quare quum ab eo tantum simus quidquid sumus, ejus tantum vi conservemur, ab eo hanc naturæ civitatem habeamus; ab eo beatitatem speremus; nihil prius neque majus habere possumus, quod amemus, &, quatenus scimus & possumus, colamus. Enimvero cui alteri is esse poterit amicus, qui Deo non sit? Nam nemo alius est, in quo plures & majores sint rationes, quamobrem cum eo perfectam amicitiam habeamus, & pervigilantissime custodiamus. Naturæ igitur ordini & rerum rationibus adversatur, idest naturæ legi, qui Dei amicitiae & cultui quidquam aliud anteposit (a).

§. XIII.

(a) *Pudet me, cum recogito, fuisse Casuistas, quorum vel Ethnicos*

§. XIII. *Prop. 12.* Quilibet homo studere debet, ut sit dignus sui amicitia, & sibi amicus omnino esse debet. Nam quilibet homo ad beatitudinem a natura gignitur; ergo quilibet a natura ipsa incitatur & ut sit, & ut bene beateque sit, quæ sunt duæ primæ ac maximæ naturæ humanæ propensiones ingenitæ & communes. Ut autem sit, ac bene beateque sit, in id se comparare perpetuo debet, ut se conservet, ac excolendo perficiat. Perficit autem se quisque iis habitibus, quibus privata, publicaue vita tranquilla & beata efficitur. Quum autem eæ sint virtutes; virtute se perficere ac beatum facere homo potest. Id quum efficit, amicus sibi est: nisi efficiat, ne dignus quidem sua amicitia esse potest, quæ esse nequit, nisi inter bonos. Itaque sic vivere quisque debet, ut nihil in se admittat, quod vereatur amico facere; nihil omittat, quod amicitia poscit. Distinguendum igitur est inter hanc, de qua loquimur, amicitiam, & amorem, quo omnes naturaliter se amant. Est enim amor ille naturæ opus, impetus; hæc vero amicitia rationis & electionis. Illo rapimur in naturam conservandam; hac in virum bonum efficiendum. Quocirca quanquam nemo est, qui odisse se potest; plures tamen sunt, qui nec sibi

I 3 sunt

zbnicos jure puderet. Pythagoras, Plato, ac Pythagorici, Platonicique juniores, neminem fore beatum tradunt, inculcantque sæpe, nisi perpetuo Deum ac divina, puraue mente meditetur: illi, christiani scilicet, haud ita fuere scrupulosi, ac quasi Deus quietum longeque a nobis ævum vivere velit, ne sæpius exturbemus præcipiunt: nam qui semel in anno ut accederemus docuere, fuere illi severissimi. Quid illis faciemus Epicureis, qui semel in vita sufficere tradidere? Finis hominis, inquit Porphyrius lib. 1. περί αρετης επιθυμιών est perpetua contemplatio τῆ οὐτῶ (quo nomine Deum appellant Platonici) & το ζῆν ἡττα ὅν, & vivere secundum Mentem (illam scilicet sempiternam, quo mundus continetur) ad eamque omnia referre. Quin quo ad illam αἰωνίου ἡτταῦ æternam essentiam nobis pateat aditus, danda, inquit, nobis est opera, ut impura omnia ac polluta, quæ a corpore, viteque hujus commercio contraximus, eluamus, nudeque mentes ad nudam mentem accedamus. Quoties vero? perpetuo. Nos semel in vita? Oh scelus! Vereor ut intellexerint το divinum verbum, panem nostrum quotidianum da nobis hodie. Qui nempe hodie? Quotidie: quotidie ergo rogandus.

sunt amici, nec ea amicitia digni: quandoquidem qui si sic ut secum, ita cum aliis vivant, jure illis inimicissimi esse videantur. Hinc ego omnia hominis adversus seipsum officia deduco. Quumque hanc amicitiam natura ipsa præcipiat, ut demonstravi; ea quoque omnia officia præcipit, quæ inde consequuntur.

§. XIV. *Prop. 13.* Ex vi naturæ omnes homines mutuam sibi debent amicitiam. Primum amicitia inter æquales natura est constituta: omnes autem homines æquales nascuntur (*prop. 1.*); ergo in naturali alii erga alios amicitia; quam adulti non delere, nec scødare, sed fovere debent, si secundum naturam vivere volunt. Deinde omnes homines in mutuam societatem generantur (*prop. 2.*), quæ sine mutua amicitia vera esse nequit. Tum sibi debent amicitiam; ergo sibi debent, ut sint viri boni; inter bonos vero natura ipsa communis amicitia est. Tandem in mutuam felicitatem conspirare debent, quæ sine mutua amicitia obtineri nequit. Ac vero fac omnes sibi mutuo esse amicos, erunt omnes viri boni, omnesque beati: nam quæ vitam humanam misere miseram faciunt, ea sunt mala, quæ aut nostra nobis ignorantia, vel malitia procreat, aut alii aliis inimicissime inferimus. Quæ a natura sunt, nec mala sunt, si ex fine æstimentur, ut ego alias demonstravi, & quam paucissima sunt. Pone item omnes sibi mutuo esse inimicos & infestos, quid vita humana turpius ac miserius? Quocirca si ipsa rerum natura nostri felicitatem exigere videtur, & eam appetimus omnes; eaque habetur, ubi omnes omnibus amici sunt; determinatur, ubi alii aliis mutuo sunt infesti; hæc erit verum præsentis vitæ tranquillitatis adipiscendæ medium, illudque propterea natura ipsa præceptum.

§. XV. *Prop. 14.* Amor Dei reprimit eam cupiditatem, quæ socialitatem destruit, ac propterea est temperationis primarum corporum civilium virium lex moralis. Nam amor Dei: 1. efficit, ut ceteros homines sincerius amemus, velut ex eodem patre progenitos, atque idcirco nostros fratres; ergo promovet socialitatem; ex quo fit, ut ea cupiditas, quæ naturæ civitatem

tem dissolvit, frangitur. 2. Amor Dei figit animo longe nobilius & præstantius objectum nostræ cupiditatis, quam sunt ea, quæ tellus nobis præstare potest; ergo cupiditatem terrestrium hujusmodi bonorum minuit, idest eo adducit, ut non plura cupiamus, quam quæ huic vitæ commodè transigendæ sunt necessaria. Quum autem ea rationis rectæ dictamina, quæ temperiem societatis & cupiditatis efficiunt, sint leges naturæ morales (prop. 10.); sequitur amorem Dei esse legem naturæ moralem.

Corollarium. Ex quo sequitur, ut sit & religio. Nam tota religio Dei amore continetur. Evangelium igitur cum natura consentit.

§. XVI. *Prop. 15.* Amor aliorum temperat eam cupiditatem, quæ societati adversatur: quapropter est lex naturæ moralis. Scilicet qui alios amat, is nolit ita esse cupidus, ut omnia ad se trahat: sunt enim inter se opposita; ergo is amor cupiditatem societati noxiam temperat. Itaque est lex naturæ moralis (prop. 10.).

§. XVII. *Prop. 16.* Amor Dei cum odio aliorum destruit societatem; nec verus est amor; ac proinde contra legem naturæ. Ac prima pars est per se perspicua: nam si omnes homines sese mutuo oderint, sese quoque mutuo aut fugient, aut destruere conabuntur; nulla ergo erit societas. Amor ergo Dei cum odio aliorum destruit societatem.

Altera pars. Amor societatis ex Dei voluntate est (prop. 13.); ergo odium contra Dei voluntatem. Porro amor Dei contra Dei voluntatem non est verus amor; ergo amor Dei cum odio aliorum non est verus amor.

Tertia tandem per se patet: nam hic amor cum odio aliorum est contra dictamina rectæ rationis; ergo contra legem naturæ (prop. 10.)

Scholion. Lege Muhammedana præcipitur ita amare Deum, ut alios propter amorem Dei odio habeant, ac disterminent; cum natura ergo & Deo pugnat. Lege Christi & inimicos diligere debemus; ex quo ejus præcellentia ac divinitas patet (a).

I 4

§. XVIII.

(a) Itaque oratio christiani est, Pater noster &c. *Quorum vero pater?*

§. XVIII. *Prop.* 17. Amor Dei cum odio nostri nec verus est amor, & societatem destruit, ac contra legem naturæ est. D. pr. pars. Dictamen rectæ rationis est, ut nobis amici simus (*prop.* 12.); ergo ex voluntate Dei est: nos ergo odisse contra Dei voluntatem. Jam amor Dei contra Dei voluntatem non est verus amor; amor ergo Dei cum odio nostri non est verus amor.

Secunda pars. Nequit alterum amare, qui sibi odio est; ergo inimicitia adversus nos destruit socialitatem, ac propterea societatem.

Tertia pars. Amicitia Dei cum inimicitia nostri est contra ea dictamina rectæ rationis, quæ ad temperiem virium primitivarum corporis politici pertinent (ex 1. & 2. parte); ergo contra naturæ legem.

Scholion. Odium nostri cum dico, non *relative* dico, sed *absolute*. *Relative* enim oportet nos odisse, ut Deum rite amemus; idest omnia ea nobis denegare, quæ cum Dei amicitia, & obsequio pugnant.

§. XIX. *Prop.* 18. Amor aliorum cum odio nostri, nec possibilis est, & societatem destruit.

D. 1. p. Quia societatem nemo amat nisi conscientia imbecillitatis; ergo ob amorem sui. Hoc amore homo spoliari nequit, ut nequit privari conscientia imbecillitatis; possibilis ergo non est.

Secunda pars. Si omnes homines sese oderint, nemo alterum amabit (ex pr. parte); ergo odium nostri societatem evertit.

§. XX. *Prop.* 19. Lex naturæ est, ut tres illæ amicitiae minime separentur. Lex naturæ est dictamen rationis rectæ, quo vires naturæ humanæ primitivæ ita temperantur, ut ad felicitatem hominem perducant (*prop.* 10.): tale autem est vinculum trium illarum amicitiarum (ex super.): est igitur naturæ lex.

Scholion. Si quis attente animo suo cogitet, is intelliget & sejungi non posse eas, quas dixi, amicitias, & se-

pater? Pater omnium, inquit *Apostolus*. Fratres ergo sumus omnes. Qui igitur odia nationum tuentur, qua possunt fronte Deum patrem omnium interpellare? Licet odisse vitia, non homines.

& sejunctas intercidere omnes. Nam fieri non potest, ut quis sibi sit amicus, qui nec Deum sui parentem, ac totius mundi gubernatorem amet, nec societatem, sine qua non solum miser sit necesse est, sed ne sit quidem: nec Deum amare potest, aut societatem quicumque sibi odio est, quique se diris devovit. Ex quo & illud sequitur, ut sejunctæ illæ amicitiae non solum algeant, sed convellantur stirpitis. Vir ergo bonus, virtutis ac felicitatis suæ amans ita secum apud animum suum reputabit, se nec bonum esse posse, nec porro felicem, nisi sancte tres illas amicitias custodierit.

§. XXI. Ac officia hominum ab his principiis, quæ suapte natura clara sunt, derivari facile possunt. Sed illud animadvertendum est, quæ actiones humanæ lege naturæ reguntur, non omnes eodem modo regi. Nam sunt quas *απλως* *abscisse* ac *simpliciter* lex naturæ præcipit, aut prohibet: sunt quas *προς τι* *relative* tantum: sunt item quas suadet, aut dissuadet: tandem quas permittit. Alteri injuriam facere præcise & absolute prohibet, ut nullo casu liceat. Nuptias inter fratres & sorores *relative* tantum, ut supervenire causæ possint, quibus liceant, veluti si ad fratrem & sororem genus humanum referatur totum, ut quum homines esse cœpere. E duobus bonis, melius eligere suadet non præcipit. Nuptias adulto humano genere singulis non præcipit, sed permittit. Hæc Philosophus accurate perpendere debet, ut scilicet quæ sint hominum jura, quæ ex lege naturæ proficiscuntur, ac quoto gradu honestatis vel turpitudinis actio sit, discernere possit.

§. XXII. Illud difficile definitu videtur, quæ regulæ servandæ sint, ut id dignoscatur. Ego ad sequentes hic conferam.

I. Quæ cum amicitia Deo, nobis, aliis debita e diametro pugnant, *abscisse* lege naturæ vetantur. Nam eam amicitiam absolute naturæ lex præcipit. Ita impietas, Dei negligentia, suicidium, mutilatio, sanitatis oppressio voluntaria, homicidium, adulterium, calumnia, furtum, convicium &c.

II. Quæ talia sunt, ut sine iis amicitia illa consistere

stere nequeat, lex naturæ præcipit absolute. Ut crebra ad Deum oratio: sui studium: humanitas ac beneficentia in eos, qui indigent. Ratio est eadem.

III. Quæ hanc amicitiam intensiorem & perfectiorem efficere apta sunt, sed omissa non dirimunt, lex naturæ suadet; nam sine illis legis naturalis finis obtineri potest. Talis est perfectio virtutis heroicæ. Huc pertinent consilia evangelica.

IV. Ea, quæ talia sunt, ut si adsint, amicitiam quidem illam non dirimunt, sed non sinunt esse plenam & perfectam, lex naturæ dissuadet. Ejusmodi est urbanitas. Ex eadem ratione.

V. Ea, quæ seu omittantur, seu fiant, amicitia illi nec derogatur quidquam, nec additur, permittit naturali libertati. Nam ea sunt extra finem legis.

VI. Quæ generatim considerata amicitiam istam lædere comparata sunt, sed in quibusdam circumstantiis posita malignitatem illam deponunt, *relative* vetat. Ita neminem nec percutias, nec increpes, nec ægritudine afficias oportet; nisi emendare ex officio debeas.

VII. Quæ ad amicitiam servandam generatim quidem sunt necessaria, sed quorum in tempore, aut loco, necessitas cessat, *relative* præcipit. Itaque non dabo non indigenti, si vel enixe petat: ac si dari vult, pretio dare possum.

C A P U T XIII.

*Wollastoni & Ashley Syckes de lege Naturæ
dogma exponitur.*

§. I. **I**Nter eos, ac quidem primos, qui nostro hoc sæculo ad legem naturæ explicandam profundo ingenii conatu sunt aggressi, facile ego collocaverim Wollastonum Anglum philosophum. Hic in eo opere, quod haud dudum adversus Atheos & Deistas scripsit (a), penitissime legis naturalis indolem, atque usum & vim expedit. Wollastoni doctrinam paucis complexus

(a) *Ebauche de la Religion naturelle.*

plexus est Aslhey Syckes (a) Anglus item, ac nonnullis additamentis illustravit. Utriusque igitur nos cogitata una exponemus. Juvabit profecto omni ex parte justitiæ atque honestatis fontes penitus inspectare. Ac Syckes alia quidem ratione exorditur, quam qua ego referam; quippe qui a regula ipsa humanarum actionum initium facit, mox humanam libertatem, atque existentiam supremi Numinis demonstrat, quo eam legem plene doceat. Sed ego lectoris utilitati consulam, dum inde ejus systema enarrare suscipio, quod ille postremam ejus partem facit, facturum primam, si docendi methodo scripsisset. Ita & intelligetur facilius, & cohærebit arctius.

§. II. Hominem inter agentia libera esse connumerandum iis argumentis demonstrat Syckes, quibus nulla possunt esse evidentiora. Est enim is indifferens ad ad varios habitus: nihil exploratius esse potest inter homines: nam & nullis habitibus informati nascimur: & paullatim plures ac diversos ipsi per nos induimus: & obliteramus alios, alios adsciscimus, totique in diem, quum volumus, mutamur. Persentiscit quisque intimus, se natum aptum cum variis animum disciplinis informando, tum etiam pluribus ac diversis habitibus moralibus, vitiorum, aut virtutum, ac postremo habitibus corporis, contrahendis. Totum hoc, quidquid sumus, quod ad hujuscemodi modificationes pertinet, sumus, quia volumus; nec volumus, nisi quia & intelligimus, quod volumus, & quod intelligimus ac volumus, possumus. Præterea his habitibus & viribus ita utimur quandoque parte virium agamus majori, vel minori, quandoque totis. Est igitur cum ratione nostra conjunctissima agendi, atque nos pluribus & diversis modis, prout placitum fuerit, determinandi potentia. Hæc libertas est. Itaque in iis rebus, in quibus nec ratio est, nec libertas, nulla quoque hujusmodi inest indifferencia, sed necessario eodemque modo semper agunt. Id quod demonstrat potentiam nos habere
ad

(a) *Examen des Fondemens, & de la connexion de la Religion naturelle & revelée.*

ad plura & diversa nos flectendi (a).

§. III. Porro qui tali libertate est præditus, ut & plura ac diversa intelligere possit, & in varias partes sese proclinare, is nisi ex regula certa & immutabili actiones suas componat, necesse est, ut perpetuo aberret ab eo fine, quo natura ipsa pergit, ac tota adeo vita perturbetur. Inquiramus ergo, sit, necne, ulla hujusmodi in natura certa ac constans regula, qua homines actiones suas rite conformare possint, debeantque, & ex qua degere, ut sint, & ut, quoad per humanam naturam licet, beati sint. Nulla in terris gens est tam moribus efferata, in qua iusti & iniusti, boni & mali morales non insit naturalis aliquis sensus, non secus atque voluptatis & doloris: tum aliquæ ejus boni & mali notiones; ac postremo vocabula, quibus eas exprimi solent, jactarique continenter, accusando, aut defendendo. Inter omnes gentes, etiam barbaras, laudari quædam actiones solent ut justæ & bonæ, quædam aliæ vituperari velut aut impiæ, aut iniquæ, aut flagitiosæ: sunt sui ubique heroës, virtutis studiosi, boni: sunt scelesti, improbi: itaque pœnæ ubique & præmia. Unde autem id proficisci dicemus, nisi ex insita omnibus hominibus iusti & iniusti, boni & mali regula? Insitam autem dico, quod statim, ac quis adolevit, atque uti ratione cœpit, nullo alio magistro, nisi ipsa rerum natura, hujusmodi regula informetur. Est certe hoc argumentum apodicticon. Nisi enim omnibus certa quædam ac constans regula animo esset informata, ad quam, velut ad amussim, eas actiones referrent, quas laudant ac vituperant, bonas aut malas prædicant, quid illi hujuscemodi vocibus significare vellent? Velle autem aliquid dicere, non vero inania vocabula effutire, inde ego conjicio necessario, quod ad hujusmodi vocabula commoventur, atque affectibus

agi-

(a) Cap. I. *Quin nihil majori cum voluptate facimus.* Euripides in *Oreste* v. 334. μεταβολή παντὶ γλοῦν, nihil varietate suavius. *Hominis hec Horatio nostro natura* ep. 1. lib. 1.

Quod petit, spernit: repetit, quod nuper omisit:

Æstuat, & vitæ disconvénit ordine toto:

Diruti, ædificat, mutat quadrata rotundis.

agitantur ; id quod in illis minime contingere solet , qui voces sine mente projiciunt . Agitari animus nequit , nisi notionibus boni aut mali , quod per se est perspicuum . Insidet ergo atque infixæ est hominum ratione utentium mentibus boni ac mali , honesti & turpis , justi & injusti notio ac regula ; etsi non in omnibus peræque clare ac distincte , nec in omnibus æque expedita & prompta , sed in singulis pro cujusque cultura , exercitio , vitæ commercio (a) . Inde sensus ille naturalis boni & mali , justi & injusti existit .

§. IV. Constat igitur omnes homines regula quadam uti , in eamque oculos figere , non solum dum de aliorum actionibus judicant , verum etiam quum ipsi agunt aliquid , aut omittunt . Hanc regulam omnes consecretantur , aut saltem sequi se arbitrantur . Ac quod aberrent ab ea plerumque , id non fit , quia nullam habent , sed quia aut affectibus perturbati , aut pravis educationis habitibus occupati , aut rerum ignorantia impediti , totam ejus extensionem & usum non semper pervident , nec semper ita instructi sunt , ut in singulis actionibus adhibere illam sciant . Id quod contingit etiam in ceteris artibus ferme omnibus , quarum nullus tam peritus unquam fuerit , ut ei non incidant sæpe casus , in quibus aut hæreat animi dubius , aut etiam , quasi tremantibus artibus , ab artis regula aberret . Hoc multo etiam difficilius est in morum ac vitæ civilis arte , ob multiplicem & pene infinitam rerum atque actionum copiam , & varietatem . Sed hæc ipsa rerum prope infinita multitudo & varietas , respectuumque multiplicitas , ac propterea diversitas actionum pro locis , temporibus , personis , quin tamen quicquam sensui cuidam hominum communi derogetur , satis demonstrat id , quod diximus , hæcere hominum animis certam quamdam ac constantem vitæ , morumque normam . Nam in tanta hac varietate nemo ullus reperitur , qui dum agit quidpiam , aut de aliorum actionibus judicat , id quod efficiunt quotidie omnes , non regulam aliquam consecretur . Ejus rei homines item
omnes

omnes do testes : omnes enim judiciorum , aut actionum suarum ex illa regula rationes proferunt. Ipsi sceleratissimi mortalium si crucientur , ut scelerum suorum causas & rationes eferant , ex illa norma afferre conantur : ut etiam quum in usu errant , demonstrent se aliquam habere , ex qua velint judicari . Quocirca non id inquirendum est , insit ne in hominibus justis & honestis regula , quum id omnes perpetuo præferant ; sed illud potius , quæ hæc sit , quam vim habeat , & a quo : quod hunc in modum expedire conatur Syckes.

§. V. Rerum hæc universitas , cujus exigua homines sunt pars , ita constructa est ac temperata , ut & singulæ naturæ res cum singulis uno exemplari junctæ ac copulatæ sint ; & homines inter sese & cum mundo toto ; ut adeo nos cum singulis ferme rebus , quæ nos circumambiant , respectum aliquem ac concatenationem habeamus naturalem & immutabilem . Hujusmodi connexibus , quas rerum naturæ poscunt , ac quibus consentaneæ structa sunt omnia , ut ex parvis membris animantis corpus , mundanus ordo , ejusque pulchritudo continetur . Iis & constans est , & perpulcher , & magnificus . Turbari ergo eæ nequeunt , quin ordo iste turbetur : ut nemo juncturas partium corporis perturbaverit , quin totum perdat . Ac quemadmodum totius universi ordo , pulchritudo , & æquabilitas ex conservatione ac constantia hujusmodi relationum pendet ; ita ordo , æqualitas , ac ipsa denique vitæ humanæ tranquillitas & beatitudo ab iis respectibus tota est , quos cum rebus , quæ nos ambiunt , antecedunt , consequuntur , comitantur , habemus . Qui hujusmodi relationes & circumspicit acute , & factas tectas servat , & nulla in parte aut violat , aut præterit , is omnium hominum beatissimus est : minus beatus , qui aut ignorat quandoque , aut negligit , aut videns prudens violat : ut miserrimus , qui , contra quam natura fert , perpetuo iis adversatur , velut qui cum adverso mundo colluctatur ; aut qui pro veris hominum aut inter sese , aut cum aliis rebus , relationibus , falsas ipse comminiscitur , iisque velut veris obtemperat , homo non naturæ , sed imaginarius ac phantasticus . Rerum
has

has relationes *veritatem realem* appellant Wollastonus & Syckes. Hanc veritatem, ajunt, quilibet, qui nec sensibus, nec ratione sit destitutus, ipse per se animadvertere, & intelligere potest. Sunt enim res, cum quibus hos habemus connexus, in propatulo omnibus expositæ: natura quoque ipsa earum relationum nos admonet: nam & nos inde affectibus concitat, & tranquillitatem, atque ingentes voluptates in iis procreat, qui secundum naturam vivunt; & perturbationem, ac dolores vehementissimos in iis, qui cum natura pugnare instituunt. Ergo & ex rerum ipsarum contemplatione, & ex usu atque commercio vitæ hoc in nobis ingeneratur decretum, *oportere rerum naturam sequi*, idest, ut Philosophi isti loquuntur, *veritatem realem*. Quomodo primas æternasque Picturæ regulas ab illis rerum proportionibus hauriunt pictores, quas natura sequuta est. Eas qui probe imitantur egregii sunt summiqûe: qui desciscunt, artis imperiti sunt habendi. In natura igitur atque mundo tota eorum est ars. Itidem in natura atque universo prima vitæ ars, a qua philosophi expromant necesse est.

§. VI. Hæc igitur illa regula est, quam omnes homines a natura ipsa naturaliter discunt, ac sensu quodam communi sentiunt, quamque sequi profitentur. Inde bonos aut malos prædicant, quoscumque prædicant. Ea regula informata ratio leges civiles populis dictavit. Quid enim aliud sunt civiles leges, quam peculiares regulæ, quibus homines instituuntur, ut ex norma naturæ vivant, seu ut rerum relationes, quas natura posuit, idest *veritatem realem*, sectentur? Nempe ut doceantur, quid singulorum expetat natura, tum clima, situs, viciniae, ut sint, & bene sint: quid singuli a singulis: quid principes a subditis, subditi a principibus: quid cives ab exteris: quid parentes a liberis, liberi a parentibus: quid denique in omni hominum genere ac statu. Porro quid homines a rebus aliis, quæ in tellure gignuntur, aut sunt; quid a rerum omnium opifice ac imperatore Deo, ab his Deus. Plures fuere olim, antequam leges illæ describerentur, res quoque hodie sunt nationes, quibus non alia
vitæ

vita ac morum lex . Nec eas memoro tantum , quæ nullo imperio civili continentur , sed earum quoque multas , quæ a principibus reguntur , ut omnes ferme Americanæ , pleræquæ Africanæ & Asianæ , quod sæpe observatum viatoribus (a) . *Veritas* igitur *realis naturalis* , idest rerum ordo , illa est , ac insita omnibus , vita & morum regula prima ac suprema .

§. VII. Sed hæc regula est ne etiam lex ? Legis partes duæ , *decretum* , & *obligatio* . Neque enim decreta , si obligatio desit , vim ac naturam legis obtinebunt ; id quod in theoreticis Philosophorum dogmatibus , quorum nulla sit alia vis ad nos permovendos , quam ratio , aut privata auctoritas , seu , quod perinde est , obligandos , observare possumus . Ac natura quidem , ut demonstratum est , decreta vitæ , & morum in omnibus ingenerat , dum & rerum connexus naturales ipso vitæ sensu docet , & singulos ita instituit , ut ex iis quam sciant , tum possint vivere . Sed an etiam extimulat ? An singulos ita agitat , ut ex iis vivere , ac agere oportere sentiant ? Indit ne singulis ad hanc vritatem consecrandam calcaria ? Obligat tandem ? Obligat profecto . Nam ita singuli homines natura ipsa comparati sunt , ut naturam ducem sectantes bene sint & beate ; ei reluctantes misere . Decreta igitur hujusmodi , quæ ex rerum relationibus natura in nobis imprimit , cum potentissimis motivis ad agendum vel cessandum sunt conjuncta . Quem enim non moveat voluptas aut dolor , beatitudo , aut miseria ? Quæ si cum observantia , aut violatione eorum decretorum sunt connexa , procul dubio intimam habent obligationem . Stimulos atque calcaria , quibus nos impellunt , secum ipsa deferunt . Sectatoribus tranquillitatem , & beatitudinem non ostendunt modo , sed revera præstant : perduellibus miseriam . Accedit quod nescio quæ alia vis , quam distincte intelligere & explicare nequeamus , singulis intrinseca , quam conscientiam vocaverunt majores , hæc decreta comitatur ac
sa-

(a) *Vide Recueil des voyages , qui ont servi aux etablissements & aux progres de la compagnie des Indes Orientales .*

sacra & veneranda singulis efficit. Ita profecto est. Rerum natura non solum quemque hominum docet justum & injustum, honestum, & turpe, sed ita etiam afficit, ut honesti, & iusti notiones mirifice nos delectent: injusti vero & turpis turbent & infelicitent. Est ergo hæc vitæ & morum regula *obligatoria*. Eam obligationem qui minime sentit, is ratione & sensu humano careat necesse est.

§. VIII. Sed hæc, quæ intrinseca est obligatio, minime ea ad perfectam legem constituendam satis esse potest. Tangitur quidem ea obligatione, & permovetur natura humana; sed postquam experimenta nos docuerunt, plures esse, qui aut hanc obligationem non semper animadvertunt; aut vehementibus affectibus perciti ei reluctantur; aut pravis habitibus corrupti ab ea transversum aguntur: nisi vehementioribus stimulis agamur, parum profecto momenti, aut saltem non tantum, quantum necesse est, ad nos plene determinandos, habebit hæc sanctio. Itaque tum perfectior erit, & vehementior, quum accedent extrinsecus graves etiam minæ, aut ingentia præmia. Nemo enim dubitabit, quin si supremus quidam totius naturæ imperator ad hanc regulam sectandam nos aut pœnis propositis impellat, aut præmiis illiciat ingentibus, plena sit & perfecta hujusmodi obligatio. In id igitur modo inquit Syckes (a), sit ne ullus supremus totius naturæ opifex atque imperator, qui hæc decreta sanciverit. Paucis ille hanc rem totam absolvit: nam quoniam rerum generationes & series sunt plures, eaque neque ex nihilo esse possunt, neque sine prima; est profecto prima rerum omnium causa, eaque intelligentissima, potentissima, libera. Hic Deus est: hic summus naturæ & optimus imperator. Eum nemo est, qui aut ignoret, quando certum est facilius repertum iri nationem sine sole, quam sine Deo, & religione, quod Plutarchus eleganter dixit; aut possit ignorare, qui oculos habeat & rationem. Quoniam ergo constat inter omnes, & Deum esse, & ab eo na-

turæ ordinem constitutum ; quis ignorare queat , hanc esse supremi hujus imperatoris voluntatem , ut hic naturæ ordo , seu , quod tantundem est , hæc *veritas realis* integra servetur ? Qui enim procreavit , servatque immobiliter , nisi & a nobis servari velit ? Qui nos ei ordini innexuit ? Qui reluctantes natura infelicitat , beat obtemperantes ? Constat ergo id velle . Ac si constat , ne in dubium quidem vocari potest , hujus voluntatis transgressores pœnis divinis esse obnoxios . Cur tam scelestos haberet impunitos ? Dei igitur idea , ejusque supremi imperii cum veritate illa reali connexa vim procul dubio habebit maximam ad homines sui officii commonendos . Erit hæc extrinseca obligatio , eaque plena & perfecta , quam ii possunt ignorare , qui una ignorent , aut Deum esse , aut universitatis curam gerere , aut positi rerum ordinis , qui ex æterna & immutabili ejus ratione proficiscitur , acerrimum esse custodem . Veritas igitur realis utraque illa obligatione corroborata perfecta lex est . Et naturalis quidem lex est , quia ab ipsa rerum natura in singulis hominibus imprimitur : & divina , quia a Deo naturæ ordo est , & servatur : & æterna , quia secundum æternam Dei rationem ac voluntatem .

§. IX. Interim quoniam nimio plus ampla rerum natura est , quam ut plene queat , a mente humana comprehendere ; hominesque ipsi finiti , & facile possint a peculiaribus quibusdam rebus trahi , iisque mancipari ; nihil contingere facilius potest , acciditque sæpius , quam ut homines aut hujusmodi legem non , ut par est , præ oculis habeant ; aut ut totam ejus extensionem non pervideant ; aut ut peculiaribus objectis rapti ejus desertores fiant . Quare factum est , ut Deus eandem hanc legem nova via ac ratione promulgaverit , diduxerit latius , novis motivis , novaque vi instruxerit , quo omnibus modis humanæ felicitati consuleret ; vim interea naturæ , & libertati nostræ nullam inferret . Est hæc via *revelationis* , de qua Auctor deinceps ex instituto differit . Ejus vim & utilitatem explicat : existentiam demonstrat : sed necessitatem elevat , in quo mirum est virum cetera perspicacissimum non vidisse ,

se cum tota ratione pugnare. Sic enim illè existimat, revelationem esse quidem utilem, atque maximas ex ea, & plures commoditates in genus humanum derivari: minime tamen necessariam, quod lex illa atque religio naturæ sit sufficiens. In quo nec humani intellectus vires, nec potentiam naturæ humanæ satis perpendit, nec ipse secum est concors. Quis enim non videt, quam vaga sit & incerta *veritas illa realis*, quamque ad homines maxima ex parte aut educatione stupidos, aut affectibus concitatos regendos inutilis? Nihil ne illum ejuscemodi rerum populorum agrestium historiæ docuerant? Nihil fœdi perversique tot gentium mores? Quanquam cum utilem dicit revelationem præternaturalem, necesse est necessariam dicat: sic enim decerno, nihil a Deo fieri, quod quoquo modo non sit necessarium. Vetus ergo proverbium, nec naturam quidquam moliri superflui ac supervacanei, nec Deum naturæ totius auctorem moderatoremque, in iis refero, quæ per se cuiquam perspicua esse debent. Aut igitur ei negandum erat & hac altera via ac ratione Deum legem hominibus tulisse: aut si illud negari non potuit, fatendum erat, necessarium fuisse *παροδεν* *καλῆτος* Deum nos instituere, agereque *αυωδεν*, *superne*. Sed non est opus hoc in loco repetere, quæ sunt a nobis alias copiose demonstrata. Admonuisse tantum Lectores, ne quis hujus viri doctrina transversum agatur, hoc in loco satis existimavi (a).

K 2

CA-

(a) Mihi hoc ineptum perridiculumque esse videtur, ut theistæ nostri legem naturæ minime servandis civitatibus sufficientem esse dicant, ac profiteantur, poscantque, ut civili imperio sanciatum iterum, vindiceturque, atque bardis hominibus, capitulatim salutem, explicetur; iidem negent id præclaro utilique consilio a Deo *αυωδεν* fieri, aut ejus nos rei opus habere ullum. Qui igitur sapientes Legislatores, ac Philosophos beandis Rebusq. necessarios esse dicas, neges, si a Deo docti atque instructi veniant? Nec vero ignoro qua re id fiat. Scilicet tota divina hierarchia prægravat. Cui metui atque odio si quidem ipsi prævivimus, causasque odio atque ira dignas prætulimus, haud ego negabo, jure esse capitales: si vero cinædorum pravi & scelesti mores, ac lubido infrenata vitæ, videant, queso, quid moliantur. Quid potest esse in vita turba Civitatum everfis ordinibus?

CAPUT XIV.

*Christiani Wolfii atque Henrici Koehleri de principio
legum naturalium uno & adequato doctrina
exhibetur :*

§. I. **M**E quoque pœnitêt his in rebus, quæ ad hominum mores efformandos pertinent, quæque omnibus in medio esse positæ debent, nimis esse & longum & metaphysicum. Sed quoniam suscepimus magnorum virorum super legibus naturæ sententias recitare, efficere non potuimus, ut Christianum Wolfium prætermitteremus, ejus tam gravia sunt in Philosophiam merita; ut ut ille nimis est in iis omnibus, quæ quoquo modo attingit, non subtilis modo, sed minutus, & prolixus. Sed nos studebimus minus esse fastidiosos, minusque ænigmaticos, quam hujus sætæ alumni esse solent: sic enim habeo, plura esse in Leibnitiana & Wolfiana Philosophia penitus vulgaria, quæ quoniam novis inconditisque vocabulis ab Autoribus suis sunt involuta magis, quam explicata; nova minus attentis videri possunt: Sed & habent Philosophi isti id præ reliquis proprium, ut humanas omnes notiones, etiam eas, quas communis probavit sensus, quæque suapte natura claræ sunt & distinctæ, evolvant, & minutatim secent, ut ad simplicissimas vide licet ac primas adducant; quod nec necessarium semper est, & plurimam rebus quandoque obscuritatem offundit. Henricus Koehlerus in opere de *jure naturæ in primis cogente*, quod edidit Francfurti ad Moenum anno 1738. Wolfii doctrinam, quam ille octo tomis in quarto explicuit, in parvum systema retulit, sed iisdem ambagibus intricatam. Inde nos hæc more nostro extricata paullo & exasciata dabimus: non enim scholæ doctorem adornamus, sed ad probitatem, eamque simplicem, lectorem instruimus. Ad hoc, virtutis præcepta non dixerim, quæ nequeat unusquisque mortalium ipse ex se suoque animo facile expromere; ut metaphysico doctore sit ei opus.

§. II. Quoniam eas naturæ leges perquirimus, quibus convenienter hominem vivere oportet, qui velit beate vivere; hominis ipsius naturam omnium primum noscere debemus, si eas intelligere amamus: ex hominis enim natura, cui efformandæ & moderandæ inserviunt, sunt hujusmodi leges eruendæ; quas idcirco is ignoret necesse est, cui minus hominis natura est perspecta. Quomodo leges, quibus horologia conserventur, ac fini suo apte convenienterque serviant, scire nequit, cui hujusmodi machinarum structuram ac naturam ignota fuerit. A natura igitur humana Wolfius & Koehlerus juris naturæ tractationem auspicantur.

§. III. Constat autem natura humana substantiis plane duabus, iisque inter se quidem valde diversis, conjunctissimis tamen, mentis scilicet, & corporis. Quum ex genio Metaphysicorum natura entium in eorum *activitate* aut *agendi conatu* posita sit; corporis quidem natura ejus *vi matrice*, animi vero *vi intellectrice* continebitur. Sed hoc etiam plurimum anima a corpore distat, quod in hoc *natura* ab *essentia* distinguere potest, quum in illa una eademque res sint. Corporis essentiam in ejus *structura* & *inertia* Philosophi isti constituunt (a), quæ est ab agendi conatu diversa: at vis illa intellectrix mentis est & *natura* & *essentia*. His interea omnibus conflatur homo. Quare, ut hominis natura intelligatur, utraque illa accurate est pervestiganda, mentis scilicet, & corporis natura atque essentia.

§. IV. Anima sui conscia est, percipit, cogitat; rerum sibi notiones efformat, sentit, imaginatur, fingit; attentæ est, reflectit; abstrahit, & notiones conficit genericas; experitur, judicat, demonstrat; a cognitis ad incognita progreditur; similitudines rerum velociter observat; nexum possibilium perspicit; voluptatem, tadum, dolorem per sentiscit; appetit, averfatur, vult, non vult, mavult. Ea omnia ab ejus essentia & natura fluunt; itaque ei sunt naturalia. Eadem autem ratione corporis naturalia dicimus ea

omnia, quæ ab ejus natura & essentia proficiscuntur, veluti esse mobile, irritabile, facile diffuens, grave, iners &c. Quum autem hominis natura ex utraque composita sit, animi scilicet & corporis; inde intelligitur, quæ sint hominis naturalia; ac proinde quid sit, *hominem congruenter ad naturam vivere* (a); nempe secundum hæc omnia, quæ sibi sunt naturalia, vitam agere (b).

§. V. Ex propositiones genericæ, quibus plura & varia aut coëxistentia, aut successiva aptantur, ut similiter sint aut fiant, *regulæ, normæ, leges* dicuntur (c). Ita regulas aut leges motus vocant Physicæ eas propositiones genericas, secundum quas naturales corporum motus fiunt. Quum autem sit exploratum & certum, omnes mutationes animi & corporis, idest naturæ humanæ, secundum constitutas a natura regulas fieri; erunt hujusmodi regulæ naturæ humanæ leges ei insitæ, idest naturales. Iis convenienter vivere, est secundum naturalia humanæ naturæ vivere, ac proinde naturæ congruenter (d).

§. VI. Sed quum naturæ animi & corporis, licet inter se arctissime conjunctæ, diversæ tamen sint; sit, ut animi naturales leges sint a legibus corporis naturalibus diversæ. Ac illas quidem *logico-morales*, has *mechanicas* appellat: illæ mentis, hæc corporis naturam modificant & moderantur. Utrisque igitur convenienter vivere, est naturæ consentanee vivere: nam & utraq; insitæ sunt ac naturales, & utrisque humana natura conservatur & regitur (e).

§. VII. Jam & totam istam hominis naturam bipartiri necesse est; est enim altera *animalis*, *rationalis* altera. Ac ad primam pertinent sensationes, phantasia,

(a) Hoc & Stoici docuere; & Epicurei, & Aristotelici, & omnes. Nec tamen adhuc quid sit naturæ congruenter vivere, satis est definitum. Sed vereor ne ea de re Euripidis illud in Oreste dici possit, κρηττον δε το δοκειν, καὶ αληθεως απη.

(b) §. 241.

(c) §. 244.

(d) §. 280.

(e) §. 275.

sia, associatio imaginum, affectus, memoria, analogia quædam rationis, appetitus sensitivus, affectus, instinctus & stimuli naturales, spontaneitas (a). Ad alteram vero actus reflectendi, comparandi, vis ideas genericas efformandi, judicandi, ratiocinandi, experiundi, demonstrandi, intellectus, ratio, libertas, voluntas (b). Ergo leges naturæ humanæ naturales aliæ homini cum brutis communes erunt, eæ nimirum, quæ ejus naturam animalem continent; aliæ homini propriæ, quæ scilicet ad naturam rationalem spectant. Quare iterum fit, ut secundum utrasque vivere, sit vivere naturæ humanæ convenienter.

§. VIII. Perspicua sunt hæc. Illud nunc perquirendum est, obligemur necne ita vivere, & quatenus, ac qua ratione. Nam quoniam liberi sumus, in eo, quod est convenienter naturæ vivere, multipliciter peccare possumus, nisi ita libertas nostra determinetur, ut sciat, & velit recte cum natura vivere; ne scilicet impellat illam ultra, quam par est, nec plus, quam æquum est, cohibeat, nec turbet. Est obligatio connexio motivorum voluntatem ad quidpiam agendum vel omittendum inflectere aptorum cum actionibus ipsis, aut omissionibus (c). Ea motiva esse possunt voluptates, aut dolores, adeoque præmia, aut pœnæ. Itaque illud quæritur, sint ne ulla hujusmodi motiva, quibus obligamur ad naturam nostram hæc, aut illa ratione, hætenus, & non ultra, sectandam? Sed in duplici classe posita esse possunt ea motiva: nam aut a natura ipsa sunt, aut a libera voluntate supremi totius naturæ Principis. *Illa insitam & naturalem obligationem constituunt: hæc externam, & ut vocant, positivam.* In utramque nunc inquirendum est.

§. IX. Obligationis nomine, quemadmodum dictum est, ea motiva intelliguntur, quæ flectere voluntatem queant ad agendum, aut omittendum. Ea autem est humana natura, ut dolore, & voluptate impellatur, aut cohibeatur; obligatio ergo dolore & voluptate continetur. Nascitur in nobis voluptas ex conscientia

nostrarum perfectionum , dolor ex conscientia imperfectionum ; non solum ergo præsens nostri perfectio , aut imperfectio , verum etiam spes futuræ perfectionis , aut imperfectionis futuræ metus , motiva sunt ad naturam nostram permovendam apta . Quare eæ genericæ propositiones , secundum quas , ubi naturæ convenienter vivimus , perfectionem nostram efficimus ; quibus dum adversamur , nos efficimus imperfectiores ; erunt non solum regulæ & normæ vitæ humanæ , verum etiam leges obligatoriæ : ac si & ex ipsa nostri natura intelligantur , & secum ipsæ naturaliter eam adnexam habeant obligationem , erunt naturæ ipsius leges & intrinsecus obligantes .

§. X. Observamus perpetuo plurima ex liberis nostris actionibus , aut omissionibus consequi naturæ nostræ adversa , aut consentanea , quæ in ipsis actionibus aut omissionibus nostris sui habent rationem sufficientem , causamque . Quum autem quæ naturæ nostræ sunt consentanea , ea nos perficiant ; quæ adversa , aut deteriores faciant , aut destruunt ; & quæ nos perficiunt *bona* , quæ aut deteriores faciunt , aut destruunt , sint *mala* ; conficitur , plurima bona , aut mala ex liberis nostris actionibus nobis obvenire posse . Obligat vero nos natura ipsa nostra urgetque intrinsecus , ad mala vitanda , sectanda bona ; quia illa imperfectiores nos efficiunt dolorem ingenerant ; hæc perfectiores , creant voluptatem ; ergo eadem natura nos intrinsecus quoque obligat ad eas actiones edendas , ex quibus bona nobis obtingunt ; vitandas vero eas , ex quibus mala enascuntur .

§. XI. Hinc autem fit , ut libertas humana non ita sibi relicta sit , ut possint ei licere omnia , ad quæ pertingere potest : sed opus esse , ut intra quosdam terminos ejus coerceatur licentia , idest naturali obligatione teneatur , naturæ obligatione regatur . Quare si quæ sit generalis regula , qua intelligere possimus , ad quæ nos natura obligat , seu quæ sunt nostri bona , quæ mala ; ea lex naturæ generica erit . Nam ea & docebit quæ agenda , aut omittenda : & ad ea agenda aut omittenda naturali sanctione doloris & voluptatis im-

impellet, idest obligabit. Eam porro regulam & esse aliquam, & intellecta facilem, hunc in modum pergit ostendere.

§. XII. Quoniam demonstratum est, naturam insita & naturali sanctione nos obligare ad ea efficienda, quæ nos perficiunt, vitanda vero, quæ nos imperfectiores reddunt; efficitur inde hæc generalis regula: *Quæ te statumque tuum perfectiorem efficiunt, facito: ea autem, quæ te statumque tuum reddunt imperfectiorem, caveto (a)*. Est hæc naturalis regula, quia e natura ipsa nostra & naturaliter depromitur. Cum naturali sanctione conjuncta est; quia qui ea efficit, quæ se statumque suum faciunt imperfectiorem, statim dolore, & miseria punitur: contra voluptate is & affluentissime donatur, qui ea & curat & efficit, quæ se statumque suum perfectiorem efficiunt. Quare est generica naturæ lex, quæ præcipit ea, quæ agenda sunt, vetatque contraria.

§. XIII. Neque vero acquisitis argumentis indigemus, ut eam regulam intelligamus: est ea omnibus insita: natura agitur, ut ea persequamur, quæ voluptatem & felicitatem, aversemur vero, quæ dolorem & miseriam adducunt. Quamobrem videri potest supervacaneus totus ille rerum apparatus, quo Wolfius, atque hinc Koehlerus eam rem demonstratum eunt. Illud potius diligentior operam postulat, ut sciatur, quæ sunt ea, quæ nos perficiunt, quæ natura ipsa sunt sectanda; quæ vero quæ imperfectiores faciunt. Hæc nisi in classes quasdam item genericas conferamus, erit superior illa lex inutilis: est enim generalior, quam ut ab omnibus hominibus peculiaribus actionibus facile aptari possit. Quin, quod perverse intelligi possit, totam vitam perturbare potest, ac reapse perturbat, in iis, qui ex sua libidine vivere sibi decreverunt. Quocirca videamus quemadmodum id isti efficiunt.

§. XIV. Quoniam duplici, ut dictum est, homo natura constat, corporis & animi: item animali &

rationali ; danda est opera ut utraque & conservetur , & perficiatur , si sanctioni illi naturali parere velimus . Quoniam autem quæ naturam nostram conservant & perficiunt , procreant voluptatem , lætitiā , animi tranquillitatem , sanitatem , & felicitatem denique , eam videlicet , quæ quamdiu hic sumus haberi a nobis potest ; quæ vero aut deteriores efficiunt , aut destruunt , dolorem , ægritudinem , perturbationes , morbos , miseriam postremo ; erunt hæc totidem tesserae agendorum , aut omittendorum ex naturali sanctione . Itaque inde intelligere possumus , agenda esse aut omittenda ex naturæ imperio , quæ acta , aut omissa , voluptatē , lætitiā , animi tranquillitatem , sanitatem important : neque enim tantum natura cum iis præmium copulat , nisi ut nos ad agendum , aut omittendum impellat . Cui quoniam parendum est , nisi stulte cum ea pugnare velimus ; erunt prima argumenta & manifesta agendorum aut omittendorum . Præterea ne frustra quidem dolorem , ægritudinem , perturbationem , morbos , cum aliis actionibus aut omissionibus connexit : voluit ergo inde nos ad agendum aut omittendum permoveere . Erunt hæc ergo altera item manifesta argumenta omissionum aut actionum , dolor , ægritudo , perturbatio , morbi . Quocirca est hæc velut vox quædam naturæ cuique intincta : voluptate ea & dolore loquitur , quibus quæ imperat , aut vetat , clare illa quidem & ex æquo omnibus manifestat .

§. XV. Itane vero , dicet aliquis , porcorum lege vivemus ? est enim ea sola & tota animantium brutorum regula : ultra illam nec sciunt quidquam , nec agunt . Non recte , inquiunt . Non alia animantia bruta uti regula , nec cis aut ultra illam efficere quidquam , est in perspicuis : sed naturæ magis impetu , quam ulla ratione ad eam sectandam impelluntur . Nos ut bruta legem illam natura ipsa persentimus : impetu , ut illa , animali in illam rapimur . Quid enim juvat naturam dissimulare ? Sed ratione , & libertate moderari possumus , & debemus , qua re illa carent . Quamobrem tum demum ea lex a mechanicis ad rationales revocabitur , si ex ratione , non ex bru-

to tantum impetu, sectabimur. Quæris, qua in re hic circa eam rationis usus positus sit? Nempe in hoc, ut non ex præsentī tantum voluptate, aut dolore de naturæ voluntate judicemus, sed ex summa totius vitæ dolorum, aut voluptatum, atque ex ejus summæ cum felicitate aut miseria connexionē: nam vitæ humanæ felicitas ex summa totius vitæ voluptatum æstī-manda est; ut miseria ex summa dolorum totius vitæ. Itaque usum superioris legis sequentes regulæ efficiant rectum.

§. XVI. *Prima*. Minus bonum est verum malum majori bono comparatum. Quum autem natura nos obligat ad bona sectanda, fugienda vero mala; sit ut ex eodem naturæ imperio fugienda sint ea bona, quæ nos majoribus privant; ac propterea averſandæ eæ voluptates, quæ majores impediunt: sunt enim minores voluptates, quibus majores impediuntur, veri mali telſera.

§. XVII. *Alterā*. Minora mala, si conferantur cum majoribus, sunt vera bona. Quare & minores dolores collati majoribus sunt boni argumentum. Obligat vero nos natura ad bona conſectanda; ergo in comparatione minoris cum majori malo, minus eligendum imperat, quo majus evitemus.

§. XVIII. *Tercia*. Quæ præſentia bona impediunt, quominus summa omnium bonorum, in quo felicitas posita est, major sit & intensior, ea sunt vera mala, ac proinde ex naturæ jussu fugienda. Quæ vero mala præſentia efficiunt, ut minor futura sit tota malorum summa, qua continetur miseria, sunt vera bona, ea-que ex naturæ imperio amplectenda.

§. XIX. *Quarta*. Malum totius est verum semper malum: malum vero partis, si ad totum conservandum aſt perſiciendum pertineat, verum est bonum. Ergo ex eodem naturæ imperio, malum totius perpetuo cavendum: malum vero partis, si toti conservando aut perſiciendo necessarium sit, complectendum.

§. XX. Si cum hujusmodi regulis lex illa generica adhibeatur, erit illa præclara totius humanæ vitæ, omnium.

omniumque hominum officiorum norma . Nam inde non solum quæ natura nobis debemus , sentiemus : sed intelligemus quoque facillime , quæ Deo , aut aliis naturalia debeamus officia . Scilicet & nos statumque nostrum conservare debere a natura discimus ; & quæ nos conservare , aut destruere , perficere , aut facere deteriores , voluptas & dolor ostendunt : tum quæ voluptates vere conservent aut perficiant , qui vere destruant , aut imperfectiores reddant dolores , superiores quatuor regulæ docent (§. 16. 17. 18. 19.) . Ex quibus quum id quoque intelligatur , ad summam voluntatum nostrarum , idest felicitatem , necessariam esse pietatem & religionem in Deum , iustitiam & amicitiam in ceteros homines ; ex eadem illa generica lege derivari possunt officia omnia erga Deum , & proximum . Sed explicemus posteriora hæc duo paullo distinctius .

§. XXI. Ens necessarium existentia & essentia est illud , quod ita est , ut pugnet non esse , & talem habet naturam , ut pugnet aliam habere . Quæcumque autem sunt in natura rerum sensibus aut rationi nostræ subjecta talis esse naturæ reperimus , ut nec pugnet aliam habere posse , nec non esse . Quare fit , ut nec necessario sint id , quod sunt , nec necessario existant . In primis autem Cuius naturæ est homo quod ad utramque sui partem . Contingentia ergo hæc sunt omnia , ac cum iis homines quod ad utramque sui partem . Contingentia vero sine ente necessario nec esse , nec concipi possunt ; alioquin sine ulla existentia & naturæ suæ ratione sufficiente essent , aut conciperentur . Existit ergo ens necessarium existentia & essentia , a quo rerum hæc natura est . Deum hunc vocamus .

§. XXII. Quum a Deo simus , ab eo quoque conservamur ; qui enim necessitate naturæ nostræ non sumus , ne eadem quidem conservari possumus . Ergo dubitare non possumus , quin is velit nostri conservationem & perfectionem . Est autem is supremus nostri Dominus ; ergo supremus nostri Dominus , quique possit & severe punire , & præmia magna largiri , nostri perfectionem

nein & conservationem imperat. Non potest ergo non esse & cum hac etiam voluptate conjunctum studium nos conservandi & perficiendi, quod id Deo supremo nostri Domino gratum sit; & cum dolore, nos deteriores efficere, quum id supremi Domini voluntati adversetur. Nascitur autem hinc nova obligatio ad nos conservandos. Nam quoniam obligatio voluptate, aut dolore continetur; & cum nova hac voluptate, quod Deo gratum sit, studium nos conservandi & perficiendi conjunctum sit; destructio vero aut imperfectio cum eo quoque dolore, quod Dei voluntati repugnemus; & hæc altera exoritur obligatio nos conservandi, & perficiendi.

§. XXIII. Ex superiori propositione intelligitur, leges naturales, quibus humana regitur natura, a Dei quoque voluntate vim suam & obligationem habere: nam Dei voluntate ita constructa hominis est natura & eadem voluntate lex omnium illa fundamentalis, qua nos statumque nostrum conservare & perficere nobis imperatur, sancta est. Ergo ad eas constantissime colendas duplici obligatione impellimur, naturali atque cuique insita, & externa seu positiva. Ac licet illa insita sit, & individua sectetur omnes actiones, aut omissiones nostras; minor tamen habenda est, quam externa altera divina: quia par est credere, leges illas colentibus majora esse a Deo præmia servata, quam quæ ipsa præstat natura; violentibus vero sanctitas poenas longe actiores, quam ulli naturales dolores. Quumque Deus nequeat esse nisi immutabilis, idem semper volens, idem nolens; sunt præmia illa & poenæ certa & immutabilia.

§. XXIV. Jam quum rerum hanc universitatem ad perfectionum suarum, & gloriæ suæ manifestationem fecisse Deus videatur (a); eodem quoque pertinere debent ieges naturæ, quum mechanicæ, tum morales. Erit ergo harum constantia cum universi fine, idest Dei gloria, conjuncta; perturbatio & violatio ei adversa: ac vicissim cultus Dei cum universi legibus con-

sen-

(a) Wolf. in Theol. natural. §. 815. & seqq.

sentaneus : contemptus illis repugnans . Nec vero quod totius universi fini est adversum , consentaneum esse potest naturæ nostræ , qui sumus universi pars ; aut quod est consentaneum , esse nobis adversum . Ergo cultus Dei inter primarias naturæ nostræ leges censendus est . Nam quoniam is fini totius rerum universitatis consentiens est , est & naturæ nostræ , quæ universi pars est , consentaneus : ad ea vero , quæ naturæ nostræ consentanea sunt , naturæ lege obligamur : fit itaque , ut & quia cum summa voluptatum nostrarum consentit , & quia consentit cum voluntate Dei , insita , & externa obligatione ad Dei cultum obligemur . Quare eadem illa regula naturæ generica fons est officiorum etiam eorum , quæ Deo debemus .

§. XXV. Nec vero difficile est inde quoque officia adversus alios homines derivare . Nam quoniam ad nos statumque nostrum conservandum & perficiendum obligamur ; nec in nobis habemus ea omnia , quæ ad id sunt necessaria ; eorumque partem magnam conferre in nos alii homines possunt ; nec tandem ea bonorum communio sine reciproca amicitia haberi potest ; fit ut amicitia cum aliis hominibus sit ad nos statumque nostrum conservandum necessaria , ac propterea ut ad eam ita obligemur , ut ad nostri custodiam , & culturam .

§. XXVI. Atque hæc fere sunt , quæ Wolfius & Koehlerus super naturæ humanæ legibus docuere , nimis quidem illa abstrusa & intricata , extraque hominum consuetudinem ; sed vera tamen & perpulchra . Non autem oportet hoc in loco regulas illas , etsi nimis sint procul dubio genericæ , & a communi hominum usu remotæ , latius diducere , quod illi , & nimis quidem prolixè , efficiunt : nam & eorum libri in manibus sunt omnium , & non admodum difficile est Philosophis nostris , qui in superioribus instituti sunt , obvenientibus speciebus aptare . Interim qui penitus totam hanc rem cognoscere vult , non sine magna utilitate (a) Wolfianum opus *Juris naturæ methodo scientifica*

(a) *Nec sine minori tedio . Tanta ne molis erat homines sua offi-*

fica pertractatum, recusum Lipsiæ anno 1745. leget. Nisi enim toto cælo aberro, nemo ante Wolfium Leges & Jura hominum naturalia copiosius & e suis fontibus penitus haustas docuit. Habet, non pugno, operis prolixitas quod disterrear hujus ævi homines delicatulos, minimæque lectionis & contemplationis: sed labor multa utilitate non compensatur modo, sed longe vincitur. Interim lectorem amat Philosophum, nec Philosophum tantum, sed methodo geometricæ suetum. Quanquam non hic solum Wolfius, sed Doctores omnes hujus disciplinæ sapere nequeunt, nisi Philosopho, eique Geometræ, idest qui sciat primas quasdam naturæ veritates peracuto oculo intueri, eas corripere firmo brachio, atque in res humanas geometrico filo diducere: in quo plerique, viri sæpe magnæ lectionis & eruditionis, peccant, in primis Grotius, qui jus hoc auctoritate magis, quam ratione constabilire studet. Nec ego negaverim, sensum nationum aut omnium, aut plurimarum magnum sæpe esse hujus juris interpretem: sed quanquam illud interpretari possit, constituere tamen nequit: quod vidit Pufendorffius, qui idcirco curiosius, quam Grotius, in naturam humanam inquisivit: sed defuit illi ars, qua scientiarum systemata conduntur: itaque sæpius auctoritate utitur, quam demonstratione. Auctoritas autem, si ratio desit, eos in sententiam adducere potest, qui quid sit verum ignorant, aut qui jus præpostere ex facto petunt.

§. XXVII. Illud hic quærere subit animum, quid sit, quod hoc sæculo, quo post tot virorum magnorum labores, nullum exstitit literis & Philosophia illustrius, præsertim quod ad eam Philosophiæ partem attinet, quæ mores spectat, nulli ferme hujus juris, minus esse videntur reverentes, minusque rigidi custodes, quam Europæi? Cogunt hæc tempora hanc quæstionem Philosophos agitare. Qua in re quid ego respondebo, nisi quod

officia docere? Nescio ego quo fato factum sit, ut ex quo disciplinarum moralium volumina in immensum excrevere, totus virtutum chorus, quasi scilicet giganteos cothurnas verito, e tellure in Calum remearint.

quod est omnibus in promptu, nos eo morum venisse, ut plus multo curemus subtiles esse disputatores, quam juris ac honestatis observantes? In ingenio excolendo omnem operam ponimus: ut simus viri boni haud in magna ducimus æstimatione. Quin eo luxuries, ac sæculi depravatio evasit, ut vitia ipsa virtutum nominibus cohonestaverimus. Nam divinarum rerum negligentia animi *fortitudo* vocatur: jurisjurandi cavillatio *prudentia* ac *sollertia*: sædistragi, nulliusque fidei homines, *sapientes* quoque audiunt: aliorum bonorum astuti raptores *artis* nomine obteguntur: invasores alieni thori nuptialis *juvenes sociales*. Ita singulis vitiis non honesta tantum nomina dedimus, sed præmia quoque. Quid igitur nobis volumus tot juris naturæ, ac morum voluminibus? Nempe imperitis ac simplicibus hominibus imponere, aut alii alios astute decipere? Latum malum, cuique non Philosophia, sed lex civilis, & educatio mederi potest. Nam nisi honestatis præcepta cum lacte sugamus nutricis, severaque legis civilis disciplina servare assuescamus, Philosophi, ne ipsi quidem sæpe ita, ut prædicant, honestatis cultores, contemptui sunt. Sed ea est hujus sæculi depravatio, ut educatio, ac legum interpretatio magis hominum ingenia ac Externam vitæ pompam, luxumque spectent, quam mores.

*Magnum pauperies opprobrium iubet
Quidvis & facere & pati,
Virtutisque viam deserit ardua (a).*

C A P U T XV.

*Veterum sententia, jus suum cuique tribuendum,
e novis fontibus exprompta, novoque
habitu exornata.*

§.I. **H**enricus & Samuel de Coccei in iis sunt procul dubio adnumerandi, qui omnium penitissime in hujus, quæ cum natura ipsa commixta est, legis

(a) Horat. lib. III. ad. 24. v. 42.

legis penetralia invadere studuerunt, primumque ejus fontem indagare (a). Non ego hic singula tantorum virorum dogmata exponam, excutiamque, quod longe est ab eo instituto, quod suscepi: sed quod caput est, ac istiuscemodi disputationis quasi fundamentum, *jus cuique suum tribuendum esse*, expediam, e penitiori fonte expromam, novoque, ut ego quidem opinor, adornabo habitu. Ac quanquam in eo explicando commostrandoque jamdudum adlaboraverim, atque minus ex eorum libris, quam ex naturæ Codice, ratione videlicet hominum communi, atque universi lege, eruisse mihi videar; cum plures tamen egregii, magnique viri mihi elucubrationibus suis præiverint, illis malim adscribere, quam mihi. Sed intelliget profecto Lector, si utraque noverit, quam sæpe immensè distemus. Illud ego cum in omni reliqua Philosophia, tum in hac præsertim quæram diligenter, non quid quisque dixerit, sed utrum ex veritatis regula, quæ in hisce quæstionibus non opinio est atque imaginatio (quæ nescio an esse debeat in ullis) sed rerum natura, atque æterna mundi lex. A qua qui abscedunt, dum de jure & officiis disceptant, non jura statuunt, sed corrumpunt, ac officia omnia pervertunt. Itaque odi ego jamdudum, nec sine ratione, istiusmodi librorum helluones, non rerum, sed phantasiarum doctores. Adeon? naturæ liber vilescit? Sed eo fit, puto, quia tamen si ob oculos est omnium, paucissimi tamen legere didicerunt; factumque est adeo prave ac misere, ut ab illo quotidie magis magisque desciscientes totam morum disciplinam humanis commentis foedaverimus ac perverterimus.

§. II. Primum officiorum nostrorum fundamentum, idque certum atque divinum, esse hoc, SUUM CUIQUE JUS INTEGRUM ESTO, magna vel barbari consensione docuerunt, non Græci modo Latinique; docentque hodie;

Tom. IV.

L

die;

(a) Vide quæ in Grotium scripsere. Parvæ Henrici theses, quæ velut stamina sunt totius hujuscemodi doctrine, extant in Biblioth. Germanica tom. I. Samuelis vero systema totum exhibet ejus ad Grotium dissertatio prolusoria XII.

die; nec jam tanquam acceptum traditumque, sed velut a natura haustum. In eo tota & Romana versatur Jurisprudencia, & nostra. Hinc illa fuit solemnitas & communis apud Græcos vox, *ὡς δίκη*, ut *jus* (a): hinc præcipuum jurisprudentiæ Romanæ præceptum, *suum cuique jus tribue*. Sed illa parum accurate tum veteres, cum recentes Philosophos explicuisse & demonstrasse certus sum, quid hoc sit *jus*, quod incolume servandum natura præcipit: quæ nobiscum jura nascantur: quæ ex primævis deriventur: transferri in alios ab aliis possint, & quæ: quæ servandorum lex atque sanctio. Hæc e natura ipsa expromere juvabit, paucisque theorematibus comprehendere.

§. III. Principio *jus* hic dico, quod ita in cujusque proprietate ex mundi lege est, ut pugnet esse in alterius; cujusque & conscius sumus, & liberi, nisi natura, vel pactum vetet, moderatores: quodque nobis lege mundi vindicatur. Itaque *jus* primum ab eo, quod commune est, secernq; tum a *lege*: nam quæ communia sunt, non jura sunt, etsi sub juribus: & lex jurium regula est & custos & vindex, adeoque communis, non propria. Qua ex re intelligitur, totam hanc juris naturæ tractationem ab ea quæstione suscipi oportere, est, necne, ex mundi lege, aliquid in nostra proprietate, cum nascimur? Si ex lege & ordine mundi nihil est
in

(a) *Jus δίκη*, & *ἐσμὶ δίκη* dicunt Græci. Utraque vox pro more & consuetudine usurpatur sæpe ab Homero & Hesiodo, aliisque veteribus. *Δίκη* est a *δίζω* dico, jacio, projicio: nam veteres mores velut primæ justæ humanitatis leges fuisse, dictisque atque traditione majorum servabantur. *Ὅσμις* a *ἔσω*, & *τίθημι* pono, eodem cum sensu. Veteres igitur mortales nulla alia primæ jura agnoscere, quam mores. Hæc jura naturæ dixere posteriores. His accessere præcepta gentium & civitatum. Itaque ex his tribus collectum *jus privatum* scribit Vulpianus l. 1. ff. de just. & jur.

At illud *jus*, quod dixere naturæ, a cujusque proprietatibus primam traxit originem. Henricus de Coccei *jus naturæ* vocat quod natura cuique licet: idem, ait, est, atque licitum. Illicitum, *ἄδίκον*, quod alter jure prohibere potest. Illud definiendum erat, quæ sint natura licita. Hoc intelligi nequit ex solis regulis Coccejanis. Eæ igitur latius sunt expediendæ, ac e cujusque proprietate hauriendæ.

in cuiusque proprietate, nullum est naturæ jus : si est, quod proprium cuiusque est, cum in lucem emittitur, id cuiusque jus est ; nec illud modo, sed quæcumque ex eo legitime sequuntur. Sed illud velim animadvertatur, non esse jus cum juris usu permiscendum : potest enim esse jus meum, atque in mea proprietate, illud etiam, quo aut uti nolo, aut nondum scio vel possum. Cum dormimus, nec oculis utimur nec manibus ; nec tamen minus sunt illa in nostra potestate ac proprietate. Cujus rei ratio est, quod jus ad naturam pertinet & substantiam hominis, usus in arbitrio positus est.

§. IV. Quid autem proprietatem dicemus? Id putaverim, quod ita cuiusque est, ut pugnet esse alterius: nam proprietas, modo proprietas est, nequit duorum esse. Quæ ex naturæ formulis definitio, non Jurisconsultorum: nam cum Philosophis discepto, & in naturæ Tribunali, non cum Jurisconsultis, neque in foro. Itaque illud agamus. Proprietas singularis est, non communis. Ita trianguli proprietates sunt eæ, quæ ita sunt trianguli propriæ, ut pugnet esse aliarum figurarum, circuli, puta, quadrati; cubi &c. Si igitur est aliquid ita proprium cuiusque hominis, ut pugnet esse alterius, id ad ejus proprietatem pertinet. Quid, dicet aliquis, nonne est quod est totius hominum generis proprium? Est hercle vero: sed id eo fit, quia tum totum hominum genus velut pro re individua concipitur. Ita cum dicitur propria est hominum ratio, nec belluis communis, velut duo individua habentur homo ac bellua ; quæ quoniam diversa sunt, habent aliquid proprii, quo secernuntur.

§. V. Has nunc proprietates pervestigemus. Homo ita est homo, ut nec bellua sit, nec planta, nec quævis alia res ; est igitur aliquid quod ita est hominis proprium, ut pugnet esse aliarum rerum. Nisi enim sit, una res sunt, quod & hypothesim pervertit, & naturam. Hæc *generis proprietas* dicetur, atque ejus proprietatis causa homo velut una res a ceteris distincta ac diversa concipietur. Hæc ergo generis proprietas hominem constituit: quare cuicumque competit, is est

homo : a quacumque re abest , ea extra hominum genus vagatur .

§. VI. Sed tametsi quacumque patet tellus nascantur homines , puta , Socrates , Cajus &c. , nullibi tamen homo , genus , nascitur : nam genera ratio efficit : natura non procreat nisi individua . Ergo tam est homo individuum ab homine individuo sejunctus , ut homo genus ab omni rerum aliarum genere : nihil est in natura universale . Ergo ita hic homo , Plato , puta , est Plato , ut pugnet esse Xenophontem . Quod quia alia re effici dicemus , nisi proprietate individua ? Est igitur aliquid individue proprietatis in omnibus hominibus cum in lucem eduntur . Nascantur duo homines A , B , nisi est aliquid ita proprium hominis A , ut non sit hominis B , & aliquid ita proprium hominis B , ut non sit hominis A ; erit A idem atque B , B idem atque A ; quod pugnat esse .

§. VII. Dum igitur in lucem edor & homo sum & hic homo : itidem tu : itidem quisquis quacumque patet tellus enascitur . Quilibet ergo homo est homo *proprietate* hominis : hic vero aut ille homo proprietate individui . Sed cum non dentur in rebus genera , quæ non sunt nisi *εννοαι* , *notiones* ; sit ut in qualibet re generis & individui proprietates unum sint idemque . Quapropter omnis homo in sui proprietate habet totam suam *ουσιαν* , *substantiam* , *φυσιν* , *naturam* , omnesque naturæ partes , vires , dotes , facultates , ipsosque naturales modos . Ac verò pugnans fuerit dicere aliquid esse in me naturaliter , quod ad mei proprietatem non pertineat .

§. VIII. Quæri hic potest , utrum quod in mei proprietate est , ita meum naturaliter sit , ut pugnet esse alterius ? Quo in loco discernere oportet proprietatem ab usu & moderatione proprietatis . Proprietas tam mea est , quam ego mei , atque quam ego ego . Cum autem pugnans sit me non esse me ; sequitur pugnans esse , mea non esse mea . Ita sit , ut quod in mei proprietate est , pugnet esse alterius . Sed cum sæpe præ animi corporisve imbecillitate nostris proprietatibus uti vel nesciamus , vel nequeamus ; nihil vetat cujusque

proprietates esse posse sub alterius ditione ac moderatione : nam non proprietas , sed moderatio alterius est. Ita liberi proprietate sui sunt : moderatione parentum. Cives sui proprietate : regimine imperantis.

§. IX. Constitutis cujusque ingenitis ac naturalibus proprietatibus , perquirendum est , utrum esse possint aliæ , quæ illis tempore accedant. Qua in re loco axiomatis assumo , *quidquid ex primævis alicujus rei proprietatibus erumpit , tam evadere proprium ejus rei , quam quod naturaliter insitum est* . Insitum est triangulo ut tres ejus anguli duobus rectis sint æquales ; ergo producto uno latere insitum quoque propriumque erit , ut angulus externus sit æqualis summæ interiorum oppositorum . Proprium est plantæ id esse quod est ; ergo frondes , flores , fructus , semina , quæ naturaliter ex planta erumpunt , tam sunt plantæ propria , quam est ejus essentia & natura. Eodem modo quidquid ex primævis hominis proprietatibus naturaliter effluit in accedentibus est ejus proprietatibus , tamque natura suum , quam sunt illæ primæ & insitæ.

§. X. Sed homines sunt ejusmodi res , quæ efficere aliquid in sese mutuo possint , alterque alteri aliquid concedere quatenus e natura separari potest. Itaque & instruere alius alium potest , melioremque efficere : & de suo aliquid ei attribuere in proprietatem : & submittere se alteri ob suam incolumitatem aut utilitatem , juriumque suorum moderationem in eum transferre. Quæ si non vi nec dolo ac circumventionem , sed libera sunt voluntate , ac prudenter scienterque ; nihil causæ esse potest cur ejus hæc omnia non fiant propria , in quem transferuntur . Nam nisi fiant propria , est , aut quia non ceduntur , aut quia cedi nequeunt : utrumque autem est pugnans.

§. XI. Proprietates ergo hominis aut ingenitæ sunt ; aut ab ingenitis enatæ ; aut ab aliis sponte translatae . Si superiora vera sunt & manifesta , omnes ita ejus sunt propriæ , ut pugnet esse alterius. Illud nunc pervestigandum est , utrum hujusmodi proprietates jura quoque sint. Jus superius (§. 3.) appellavimus , *quod ita in cujusque proprietate ex mundi lege est , ut pugnet es-*

se alterius ; cujusque & conscii sumus , & liberi , nisi natura vel pactum vetet , moderatores . Hanc nunc definitionem paucis explicatiorem faciamus. I. Jus est quod ad cujusque proprietatem pertinet ; quia sine ulla proprietate ne ullum quidem concipi potest jus . II. *Ex lege mundi* , quæ est proprietatum rerum omnium ordinatrix in communem harmoniam ; sed primum distributrix , quam ordinatrix : non enim ordinantur , nisi distincta , ac secreta . Præclare Græci νόμον , *legem* , vocant , *distributionem* , aut *distribuentem potentiam* ἀποτρεμεν , *suum scilicet cuique tribuendo* . Hinc Aristoteli dicitur λόγος ὁ ὀρίσμενος , *ratio finiens* : propria enim cuique tribuit definitque . Sine hujusmodi lege mundi nihil esse potest , nisi chaos : in chao autem nihil cuique proprium . III. *Cujus lex mundi regula est , custos , vindex* : vetat scilicet , quod proprium est alterius , velut suum usurpare , minuere , impedire , nisi *ex jure* , respectu cujus jus illud , quod alter prætendit , proprium non est , nec jus . Nisi enim vetet , jus commune est , nec propterea jus & quia non proprium . IV. *Cujusque & conscii sumus* . Nam jus tametsi in physica proprietate fundetur , tamen proprietas est moralis ; quæ sine conscientia concipi nequit . Hinc plantæ ac belluæ & suas habent physicas proprietates , & tamen jure carere apud omnes , præterquam Pythagoricos (a) , in probatis est . V. *Liberi , nisi natura vel pactum vetet , moderatores* . Quod quæ propria sunt , in cujusque sunt usu . Excipe nisi natura vetet , vel pactum . Ac illa semper vetat , cum uti nescimus , vel nequimus . Hinc naturale est *jus patriæ potestatis* . Pacto partem jurium transferre possumus , & in his , jurium supremam moderationem . Ita *jus heri* , aut *domini* pacto constituitur .

§. XII. Expedita jam juris natura , ac suis cuique proprietatibus adfertis , superest ut demonstremus , an
ulsum

(a) Cum veteres Græci Pythagoræi commercium animarum inter homines & belluas esse crediderint ; velut a cognatis rebus earum esum abstinuere . Ad plantas hoc ipsum pertinere putant Indi Bramines , ledereque verentur : nec vescantur , nisi quia volupe illis esse arbitrantur e tam duris carceribus exsolvi . Vide Rogers Indiæ descriptionem .

ullum sit cuique jus. Principio lege mundi cuique suar proprietates attribuuntur, privatique usus gratia. Super mundi ordine atque lege disceptare nolo: hæc enim qui ignorat, sensibus & ratione destituitur. Illa potest aliqua esse quæstio, a natura ne materiæ hujuscemodi sit mundi ordo atque lex cosmologica, an a præpotente aliqua mente, cujus numen toti mundo præsit? Quæ binis verbis finiri potest. *Generalia, atque universalia a parte rerum*, ut vocant, ad eam philosophiam pertinere jubeamus, quæ tota erat chimæris pasta. Nihil est in rerum natura nisi singulare & individuum: nam hæc quæ rerum natura dicitur, & mundus, & universum, nihil est aliud, nisi singulare, individuarumque substantiarum *ousaia*, *compago ordinata*. Enimvero corporum quædam sunt secta in partes infinite parvas, ut ignis, lux: quædam vel oris flatu divisibilia, ut aër, aqua, fluida reliqua: cetera instrumentis partimur, atque ita, ut hucusque nulla repererimus individua corpora minimeque partibilia. Materia ergo corporum non una est & individua, sed infinitæ atomi, quarum quælibet unum ipsa per se est & simplex. Nulla, quod sciamus, ratione, nullo sensu, nulla libertate præditæ. At sunt quibus placet sensu esse instructas. Sint: nam agere liberaliter decrevum est. Ea longe certe inferior esse debet, quam non jam dicam hominum, sed brutorum animantium atque insectorum. Prospicere ergo extra se, remotosque fines providere, media eo ducentia dignoscere, deligere, ordinare, aptareque finibus, non magis queunt, quam ostracæ, vermiculi, dactyli, atque ejuscemodi alia insecta. Tum constantes in tanta esse sapientia, ut nihil ullo tempore mutant, non magis possunt, quam quævis alia natura perpetuæ mutationi obnoxia. Itaque dicere non solum ipsas sese movere perpetuo, sed quacumque patet tellus concordissime congruere & in tam longa spatia rerum temporumque cogitationem & consilia jace-re, non minus mihi stultum ac perridiculum videtur, quam si quis dicat Capitolium, Pantheon, Trajani Obeliscum, Ægyptias Pyramides, aut magnas & magnificas Europæ atque Asiæ urbes, una conspirantibus

consultantibusque culicibus, muscis, pediculis, vermiculis exstructa fuisse. Quin tanto stultius, quanto singulæ hujuscemodi insectorum atomi stupidiore sint necesse est, quam totum animal.

§. XIII. Cum igitur natura ipsa existit mundum istiuscemodi ajunt Philosophi, vitent tamen oportet expedire ac definire, quid hoc sit NATURA. Nam si definiunt, nec atomos esse posse, nec ullas atomorum vires planum facient, hærentque in syrtibus. Est, ajunt, vis quædam communis. Individua primum quæro, an dividua? Si dividua, recidunt eodem. At si individua, jam non corpus: nihil enim quod corpus sit, tamque late patens, quam mundus, individuum esse potest. Deinde, ratione prædita an stupida & bruta? Hæc arte caret: caret vi rationalia progignendi. Rationalis ergo. Tum quantæ potentiæ, quæ tantas res nullis corporeis machinis fabricaverit? Certe Omnipotens. A causa igitur incorporea, intelligente, præpotente est mundus. Quid igitur stulti Deum tergiversantur? Est ergo a Deo mundus, mundique ordo & lex. Ejus existit voluntate, natu, imperio; quo enim alio modo existeret? Ergo ejus sapientia: neque enim in illo aliud esse potest voluntas, aliud sapientia. At immutabilis est ejus sapientia. Ergo & voluntas, qua hic est mundus, atque hæc mundi lex, immutabilis ergo naturæ lex.

§. XIV. Quoniam ergo lege mundi suæ cuique proprietates attribuuntur, atque adseruntur; lege æterna attribuuntur, adserunturque. Sed eo adseruntur modo, quo cuique competunt, atque ob eos fines, propter quos naturaliter tribuuntur. At quos ob alios fines natura tribuuntur, nisi ut sint, & salvi sint? Finge tribui ut ne sint, aut ut ne salvi sint; jam ne mundi quidem ordinem esse ullum, aut salvum stare, jubet lex æterna; quod pugnans est. Quibus ex rebus fit, ut hominum proprietates ex lege mundi privatæ sint cujusque utilitatis, privatæ salutis ac felicitatis. Corporis ergo ingeniique vires non alia ratione mihi tributas docet natura, nisi ut sim, ac bene beateque sim.

§. XV. Cum igitur privati ac definiti usus sint ex pro-

proprietates, quas mihi impertitur natura, atque naturæ lex, idest Dei; sequitur, ut eadem lex, quæ mihi attribuit proprias, tibi vetet in usum tuum, me renitente, usurpare: vetet inutiles mihi reddere, atque fini, propter quem tribuit, ineptas. Nisi enim vero vetat, non mei præfiniti usus sunt; non proprietates, nec ut sim beneque sim largitur Deus; quæ contradictio est, ac longe a Dei natura remota.

§. XVI. Sed eadem naturæ lex, quæ mihi meas adserit proprietates, adserit tibi tuas, suas cuique, item ut & sit quisque, & bene. Id fieri nequit, nisi ita cuique adserat suas, ut aliæ cum aliis non pugnent. Fac pugnent, nulli suæ propriæ sunt ac tutæ; quod item cum illa lege pugnat. Ita ergo quisque utatur oportet, suis, ut ne alienas lædat. Hæc est universi salus, quæ & singulorum salus est, & ex singulorum salute coalescit. Ergo cum illæ proprietates viresque quibuscumque ex causis incenduntur, atque sese ad aliarum læsionem comparant, retundi ab aliis possunt, & ad naturæ æqualitatem adduci, idque ex ea mundi lege, cujus summa est *salus totius*. Quod ex lege mundi fit, id jure fit; jure ergo cohiberi, castigarique possunt cum petulanter, ac temere profiliunt, & præfinitum a natura usum migrant.

§. XVII. Jam vero si ob naturæ imbecillitatem ejusmodi proprietates nulli mihi usui esse possunt: si uti nescio, aut prave scio; illa salutis universi lex, quam diximus, poscit profecto, ut ii, qui sciunt possuntque, mihi suppetias ferant, quoad sciunt, ac, se incolumibus, possunt. Nisi enim hoc lex illa sciscit; nihil in commune consulit; lex totius non est. Est autem totius lex; & ejus summa salus est universi; sciscit ergo. Itaque ii, qui mihi suppetias ferunt; qui meis proprietatibus pro me utuntur; qui ut salvus sim moderantur, legi patent universi. Jus ergo patriæ potestatis; jus imperii; jus amicitiae, ex lege universi sunt.

§. XVIII. Competunt hominibus proprietates 1. ingentæ, 2. inde enatæ, 3. translatae (§. 5. & seqq.): iisque lege mundi adseruntur (13.), idest lege Dei æ-

terna ac immutabili (ibid.) ; eademque lege privati , ac præfiniti sunt usus (14.) ; nisi quatenus salus nostra poscit (17.) : vetatque eadem lex illas lædere (15.) , præterquam si jure fiat (17.) . Sunt autem hæc jura (11.) ; naturaliter ergo omnibus hominibus sua competunt jura . 1. ingenita , 2. ex ingentis nata , 3. aliorum voluntate translata . Q. E. D.

§. XIX. Jura hominum sunt proprietates physicae , quæ lege mundi adfertur facultates morales evadunt (11.) ; jura ergo a lege mundi distinguamus oportet : lex enim est regula ac vindex jurium . Sed lex mundi est Dei voluntas , sapientia , natura (13.) ; Dei ergo voluntas , sapientia , natura , idest Deus ipse regula est & vindex jurium cujusque . Ac regula quidem est , dum naturaliter suas cuique proprietates tribuit , efficitque , ut & naturaliter quisque sentiat , & indigentia conscientia uti appetat , & ratione non alium ob finem sibi attributas intelligat , quam ut sit , ac bene sit , salva totius salute . Sed qui vindex ? Vindex est qui & adferit cuique aliquid ; & vim pœna arcet ; & læsum restituit in integrum . Efficit id Deus , dicet aliquis ? Efficit profecto . Nam nisi id efficit , vindex non est . At nisi vindex est , ne assertor quidem jurium ; ergo nec proprietatum . Nulla est ergo mundi lex ; auctor ergo mundi non est Deus . Est autem mundi auctor (§. 12.) ; ergo mundani ordinis & legis ; assertor proprietatum cujusque ; vindex , igitur .

§. XX. Hoc , etiamsi genus pœnæ ignorem , ignorem restitutionem in integrum , præmia videlicet , satis tamen est , quo pernoscam reverenda esse cujusque jura , paratasque esse criminum pœnas , virtutum præmia . Ac vero jura scire necesse erat , quo servare possemus : necesse intelligere summa Dei voluntate sua cuique adferi : necesse Deum esse immutabilem eorum vindicem : at genera pœnarum quid attinebat noscere ? quid præmiorum ? Immo utilius , puto , ignoramus , modo illud sciamus , Deo esse digna , adeoque summa ; nam nota minus sæpe ex consuetudine facimus . Ut ecce , pervenio in Sinas : quo probe sancteque cum Sinensibus vivam , scire oportet & esse jura , & jurium

vindicem, & parata in improbos scelestosque supplicia: expromta in bonos præmia. Cruces ne sint pœnæ, an carceres, an triremes, an raptationes, an vivicomburia, quid refert scire?

§. XXI. Nec vero omnia pœnarum genera, quibus in scelestos pravosque animadvertit summus ille naturæ Imperator, ignoramus. Principio omnis jurium nostrorum abusus, seu in nosmet, seu in alios, statim aut ipso naturæ dolore punitur, aut aliorum vindicta ac quasi hostimento. Manum mihi amputo: ipsum crimen sibi talio est. Alteri amputo, neci me dedo; aut ne dedam, exilio committo: metui igitur, pavori, animi ægritudini. Ita lege mundi jura revereri discō. Si quisquam natura felix esse potest, aut quatenus potest, nequit esse, nisi qui neque in sese stultus est, & impius, neque in alios: si fuerit, parata est miseria. Divinitus fere Horatius noster

. *Raro antecedentem scelestum
Deservit pede pœna claudo . . . (a)*

§. XXII. Deinde nulla natio est sine ullo civili regimine, seu fixo, seu precario. Nationes, quæ feræ & barbaræ dicuntur, non hoc distant a cultis emolli-
tisque, ut illæ nullo contineantur imperio, quo hæ frænentur. Qui hoc scripserunt, barbarorum vitam moresque egregie ignorasse videntur. Eo potius differunt, quod hæ certum fixumque habent imperium, ac civile: illæ & naturali continentur, & civile ad tempus sumunt, ponuntque, cum nempe opus est. Bellum est gerendum: Imperatorem eligunt, legesque imperii statuunt. Cum debellatum est, ad privatas redeunt casas. Punienda crimina: conveniunt seniores, ac pedestantes in uno decernunt pœnas, atque exequuntur. In commune consulendum: in cœtus coeunt, disceptant, quodque e publica sit re edictant. A natura est hoc imperium, cujus vim nemo fugit, nisi majori pœna, a genere videlicet humano extorris. Et hæc igitur vindicta ad divinas pœnas referenda est; a lege enim est mundi. Scite ergo Græci *Δεμιν* atque *Ρεμετιν*
Jo-

Jovis esse filias tradunt . Hinc Tragicæ συ βρω τρειν την δίκην ajunt , cum aliquem pœnas facinorum dare oportere dicere volunt . Hinc apud veteres Gentes ferme omnes prima imperii forma , eaque sanctissima , Theocratia . Hinc gentium omnium ac urbium primi fundatores Dii , Deæque creditæ .

§. XXIII. Postremo alterius vitæ sensus , & spes , aut metus etiam in barbaris gentibus , obtinet , obtinuitque semper . Nulla opinio communior . Veram , an falsam dicemus ? Si veram , ut profecto est , tertium est hoc pœnarum genus in scelestos constitutum ; vereantur igitur necesse est . Si falsam , non minus tamen communis est ; ergo a natura rerum ; nihil enim quod commune est omnium , non a toto mundo proficiscitur . Qui alias quærent causas , sunt adhuc in Philosophia pueri . Si a natura ; ergo a lege mundi . Ut non sit altera vita (videant quantum de jure meo concedo) parva ne pœna est , eaque a natura inflicta , hoc improbos perpetuo metuere ? Sed jam metum demisit Epicurus ; demisit Lucretius . Ego libros eorum lego : literas oculis concipio : sed viscera scrutari voluisssem .

§. XXIV. Mihi hæc manifesta videntur : nihil convellere queo sine manifesta contradictione . Nequeo non esse dum sum : nec non esse id , quod sum , ac propter id , propter quod sum : nequeo non eas habere proprietates , quas natura habeo ; nec earum non persentiscere vim & usum , cum sentio . Sed ne fieri quidem potest , ut non hujus sim mundi pars , cujus sum ; nec totius subjiar legi . Mihi igitur illa omnia , quæ naturaliter habeo , tam certum est lege mundi adferi , quam certum me esse , mundique esse partem , atque totius ordini subiectum . Sed an alia lex mundi , quam voluntas causæ mundum procreantis , & continentis ? Mihi igitur hæc omnia non lege Dei adferi tantundem est , ac nullo ordine , nec me , nec mundum agi . Si autem adferuntur , vindicantur profecto ; plena ergo sunt jura .

§. XXV. Illud dicet quispiam , cur plus nobis potentiae tributum est , quam juris ? Imperite : jus enim

potentiam non adimit (sæpe namque tota agendum est), sed regit. Inepta igitur quæstio est. Jus non opponitur potentiæ, sed potentiæ aberrationibus. Itaque jus non vetat tota videre oculorum vi, tota linguæ loqui, tota brachiorum agere, toto ingenio cogitare: sed quomodo videndum sit, aut loquendum, agendumve, aut cogitandum, docet. Tota, licet, naturæ potentia utere; sed ita utere, ut nec te infelicitas, nec alterum: hoc jus est. Jus libertati tribuitur, vis naturæ. Quod si roges, cur plus libertatis naturalis accepimus, quam juris, eodem ineptiarum revolveris: non enim libertatem adimit jus, sed libertatis abusum. Hic Virgilii versus *Æneidos* 1. v. 523. quo *Didonem* *Æneas* compellat,

Justitiaque dedit gentes frænare superbas,
totius est, ut ego quidem arbitror, juris naturalis epitome. *Justitia*, quæ est quasi juris statio: nam *jura* dabat, reddebat videlicet, *legesque viris*, quibus nempe jura facta tecta servarentur. *Frænare*, ne, ut ille dixit, prosiliret *frænis natura remotis*. *Superbas*, extra jura temere procurrentes: est enim superbia, *υπερβια* quasi *υπερ βιαν*, præter vires, morales accipio.

§. XXVI. Insitam jam esse ac hominum pectoribus conditam legem hanc universi & naturæ, ex eo fit perspicuum, quod ea universum procreatum sit, & regatur. Sed illud disceptare video, *idea* ne inscripta nobis sit, an *συνεστα*, an vero *δυναμει*? *Δυναμει*, potentia innata esse naturalis legis scita ac dogmata, ut axiomata Arithmeticæ, Geometriæ, ac rationis communis cetera, quidam arbitrantur (a): ut nimirum nemo sit quantumvis rudis, qui, quum rationis usum adeptus est, non ipse per se ea intelligere queat. At in *idea* ac exemplari in animis nostris insculpi & veteres Platonici, & recentes quidam docent. Hanc opinionem Scholæ olim theologi, philosophique rejecerunt, ac expugnarunt (b). Illa mihi opinio videtur vero similior, *συνεστα*, interno sensu ac conscientia perlentiri.

Cur

(a) *Lockius de Intellectu humano.*

(b) *Vide S. Th.*

Cur id censeam facit , quod quidam etiam dum minus ratiocinantur , iis percelluntur , sicubi sine ullo affectu prævalido facto opus sit .

§. XXVII. Qua ex re fit , ut non facta ac omissa externa tantum regat vindicetque naturalis lex , verum internos quoque animi motus , atque hos prius & potius , quam illa ; nam sunt hi veluti radices , ex quibus externæ actiones pullulant . Id lex Mosaica & Christiana disertis verbis docent : siquidem non solum mœchari , ac furari , & cetera ejusmodi vetant , sed ipsam animi concupiscentiam . Nec Ethnici ignoraverunt , quorum copiose loca congeffit Grotius ad Matth. cap. v. quem consulat qui vult . Sed ante omnia adnotemus , eo sine ulla dubitatione pertinere vetus illud , quod Apollini adscripsere veteres , *nosce teipsum* , animo scilicet , ut ait Cicero . Thaletis illustre est apud eosdem responsum , qui roganti , *α ληθοι θεος ανθρωπος αδικων* , *utrum Deos lateret inique qui quidpiam ageret* , *αλλ' εδε διανοουμενε* , *sed ne cogitans quidem* , ait (a) .

§. XXVIII. Illud etiam objectant , si jus & lex insita sunt & quasi inscripta in hominum pectoribus , cur , ut ait Plinius : *multi famam , pauci conscientiam verentur* ? Respondeo nullum esse hoc mendacio majus , nec crassius . Primum qui verentur famam , ii conscientiam verentur : nam etiam illa externæ honestatis cura , ac custodia a virtutis conscientia est . Deinde etiam perditissimi homines , modo ne fragore affectuum concutiantur , conscientia sentiunt latratus . Totā humana natura quanta quanta est , averfatur scelera . Ne unquam sentiatur , penitus revellenda est . Sed , ajunt , habitus est educationis conscientia . Item inscite . Si enim est , misericordia , comes conscientia hujus , ab educatione est , non a natura , quod falsum . Deinde & amor societatis ab educatione , quod item falsum . Tum agrestes populi conscientia scelerum tanguntur . Hoc errant quod quædam minus capitalia in sceleribus non habent . Postremo bestia parcunt cognatis . Degenerent homines a ratione , an etiam a natu-

ra

(a) Laert. in Thal. n. 9.

ra animali degeneres esse possunt?

§. XXIX. Atque ita officiorum naturalium principium insitum in natura, ac pectoribus hominum conditum, constat, planumque est: **JUS SUUM CUIQUE TRIBUE: SI ULLO MODO LÆSERIS, REFICE. HÆC SUMMA UNIVERSI LEX ESTO.** Quæ cum omnibus nota sint perinde excultis atque barbaris gentibus; sequitur disceptationes de jure, & officiis omnes in facto versari. Jus tribuere natura dicitur. Sed sit, necne, jus, ac quatenus, facti disceptatio est. Quæritur necari alter possit. Si jus est, quis nisi aut stultus, aut impius consultet? Ergo si disceptatur, non de jure, sed de facto quæritur. Generatim jus est cuilibet in vitam: generatim ergo scelus est necare. Quid si facto suo jure in vitam decidit? Si reus scilicet sit mortis? factum scilicet quæritur, non jus. Subest ne Titius imperio Caji? Idem est ac si quæramus, habet ne Cajus jus jura Titii moderandi frænandique usum? Factum est. Pater est Cajus; jus habet patriæ potestatis. Rex est; jus habet imperii. Vides quam brevis sit intelligenti naturæ jurisprudentia. Sed & brevis esse deberet civilis inter æquos bonosque viros. Verum temporum luxurie factum, ut dum jura legibus tueri vellemus, opprefferimus, ignoremusque sæpe, quod nec Scythæ, nec Canadenses, nec Huttentotti nesciant.

§. XXX. Sed eo, unde discessimus, redeamus. Vita, membra, ingenii corporisque vires, naturalis libertas, ingenita cuique sunt jura. Hæc nemo est tam ferus, qui possit ignorare. Sed sunt ex illis nata plura, verum cum sine alterius juris usurpatione quæsimus: nulla enim nobis esse potest tactio alieni juris. Liberi ergo ex justis naturæ nuptiis quæsit, domitæ feræ, exculta agrestis nulliusque terra, arbores, quas ipsi plantavimus, ædificia &c. in accedentibus sunt juribus. Hæc nota: tantum legitime acquisiverimus disceptari potest, quod contestatione jurium, monumentis, testibus sit. Postremo quæ mihi tu ob voluptatem utilitatemve tuam cessisti jura, nulla vi, nullo terrore, nulla injuria, nullo dolo malo, nulla ignorance, ac inscientia, siquidem tua erant, & in tuo.

tuo libero usu, tam fieri mea æquum est, quam tuæ erant: est enim juris naturæ commercium. Sed in factis lites sunt immensæ; facta ergo noscenda.

§. XXXI. Quantum, inquit aliquis, primævi juris vi ac facultate ex communibus telluris bonis occupare licet? Quantum pactis conventis adsciscere? Hoc ego haud absimiliter quæri censeo, ac si quis interroget, quo mihi calceos suam, aut vestem, quantum communium pellium, lanarumque accipere fas est? Nam terra commune est mortalium omnium patrimonium. Ei igitur quæstioni a natura ipsa exitus atque terminus est præfixus. Pedem videlicet mætitor, corpusque; is juris occupandi terminus est, qui corporis. Latior si sit calceus aut vestis, & magno cum incommodo diffluet, & cum aliorum æquum jus habentium injuria tibi induitur. Podagra, inquis, aut callo laboro: difficilis sum respirationis. Secato latius: nolo premaris. Sed ita tamen ut calceus sit, non navicula: ut vestis, non aula. Nonne intelligis naturam reluctari? Ut sis & bene sis hæc illa tibi parat, non ut iis obruaris. Ajunt, Batavæ ad promontorium bonæ spei coloniz præfectum, cum donis, reculisque aliis Afros illos pellexisset improvidos, ac naturæ servientes, tanta terrarum spatia occupavisse, ut Belgium ipsum, cujus civis erat, prope exæquarent^(a). Cui bono? Credo ego ut Astronomos imitaretur; qui cum angustam fere domo rem habeant, amplas in Luna possessiones præripuere, ut si quando eo remigrent, habeat sua ibi Ptolomæus regna, habeat Hipparcus, Tichonus, Gassendus. Oh prudenter factum!

§. XXXII. Quæ huc usque demonstrata sunt, jura dici possunt perfecta & cogentia. Eorum nobis tactio ita vetita est lege naturæ, ut naturæ jus sit vim vi repellere, & illatam injuriam, aut datum damnum talionis lege compensare. Illud nunc demonstrandum est curatius, homines omnes nasci vivereque cum jure auxilii ab iis poscendi, quibuscum versantur, aut quibus inciderunt omnibus; tum autem cum juribus suis

uti

(a) Kolbi descriptio Prom. bonæ spei.

uti aut nesciunt, aut nequeunt, quo sint ac bene sint. Hoc jus, quod vi cogente careat, *imperfectum*, & humanitatis dici potest. Id demonstro primum ex imbecillitate hominum naturali. Quid ita procreamur, ut quo simus vitales juribus nostris uti nec scimus, nec possumus, si nolit mundi lex eos, quibus communem habemus naturam, nobis opitulari? Mutuam ergo societatem ac mutuam auxilium hoc naturæ ordine, hocce suo facto imperat Deus. Eadem vero ratio est cum adulti aliqua naturæ causa præpedimur, qua fit, ut viribus juribusque nostris uti nequeamus.

§. XXXIII. Ostendo secundo ex natura amicitiae sentiente atque appetente, nisi quid eam aut præveniat, aut absterreat ex parte socii. Has causas amove, nihil antiquius in omnibus adversus omnes progignitur, aliturque constanter, quam mutua amoris flammula. Ad societatem igitur gignimur, cujus distractionem sola efficit aut præventio ne alter noceat: quia vel alias nocuit, vel id agit, quod ad nocendum spectat: aut parata nocendi instrumenta: aut habitus aspectusque ad lædendum intentus: At societas nisi in habitu mutui auxilii non consistit.

§. XXXIV. Tertio ostendo ex commiseratione adversus eos, quos mala premunt, qua omnes quantumvis sævi corripimur, nisi illæ dissociationis causæ nos avertant, quæ supra commemoravimus. Quam commiserationem qui *imbecillitatem animi* vocant, quo vident, credunt se aliquid præclari dicere, cum tamen non dicunt, nisi quod caput est hujus rei: omnes enim imbecilli nascimur: nec ita nascimur, nisi quia in mutuam societatem destinamur. Eum ego hominem ab hujusmodi imbecillitate immunem esse oportere puto, qui sibi satis ipse sit ad omnia, ut sit & bene sit; quos Natura non procreat; quia non singulos homines in singulis planetis, velut segreges Cyclopes parere voluit, sed genus integrum sibi junctos copulatosque simili natura, eademque indigentia.

§. XXXV. Cum jure igitur poscendi auxilii nascimur; adeoque est naturæ quædam civitas, ad quam omnes, qui ubique gentium procreantur, homines per-

tinent. A natura abhorrent ii Philosophi; qui ab hac civitate abhorrent. Nemo hominum homini ulli natura inimicus est, sed fit: nec indifferens, sed naturæ similitudine amicus sociusque. Eo tota universi harmonia spectat. Gentium inimicitia, atque hostilitates, quia *αναρμοστοι* non congruentes cum universi harmonia, & cum hominum natura pugnant. Quas si foveat incendatque Politicus, mea non refert requirere: Philosophi vero quidam, idest universi cives verique dispectores & patroni, qui possint, mirandum esset, nisi propalam jam esset, e majorum scriniis philosophari plerosque omnes potius, quam e mundi regula.

§. XXXVI. Hoc jus mutui auxilii majus fortiusque efficimus cum in civitates coalescimus. Nam sparsæ olim familiæ non alia ratione in civitates coierunt, ac civili se subjecerunt imperio, nisi ut mutuo sibi essent præsidio; pactis igitur, aut facto suo reciproce in sese id juris transfulerunt. At jura translata tam sunt propria, quam sunt ingenita. Quicumque igitur violant, & communem naturam violant, & civitatis pacta, ac præcipuum cœtuum vinculum.

§. XXXVII. Illud binis verbis expediendum nunc est, quibus conditionibus jus hoc mutui auxilii, aut natura tribuatur, aut in civitate transferatur pactis conventis. Jura ingenita sunt paria, parisque in omnibus roboris: tum æque cuique cæsa; æque cuique a natura commendata. Ergo jus hoc mutui auxilii cessat in pari aut imbecillitate, aut indigentia, aut periculo.

§. XXXVIII. Jam vero jus mutui auxilii habet is qui nescit, aut nequit suis uti viribus; non ergo is, qui non vult. Ergo in voluntaria alterius imbecillitate, indigentia, miseria, periculo, nullum est. Quid igitur faciunt ii, qui erronei, *ευτροφοι*, bene nutritos, pascunt lactantque? Nempe ut civitates aut in vetus agrestium gentium chaos vertant, aut in deserta (a). Ajunt Indos Baniolos amore in animantia (sunt enim Pythagorici ferme omnes) quotannis basilicas cœnas parare muscis: alios suo corpore ac sanguine per integras

(a) Vide gravem Tiberii orationem apud Tac. An. II. 38.

gras noctes pulices cimicesque saginare (a). O sanctas gentes, humanas in feras, feroces immanesque in homines (b)!

§. XXXIX. Jus auxilii nullius jura lædere debet: sunt enim inter sese pugnancia humanus & inhumanus: humanus & injustus; nec natura pugnancia aut scit, aut præcipit. Tertium est igitur corollarium, ut si nequeam esse tecum humanus, nisi sim alteri inhumanus, aut injustus, jus mutui auxilii cesset. Genus est igitur inhumanitatis, atque injustitiæ, quod tamen non raro fit, ut quis suos, vel patriam prætermittat, quo alienos, aut externos ditet: ut hos spoliet, quo vestiatur alios. Sed nihil est in humana vita frequentius, quam hujuscemodi homines offendere, qui secum ipsi & cum ratione pugnant.

§. XL. Præterea jus mutui auxilii nascitur ex vera alterius miseria, non ex imaginaria: natura enim in te laborare debet, ut tibi opituler, non imaginatio. Quartum est ergo corollarium, ut hoc jus cesset, si non naturæ pascas auxilium, sed luxui: nam, luxus non ex natura nascitur, sed ex phantasia. Clamas opem, quo bysso & purpura induaris: quo turbam servorum & ancillarum pascas: quo in cœnis Lucullanis cum helluonibus crepes: quo exercitum equorum nutrias: quo lupanaria locupletes. Respondeo ad naturam vivere didicisses. Adhuc tibi binæ, ut ceteris, manus: adhuc muscoli nervique. Indura, sodes (c). Hæc natu-

M 2

ræ

(a) *Universal History lib. XIII.*

(b) *Vide locum egregium Hermachi apud Porphyrium περί αποχρηστικῶν lib. I.*

(c) *Catullus lepidissime ad Furium*

Pulchre concoquitis, nihil timetis,
Non incendia, non graveis ruinas,
Non facta impia, non dolos veneni,
Non casus alios periculorum.

Atque corpora sicciora cornu,
Aut si quid magis aridum est, habetis,
Sole, & frigore, & esuritione.

Quare non tibi sit bene ac beate?

Hæc tu commoda tam beata, Furi,
Noli spernere, nec putare parvi.

ræ lex est, ut quisque sibi, quantum scit & potest, salvo alieno jure, prospiciat. Quo igitur amandabimus eos misericordes Casuistas, qui furari præcipiunt, ne de statu nostro decidamus? Vix ego crediderim quemquam esse mortaliū, qui alteri egregium consilium suppeditet, quo, cum opus est, in se uti nolit.

§. XLI. Jura sua quisque in alium transferre potest, modo ne cuiquam noceat; potest quis igitur acquisita bona, jura nata ex primævis, ac ipsa primitiva, pro amicitia effundere omnia, tantum si caveat, ne quid detrimenti, aut domus, aut Respublica, aut quivis alius accipiat: nam est hæc universi lex, ut ita juri- bus nostris utamur, ut nemo lædatur. Hunc ego hominem omnium egregium atque humanissimum habebō. Ceterum nolo quisquam opinetur, ullo nos jure ad tantum facinus obligari: virtutis est, ac liberæ, non obligationis. Quid attinet præcepta duplicare præquam lex poscit? Nam hujusmodi homines professione, non opera, Stoicos, odit sancta Sophrosyne. Homo juris observantissimus ambitu telluris contineri opus habet. Si quis supervolitet, beatus is quidem.

§. XLII. Paucis nunc qua quis ratione jure suo excidere possit, seu culpa, seu delicto, seu crimine demonstremus. Lex Naturæ sua cuique jura adserit; ergo lædere vetat. Si quis igitur læsit, jus læsum, si possibile est, aut si illud nequit, quod interest, restituat. Æqua ergo juris sui parte privandus est. Igitur jure in eam partem excidit, ut, etiamsi nolit, auferri ab eo sine injuria possit.

§. XLIII. Sed distinguendum est inter læsionem, quæ forte fortuna accidit, & quæ culpa: tum inter hanc, & crimina. Si puro casu accadat, tametsi ego casus sim instrumentum, modo culpa absit, non a me est damnum, sed a natura, & legibus cosmologicis: *αναγκαιον* est, *fatale*: *αναγκαιος* autem omnes natura subiecti sumus, velimus, nolumus. Ea lex mundi est (a). Ab ea igitur compensatio exposcenda est; sal-

VO

(a) *Quod eleganter graviterque scribit Euripides Med. v. 1018.*

Κουρας φερει χλη θυγον οντα συμφορας.

vo nisi jure mutui auxilii tenear. Ita si ventus me dejecit, casuque tibi brachium fregi, ventus læsit: nihil stricto jure debeo. Sed si jus humanitatis locum habet, aut quatenus habet, hoc obligabor: quantum igitur scio & possum, non quantum jus tuum poscit.

§. XLIV. Si culpa interfuit, etsi desit crimen, idest dolus malus ac lædendi voluntas, integrum debeo, jureque stricto: nam culpæ cavere debeo & possum. Nisi cavi, lex læso vindex adsistit. Non patrocinetur læso lex mundi, jam jura negligit; quod pugnat cum legis fine, qui nequit esse alius, nisi custodia jurium. At nihil est nec in natura, nec in Deo pugnantis.

§. XLV. Si crimen, idest dolus malus, ac nocendi voluntas, interfuit, & læsum, ablatumve jus præstabit integrum (ex §. sup.); & doli mali pœnam. Nam lex, quæ vetat nocere, non in factum tantum vindicat, sed cavet etiam in futurum. Illud abscissione æqualis juris obtinetur: hoc remotione pravæ voluntatis. Cum illa nocendi voluntas ei, qui nocet, cara sit & voluptati; reddenda est illi ingrata, atque odiosa. Id sit pœna. In injuriis igitur alteri illatis utrumque consequimur duplicata pœna talionis; aut ea, quæ ad talionem in duplum proxime accedit. Brachium alteri sponte obruncasti: quod interest reficies, & brachio minueris. Si nihil sit, quo æques quod interest, ambobus brachiis mutilaberis.

§. XLVI. Sed si non personæ tantum jus tuo crimine læsisti, verum vinculum quoque vel familiæ, vel civitatis resecueris, velut si patrem impie mulcaveris, si regem per sacrilegium violaveris, vita lues: dignus non es qui vita fruaris, cum fontes vitæ inique turbare ausus sis. Sacer es (a).

§. XLVII. Eadem naturæ lex, quæ jura cuique præstat, adseritque, jurium præstat custodiam, seu jus

M 3

de-

Leviter ferre, quisquis mortalis natus est, infortunia oportet, naturæ dictamen est, non hominum.

(a) Veteres Mosaice, Græcæ, Latineque leges severissimas in impiis liberos pœnas decreverunt. Hac severitate & familiæ steterunt olim & sancta educatio, & rigidi ac impolluti civitatum mores. Postquam neglectæ, nihil amplius sancti, nihil reverendi.

defensionis : siquidem pugnans est tribuere jura , idest privati usus proprietates , auferre jus custodiæ , & tuitionis . Nam quod defendere velut privatum nequimus , commune est , non proprium . Igitur si quis mihi per injuriam jus aliquod eripere gestit , eodem respectu mei decidit , aut in tantundem est reus . Quare si nulla sit alia ratio juris mei tuendi , nisi ut tibi faciam , quod tu mihi facere contendis , jus talionis est , & a naturæ lege . Ergo inter jura nostra primæva & hoc accensendum est , licere vim vi repellere : licere sublata per vim jura recuperare : modo cum his juribus jungatur clausula , *cum nulla alia via suppetit jus nostrum aut tuendi , aut vindicandi* . Sed ob eandem rationem tam tuendo , quam repetendo non licet æqualitatem excedere , ne ipsi eodem , quod propulsamus , crimine teneamur .

§. XLVIII. Sed est duplex vis , qua alteri resistitur , una naturalis & privata , altera publica & civilis . Vi privata uti licet , aut si eam nulli cessimus , aut iis , in casibus , in quibus cedere noluimus . Igitur familiæ extra imperium civile viventes , quæ integra adhuc retinent jura Naturæ : tum civitates ac regna , vi propria jura tuentur , aut læsa vindicant . Id est jus belli . In civitate vero , cum non adest tempus adeundi magistratum , veluti in repentinis aggressionibus , integro jure tuendi uti possumus . Ceterum si prævenire magistratum liceat , aut si jura jam læsa sint , jus vindictæ ad imperantem pertinet . Quod qui invadit , aut attrectat , tum reus est , sæpeque magis , quam is , a quo aut lædi timet , aut læsus est : sunt enim sacra imperantium jura ; quia sacra ac divina res est civitas (a) .

§. XLIX. Jam de jure nostro ob amicitiam generis humani concedere aliquid possumus , & interdum debemus (32.) ; idque egregiæ est virtutis ; lex ergo patientiæ , ut pati potius injurias velimus , quam vindicare ,

(a) Ob id igitur existimo , veteres humana divinis miscentes , primordia urbium augustiora fecisse . Nam veteres urbes omnes ferme Deorum opus fuisse traditum est . Enimvero quid divinius , quam in mutuum auxilium coire , ac vetera impiaque relinquere nemora ?

care, omnium divinissima est: quippe cum divina res sit amicitia. Quod si ea plures ac communiter abutantur, atque ex paucorum patientia in publicam perniciem armantur; lex naturæ vindicanda est, quæ omnium incolumitatem, & felicitatem spectat. Itaque Principes, Magistratus, Duces armorum, vigiles, qui duas sustinent personas, privatam & publicam, nequeunt lege patientiæ improborum vim acuere, quin rei sint desertæ civitatis. Quibus addendum est, interdum jus caritatis poscere, ne patiamur, quo nimirum pravi ad virgulam redeant. Amor sæpe est fuisse sævum.

§. L. Ex quibus intelligitur non posse in Natura esse ullam jurium repugnantiam; nequit enim nec Deus jura adversantia juribus tribuere, nec natura moralis excipere. Cum ergo pugnantia videntur, non Naturæ pugna est, sed affectuum. Nam sæpe in jura erigimus cupiditates: sæpe cum jure decidimus, quod decidisse displicet, retinere adhuc nobis persuademus. Potentes interdum viri sibi jura ex phantasia creant, quibus impune paganos, aut imbecillos opprimere se posse arbitrantur. Sunt non Naturæ jura, sed cupiditatis: nam injurias ulli mortalium inferre tam grandibus vetat Natura, quam parvis. Quin grandes parvosque divina lex ignorat, nisi ex virtutum merito. Jam vero injuriam intulimus: lege talionis tenemur. Eam interim omni modo fraudare studemus. Philautia nobis suadet, nondum jure nostro excidisse: pugnam jurium ac officiorum imaginamus. Ita a naturæ æqualitate recedimus. Eiusdem generis sunt reliquæ decantatæ jurium pugnæ, aut imaginariæ, aut fraudulentæ: aut si sunt ullæ, in obscuro ambiguoque sunt factæ.

§. LI. Cum nequeat esse jurium pugna (ex §. sup.); ne officiorum quidem ulla esse potest, si ex lege judicare velimus, non ex cupiditate, pravisque affectibus & habitibus: nam officia & virtutes, quæ officia imperant, si quidem officia sunt & virtutes, ex virgula sunt rectitudinis, ex lege nempe universi: nec enim officium est ullum, nec virtus, nisi imaginaria, quæ extra illam virgulam vagatur. Qui igitur pugnam of-

ficiorum inducere , qua sibi cupiditas consuleret , generis humani palpatores , morumque depravatores , sentinam pravorum judiciorum excavarunt : altero cataclysmo homines oppressere , tanto veteri illo peiori , quanto non ad legem vindicandam , sed antiquandam excogitato . Occidi , inquit aliquis : rogatus pro tribunali fatebor crimen ? Nega , ajunt illi : nemo se infamare debet : nemo suis ipse manibus se cruci suffigere : hoc jus est cujusque . O scelus ! Hæc dicenda erant antequam occideres : cum res erat integra . Occidisti ? Jure in vitam decidisti . Non tu nunc , cum fateris , infamas , sed cum crimen patraſti : non nunc te cruci affigis ; sed cum hominem homo necasti . Vide quantum a lege distes , Casuista . Illa hunc & non rogatum crimen fateri jubet : Tu ne rogatum quidem . Quid si tibi mutuum dedi ? Negabis scilicet debere nisi rogem ? O capita *φρονδα* !

§. LII. Instat , inquit alter , a tergo hostis : & quadrigis vehor . Elabi possim , si lora laxem . Sed turba occupat viam . Nullum est effugium . Vadam per dorsa hominum , an frænum compescam , sinamque me trucidari ? Vade , inquit palpo : prima lex est , sibi consulere . Oh latro ! Nam quid ego aliud responsi expectassem a latrone ? Quo facto ea turba jure suo in vitam exciderit , monstra , ac vade . Excidi , inquis , jure ego meo ? Non : sed adversus illos tuere , qui invadunt . Si non potes , quid tibi cum alieno ? Est tamen aliquid adhuc . Jus auxilii implora : debet turba . Negat , inquis . Cogere nequis : jus auxilii non cogitur (ex §. superiorib.) . Infantes sunt inquis . Siste latro . Non vides te cum tuis hostibus ac quadrigis adversus innocentes militare ?

§. LIII. Furatus sum , inquit iste : si restituo , esuriam . Tu vero , inquam , & sitias , quo ereptum alteri jus restituas . Pereo , inquis . Retine igitur quoadne pereas : in id tibi jus præstat necessitas . Ceterum cave ne non ex natura , sed ex libidine ea sit necessitas : nihil enim juris cuiquam libido tribuere potest .

§. LIV. Credidit mihi amicus secretum amicitiae religione . Amicum prodo ac secreti religionem , si effe-

ro : patiam si taceo . Temere fecisti : de jure enim alieno promissisti , nec poteras : patriæ primum obligatus eras , quam amico . Nullum igitur amico quasi-
tum esse potest jus ; nulla ergo pugna jurium , nulla officiorum . Pater est , inquis , Utrique igitur deserte . Conspirator est . Remove de proposito : infecta adhuc re , confessione animum eluat . Surdus est , inquis . Iniquus igitur : non patriæ solum , sed tui proditor , & homicida . Omni humano divinoque jure exutus est : tu jure & tuendi tui & patriæ defendendæ obligatione teneris .

§. LV. Ecce hic perstrepat . Magnus hostis urbem obsidione cingit . Exposcor ad cruciatus : sed insons sum . Si me dedit urbs , imminente periculo liberatur . Dedet innocentem ? Immo ipsum te dedas oportet : hoc pacto in civitatem coaluisti , ut non tibi civitas , sed tu civitati servires . Excidisti ergo jure in vitam , cum salus publica tui causa periclitatur . Nisi te dedas , reus es : civitas igitur te dedet , reum improbique civem , non insonem . Quid si excubiæ dicant , perimus , si locum velimus tueri : deferamus ergo ? Iniqui sunt : vitæ cessere , cum sacramento rogati sunt .

§. LVI. Illud vero non ferendum , esse qui & contentionem jurium inter Deum ac hominem prætendant , & in pari causa , aut etiam (quod iniquius & intolerabilius) potiori ex parte Legislatoris , jus nostrum prævalere oportere doceant . O Legum perversores ! O profligatores justitiæ & honestatis ! In dubio , ajunt , libertas prævalet ; in contentione probabilis , ac probabilioris , si illud mihi favet , potius est . Tu igitur in contentione cum Deo , æquis partibus , illo posthabito , totum usurpas ! Cum Legislatore naturæ transigere paras ? Jus meum , inquis . Quod jus prædicas in causa cum Auctore mundi ? Vel vita excidisti , si ille comparet . Sed hæc flagitia inde nata , quod *sensum & cupiditatem* regulam fecere vitæ , cum illa cupiditati frænandæ data sit . Nostri Casuistæ , quo vultu hoc Evāgelicum factum spectabunt ? Rogat Legisperitus (a) *Quid faciam ut Regnum Dei possideam ?*

(a) Luc. cap. x.

deam ? Christus , in lege quid scriptum est ? At ille legem recitat . Qua prolata , bene , inquit : *hoc fac , & vives* . Non ait , quid tibi suadet cupiditas , quid utilitas , quid naturæ vitiositas , quid consuetudo . In lege quid scriptum est ? Lex norma sit necesse est , non sensus , non utilitas , non cupiditas . Ecce malorum scatebra (a) .

§. LVII. Sed piget per singula ire . Audentissime dicam : nulla esse potest iurium pugna : nulla est officiorum : sed factorum videri potest aliqua ; in incerto sæpe sunt facta . Hæc igitur circumspectienda : hæc definienda , prius quam de jure contendas . Sunt hæc , inquis , dura atque ardua . Cupiditati haud nego : sed ita scripta hominibus lex est . Chirurgia lex est , non cœna . Quancquam hæc quæ dura videntur , mollissima sunt , si virtutem sancte atque ex animo colere didicerimus . Facit huc quod ait alia in re Ovidius ,

*Dura aliquis præcepta vocet mea : dura fatemur
Esse : sed ut valeas multa dolenda feres .*

§. LVIII. Postremo illud observemus , esse jura alia aliis potiora . Cum majora ac potiora vigent , nullum est minorum jus : ita sunt , velut si non sint . Non igitur est pugna , sed minorum iurium cessatio : pugna enim est inter duo jura æque vigentia , & opposita ; quæ , ut diximus , nec in Deo esse potest , nec in ea lege , quæ est a Deo . Quæ , inquis , majora ac prima ? Jura in vitam primum servandam , tum beatitudinem nobis attributa sunt . Vita ergo primum jus est : nullum est ei æquale . Sequuntur altero gradu membra , insita vitæ instrumenta : tertio bona adscititia , quæ item instrumenta sunt vitæ : quarto ordines pacationi vitæ servientes &c. Philosophemur ex natura ac lege , nihilque horum esse poterit perplexum . Cum

dia-

(a) *Jugurtha* postquam Roma egressus est , fertur sæpe eo tacitus respectans , postremo dixisse , *URBEM VENALEM ET MATURE PERITURAM , SI EMPTOREM INVENERIT . Sallust. Jugurth. pag. 161. Glasgwa 1751.*

diarios ejuscemodi, qui ad manus sunt, libellos, aut immensa loquacium volumina totum eruditionis nostræ fundum fecerimus, omnia erunt & obscura, & implexa. Dicamus magnanime

. abite
Illuc, unde malum pedem tulistis.
Sæcli incommoda.

Sed corripiamus vela, ac leges naturæ perscribamus præcipuas, atque e naturæ penore.

I. Jura cujusque seu illa ingenita, ac primæva, seu inde nullius injuria enata, seu procul omni dolo malo translata, vitæ cujusque fulcra sunt: sarta tecta servantur: nulla cuiquam in ea tactio esto, nisi quantum is voluerit siveritque, qui dominus est.

II. Qui aliorum jura ulla in parte læserit minueritque, aut inutilia reddiderit: aut clepserit, vel rapuerit: aut circumventionem, ullove dolo ad se traxerit, in tantundem talio esto: eo jure excidat, quod alteri aut abstulit, aut inutile reddidit. Ea lex est mundi: ea Dei præpotentis atque rerum naturæ vindicis.

III. Sed postquam corrupta jura reficit; ne se elutum jam scelere putet, quousque legi mundi gubernatrici satis plene fecerit. Quisquæ in naturæ civitate reus sua sponte factus est; naturæ fisco deditus est ad noxam. Divinas ergo luat pœnas oportet.

IV. Jura ita quisque partitor, ut sciat alia esse mundi Imperantis ac Domini: alia sui: alia aliorum: alia personarum, aut familiarum privata, alia publica Urbium. Singulis sua præstato integra: nullius lædito.

V. Quidquid Deus est, quidquid efficit; jus Dei est. Id noscito sancteque colito. Mens pura est Deus, omniscia, omnipotens, optima, ac solius boni caussa: beata, justa, sancta; rerum effectrix omnium servatrixque perenniter ac moderatrix: nihil non ejus fit numine: omnibus est enim intima, atque ubique præsens: nihil dedit: nihil mutat. Idem perpetuo vult, idem non vult: quæ vero vult, justa, honesta, sancta, bona, sint omnia necesse est: nihil nec iracunde, nec avaræ, nec impruden-

denter negligenterque efficere potest : æque omnia atque immutabili lege & ratione gubernat . Hæc igitur jura Dei habeto : tremenda sunt : impium te esse scito , inferisque sacrum , si moveris .

VI. Cum ad tantam majestatem accedis , tum te sancte adire existima , cum puro integroque animo & moribus accesseris : purus autem est animus , & impollutus , cum legi perpetuo congruit : cum nec ad dexteram , nec ad sinistram deflectit . Nihil tu igitur tecum defer nec superbi , nec avari , nec injusti , nec inhumani : nihil crapulæ : nihil luxus : sed ne quidquam quidem ambitiosi vanique : nihil popularis gloriolæ : nihil ficti : tu te ipse solus scditatibus animalibus remotis , accedito . Animus animum adito : mens mentem : rectus rectitudinis æternum exemplar . Solo virtutum choro comitaberis . Si quid horum præterieris , scito te eliminari tanquam profanum .

VII. Jura tu tua caste servato : in vitam membraque ac valetudinem tuam nihil hostile aggreditor : id abnorme a mundi regula . Valeas beneque sis animo & mente , stude : id tibi illa lex suprema præcipit . Externis bonis ita utare , ut bene animo corporeque esse possis . Ne utrumque nimis copia ac luxu fœda aut opprime . Si contra feceris , parricidam te esse scito , atque inferis devotum . Ita excolito animum corpusque , ut tibi aliisque præsto esse possis , cum natura poscit : id & jus valetudinis exigit ; & fucos inertesque homines , ac nihili , proscribit telluris civitas (a) .

VIII. Si jure ullo , sive tua sponte , teque sciente , te abdicasti , sive volens in alium transtulisti , sive tuo crimine , flagitiove , aut ullo pravo facto excidisti , scito nec reprehendendi tibi jus esse amplius , nec tutandi , cumque iis duellandi , qui ut in fide factove consistas vi contendunt .

IX. At si dolo malo , vique nulla , nec legitimo imperio circumductus sis , jureque tuo spoliatus , adversus astutos , audacesque , aut latrones , raptoreque , vique præ-

po-

(a) Draco homines soli abdomini pigritiæque servientes necari iussit : Solon multari . Vide Plutarchum in Solone .

potentes , aeterna auctoritas esto .

X. Jura aliorum primum stricta , tum quod auxilii mutui diximus , intacta habeto : tam tibi jus in aliena est , quam in tua aliis . Hanc vitæ beatæ legem ne transadigito : bellum est , si minimum migraveris : bello vero quid miserius ? nihil proprium , nihil juris , nihil sancti in bello cuiquam : venalia omnia , aut incerta .

XI. Sunt jura civitatum ordinumque : sunt jura imperantium . Ea tam cujusque sunt propria , quam tui tua . Ne tibi igitur sit illuc tactio . Jurium sunt cujusque moderatores , custodes , vindices , imperantes ; itaque Deo cari ; legis enim universi sunt vindices (a) ; divinam ergo gerunt administrationem : sacri sunt . Quisquis sub imperio es , pareto . Ea lex est universi .

XII. Cui civitas civitatisque ordines oneri sunt , renunciet se abscedere velle : ab illa expetito , ut pacti fide liberetur . Abeat si indulserit . Indulgebit autem profecto si sapiens est : nequit enim esse bonus civis , quem civitas praegravat : improbi autem civis absunt . Quod si quis est tam barbarus , impolitusque , ut ab omni civitate abhorreat , omnes vexet , eum in Samojedas ablegato . Si ita lubido fert , brutescat ; liceat insanire (b) .

XIII. Hæc naturæ dogmata nemo neque papyro , neque membranis , sed ne creis quidem tabulis , exarato , rebus , quæ situ , pulvere , rubigine corrumpuntur , neminemque tantus concitant : animo insculpat , atque *εγκατεστοιχωμενα* , velut hærentia elementa , habeat . Æterna sunt (c) . Virtute occalleat necesse est quisquis beatus esse cupit (d) .

(a) Sunt & populorum parentes , eoque Deum , ut ajunt poætæ , cura . Pindarus Ode v. Pyth.

Διος τοι νοος μέγας κυβερνᾷ

Δαίμον' ἀνδρῶν φίλων .

Jovis mens magna gubernat

Sortem virorum , qui tibi sunt cari .

(b) Hoc in auctorem operis Le Code de la Nature .

(c) Retulit Plutarchus νομῶς γεγραμμένους leges scriptas hand placuisse Lycurgo , quod sua præcepta moribus & disciplina *εγκατεστοιχωμενα* , tanquam elementa quædam in mente defixa , ac in succum versa , utiliora existimaverit futura . O præclare excogitatum , factumque !

(d) Magna olim inter nostrates doctis fuit , estque hodie quaestio ,

stio, equam virtutem cognoverint, coluerintque Ethnici? Placet sic ea de re procul omni amore atque odio paucis differere.

Veram virtutem sic definit S. Aurelius Augustinus de Civit. Dei lib. v. cap. xii. num. 4. Neque enim, inquit, est vera virtus, nisi quæ ad eum finem tendit, ubi est bonum hominis, quo melius non est: ad Deum nempe verum, cujus consortio plene beati esse possumus.

Summum aliquem Deum omnes gentes agnoverunt, agnoscuntque hodie; quod qui negat, in veterum juxta ac recentiorum nationum historia hospes plane est & peregrinus. Præclare Huetius lib. II. Alnet. cap. i. initio.

Deum esse, supremam videlicet rerum omnium causam, principium atque finem, tam aperte, tamque constanter credidit ac prædicavit omnis retro vetustas, tantoque consensu in eandem conspirant sententiam universæ gentes, ut naturæ vox esse videatur.

Deum esse principium, medium, finem omnium docuere Pythagorei, ut testatur præter alios Servius in Virg. Ecloga viii. v. 75. ad illud, numero Deus impare gaudet: juxta Pythagoreos, inquit, qui ternarium numerum perfectum summo Deo assignant, a quo INITIUM, & MEDIUM, & FINIS est. Idipsum tradit Jamblicus: eadem Proclus, ceterique Platonici, multisque disferit sæpe Porphyrius. Agnoscit hoc idem Huetius & loco superius laudato, & cap. 2. ejusdem libri §. 19.

Felicitatem nostram in unione cum summo Deo olim postquam hinc discesserimus positam esse, eamque esse virtutis præmium, disferit ex instituto Plato in Phædone: docuere Pythagorei omnes, in primis Porphyrius περὶ ἀποχῆς ἐμψυχῶν: docuere Poetæ usque ab Homero, qui Hecaras in conviviiis apud Jovem oblectari, ac virtutis merito, canunt. Tradidit idem Aristoteles in Metaphysicis. Adipsum integro capite exponit & copiose Huetius eodem in opere ac loco cap. xxiv. Addamus hic Theocriti insignem versum ex Id. 17.

Εκ Διὸς ἀρχώμεσθαι, καὶ ἐν Διὶ ἀνῆγете Μῦσαι.

Ab Jove incipiamus, & in Jovem definite Musæ.

Nullum opus Græcos Latinosque veteres cæpisse, nisi a Deo, pluribus veterum ac consentientibus testimoniis ostendit Everardus Feithius Antiquitatum Homericarum lib. i. cap. vii. & Feifferus Antiq. Græc. lib. I. cap. 2. quos vide. Operi se accingentes Θεός, Θεός, Deus, Deus! exclamare solebant. Pythagoræ lex est in Carm. Aur. v. 48.

Ερχεο ἐπ' ἐργον θεοῖσιν ἐπευχόμενος, ad opus accede, cum Deos precatus fueris. Arabes omnes nihil nec magni, nec parvi momenti adgrediuntur, nisi precati, Bish-Millah, in nomine Dei: cum vero se expediverint, Almandi'llah, clamant, laus Deo. Universal History vol. xiv. cap. i. pag. 67. edit. in 8.

Hæc facta sunt, eaque delibavimus ex infinitis. Dicet aliquis, veram virtutem coluere igitur Ethnici? Hæc altera quæstio est.

Facta sic se habent, ut diximus; idque doctissimis antiquitatum restantibus. Sed quominus virtutem veram colerent duo in primis fecere: nam & veri Dei cultui (cui ego haud scio quo in loco templum posuerint unquam) infinitam Deorum Dearumque turban & quasi lupanar adsociaverunt; & cum virtute ita pessimos affectus vanitatis, gloriæ, superbiæ, terrestriis utilitatis junxere, ut illum finem, ad quem vera virtus contendat necesse est, perdidisse ex oculis videantur. Iniqui sunt in veteres & ineruditi qui priora illa facta, dictaque pernegant: in christianos vero late injurii, qui postrema hæc inficiantur. Quæ quum sint, rite recteque dicetur, primos, qui veram virtutem homines docuerint, atque ab omni corporis, corporearumque rerum impuritate abjectam, solisque celestibus intentam, fuisse christianos. Utinam servavissimus integram!

Quo melius autem id demonstrem, quod contendo, pauca ex Romanis Græcisque exempla promam, quos constat plurimum virtute sese jactare solitos; ostendamque, quam falsa virtutis specie decepti fuerint vel ipsi qui maxime celebrantur. Metellum fama æquabili & inviolata fuisse scribit Sallustius in Jugurtha: magnum & sapientem virum fuisse comperior, tanta temperantia inter ambitionem sævitiamque temperatum. Neque tamen minus hic vir & Jugurtham proditione potius sodalium, quam aperto bello capтивum habere studuit; & Mario adeo propter adeptum consulatum insensus fuit, ut coram aspicere non sustinuerit. Sed Jugurtham, rigidioribus virtutis cultoribus Afris, quam Romanis, in potestate habere non potuit. Id tamen perfecit Marius Sullæ artibus, postquam videlicet Bocchum ad finem fœderatumque, metu, promissis, corruptisque per scelus amicis in partem traxisset. Marium interea virum appellat omni virtutum choro exornatum; quippe cui inerant industria, PROBITAS, militiæ magna scientia, animus belli ingens: domi modicus libidini & divitiarum victor: tantummodo gloriæ avidus, Egregiam vero gloriam, hostem, quem justo bello vincere nequeas, proditione amicorum opprimere. Sed quæ illa probitas? Ad Romanorum nempe expressa exemplum. Tacitus Ann. III. 26. Vetustissimi mortalium, nulla adhuc mala libidine, sine probro, scelere, eoque sine poena aut coercitionibus agebant: neque præmiis opus erat, cum honesta suo pte ingenio peterentur: & ubi nihil contra morem cuperent, nihil per metum vetabantur. Neque in his Metellus, neque Marius. At postquam exui æqualitas, & pro modestia ac pudore, ambitio & vis incedebat, provenere dominationes. . . . Nam sequuntur leges, etsi aliquando in maleficos ex dicto, sæpius tamen dissensione ordinum, & apiscendi illicitos honores, aut pellendi claros viros, ALIAQUE OB PRAVA, PER VIM LATÆ SUNT. Hac forma cusi Metellus & Marius, ceterique illustres Romani: in ea Civitate, in qua avaritia, & ambitio in omnem libidinem, probra, flagitia, incendebant.

Augustum magnum fuisse virtutum cultorem, earumque me-
rito

vito inter Deos relatum, constat; quo tamen homine truculentior-
rem habui unquam neminem, nec magis fœdum vanumque. Equi-
ti Romano, quem quod in adversis partibus militasset morti tra-
diderat, precanti, ut honos sepultura concederetur, paratum, in-
quit, sepulcrum, vultures. Idem patrem cum filio configere coe-
git, atque interficere se mutuis impiisque vulneribus. Suetonius
in Augusto.

Germanicum delicias fuisse Romanorum prædicant: neminem
eo clementiorem scribit Tacitus. At quo sensu aut ore depugnan-
tibus Romanis adversus Arminium tam clementis Principis vocem
accipiemus? Insisterent cædibus: nihil opus captivis: solam in-
ternicionem gentis finem bello fore. Jamque sero diei subducit:
ex acie legionem faciendis castris: ceteræ ad noctem cruore ho-
stium satiatæ sunt. Tacit. II. Ann. 21. Hæc crudelia. Idem cum
suspensione veneni a Pifone & Plancina præhiti moreretur, adfisten-
tes amicos hunc in modum adloquutus fertur. Si Fato concede-
rem, justus mihi dolor etiam adversus Deos esset, quod me pa-
rentibus, liberis, patriæ, intra juventam, præmaturo exitu, ra-
perent. Nunc scelere Pifonis & Plancinæ interceptus, ultimas
preces pectoribus vestris relinquo: referatis patri ac fratri, qui-
bus acerbitatibus dilaceratus, quibus insidiis circumventus miser-
rimam vitam pessima morte finierim. . . . Flebunt Germanicum
etiam ignoti: vindicabitis vos, si me potius, quam fortunam meam
fovebatis. Quæ nec pia sunt, nec magnanima. Sed ex illo tamen
Romanorum modulo; penes quos agere & pati fortia, nihil fuit
aliud vel ab urbe condita, nisi agere & pati iniqua, scelestæ,
flagitiosa, impia.

Vespasianus civilis fuit & clemens, ait Suetonius, ut neque
cæde cujusquam unquam lætatus, justis suppliciis illacrymaverit
etiam & ingemuerit. At magnus fuit lucri belluo & imperii de-
populator: non enim contentus quæssa sub Galba vectigalia revo-
casse, nova & gravia addidisse, auxisse tributa provinciis, non-
nullis & duplicasse; negotiationes quoque vel privato pudendas
exercuit. Creditur quoque procuratorum rapacissimum
quemque ad ampliora officia ex industria solitus promovere, quo
locupletiores mox condemnaret; quibus quidem vulgo PRO SPON-
GIIS dicebatur uti. Suetonius in Vespasiano. Hunc principem, pa-
trique patrem, & non potius infestum toti imperio latronem di-
xeris? Atque talis est tota illa jactata Romanis probitas, πρὸς τε
nempe.

Jam vero Titus Vespasiani filius generis humani amor sat-
uratur. Ausonius.

Expers civilis sanguinis, orbis amor
nempe Romanus, & Romæ, & eo tempore, quo, ut ait Tac-
itus, corrumpere, & corrumpi, sæculum vocabatur. Audiamus
Suetonium. Præfecturam egit aliquanto incivilius & violentius:
siquidem suspectissimum quemque sibi, submissis, qui per theatra
& castra quasi consensu ad poenam deposcerent, haud cunctanter
op-

oppressit. Est hæc videlicet Titi clementia! Quid vero illa? Præter sævitiam suspecta in eo etiam luxuria erat, quod ad mediam noctem comestationes cum profusissimo quoque familiarium extenderet. Nec minus libido propter exoletorum & spadonum greges suspecta rapacitas, quod constabat in cognitionibus patris nundinari præmiarique solitum. O generis humani delicias! Depravati autem: cui quid aliud præter sæditates placeret? Sed his Imperator bellum indixit. Metu nempe, & quia utilius, non ulla probitatis oblectatione, nec vero generis humani amore; quo qui tangi ejuscemodi mortales possint, ignoro. Amorem ajunt philosophi esse τοῦ θεοῦ ὑπερστίαν, afflatum ac remigium Deorum: a Dei igitur amore auspicemur necesse est, si justī, probi, honestique esse volumus: namque amor Dei, amor est ordinis universi, ac æternæ legis; ex quo amor existit generis humani, ac virtus denique omnis. At illi aliis incitamentis sese ad virtutem incitavere, privata videlicet aut publica utilitate, ac gloriæ præsertim cupiditate. Nam ego nec in Aristotelis libris, quos ille de moribus ac virtutibus plures scripsit, nec in Ciceronis de officiis, quos deosculamur omnes latine docti, ejus amoris, universique finis, vestigium ullum aut volam vidi unquam, tametsi sæpe, eamque ob causam, oculatissimus perlegerem. Illa vero gloria quid tetrius? Nam neminem ego esse opinor, qui triumphos Romanorum legens, non animo infrendat, totusque horreat.

Eadem dici possunt & de Græcorum probissimis, non modo vetustis Legislatoribus, sed ipsis philosophis (vix equidem Platonem & Zenonem exceperim) quorum obscæne, aut inique facta, & crudeliter, tota Græca celebrat historia ab Homero ad Plutarchum. Enimvero Minos, Lycurgus ac Solon, quibus Numam quoque addo, ne ipsis quidem Græcis plene probantur. Minos metuens ne fœmine nimium Crætæ prolificarent, quo viros ab uxorum complexibus sejungeret, pedestriam ioculit, quemadmodum Aristoteles & Strabo, luculenti in primis auctores, testificantur. Lycurgus μικρὸν κρυπτικὸν ἔργον, nefandum cryptiæ opus, ut vocat Plutarchus, legibus statuit. Erat autem ejuscemodi. Selecti Lacedæmoniorum ad duo millia, perque agrum sparsi, cryptis sese abscondebant, vitæque Ilotarum, qui nempe rei agrariæ operam dabant, insidiabantur, necique dabant, metu ne in immensum excrescerent, eoque illustri facinore celebrabantur. Equidem non ignoro id factum ad posteriora tempora conari Plutarchum referre: sed me Plato mover, mover Aristoteles, qui Lycurgo tribuunt. Solon iniquo adversus Megarenses bello legislationem inceptavit; quod cum Athenienses tergiversarentur, insaniam simulavit, furensque in foro vociferabatur,

Ἰσμεν ἢ Σαλαμῖνα μαχιστομενοι περὶ νηὸς

Αἰσχὸς πτωτομενοι idest.

Eamus in Salamina, insulamque bello oppugnemus,

Vetus opprobrium depulsuri Laetius in Solone.

Tom. IV.

N

Nam-

Nempe id æquius, quod fortius. Ea virtus.

Idem a Cretenſium pæderæſtia haud admodum fuit alienus, quod ſatis aperte inſinuat in Solone Plutarchus, præmio. Sed & fuit alicubi in legibus ſatis durus, præterque naturam. Siquidem ejus lex eſt, qui civitatis princeps in ebrietate cubare repertus ſit, capitali eſto. Græca ſunt apud Laertium, το αρχοντι αν μεθυσιν λησθαι, δαυκτον ενωι την ζημιαν. Amo ego idcirco perditæ Lucianum, qui nec taciturno Pythagora, ac a cognatis fabis abſtinenti, nec verecundi oris Platoni, nec ſancto, ſi Diis placet, Socrati, nec rigido Zenoni, nec ulli veterum ſama virtutis & ſanctitatis celebri pepercit, quominus velut inſignes generis humani impoſtores corruptoresque vere læpidiſſimeque ac propalâ inceſſeret, non intendendo vera, neque calumniis, ſed exprompta diſtorum factorumque hiſtoria. Deoſculor & Ariſtophanem, qui multus multo ſale ac veruſta libertate Socratem, reliquosque philoſophos in Nubibus perfricxit.

Sed enim & Chriſtiani, loco etiam & officio conſpici, ipſique interdum antiſtites ac cæleſtium rerum procuratores & magiſtri, haud ſæpe fuere meliores, quod noſtra docet hiſtoria. Non ego abnueri: nec tamen ex regula publicaſque approbatione. Hoc diſtamus, ut nos nullius malefacta, diſtaſque, ſeu iniqua & immania, ſeu ſæda ac flagitiſoſa palpando probaverimus, nec legibus cohoneſtaverimus; quod illi fecere, paucos ſi demas audaciſſimi peſſoris, eoſque aliis cauſas ſtruxerunt perniciæ; neque vero palpones tantum, ſed aliquando Philoſophi hiſtoriciſque, ipſique interdum Legumilatores. Cujus rei cauſa in promptu eſt: qui enim Diis, quos venerabantur, homines probiores fuiſſent? Qui æquiores humanioresque? Qui minus flagitiſi? Deorum vero Græcorum, Latinorumque, quippe qui e Græcis expreſſi, inique aut impie facta, aut flagitia, ſi quis petit, copioſum habet enarratorem Homerum, veteresque adeo Tragicos. Sed enim δικαστῶν αρχιδησι, jura dantem cælitibus Jovem vocat Callimachus (in Jov. v. 8.) Quin Homerus Reges ipſos Terreſtres jura & leges ab eo hauſiſſe ſcribit Iliad. A. 138. Æſchylo in ſemetipſo jura habere dicitur Jupiter, πῶρ εκουη το δικαλον εχων, Prom. v. 286. Plutarcho videtur non Jovi adſidere juſtitia, ἀλλ' αὐτος δικη, καὶ θεμις, ſed ipſe eſſe juſtitia & fas. Hæc & alia cum plures alii, tum præſertim Ezechiel Spanhemius ad Callimachum loco laudato congeſſit. Ego verſatam inter doctos Ethnicos aliquam ſummæ divinitatis notionem haud abnueri. De populis hic diſcepto. Ecquem Jovem coluere? Ipſi Poætæ ecquem laudibus celebraverunt? Diſtæum, an Lycæum ignorat Callimachus: nempe ubi natus, eduçtusque. Patrem, matremque indigitant: antra monſtrant, quibus innutritus. At, ſemper eſt Jupiter, & immortalis: boat Homerus το θεοι αν ευντες. Scilicet ſine carentes, non initio. Quid quod initium & finem habere Jovem ipſum aſſerit Sophocles apud Clem. Alex. Strom. v.?

... νεος γαρ (Jupiter) εχει τελῶς καὶ αρχην.
Nam ille & finem habet. & principium. Idipſum oſtenderat Ezech.

Evemerus. Deum inquit *Vellejus*, nisi sempiternum intelligere qui possumus? Utique non possumus: *οτι ουτως ουκ εχεν* Deum, eodem semper se modo habere, scribit in *Timæo* *Plato*. Divinitus. Hunc, amabo, coluere *Attici*, aut *Græci* ulli? Hunc *Latini*? Per partes coluere, ait *Seneca*. Unius supremi virtutes secuere, Hoc philosophus. A populo hoc vellem dictum. Nihil me hujus philosophiæ docent templa: nihil patriæ religiones: nihil hymni, precationesque. Contraria omnia personant theatra. Qui docuissent Poetæ, quod populus aut ignoraret, aut exsecraretur? Naturæ quædam voce summa constituitur divinitas. Annuo. Audire tamen hanc vocem oportet: mentem habere, ut ajunt *Pythagorici*, *Platonicique*, desecatam. Habuere gentes? Id ipsi negant philosophi. Probat idipsum vexata eam ob rem identidem philosophia. Nam qui theismum profiteri sunt ausi paullo apertius, *Anaxagoras*, *Socrates*, *Aristoteles*, alique, aut exilio aut ultimo supplicio affecti. Sed hæc supervacanca sunt iis, qui res vetustas vel summis labelis degustavere. Ad extremum addo, me intelligere non potuisse, qui veteres *Græci* in lupos eos verti opinarentur, qui apud *Jovem* *Lyceum* in *Arcadia* victimarum humanarum carnibus vescerentur, ut ait in *viii. de Rep.* *Plato*: qui vero immolarent summo *Jovi* ac trucidarent, non modo homines, sed pios & sanctos? Ab hisce igitur solidam veranque virtutem expectem? Deos primum eam honorasse doceant. Quam si ibi conspicerent, impii futuri fuissent, qui coluissent; Deorum quippe dissimiles.

Id licet hinc quamvis hebeti cognoscere corde, quod cum ejuscemodi flagitia puderent philosophos, allegoriis tegere studuere, O miseras hominum mentes, o pectora cæca!

LIBER ALTER

Quemadmodum ex legibus naturæ hominum officia ducantur.

§. I.



UOD Stoici καθήκον, id Cicero officium dixit. Stoicis autem officium est id, quod cur factum sit, probabilis ratio reddi potest, quemadmodum refert Laërtius Lib. 7. n. 62. Quæ definitio & propria est & vera, si nomine *rationis* intelligamus hoc in loco, quæ ex primis legis naturæ notionibus nascitur. Nam officium nihil aliud revera est, nisi quod humanarum actionum norma faciendum, aut omitterendum docet. Quare officium facere est ex regula vivere, ei obtemperare; facere vero contra officium, est extra regulam prosilire, aut contra agere. Quæ ex definitione intelligitur, officium ad actiones tantum liberae pertinere, non etiam ad necessarias: nam actiones tantum liberæ ipsæ per se ac *immediate* lege morali gubernari possunt. Officiorum partitio commodissima est in ea, quæ quisque Deo, tum quæ sibi, tandem quæ aliis debet. Quæ aliis debemus item bipartita sunt, nam aut ex jure perfecto debemus, quæ a nobis vi exigì possunt, & *officia justitiæ* dicuntur, aut debemus ex jure imperfecto, seu caritate generis humani, quæ vi subiecta non sunt, & *humanitatis vel beneficentiæ* appellantur. Sed officia justitiæ ad duo quoque genera spectant: nam alia sunt *absoluta*, alia *hypothetica*. Absoluta sunt ea, quæ ita ex lege naturæ profluunt, ut nullum humanum institutum, aut pactum, aut factum supponant. Conditionata vero, quæ locum non habent, nisi post statuta humana, pacta conventa, facta. Ergo hæc tractatio ita instituetur, ut principio agamus de natura actionum humanarum &

& conscientia, ac libero animi arbitrio : secundo de officiis erga Deum : tertio de officiis erga nos ipsos : quarto de officiis erga alios humanitatis & beneficentiae : quinto de officiis erga alios absolutis : sexto de officiis erga alios hypotheticis : septimo de natura, & origine societatum, & civitatum, deque officiis in societate obtinentibus. Ita autem agemus, ut capita potius officiorum indicaturi simus, quo intelligant adolescentes, quemadmodum ex naturæ lege vivere oporteat, quam ut rem longe lateque diffusam, ac immensis voluminibus prægravatam, plene hoc libello comprehensuri simus (a).

CAPUT I.

De natura actionum moralium, tum de conscientia, libero arbitrio, & imputatione morali.

§. I. **L** Ex moralis, seu naturalis, seu positivæ, eas primum, ac per se hominis actiones spectat,

N 3

(a) Quamquam ego sic æstimo, magno fuisse eos generi humano nocumento, qui morum doctrinam, quæ plana esse debet, & in medio omnibus exposita, oriose commentando, non infiniti tantum operis reddidere, sed dum quisque sua magis tueri studet, quam communia, perplexam, & lubricam: qua ex re factum, ut plerique crediderint, dum nihil non defendi posse viderent, omni se esse jure & officio exsolutos, nisi quantum placuerit. Igitur veteres Legumlatores sapientiores fuisse; quippe qui paucis præceptis, sed quotidiana & longa disciplina, mortales moderandos suscipere: at hi dum ingenio luxuriantur, omniaque disceptationibus turbant, nihil reliqui sancti ac justii fecere. Ita vetustæ gentes eo fuisse sanctiores, ac justii & honesti observantiores, quo ab his lascivientium philosophorum scholis remotiores: naturam non disputando, sed sentiendo discebant; eoque sectabantur incorruptius, quo minus per factiones scholarum revocabantur; eratque illis inconditum horridumque prætextu ingenii vetera ac sacra movere, ac in disquisitionem adducere, numine ne aliquo Dei humana gubernantur, an nullo? Jure ne aliquo ac justitia homines tenentur? homines ne hominibus, an belluæ, nati sumus? Necare cognatos licet, adulterare, scortari, prædare, rapere, de lubricare, in rebus, veluti stirpes homines ab hominibus haberi: sapere, circumducere, blandicellis verbis mentiri; quæ hodie doctores coronant.

stat, quæ *humane* dicuntur, idest quæ ab intellectu, & voluntate hominis libera confluunt, non etiam mechanicas, quæ naturæ sunt animalis & corporeæ, quæque libertati non subsunt, nisi *oblique*. Motus sanguinis e. g., cordis, arteriarum, aliique pure machinarii, tum quæ *passiones* dicuntur, seu *sensationes*, ac impressiones primæ naturæ animalis, aut ab objectis externis excitatæ, aut a causis mechanicis nobis intrinsicis erumpentes; seu primi naturæ animalis impetus, amoris, iræ, metus &c., imperio libertatis nostræ minime suapte natura & immediate subsunt; neque idcirco sunt *actiones morales*, aut in censum *officiorum* veniunt. Dixi autem actiones quoque mechanicas, & sensationes ac affectus *oblique* libertati posse esse subiectas, quod scilicet plurima possit circa eas libertas nostra; seu agendo, seu omittendo. Ceterum tunc non illæ proprie legi morali subjiciuntur, sed potius eæ voluntariæ actiones, aut omissiones, quas circa illas agimus, aut omittimus. Ita respiratio, qua vivimus, mechanica est; quæ si a causis item mechanicis impediatur, ita ut hominis mors sequatur, nihil est ea in re, quod crimini verti possit: contra, si voluntarie spiritum cohibeamus, ut emoriamur, nostri sumus homicidæ. Primus amoris, aut iræ impetus sæpe pure mechanicus est; sed multa libere efficere possumus, aut omittere, quibus illi affectus excitari, aut cohiberi possint: quæ si fecerimus, aut omiserimus ex regula, officium egimus: si contra, desertores sumus officii.

§. II. Intrinseca autem actionum moralium principia, quibus nimirum illæ humanæ sunt dicunturque, sunt *intellectus*, & *voluntas* libera, seu electio. Ut enim actio sit humana, & moralis, utque jure possit imputari, seu in bonam, seu in malam partem, necesse est ut & intelligatur, & libere agatur: alterum ubi deest, mechanica potius, quam humana & moralis est. Igitur quæ ex ignorance, aut coactione fiunt, quin ejus ignorance, aut coactionis causæ fuerimus liberæ, ea nec crimini, nec virtuti imputari possunt.

§. III. Intellectus in actionem influit *conscientia* actionis, & legis. Libertas *electione* libera, seu proæresi,

consilio (a). Ea ratiocinatio syllogismus est; & tribus semper absolvitur, *lege, definitione actionis, & sententia*. Lege continetur propositio: definitione actionis assumptio: sententia vero complexio. E. G. *Nemini quidquam malefaciendum* (Ea lex est, quæ in omni conscientiæ ratiocinio veluti fax quædam præluce debet) *alterum autem criminari est ei malefacere* (hæc actionis est definitio & constitutio, quæ est necessaria ut actio possit cum lege conferri): tum sequitur sententia, ergo *alterum criminari lege vetatur*. Hæc autem ratiocinatio tum dicitur conscientia, quum, ut dixi, versatur circa proprias actiones, aut omissiones: quod si circa actiones, aut omissiones aliorum instituat ab iis, qui res humanas moderantur, *imputatio* dici solet, qua scilicet collata alterius actione cum lege, concludimus, illi aut legis pœnam deberi, quia legem violavit; aut laudem, vel præmium, quia legem viriliter observavit: qua de re paullo post uberius dicemus.

§. IV. Conscientiæ plurimās fecere Philosophi partitiones. Ac bonam quidem vocant eam, a qua quis absolvitur: malam vero, a qua damnatur. Vocant antecedentem, quæ de actionibus nondum editis ratiocinatur, quæ nonnisi in bonis, & sapientibus inest: consequentem, quæ ratiocinatur de actionibus jam editis, qua depravati quoque homines utuntur, saltem quousque conscientiam *cauteriatam*, ut appellant, non contraxerint, quod consuetudine peccandi fit. Jam conscientia antecedens vel docet actionem ex lege faciendam, vel abstinendum ab actione, utpote contra legem, vel esse permissum agere, aut cessare. Priorem *instigantem* appellant, alteram *revocantem*, tertiam *admonentem*.

§. V. Porro conscientia vel recta est, vel erronea.

§

N 4

Quum

(a) Hinc Græcis βελη, unde est nobis voluntas, utrumque simul significat, rationis consilium, & electionem, quasi βελουμα. Itemque verbum βελουω, unde Latinis volo. Nam quod Homerus initio Iliados vocat Διος βελυ, id dicitur Cæcillo voluntas cælitum, Carm. 11.

Quum enim conscientia sit ratiocinatio de bonitate ; aut malitia actionis ex lege ; si propositio , aut assumptio , aut complexio fuerit falsa , conscientia dicetur erronea : si vero omnia fuerint vera , vocabitur recta . E. G. si quis ita ratiocinetur : *amor proximi exigit , ut errantes occidam : Publius autem errat ; ergo occidere debeo* . Falsa enim est propositio , quum *errantis poena sit doceri* , inquit gravissime Plato : quare conscientia est erronea . Potest autem quis errare , aut circa legem , aut circa jus , aut circa actionem , seu factum . Et in lege quidem aut unam legem pro alia traducens , aut non justam legis extensionem animo comprehendens ; aut legem antiquans . Error juris est , cum aut plus , aut minus , juris nobis , vel aliis attribuimus , aut diversum ab eo , quod revera competit . At in facto errare possumus multipliciter , seu ponentes quod non est , seu quod est tollentes , seu unum pro alio accipientes . Error juris difficilior est , quam facti : nam facti natura ex infinitis propemodum circumstantiis pendet , quas difficillimum est omnes semper inspicere & in numero habere . Ex quibus intelligitur , ut quis habeat conscientiam semper rectam , quatuor potissimum requiri . Primum , ut leges omnes morum calleat : secundum , ut sciat justam legum extensionem dimetiri ; tertium , ut pernoscat jura : quartum , ut sciat facta cognoscere , perpendere , & cum legibus comparare .

§. VI. Est etiam conscientia vel certa , vel probabilis . Certa existit ex clare cognita lege , ejusque extensione , atque clare & distincte definita actione . Id non semper obtineri potest : nam etiamsi leges perfecte teneantur , incidunt tamen plerumque casus difficiles , in quibus nec legis extensionem omnem comprehendimus , nec actionem ob multiplices circumstantias scimus definire . Plerumque etiam officia collidi videntur , quo quis æstimare possit alterum alteri adversari , ut quid facto sit opus non clare pervideamus . In his casibus si nihil ex neutra parte clare appareat , conscientia est *dubia* : si plus ex alterutra , *probabilis* . Conscientia autem dubia , quum dubium ex frivolis cau-

causis est, *scrupulosa* appellari solet.

§. VII. Est autem hoc in loco animadvertendum, probabilitatem in scientia morum, aut *intrinsecam* esse, aut *extrinsecam*. Illa ex fontibus hujus scientiæ propriis nascitur, legibus nimirum vel naturæ, vel divinis positivis, vel humanis: hæc ex auctoritate Doctorum. Si actio ex suis principiis liquido fluere videatur, idest si clare cum lege videatur consentire, aut ei adversari, conscientia certa est: si non videtur clare, sed videtur tamen aliquo modo, est intrinsecus probabilis: si nullo modo actionem cum lege comparare potes, sed id ab aliis accipias, probabilitas est extrinseca. Hæc posterior probabilitas ab intrinseca illa pendet, nec ulla esse potest, ubi nulla est probabilitas intrinseca: neque enim aliam ob rationem Doctores nos permovent, nisi quod iis & leges perspectas planeque cognitæ, & actiones accurate definitas, & cum legibus collatas supponimus. Quæ si in illis desunt, quemadmodum in pluribus desunt, nulla esse potest eorum auctoritas. Id animadvertere eos oportet, qui ex cœnosis potius rivulis, quam ex puris fontibus morum regulas deponunt. Philosophus in principia justitiæ, & honestatis inquirere debet, in hoc a vulgo distans, quod totum ex aliorum auctoritate pendet. Neque enim qui de moribus & officiis scripsere aut eam legum peritiam adhibuere semper, quæ erat necessaria; aut sinceram semper morum regulam præ oculis habuerunt; ac fuere quidam, qui tempori, sectæ, vulgi judiciis, propriis affectibus, aut utilitati interdum serviverunt. Hinc factum, ut in tantam opinionum non modo varietatem, sed perversitatem quoque pervenerimus, ut, quod ille dixit, *nec remedia, nec vitia pati possimus*.

§. VIII. Præterea conscientia dici solet *libera*, quum nullo affectuum impetu, nulla prava cupiditate, nullo pravo habitu impeditur in ratiocinando de bonitate, vel malitia actionis: *minus vero libera*, si ex aliqua superiorum causarum turbetur: quarum conscientiarum illa aptior est officiis intelligendis, & discernendis, quam ista: *male enim judicat omnis corruptus*

judex, ait noster ille. Quare viro probò curandum est, ut liberam semper, quoad natura humana finit, conscientiam habeat: dici enim vix potest quantopere turbata conscientia justitiæ & honestati discernendæ efficiat, idque nobis sæpe pro honesto & justo ostendat, quod e re nostra est, non quod ex regula (a). Dicitur quoque conscientia *dormitare*, quum animus officio suo minus est intentus. *Cauterio usta* appellatur, quum nihil de honestate, aut turpitudine actionum sollicita est, qualis esse solet in iis, qui consuetudine malefaciendi habitum contraxere. Tandem dicitur *expergefieri*, quum quis ad se, & officia sua demum redit. Ex his, quæ dicta sunt, patet jam, quæ sit conscientia *tranquilla*, aut *remordens*, vel *inquieta*, qui sunt conscientiæ, seu proærescos, effectus. Atque hæc fere sunt conscientiæ partitiones.

§. IX. Quæri hoc in loco potest, an conscientia sit regula morum? Regula morum esse debet *certa*, *recta*, & *constans*, alioquin ne actio quidem humana, quæ ad illam regulam exigenda est, certa, recta, & constans erit. Hujusmodi autem regula nequit esse nisi sola lex, & quidem divina, aut quæ ex ea, velut ex exemplari, diducta est; quia sola Dei ratio certa est, recta, & constans. Sed quoniam lex ope conscientiæ actionibus applicatur, inde factum est, ut conscientiam recentes Theologi vocaverint *immediatam* morum regulam, legem vero *remotam*. Id vero sic intelligendum est, ut conscientia informata a lege, ac recte ratio-

(a) Id vero dictitabant Stoici, qui ratione agenda sapienti omnia, non *παρρησι*, affectibus præcipiebant; solumque istiusmodi sapientem liberum esse. Quos qui ita accepere, ut sentire affectus non oportere sapientem traducerent, eorum perverterunt doctrinam. Amorem, inquiunt illi, persentiscet sapiens: persentiscet odium, iram, metum, voluptatem, dolorem, totumque inferiorem appetitum. Sed hunc plebejorum tumultum arcebit a sede rationis, quum justum ne sit aliquid, an injustum, honestum, an turpe judicare opus est. At hoc effregere præceptum nostri sæpe Casuistæ, qui naturæ imbecillitates, quibus curandis tributa est lex, aut privatas utilitates in jure dicendo consulere judices, quorum exempla nemini ignota esse possunt, proferenturque a nobis, cum occasio jusserit.

ratiocinans pro morum regula, si ita loqui placeat, habeatur: exploratum enim est, conscientiam erroneam, stupidam, corruptam, dubiam, non posse haberi pro regula, nisi omnia scelera licita efficere velimus. Nul- lum enim est scelus, quod non aliqua corrupta con- scientia probet, ut præclare prorsus dixerit Seneca, *nullam esse scditatem sine suo amatore, nullum errorem sine patrono* (a).

§. X. Quid? inquit aliquis, agere ne licet contra conscientias? Non certe licet; sed inde minime fit, ut conscientiarum officiorum nostrorum prima regula esse pos- sint: nam ne contra conscientiam quidem erroneam agere licet; nec vero quisquam dixerit, conscientiam erroneam esse actionum nostrarum normam. Ac quod non licet quidquam agere, quod cum honestatis aut justitiæ conscientiis pugnat, aut pugnare videtur, id non a conscientiis est, sed a lege, quam conscientiarum præferunt. Quare etiam ubi conscientia erronea est, ei adversari est contra officium facere: quia est viden- tem ac prudentem legem oppugnatum ire; quia in censum venit non lex, quæ non est, sed legis, quæ esse videtur, contemptus, adversus quam nunquam esse animatum licet. Quare sectandæ quidem sunt con- scientiæ, seu potius lex, qua conscientiæ informantur, sed accurate & studiose perquirendum est, utrum re- ctæ, nec ne, sint.

§. XI. Quæritur item, quid agendum sit cum con- scien-

(a) Sæpe conscientia ita educatione, publicisque moribus infor- matur, ut illum naturæ sensum, ac ingenitos animo justis & bo- nestis igniculos, suffocet, atque a natura desciscat. Satis id & gentium superstitiones, & inique aut turpiter facta, quæ pro ju- stis honestisque habuere, demonstrant. Quid magis impium, quam homines, quibus servandis nata est religio, ad aras velut pecudes mactare? At id totâ tellus pium sanctumque duxit. Quid ini- quius, quam vicinas remotasque gentes Deorum, ut ajunt, im- mortalium imperio exscindere, aut spoliare, & in servitutem ad- ducere? Id item totum fecit olim hominum genus, facitque etiam- num. Quid turpius, quam commo-are uxores, aut ingenuos πα- ρεισθεῖς? At illud sanxit Lacedæmonie Lycurgus, hoc Athénis So- lon, uti auctor est gravissimus Plu-archus in Lycurgo, & Solone,

scientia probabili? Repetamus hanc doctrinam paullo altius. Nemo ignorare potest, nisi sit omnino stupidus, hominem naturæ ipsius dictamine certum tenere debere ad finem suum iter, siquidem illud occurrat inquirenti perdiligenter: quod si post accuratam, & sedulam diligentiam adhuc lateat, idem rectæ rationis dictamen exigit, ut in dubio pars tutior eligatur; in probabilitate vero probabilior, velut fini suo propinquior: eam regulam in ceteris humanæ vitæ negotiis homines natura ipsa instigante sectantur. Enimvero qui in dubio viam minus tutam, aut in opinione minus probabilem ingreditur, is dupliciter peccat: nam & legem contemnit, & de fine suo parum est sollicitus. Eam ob rem omnes controversiæ, quæ super probabilitate præterito seculo a magnis alioquin ingeniis excitatæ sunt, magis ex pugnandi prurigne, partiumque studio, quam ex veritatis amore natæ mihi videntur. Itaque nisi probabilitas minor sit ea, quæ legi favet, eam sequi, ubi adest major, est haud dubium proterve legum jugum excutere velle: homines imperio Dei perduelles efficere; aut cum imperante supremo transigere velle, partemque usurpare imperii. Itaque flagitiosum est, & sceleratum, cum ejuscemodi criminum pellacias nec Aristoteles, nec Cicero æquis auribus audiant, in scholis tolerari christianorum (a).

§. XII. Ex iis, quæ dicta sunt, facile intelligitur, quænam sint actiones *imputabiles*, & quibus imputari possint. Nempe eæ actiones sunt imputabiles, quæ humanæ sunt, idest quæ & intelliguntur, quales sint, & ex

(a) *Quamquam ea altiore habent, ac æque indignam causam. Nam quæ sola lege definita esse oportuit, ea principio homines quidam vero consensu interpretum definivere. Ita antiquata quodammodo lex. Deinde cum nemo alteri facile ingenio cesserit, pro legum auctoritate, provenere scholæ & interpretum certamina, quæ tuendis, legis immemores, enixe incubuere. Postremo pro cuiusque amore aut odio, signiferorum celebratæ sententiæ, etiamsi interdum aperte iniquæ, aut turpes. Ita a morum disciplina excivimus. Quibus accessit hominum præcipue tuentium studium & secta, atque hinc privatum scholarum emolumentum, quæ etiam magna ingenia pertentantur.*

& ex libertate fiunt. Ex si legi sint conformes, justæ, bonæ, honestæ dicentur: si vero contrariæ, malæ, injustæ, turpes, ac proinde sanctioni legis obnoxia. Statim enim ac quis legem violavit, pœnæ legis subditus fit, quam subire oportet, nisi legislator clementissime indulgeat. Quocirca, ut actio imputetur, duo imprimis sunt necessaria, *summa legis peritia*, ut scilicet ejus extensio tota animo comprehendatur, nec verba tantum teneantur, *sed vis & potestas*, ut Jurisconsultus ait; & *accurata facti cognitio quoad omnes ejus circumstantias*. Sed quoniam quædam sunt, quæ efficere possunt, ut actio in genere quidem sit humana, non vero in specie, idest in genere sit imputabilis, non vero in specie, ob adnexas scilicet circumstantias; paullo distinctius ea de re differendum est.

§. XIII. Principio nemini imputatur actio, aut omissio, si quis aut egit, aut omisit ex ignorantia, vel errore involuntario: nam ea actio, aut omissio humana esse nequit, nec æquum est, actiones, aut omissiones non humanas imputare. Dixi autem *ex ignorantia*, aut *errore involuntario*, quod esse potest quædam ignorantia, ac proinde quidam error voluntarius, quum legis, tum facti. Nimirum ignorare ea, quæ officii est scire, voluntaria legis ignorantia est. Ea ergo efficere vetita, aut omittere præcepta, nemo potest, quin actio, aut omissio imputetur. Quod ut intelligatur, animadvertendum est, quædam esse officia omnibus communia, quædam vero quorundam statuum propria. Officia omnibus communia ego habeo generalia, quæ spectant aut Deum, aut nos ipsos, vel alios, ut homines: officia vero propria sunt particularia, quæ spectant status quosdam ac personas naturæ advenientes, qualia sunt officia Principis, Patris, Senatoris, Pastoris, cetera. Quod pertinet ad prima officia, in iis, quod ad prima saltem capita, non videtur cadere posse ignorantia omnino involuntaria: prima enim legis ac juris naturalis capita recta ratio, insitusque sensus omnes conducit, quemadmodum superius demonstratum est. Contra vero in consequentiis quibusdam ex primis illis capitibus provenientius, in
qui-

quibus major perspicacia exigitur, hujusmodi ignorantia locum habere potest aliquem. In officiis vero particularibus ignorantia eos tantum excusare potest, qui in illo statu voluntate sua non sunt constituti: nam si in eo statu voluntate sua positi sint, nullo modo officii sui ignorantia eos contegit: quandoquidem inter prima officia ejus status est ea scire, sine quibus persona ejus status geri non potest. Itaque Senatores, Patresfamiliae, Pastores, Doctores, alique quodcumque munus gerentes, non excusantur, si in eo munere administrando ex ignorantia peccent: est enim hujusmodi ignorantia voluntaria. Sed & neminem excusare potest ea ignorantia, quæ *vincibilis* appellatur, idest quæ non adfuisset, si ea diligentia adhibita esset, quam homines prudentes in ceteris vitæ negotiis adhibere solent: hanc enim diligentiam Legislator efflagitat in iis, quibus leges dat: hominibus enim dat, non stirpibus. Quare ii *hominem de homine tollunt*, ut ait Cicero, qui ignavia peccata tegi docent.

§. XIV. Præterea nemini imputari possunt actiones cum cognitione alioquin factæ, sed tali cognitione, quæ omnem libertatis usum prævertit, nisi eas evitare in potestate nostra fuit. Ita motus affectuum adversus legem, iræ, timoris, amoris, aliorum, qui dici solent *primo primi*, quique licet non nascantur, nisi ex objectorum perceptione aliqua, tamen motu magis mechanico, quam deliberatione voluntatis peraguntur, non sunt imputabiles, nisi aut quum iis causam libere dedimus, aut, quum evitare potuissemus, libere omisimus. Prioris partis hujus propositionis ratio est, quia liberi non sunt; nec æquum est, ut quod in potestate nostra non est agere, vel omittere, voluntati nostræ imputetur. *Nemo*, inquit Augustinus, *peccat in eo, quod nullo modo cavere potest*. Alterius vero partis, quia licet *non in se*, saltem *in causa*, ut loquuntur scholæ, sunt liberæ: quodcumque enim cavere potuissemus, si non fecimus, libere voluimus. Scilicet eadem legis vis, quæ vetat quidquam, aut præcipit, ea vetat quoque aut præcipit cavere ea, quæ adversus legem sollicitant, incitantque, quæ nisi caveas, legem despicias, ac irrides.

§. XV. Ad idem genus actionum pertinent eæ , quæ ex diuturnis habitibus proficiuntur. Hujusmodi actiones plerumque machinariæ sunt , quia habitus quasi alteram naturam conficiunt. Quare si omnem operam dederimus pravis habitibus extirpandis , nec dum profecerimus , actiones illæ erumpentes , naturæ magis sunt , quam arbitrii , adeoque minime imputabiles. Ceterum si habitus fovemus , aut exuere negligimus , tantum abest ut illæ minus imputentur , ut magis etiam multo sint imputabiles. Nam habitus pravi aut neglecti aut fotti majorem legis injuriam continent , quam singulares actiones pravæ , quæ ab habitibus non proveniunt : magis enim vitium in eodem genere est habitus , quam actus : nam ille , non hic , efficit , ut tota nostri natura cum regula pugnemus .

§. XVI. Quæret hoc in loco quispiam , quid censendum sit de actionibus invitæ , & coactis ? Actiones invitæ appellamus eas , quas metu majoris mali agimus , ut quum servus ne occidatur ab heri suo , alterum occidit ex heri imperio : aut quum nauta , ne mergatur una cum mercibus , merces in mare projicit : actiones vero coactas eas , quæ ita a nobis proveniunt , ut ipsi earum non causæ , sed instrumenta simus , veluti si quis mea manu alterum feriat , vel si me urgeat , quo alterum impellat. Actiones invitæ , dici possunt *mixtæ* : eæ enim nec plene liberæ sunt , nec omnino mechanicæ : itaque imputabiles sunt , licet aliquam quandoque indulgentiam mereantur. Atque hujusmodi fere sunt pleræque , quæ ex vehementibus affectionibus peraguntur . Ceterum distinguendum est inter actiones , & omissiones . Actiones lege prohibente vetantur : Legis autem prohibentis hæc est natura , ut obliget omni tempore , & loco , quod dicunt *semper* , & *ad semper* : at omissiones lege præcipiente : Legis vero præcipientis natura est , ut datis occasionibus obliget , non vero *semper* , & *ad semper* . Itaque actiones mixtæ , seu invitæ , de quibus loquimur , contra legem prohibentem , semper imputantur : nulla enim tam gravis causa esse potest , quæ nos , nisi velimus , ad nefas impellat. Nos igitur egimus , ut si iniquum , vel nefarium

farium sit, quod egimus, velut si servus conservum jugulet, ne ab hero occidatur, inique ac scelerate egimus. At omissiones invitæ contra legem præcipientem excusari possunt, si scilicet gravis quædam causa occasionem locumque agendi distulit, velut si quis mihi mortem minetur, si alteri periclitanti succurram: jure enim abstinere possum; quia vis illa minarum locum succurrendi quasi perimit. Præterea aliud est contra jus agere, quod nunquam licet; aliud juris tributionem differre. Innocentem interficere est contra jus agere; periclitanti non succurrere, ne ipsi periclitemur, est in pari casu nobis potius consulere, quod lex non vetat. Sed actiones, coactæ nullo pacto imputari possunt: neque enim a voluntate nostra ullo modo pendent, ut morales dici possint. Quod si a coactione quidem cœperint, progressu vero voluntariæ evadant, tum de iis, veluti de moralibus, statuendum est.

§. XVII. Sed cui imputari possunt? Nempe causæ aut *physicæ*, aut *moralis*, scilicet ei, qui aut ipse per se aliquid egit, aut omisit adversus legem: aut ut ageretur aut omitteretur effecit, seu imperio, seu auctoritate & consilio, seu exemplo, seu neglectu sui officii. Illud animadvertendum est, plerumque actiones aut omissiones adversus legem plus causæ *moralis*, quam *physicæ* imputari, ut quum actio aut omissio plus intelligentiæ & voluntatis, est plus moralitatis habuit in causa *moralis*, quam in *physica*. Nam, ut præclare ait Paullus l. 53. ff. de Furtis, *maleficia voluntas & propositum delinquentis distinguit*. Quo modo imperia eorum, qui plurimum possunt, efficiunt, ut inde acta aut omissa per eos, quibus, ut Tacitus inquit, *obsequii gloria relicta est*, plus imperantibus, quam ministris imputentur. Ita plurima plerumque populorum crimina, aut delicta Rectoribus magis imputantur, quam iis, qui ea aut agunt, aut delinquant. Nam quoniam totus societatis civilis ordo, ac proinde legum observantia, ab ejus moderatoribus nascitur; fieri vix potest, ut quum illi officio suo defunt, cetera ordinata sint & pacta: faciliusque reperies sapientem Rempublicam in turbata Civitate, quam tranqui-

quillam & bonam Civitatem in Republica aut somno
lenta, aut nefaria.

§. XVIII. Diximus ut imputare alicui quis recte
quidquam possit, requiri & perfectam legis scientiam,
& plenam facti cognitionem, quæ sunt nunc perpen-
denda. Quod spectat ad primum, ut dicatur quis ha-
bere perfectam legis scientiam, satis non est, ut ver-
ba legis teneat, sed ut vim, animum, finem. Nam
si quis plenissime legis verba observet, finem vero vio-
let, legem quoque violasse, ac *circumvenisse*, ut ait
Ulpianus, censendus est. Contra autem ubi quis fi-
nem legis observaverit, utcumque contra legis verba
egisse videatur, legem observavit. Liberaliter scilicet
lex interpretanda est, non serviliter. Hæc certa sunt.
Interea cavendum est judici, ne nimis interpretando
totam vim legis infringat, quod sæpe fit ab iis, qui ex
jecinore magis suo sapere volunt, quam ex scientia le-
gum. Atque hinc factum est, ut quædam Resp. san-
xerint, ne ulla esset iudicibus interpretandi facultas,
existimantes lenius peccari ignorantia, quam pravitate.

§. XIX. Jam ut finis legis dignoscatur, primum
omnium in causas ejus legis impulsivas inquirendum
est. In legibus humanis id obtinetur ipe historię le-
gum, & earum rerum, quæ quoquo modo leges spe-
ctant. Itaque nemo sine cognitione civilis historię se
ad rectam legum interpretationem pertingere posse con-
fidat. In divinis legibus scriptis historia sacra adhiben-
da est, atque præterea cognitio naturæ Dei, & homi-
num: inde enim illarum finis dignosci potest. Legum
naturæ finis præcipuus est, nostri beatitudo: eo enim
omnes tendunt: quemadmodum finis legum civilium
est salus publica, seu civitatis conservatio, & tran-
quillitas. Ex his ergo finibus singulæ leges interpre-
tandæ sunt, ut quantum quis, & quatenus adversus
legem fecerit, intelligi possit.

§. XX. Præterea necesse est imputanti, ut justam
extensionem legis comprehendat, re aut contra volun-
tatem Legislatoris plus quam par est, legem coarctet,
aut æquo justius provehat. Extensionem legis partim
ex ejus fine, partim ex aliis causis impulsivis, partim

ex vi verborum discimus. In primis autem necessaria est germana verborum intelligentia : ex eorum enim constitutis notionibus magnum legi lumen accenditur. Vide quæ super ea re adnotavit Pufendorffius de Offic. Hom. & Civ. Lib. I. Cap. ult., ibique Everardus Otto. Agnovere id Jurisconsulti Romani, qui idcirco *de verborum significationibus* diligenter pertractavere. Ad facti plenam cognitionem consequendam ejus circumstantiæ omnes distinguendæ sunt, personæ scilicet, status, loci, temporis. Singulæ enim facti circumstantiæ actionis naturam commutare possunt. Vide ut super ea re disputat Heineccius Lib. I. de jur. natur. & gent. cap. 4. Qua autem ratione adhibendæ poenæ, & quatenus, id a nobis commodius disputabitur.

C A P U T II.

De officiis erga Deum.

§. I. **A**Mplissima est hæc tractatio, præsertim si Philosophus, quod omnino oportet, se Christianum quoque esse meminisse velit. Sed summa nos capita attingemus, elementorum angustiis, ut dixi, impediti. Fundamentum officiorum omnium, quæ Deo debemus, est hoc, **JUS DEI DEO TRIBUE INCORRUPTÉ, AC IMPOLLUTE**; quippe qui ab eo conditi sumus, & conservamur; quod is supremus sit nostri dominus; quod bona omnia animi, corporis, fortunæ ei accepta referre debeamus; quod ab eo tantum veram beatitudinem sperare possimus. Itaque fit, quod alias dictum est, ut primam, & perfectissimam ei amicitiam & servitutem debeamus, eaque omnia officia, quæ ex ea amicitia & servitute profisciscuntur. Officia autem isthæc uno *pietatis & religionis* nomine appellantur, quæ complectitur amorem, timorem, fidem, spem, obediendi propositum, invocationem, gratiarum actiones, & quæ his sunt affinia.

§. II. Sed quoniam, ut præclare disputat Lactantius, *non potest religio a sapientia separari, nec sapientia a religione secerni; quia idem Deus est, quem scire oportet.*

oportet, quod est sapientia; & idem, quem colere, quod est religionis; prima officia hominis circa Dei cognitionem versari debent, ut nempe intelligat, Deum esse æternum, independentem, simplicissimum, incomprehensibilem, omnipræsentem, unum, intelligentem, sapientissimum, omniscium, futurorum etiam præscium, omnipotentem, liberum, veracem, justum, optimum. Nisi enim hæc intelligat omnia, perpetuoque secum animo verset, & sibi firmissime persuadeat, in officiis suis erga Deum deficiat necesse est. Quare perspecte idem Lactantius eodem Lib. 4. prius est, inquit, Deum scire: consequens colere. Agnoverunt idipsum Ethnici Philosophi. Seneca Cap. 95. Primus est, inquit, Deorum cultus, Deos credere: deinde reddere iis maiestatem suam, reddere bonitatem. Et Epictetus in Enchiridio cap. 38. Religionis erga Deos immortales præcipuum illud esse scito, rectas de iis habere opiniones (a). Vide & Platonem lib. 4. de legib.

§. III. Primum ergo omnium oportet, ut homo, veræ pietatis cultor, secum constituat, primarium in religione officium esse intelligere Deum esse, idest æternam, incorpoream ac præpotentem Mentem, mundi hujus architectricem, creatricem, moderatricem; & in ejus attributa diligentissime inquirere, in ea potissimum, quæ majorem rationem habent cum creaturis rationalibus, omissa subtili eorum inquisitione, quæ intellectum magis exercere possunt, quam animum ad pietatem formare: deinde pervidere, quæ ex iis attributis consuetudina practica ad vitæ honestatem & sanctitatem pertinentia consequantur, ut ita scilicet secundum relationes, quas natura nostra cum Deo habet,

O 2

idest

(a) Illud difficile dictum est, equas justas de supremo natura auctore notiones habuerint, qui tam nefanda de minoribus prædicabant. Nam ab his aut iniquis, aut flagitiosis & obscænis, quæ Diis, Deabusque attribuerunt, tota illa gentium prostitutio nata est. Dictum est sæpe, dicamque iterum, nulla in gente mores meliores esse possunt, quam ii sunt, quos in divis venerantur, seu homines vitam ex Deorum ingenio finxerint, seu, quod verius puto, humana transfulerint ad Deos, quo impunius iniqui, scelerati, fædi essent.

idest divinæ naturæ juribus convenienter, vivere possit. Et ad cognitionem quidem Dei, ejusque proprietatum duplici via ire possumus, *naturæ*, & *revelationis*: dupliciter enim ad homines Deus loquitur, via *naturæ*, qua primum loqui cœpit; unde est illud Psalmistæ, *Cæli enarrant gloriam Dei*; & via *prophetica*, qua tum usus est, cum altera pravitate morum obducta erat. Imprimis Philosophi operam dabunt scrutandæ rerum naturæ, ejus scilicet investigantes pulchritudinem, magnitudinem, ordinem, rerum singularum fines, & usus, ex quibus Dei sapientia, potentia, bonitas, præscientia intelliguntur. Quocirca studium Historiæ naturalis, Physicæ, Astronomiæ, tum & Historiæ humanæ, cum summa hac utilitate conjunctum est, ut nos de natura Dei instruat, atque ad officia adversus eum formet. Hanc partem Theologiæ naturalis præclare persequuti sunt Derham, & Niewentitius, pluresque alii huius ævi Physici.

§. IV. Conjungat porro Philosophus Christianus cum hoc studio Scripturæ quoque sanctæ studium, earumque rerum, quæ studio illi sunt necessaria. Ac in eo studio non cognitionem tantum theoreticam consecetur, nec, si muneris sui non sit, in Bibliorum dumeta ingrediatur, sed practicam potissimum, historiam, exempla, præcepta, toto animo complectatur: neque enim aliunde copiosius, & explicatius divina voluntas, quæ officiorum nostrorum prima est, & suprema regula, patescit, quam ex literis divinis; quippe quæ non ob aliam rationem hominibus datæ sunt, nisi ut brevitate, & imbecillitatem mentis nostræ sustinerent, & perficerent, ut *perfectus* scilicet *esset homo Dei ad omne opus bonum instructus*, ut loquitur Paulus Apostolus: ut *in verbis Dei cor Dei scrutaremur*, quemadmodum monet Gregorius Magnus.

§. V. Qui vero naturæ perscrutandæ pares non sunt, ii saltem studium Scripturæ divinæ continuent, in primis Evangelii, seu vitæ & doctrinæ Jesu Christi. At qui neutrum facere possunt, eos audire ex naturali officio debent, qui divinas hujusmodi veritates ex utroque fonte depromtas prædicant. Quicumque autem
hoc

hoc primum erga Deum officium transgrediuntur, ii si ex ignorantia in ceteris, quæ ex eo pendent, peccent, crimini ea ignorantia vertitur, quum sit voluntaria & *vincibilis*: nam ejus, quod scire officium est, ignorantia, voluntaria semper est; & *vincibilis*, quæ modica etiam diligentia evitari, quemadmodum superius demonstratum est. Velim hoc auditoribus suis doctores, & ovibus pastores sæpe ac serio prædicent: est enim honestæ ac sapientis vitæ principium.

§. VI. Jam vero nullum est Dei attributum, ex quo non aliqua & magna officia hominis adversus eum deducantur. Ex. gr. ex immensitate seu omnipræsentia Dei illud in primis proficiscitur officium, quod ad omnem vitam honeste transigendam vim habet plurimam: scilicet quoniam nos perpetuo sub oculis Dei versamur, in cujus conspectu *ne Angeli quidem sunt mundi*, ut loquitur Jobus, non decet nisi puros & sanctos esse. Quod si inter leges paganæ Theologiæ illa præcipue celebratur a Cicerone Lib. 11. de Leg. *ad Deos caste adeunto*; quam repetunt sæpe Seneca, & Juvenalis; quanto nos puriores esse decet, qui in veri, & potentissimi Numinis conspectu, hujus rerum universitatis creatore & gubernatore, perpetuo vivimus? Socrates parens ille philosophiæ moralis inter Græcos, quum templum intraret, hac precatione utebatur: *o Patris, atque cetera Numina, quæ hic adestis, date quæso ut intus pulcher efficiar.*

§. VII. Præterea ex immutabilitate Dei nascitur in nobis certissima promissorum spes, si ejus legibus conformem vitam duxerimus. Scilicet mutari Deus nequit, ut de spe in illum diffidere possimus. Itaque Paullus Apostolus quum dixisset, se vitam secundum decreta evangelicæ egisse, addit: *post hæc reposita est mihi corona justitiæ, quam reddet mihi in illa die justus judex*. Ex ejus quoque sapientia, & providentia nascitur interna illa animi quies & confidentia in sapientissimum nostri gubernatorem, quæ nos in adversis mirifice solatur, quæque in iis hominibus esse nequit, qui eo dementiæ, & impietatis devenerunt, ut aut nullum esse Deum suspicentur, aut nullam habere re-

rum humanarum procuracionem ; quorum idcirco tota vita stulta , fortuita , & miserrima sit necesse est .

§. VIII. Ex omniscientia , & omnipotentia existit item iustus timor , & cautio ne occulte quidem peccandi , quod occulta etiam , etiam cogitata animi , aperta sint , & nuda oculis ejus . Ex iustitia ut timor peccandi , ita consolatio , dum iniuste ab hominibus vexamur : nullum est enim crimen , quod Deus aut cito , aut sero tandem non puniat , atque temporis diuturnitatem gravitate supplicii compenset . Ex imperio in omnia proficiscitur nostrum obsequium , & servitus . Justum enim est , ut in supremum Universi Imperatorem obsequentissimi simus . Ex ejus incomprehensibilitate efficitur in nobis timor , & reverentia , dum de ejus natura , consiliis , operibus differimus , ut ne scilicet ultra fines suos vim rationis nostræ promoveamus . Præclare dictum est a Platone in *Timæo*, *Patrem, & Opificem Mundi invenire difficile : postquam vero inveniris , eloqui vulgo impossibile* . Sed hoc ipsum corrigit S. Gregorius Nazianzenus , affirmatque multo difficilius esse , *Deum invenire , quam vulgare* . Atque idem de ceteris Dei attributis dici potest . Res enim incomprehensibilis est Deus .

§. IX. Secundum hæc curanda sunt alia officia practica . Ea sunt aut interna , aut externa . Interna ad hæc præcipua referri solent , amorem , timorem , fidem , spem , gratiarum actionem , obediendi propositum , invocationem , & orationem . Externa sunt , primum non loqui de Deo , deque rebus divinis , nisi honorificentissime , atque ne joco quidem dicere male : nam quis nisi aut mentecaptus , aut impius audeat de tanta majestate ? Secundum , omnibus signis externis interna illa officia manifestare , ut alii ad similia excitentur . Tertium , veritates divinas alios studiose docere . Quartum , promovere Dei gloriam , & veram pietatem iis omnibus argumentis , quibus ejus attributa intelligentur , piis moribus , prædicationibus , scriptionibus : tantum , ne armis , ac terrore , quod impium est , & iniquum : *non est enim Religionis cogere Religionem* , ut ait Tertullianus . Posteriora hæc officia practica per
se

se ipsa manifesta sunt; de primis seu internis paullo copiosius dicemus.

§. X. Principio Deum amare oportere, & quidem super omnia, ac purissimo amore, quoad capaces sumus, naturæ ratio omnibus dicitur. Primum quia summe bonus est. Huc spectat quod Socrates dicere solebat, ipsam veritatem, & pulchritudinem, si sui vultum nobis sine velo ostenderet, incredibiles in nobis amoris flammæ accensuram. Deinde, quia Deus tantum summum nostri bonum est, in cujus fruitione beati esse possimus. Præclare S. Bernardus in tractatu de statu virtutum tomo II. *Homo*, inquit, *nec per se est, nec per se bonus est Deus enim per se est, & per se bonus est. In eo autem, qui per se est, & per se bonus est, finis nostræ beatitudinis constituitur; ergo in solo Deo*. Quæ & Plato sæpe prædicat. Quis hic ferat Casuistas quosdam, qui nullum ipsum per se ac peculiare esse amandi Dei præceptum inculcaverunt? Quos ego impios ne, an stultos dicam, ignoro.

§. XI. Tertio, quia is nos amat, amicosque vocat habetque, ut ex tot, quæ in nos perenniter confert, beneficiis patet. Quocirca & tertiam hanc amoris speciem, qui est amor gratitudinis, ei debemus. Quin quum perpetua ejus sint in nos beneficia, perpetuus quoque esse debet hic gratitudinis amor. Quarto tandem, quia vult a nobis amari, cujus rei argumentum est, quod cum desiderio insito summi boni nos procreat, quo veluti naturæ quadam lege ad eum rapiamur. Quantopere autem stultum est Deo ultro amicitiam nobis suam offerenti renunciare? Præclare Augustinus Conf. lib. I. cap. 5. *Quid*, inquit, *tibi sum ipse, ut amari te jubeas a me; & nisi faciam, irascaris mihi, & mineris ingentes miseria? parvane ipsa est miseria, si non amem te?* Quum porro amari Deus nequeat, nisi de illo cogitemus; ut perpetuo est amandus, ita præcipuum cogitationum nostrarum objectum esse debet. Quare monstro simile mihi videtur, inventum theologum (Christianum ne dicam pudor efficit); qui docere potuit, sufficere homini semel in vita actum amoris Dei concipere, Frontem hominis!

§. XII. Sed amandus quoque est Deus propter utilitatem maximam, quæ ex ejus puro amore pro præfenti vita in omnem hominum statum manat longe. Nam qui eum sapienter & sincero corde amant, ii & pacato animo vivunt in societate humana; & honesti, justi, ac reliquorum officiorum observantissimi sunt. Familias quoque honeste, & tranquille regunt, ac publicæ rei præpositi populorum felicitatem ex animo promovent. Quum contra qui non amant, tristibus curis agitantur, inquieti semper sunt, omnia turbant, suæ tantum utilitatis amatores, invidi, maligni, atque omnium scelerum architecti; ut intelligamus, nihil esse posse ea republica turbulentius, in qua aut plures hujusmodi homines procreantur, aut tales sunt, qui publicis rebus præfunt. Quicumque historiam humanam vel primis labiis degustaverunt, infinita habent hujus doctrinæ exempla. Itaque Origenes in epistolam ad Rom. Cap. xii. perspecte scribit, *ego puto, quod omnis caritas, quæ non est secundum Deum, simulata sit*. Enimvero tunc argumento est, non vere diligere Deum, qui non diligit proximum, ut disputat Johannes in Epist. i. ita non sincere, sed simulate diligere proximum, quicumque non recte, nec sincere diligit Deum. Maximum vero argumentum sinceri erga Deum amoris est studium officiorum, quæ nobis, quæ aliis, quæ Deo tandem debemus; totius scilicet justitiæ & honestatis: mentiuntur enim ii, qui Deum se amare profitentur, horum autem officiorum quasi immemores vivunt; quique aut iniqui sunt, aut inhumani, aut superbi, aut avari; nam amor Dei a divinarum legum observantia separari non potest, ac, ubi separatur, aut falsus est & simulatus, aut prava superstitio.

§. XIII. Tum timendus est Deus. Duplex autem est timor, quo Deus timeri potest, *Filialis, & Servilis*. Filialis cum amore conjunctus est, & ex amore nascitur; servilis vero ab amore est sejunctus, & nascitur a poena. Filiali timore timetur Deus, quia amatur: servili vero, non quia veremur ut Patrem, qui nos amat, sed quia formidamus ut Dominum potentissimum, qui punire possit severissime. Utroque timore

more Deus timetur utiliter, sed priore sanctius & purius: nam qui posteriore modo timet, leges quidem servat eo timore percitus, idque est profecto aliquid, præsertim in societate aliorum hominum; sed poenam magis timet, quam culpam: qui vero timet filiali amore, culpam magis, quam poenam veretur. Apposite B. Augustinus epist. nunc 145., olim 144., quæ est ad Anastasium data; *inimicus est*, inquit, *justitiæ, qui pœnæ timore non peccat*. Timendum autem esse Deum utroque timore brevissime demonstrari potest. Primum Deus est amandus ut bonus, ut pater, ut beneficus, ut ultimus nostri finis, quemadmodum demonstratum est: qui autem ita Deum amat, timet quidquam facere, quod ille improbet, non quia puniatur, sed quia veretur eum, quem amat, lædere. Deinde quum Deus potentissimus sit, ejusque voluntas immutabilis, certa est pœna, & immutabilis, quam ille peccatoribus minatur: itaque hac etiam ratione justus est Dei timor, & non sine magna vitæ socialis utilitate. Hunc *initium sapientiæ* vocat Hieronymus in proverbialia: illum sapientiam perfectam & consummatam.

§. XIV. Præterea quum sit Deus suprema ratio, atque summe bonus, & quidem immutabilis, dubitare nullo modo possumus, ne nos decipiat, ubi quidquam docet, aut promittit. Itaque si constet aliquid Deum docuisse, aut promississe, etiamsi id minus ratio nostra assequitur, certissimum illud habere debemus, nec ullo modo de ejus veracitate, aut fidelitate subdubitare. Talis enim dubitatio nequit non esse conjuncta cum maxima Divinitatis injuria: nam ne de amico quidem æquum est quidquam suspicari, quod cum vera amicitia pugnet. Quare fit, ut certissima fides Deo præstanda sit.

§. XV. Sperare quoque in Deum hominis pii præcipuum officium est. Duabus autem partibus constat hujusmodi spes. Primum sperare debemus esse eum remuneratorem virtutum; quia Deus, qui sapientissime, & munificentissime res omnes gubernat, suum procul dubio constituit virtuti præmium, nec pro sua sanctitate, & immutabilitate potest nos deludere. Et quan-

quam in ea nascuntur homines conditione, ut sine Dei gratia nihil mereri possint, quod ad æternam beatitudinem spectat, ut Christiana docet Theologia; Deus tamen tam bonus est, ut merita sua velut nostra coronet, quemadmodum loquitur alicubi S. Augustinus.

§. XVI. Alterum, quod sperare constantissime debemus, est, Deum poenas ab hominibus scelestis immutabiliter exacturum: nam ut virtutem remunerari, ita vitia punire proprium est sapientissimæ providentiæ. Nec si Deus differat, aut si impios, & pravos homines cumulare bonis terrestribus videatur, minus sperandum est. Nam, ut verbis nobilissimi historici Romani utar, *consueſcunt Dei immortales, quo gravius homines ex commutatione rerum doleant, quos pro scelere eorum ulcisci velint, his secundiores interdum res, & diuturnam impunitatem concedere.* Cæsar de Bel. Gall. Lib. I. Cap. XIV.

§. XVII. Obsequium erga Deum nascitur ex supremo ejus jure, ac dominio in omnia: correlata enim sunt dominus & servus, dominium & servitus. Tria autem complectitur hoc obsequium. Primum diligentem inquisitionem divinarum legum, quoad cujusque indoles, & status patitur: videri enim potest contemni Legislator ab eo, qui negligens est in ejus legibus addiscendis. Secundum legum istarum amorem, & vitam secundum eas institutam in timore: non enim obsequens Deo est, qui eum noscit tantum, sed qui secundum leges ejus vivit: *non qui dicit Domine, Domine, intrabit in regnum Celorum, sed qui fecerit voluntatem Patris, qui in Celis est.* Itaque desertores ego officii sui habeo eos omnes, qui, ut idem Christus servator noster docet, *longas orationes orantes*, quod reliquum est nihil verentur, lingua, manu, consiliis ceteros vexare, turbare, misere afflictere, idque, si superis placet, humanitate & caritate moti (a). Tertium

(a) *Subit hic animum illud divinitus a Chrysostomo dictum hom. xv. ad popul. Antioch. Audi Deum in mandatis, ut te audiat in precibus. Græca si quis malit, sunt, ΑΝΤΟΥ ΤΩ ΘΕΩ ΕΝ ΤΑΙΣ ΕΥΧΑΙΣ ΛΑΙΣ, ΙΝΩ ΤΩ ΑΥΤΟΣ ΑΝΤΩ ΕΝ ΤΑΙΣ ΕΥΧΑΙΣ.*

tium obedire Deo magis, quam hominibus, quippe qui supremus est nostri dominus, cui Reges omnes obediunt oportet, & *sub quo incurvantur qui portant orbem*, ut loquitur Jobus.

§. XVIII. Invocandus quoque Deus est, non quasi ignoret, quid nobis sit usus, sed duas præcipue ob rationes; tum quia id est argumentum nostri erga illum obsequii; tum quia ita animum nostrum ejus donis excipiendis præparamus; quam rationem precum, quæ Deo ab hominibus funduntur, Platonici constituunt, in primis Jamblicus. Petenda autem sunt a Deo primum omnium bona æterna; tum ea, quibus honeste præsens vita sustentetur. Monet Plato, in precibus non pecuniaria petenda, sed generatim orandum Deum; quia plerumque nescimus, utrum quæ petimus, sint vera bona. In quo cum dogmatibus Christianæ religionis consentit. Nam Christus Dominus noster discrete docet sic orandum Deum, *fiat voluntas tua*, increpatque ignorantes homines, *nescitis quid petatis*. Porro oratio a toto quidem homine facienda est, sed mente magis, quam corpore; non enim oratio est, quæ labiis tantum fit, non etiam corde: quia homo non corpus est, *sed animus rationis particeps, corpore utens*, ut præclare ait Plato. Itaque veteres Christiani Patres orationem esse ajunt, mentis ad Deum elevationem, & *divinarum rerum ac legis meditationem*, ut vocat Psalmista, & *colloquium cum Deo* (a). Quare Augustinus ait, Christum orationem, quam *Dominicalem* vocamus, verbis quidem docuisse, ut sese nostro intelligendi modo adaptaret, sed animo tamen & mente peragendam. Egregia sunt, quæ super hac re differit in duobus aureis libris *de sermone Domini in monte*. Legi quoque meretur Moralis Christiana Floriotti.

§. XIX. Tandem quum beneficium, & gratiarum actio sint inter se correlata, ut illo posito, & hæc sequatur oportet; nos vero perpetua a Deo beneficia accipiamus; perpetuas illi gratias agere debemus, & ut

(a) Chrysost. hom. xxx. in Gen. η ευχη διαλεξις εστι προς τον Θεον. Clemens Alex. Strom. viii. ομιλια προς τον Θεον.

ut animum humilem , ac gratum testificemur , & ut nos dignos conservemus , quibus Deus bona sua cumulatius impertiatur . Pertinent ad actionem gratiarum etiam externa quædam signa grati animi , præsertim in Civili societate . Quo illud spectat Evangelii , *sic facite opera vestra bona , ut videant vos homines , & glorificent Patrem vestrum &c.* Ita enim alii ex aliorum exemplo componimur . Itaque recta ratio Deo sacrificandum præcipit , non quasi terrestrium rerum indigeat , sed in argumentum nostræ adversus illum servitutis , qua omnes concuti plurimum in societate refert . Veterum gentium maxima pars quum solius corporis sensu , & voluptate bona perpenderint , Deoque non cælestem , sed humanum tribuerint sensum , terrenæ bona Diis suis offerebant , illis necessaria , & grata credentes esse , quæ nobis , quemadmodum observat Lactantius Lib. VI. Cap. II. Sed & Christiana doctrina , & naturalis ratio æque dicant , non hæc terrena bona , sed animum innocentem , & incoctum generoso petus honesto Deo propalam atque in hominum consortio sacrificandum . Præclare idem Lactantius eodem loco Cap. I. : *nihil sancta , & singularis Majestas illa ab homine exigit , quam solam innocentiam .* & Cap. II. *hæc est , inquit , religio cælestis , non quæ constat ex rebus corruptis , sed quæ virtutibus animi , qui oritur e Cælo . Hic verus est cultus , in quo mens colentis seipsam Deo immaculatam victimam sistit .* Quid autem causæ fuisse dicemus , cur Deus in veteri lege animantium sacrificia præceperit ? Censet Theodoretus , hæc sacrificia non fuisse apud Judæos præcepta , sed permissa tantum , ne Hebræi , qui inter gentes idololatrias in Ægypto educati erant , & terrenarum rerum sacrificiis assueti religionem sine ullis externis symbolis , quod rudes agrestesque homines efficere parati sunt , desererent (a) . Ac vero difficile est , nisi tota humana natura :

(a) Theod. quæst. I. in Levit. Idem docet Epiphanius heresi 66. Chrysostomus quoque hom. 166. tom. v. Concessit Deus , inquit , Judæis ab initio sacrificiorum cultum , *ἐκ ἀναγκῆς τοῖς Ἰουδαίοις , ἀλλὰ βυλόμενος αὐτὸς ἀπὸ τῆς εὐχρηστίας ἀποστῆναι* , non quod

tura commutetur, hominem, cujus major pars sensus est & phantasia, sola intelligibili religione Deo devincere: ipse enim suapte natura ad sensum & phantasia statim dilabitur. Quanquam & alterum extremum cavendum est, ne ejus rei causa tota crusta ac sine medulla religio evadat, qualis Ethnicorum superstitio fuit, quos idcirco Apostolus *Atheos* appellat (a). Sed & fuere sacrificia illa Hebræis præcepta veluti symbola sacrificii Christi, quod sæpe memorat Paulus Apostolus. Pertractat hanc quæst. copiose Johan. Spencerus de legibus Hebræorum ritualibus.

CAPUT III.

De Officiis Hominis adversus seipsum, ac primum de iis, quæ cum toti homini, tum corpori debet.

§. I. **E**X iis, quæ in superiori libro demonstrata sunt, constat, lege naturæ nos obligari ad nostri amicitiam, custodiam, & culturam; ut idcirco quidpiam voluntarie efficere nequeamus, quo deterior nostra fiat natura, aut ea scientes & prudentes negligere, quæ ad nostri custodiam, & culturam sunt necessaria, quin violatæ legis naturalis apud Deum ac homines sumus rei, ac propterea a nostri felicitate longe aber-

quod delectaretur sacrificiis, sed eos hac ratione volens a Gentilismo abstrahere. Vide & Justinum in Dialogo cum Tryphone, & Hieronym. in cap. 1. Esaie. Veterum populorum sacrificia oblationes fuisse rerum inanimatarum, ut ostendit Porphyrius de abstinentia. Diserte id cavit Numa Romanis, ut scribit in Numa Plutarchus. Hinc mores simpliciores minusque truculenti. Invectis vero victimis ac mactatione animantium crudeliores evasere, hominesque ipsos immolaverunt.

(a) Ita appellat Ephesios cap. 2. v. 12. Vide Clem. Alex. in Protreptico. Theodoretus Therapeut. serm. III. tom. IV. Haud illi soli habendi sunt Athei, qui penitus dicunt Deos non esse, ἀλλὰ καὶ πολλοὶ μὲν Θεῶν, sed & qui multos Deorum ordines fabulati sunt. Quin ipsos quoque in Atheis habet, qui ἐς πολλὰ το Θεῶν, in multa numina Deum unum partiuntur. Oecumenius Atheum habet quemcumque qui ἐξω τῆς εὐτολῆς τῆς εὐαγγελικῆς, extra præcepta Evangelica vivit. Com. in II. Joan. ep. Quod aliquando durius videri potest: sed habet suum verum intellectum.

aberremus, quæ solius sapientiæ & virtutis effectus esse potest, ut miseria ignorantiae & vitii. Enimvero præterquam quod nemo est tam rerum humanarum insciens, quem id latere possit, quod cujusque natura docet, & conscientia; quodcumque ex superioribus systematibus, quibus *principia* legis naturæ *cognoscitiva* constituimus, complecti placet, demonstrari perfacile potest, hominem sui culturæ, & perfectionis negligentem legibus naturæ adversari, atque recta in miseriam ire. Nam si Grotii placuerit systema; intelligetur, societatis sollicitum esse non posse, qui sui curam negligit. Si vero Pufendorffii, deducet quilibet aperte, se ex naturæ lege sociabilem præstare debere, & propterea sui perfectionem curare. In Cumberlandi vero systemate cura partis; ejusque benevolentia & amicitia necessaria est ad curam, benevolentiam, & amicitiam totius hominum generis. Id ipsum dictum esto de systemate Heineccii. In systemate Wollasthoni, quoniam naturales rerum relationes sectandæ sunt; relatio vero naturalis, quam nobiscum habemus; amicitia est intimæ ac primæ; sequitur debere esse nobis amicos, ac propterea perfectionem nostram curare. At in systemate Wolfii a nostri cura & perfectione tota naturæ lex explicatur (a).

§. II. Videbitur fortassis alicui superfluum esse ea de
re

(a) Postremo lex illa naturæ generica, jus suum cuique tribuere, & nostra nobis tribuenda docet: perabsurdum enim fuerit nos e numero hominum subtrahere; cumque justis humanique adversus alios simus, in nos esse & iniquos, & immanes. Quanquam haud ego facile existimaverim jura aliorum servare cum posse, qui sua aut stulte, aut serociter violet; neque quemquam hominem cum hominibus esse posse; qui primum secum esse non didicit. Quin ab ejusmodi fonte si quis totam eam iniquitatem, immanitatemque qua alicubi gentium sevitur, derivari prædiceret, is mihi rem acutè retigisse videtur: nam quidam sunt nondum homines: alii, quum plusquam homines esse superbissime voluerint, humanitatem omnem exuerunt. Caligula vox fuit & atrox, & stulta, omnia mihi licent (Sveton. in Calig. cap. 29.). Jovi scilicet humano nihil magis in natura sua placebat, quam ἀδίκτης, inimitis animus ac pertinax, nulloque sædere humanitatis ceteris hominibus sociatus. Vide Plat. lib. v. de leg. O Pulchra!

re præcipere, quum a natura ipsa ad nostri tutelam & perfectionem rapiamur, quod nobis cum omnibus animantibus commune est. Statim enim atque animalia nata sunt, ut sint, & bene sint, a natura incitantur, sibi que commendantur. Non ego id diffiteor. At quoniam in eo ut nos ex recta ratione amemus, & perficiamus, idest ut nobis amici simus, peccare facillime possumus, peccamusque frequentissime; accurate id, si quidquam aliud, efficiendum est, hoc est ex certis, & immutabilibus regulis. Perspecte Seneca *de Vita beata* Cap. I. vivere, inquit, omnes beate volunt: sed ad pervidendum quid sit, quod beatam vitam efficiat, calligant: adeoque non est facile consequi beatam vitam, ut ab ea eo longius quisque recedat, quo ad illam concitatus fertur, si via lapsus est.

§. III. Duplex habet objectum nostri studium, & cultura. Primum vitam hominis animalem, ac bona, quæ hujus vitæ sunt propria, eique transigendæ necessaria: alterum mentem, & ea, quæ ad mentem, idest vitam rationalem, pertinent. De prima cultura in hoc capite differemus, de posteriore in sequente. Vita hominis animalis posita est in unione mentis & corporis, atque in earum facultatum exercitio, quæ corpore velut instrumento exercentur. Quod igitur ad hanc vitam pertinet, considerata sunt. I. vita ipsa: II. ejus finis: III. exercitium eorum actuum, quibus is finis obtinetur: IV. instrumenta actuum hujusmodi: V. usus bonorum, quibus hæc vita ducitur. Super quibus ea nunc sunt paucis præcipienda, quæ ex lege naturæ derivantur.

§. IV. Ac principio vitæ hujus nemo dominus est, ut ad arbitrium projicere eam possit. Quum enim proficiscatur ab unione mentis & corporis, cujus causa Deus est, a Deo immediate est. Qui non nostra sponte huc venimus, sed summi imperatoris jussu, qui eo injussu abscederemus? Itaque aut vi abrumpere, aut gladio, laqueo, veneno, præcipitio finire, aut neglecta cura abjicere, velut inedia, aut ignavia adversus pericula, aut ejusmodi interituum causas struere, est supremam Dei legem violare, ac adversus illum

Aum esse perduellem . Præclare prorsus Plato in Phædone , *in custodia* , inquit , *quadam positi sumus , neque decet quemquam ex ea seipsum solvere , neque aufugere .* Et Lactantius Lib. III. Cap. 14. *Sicut* , inquit , *in hanc vitam non nostra sponte venimus , ita rursus ex hoc domicilio corporis , quod tuendum nobis assignatum est , ejusdem jussu recedendum est , qui nos in hoc corpus induxit , tamdiu habitaturos , donec jubeat emitti .*

§. V. Quamobrem probari nullo modo potest , quod apud veteres quosdam populos fieri solitum fuisse legimus , quodque fit etiam nunc apud barbaras nonnullas gentes , ut quum ad eam ætatem quis proventus fuisset , in qua aliis inutilis , sibi gravis esset , ipse sponte sua præsidia mortis sibi arcefferet , veluti apud Indos ; quod , præter alios , retulerunt Strabo Geographus , & Curtius de rebus gestis Alexandri ; apud Taprobranenses , de quibus Diodorus Siculus Lib. III. Cap. 58. atque apud alias nationes , quarum exempla produxit Pufendorffius de jur. natur. , & gent. Lib. II. Cap. 2. Porro quis probet inhumanam eam legem , quæ extitit apud Cæos , *ut majores sexaginta annis acognito vitam finirent , quo reliquis cibaria sufficerent ?* Hutentotti incolæ caritatis bonæ spei senes labori & vitæ sustentandæ ineptos tuguriis claudunt , relictis paucorum dierum cibariis , quibus assumtis pereant necesse est , ut retulit Kolbi in ejus loci descriptione . Quin referunt viatores quidam , apud gentes Americæ Borealis , quas *Exquimaux* vocant , usu obtinere , ut Patres familiæ , postquam nimirum ad decrepitam ætatem pervenere , liberis parricidium imperent , liberisque quasi pro sui officio parere . Sunt hæc inhumana & barbara & natura pugnantia . Fatum præstoletur oportet , quicumque non pro sui arbitrio hic genitus est ; quod antevertere est indignari humanitatem . Quam in re (absit verbo invidia) servantiores naturæ legis sunt brutæ animantes , quam homines plerique . Siquidem eorum nulla , quod sciam , sibi mortem conscire audeat . At homines , quasi sublimiori loco nati , id sibi prætendunt privilegii , ut & vitam odisse liceat , & animas projicere .

§. VI. Sed nec illud probandum est, licere ipsum se interimere, si alias cum probro adversus Deum victurus sit, qua ratione Rabbinus mortem Samsonis excusant. Nam si invitatus passus sis, nihil est, cujus jure argueris: si sponte adiisti, non morte purgandum, sed poenitentia. Tandem ne licitum quidem esse potest se occidere ad servandam virginitatem, aut pudicitiam, quod quidam censuerunt: ut idcirco quamvis ignoscamus iis virginibus, quas legimus, ut virginitatem, & pudicitiam servarent, divino quodam impulsu se se interemisse; id tamen per legem naturæ fieri posse negamus. Minus quoque ad corpus impudice violatum eluendum, quod Lucretia Romana matrona fecisse fertur. Conferatur Beatus Augustinus Lib. I. de Civitate Dei Cap. 16. Horum omnium una ratio est, quod non liceat in nos id juris præripere, quod proprium Dei est, obligemurque diserte lege naturæ ad nostri jus custodiendum, quoad in nobis est. Cicero lib. VI. de Rep. *Nisi enim, inquit, quum Deus is, cujus hoc Templum est omne, quod conspicias, istis te corporis custodiis liberaverit, huc tibi aditus patere non potest: homines enim sunt hac lege generati, qui tuerentur illum globum, quem in hoc Templo medio vides, quæ terra dicitur Quare & tibi, Publi, & piis omnibus retinendus est animus in custodia corporis, nec injussu ejus, a quo ille est vobis datus, ex hominum vita migrandum est, ne munus humanum a Deo defugisse videamini.*

§. VII. Jam illud in quæstione positum est a viris doctis & eruditis, an aut ob summam calamitatem, quæ sit morte ipsa intolerabilior, aut ob certitudinem instantis atrocissimæ, vel ignominiosæ mortis se liceat necare, naturæque fatum tantisper anticipare? Plato Lib. IX. de Legibus negat quidem ob alias causas licere sibi mortem consciscere: sed excipit hunc casum, de quo disserimus, nempe ubi quis tristi, & inevitabili fortunæ impetu cogitur. Idem docuit Cicero Lib. I. Quæstion. Tusculan. Nam postquam memorasset mortem Socratis, & Catonis Uticensis, addidit, *vetat dominans ille in nobis Deus injussu hinc nos suo demi-*

grare. Quum vero causam justam ipse Deus dederit, ut tunc Socrati, nunc Catoni, sæpe multis, nã ille medijsfidius vir sapiens latus ex his tenebris in lucem excesserit illam, nec tamen vincla carceris ruperit, (leges enim vetant) sed tanquam a Magistratu, aut aliqua potestate legitima, sic a Deo vocatus exierit. Scribit idem sæpe Seneca. Celebrat hanc ob rem Pomponii Attici excessum Cornelius Nepos in ejus vita: is enim quum sanus ac validus ad septuagesimum septimum annum pervenisset, tandem incidit in morbum, qui quum tres post menses invalesceret (a), neque ulla medicina curari posse videretur, inedia mori in animum induxit, idque perfecit (b). Hæc tanti fecit Pufendorffius ut Lib. II. de jur. natur. & gent. Cap. IV. §. 19. quæstionem in medio ferme reliquisse videatur.

§. VIII. Sed negandum omnino est. 1. Nulla enim naturæ necessitas talis ac tanta esse potest, ut id nobis imperium in nos transferat, quod Dei est proprium, quale est jus vitæ, & necis: nulla tam clara naturæ vox, quæ nobis exceptionem prædicet adversus vitæ amorem insitum individuumque. Deinde non levem id providentiæ Divinæ aut diffidentiam, aut violentiam-

(a) *Corn. Nep. cap. xxi.* subito tanta vis morbi in unum intestinum prorupit, ut extremo tempore per lumbos fistula putris eruperit.

(b) *Nam* quum in dies dolores accrescere, febremque accessisse sensit, Agrippam generum ad se arcessiri jussit, & cum eo L. Cornelium Balbum, Sextumque Peducæum. Hos ut venisse vidit, in cubitum innixus, quantam, inquit, curam, diligentiamque in valetudine mea tuenda hoc tempore adhibuerim, cum vos testes habeam, nihil necesse est pluribus verbis commemorare. Quibus quoniam, ut spero, satisfeci, me nihil reliqui fecisse, quod ad sanandum me pertineret, reliquum est, ut egomet mihi consulam. Id vos ignorare nolui. Nam mihi stat alere morbum desinere. Namque his diebus quidquid cibi sumsi, ita produxi vitam, ut auxerim dolores sine spe salutis. Quare a vobis peto primum, ut consilium probetis meum: deinde ne frustra debortando conemini. Hac oratione habita tanta constantia vocis atque vultus, ut non ex vita, sed ex domo in domum videretur migrare cum cibo se abstinuisset die quarto, postquam id consilium inierat, decessit. *Nep. ibidem.*

lentiam continet. Nam si Deo omnia sapientissime gubernanti in eas rerum angustias conijcere placet, quæ videantur intolerabiles; credendum est, id e re nostra esse, adeoque nullo modo licere adversari, nisi aut de sapientissima Dei gubernatione diffidere velimus, aut aperte eam violare parati simus: utrumque autem est contra officia, quæ Deo debemus, quæque sunt prima, & maxima. Tum ne fortitudo quidem est sic vitam projicere; quum fortius mala tolerantur, quam iis cedatur, ut præclare disputat Aristoteles. Id quod vetus poëta eleganter cecinit,

Rebus in adversis facile est contemnere vitam:

Fortius ille facit, qui miser esse potest.

§. IX. Interim quanquam hunc in modum vita custodienda est; mors tamen, cujus nos nec negligentia, nec vi illata, causa sumus, omnino contemnenda est, aut saltem non valde timenda: quippe quæ & finem præsentium calamitatum facit, & principium alterius vitæ beatæ in hominibus piis, & iustis. Dici non potest quantopere in vita pacate ac libere ducenda contemptus mortis juvet, ac quantopere nos negligentes & pigros, atque in omnibus rebus timidos efficiat nimius ejus horror. Ut autem non valde timeatur; quotidie animo volutanda est, atque in familiaritatem adducenda. Præterea illud sæpe animadvertendum est, stultum esse expavescere, quod evitare nequeas. Sunt veterum Philosophorum dicta quædam, & facta præclara, quibus animus ad mortem contemnendam erigitur. Imprimis legenda est Oratio Socratis, quam in Phædone retulit Plato, primus Tusculanarum Tullii Liber, atque plures eandem in rem Senecæ Epistolæ. Non ignoro hanc animi fortitudinem a temperamento potius in nobis gigni, atque educatione indurari, quam ab eruditione & meditatione informari: sed scio quoque metum sæpe ignorantia & errore augeri, ut is magnam ejus partem demere possit, qui inanes causas quasdam, quæ eum intendere aptæ sint, agnoverit.

§. X. Ac vero plures sunt, quos perturbat vulgare præjudicium, dolorum sensitivorum omnium maximum

esse, qui ex separatione corporis & animi sentiri dicitur. Inane terriculamentum : nam quum ea conjunctio nullis corporeis vinculis contineatur, sed posita sit in sola harmonia animi, & corporis a voluntate Dei pendente; ubi cessat, nullum ipsa per se sensitivum dolorem creare potest, ac proinde nullus ea in re esse potest in morte dolor, nisi mors contingat ex partium corporis violenta contusione, dilaceratione, inflammatione, constrictione, aut similibus causis. Quæ satis eorum experientia constant, qui aut lethargo, aut phthisi, aut apoplexia correpti moriuntur. Quod si quis angitur, quod necesse sit moriturum, quæcumque in hac vita amavit relinquere (qui certe dolor ille est in morte maximus), is assuescat rebus hujus vitæ utendis velut in transitu, non ita fruendis, quasi sempiternum habere possit : namque stultum est iis tuto confidere, velutque immobilia complecti, quæ non solum deficere possunt, verum aliquando debent. Tandem si perturbetur a conscientia vitæ non bene actæ, is det operam, ut præterita vitia emendet, ac virtutem perpetuo colat, ac constantissime sectetur : cetera lætus sit, & spei plenus bonæ. Hæc, dicet aliquis facilius prædicantur, quam efficiuntur. Neque ego abnuero. Sed ita fit, quod & a morum disciplina jamdudum recesserimus, & abdomini, omnique mollitudini sueverimus. Nam ego agrestes barbarosque homines constanter mori legi plurimos; nostrosque paganos labore & inopia obtritatos, sæpe Catone fortiores vidi: cum in urbe luxu & deliciis disfluente, ac ubi vivere nihil est aliud, quam omnigenis voluptatibus contabescere, putrescereque, nihil vel remotissimæ etiam mortis suspitione horribilius, atque formidolosius.

§.XI. Quum constet lege naturæ obligari nos ad vitæ custodiam, quæritur quousque ea peragenda sit (a)?

Re-

(a) *Quæsitum sæpe memini, quid factu opus esset super dubia, aut non sine periculo, medicina. Ego cum morbo comparandam atque appendendam esse censeo. Si ille certam mortem minatur, etiam dubia expediendæ salutis via tentanda; namque habet dubietas certi particulam aliquam, quæ vitæ consultat; at certa mors est. Quod si incertum sit utrumque, probabilitates velim estimari.*

Si

Regula generalis est, non teneri nos vitam tueri cum pari periculo vitæ, aut subeundo malum, quod ipsa morte sit atrocius. Primum, perire ne peream, me amicum occidere, ne occidam, tantumdem est, ac legem violare naturæ, ne violem. Deinde subire malum, quod sit morte ipsa atrocius, & nos in statum continuatæ per aliquod tempus mortis conjicere, est perpetuo perire, ne semel pereamus; ad quod lex naturæ nullo modo nos obligat; quia non potest nos ad contraria obligare. Itaque in his vitæ humanæ casibus licet patientes nos naturæ vi & imperio commodare, seu, quod dicitur, *mere passive* nos habere. Inde responderi potest quæstionibus, sumenda ne sint ægroto remedia morte ipsa atrociora? positus in statu certæ mortis teneatur ne subire periculum mortis, quo priorem statum evadat?

§. XII. Superiori regulæ addenda est altera, scilicet nos non obligari ad vitam tuendam & perficiendam supra nostras vires, aut supra cognitionem nostram; tametsi teneamur ex naturæ lege vires nostras conservare, & perficere, atque eam nobis bonorum, & malorum cognitionem comparare, quæ vitæ tuendæ, & perficiendæ sit necessaria, idque quatenus naturæ nostræ conditio & status permittunt. Prius inde probatur, quod nemo obligari potest ad eas res, quæ vires suas excedunt, utpote *relative impossibiles*. Posterius vero ex eo, quod quilibet pro virili parte ut toti generi humano, ita sibi consulere debet, quemadmodum in superiori Li-

P 3

bro

Si periculosior morbus est, quam remedium, & adhibendum est, & interdum necesse est, ne desertæ vitæ custodiæ rei simus. Quo ego magis miror repertos theologos, qui dubitarent, alios qui verarent, inseri ne variolæ possint. Nam & morbus, si genus mortalium spectes, certus est; & nisi inseris, qui mortem evadunt, eam prope habent rationem, quam 13 aut 14 ad 1.; cum postquam insitio adhiberi cœpta est, qui inde intereunt, constantibus experimentis, rationem habent longe majorem, quam quæ est inter 1. ad 400. Sed cum alias, tum hac præsertim in causa patescit, quæ utopere theologo & supputandi ars, & naturæ historia necessaria est; qua destitutus, non incomptus modo & impolitus, sed iners sæpe est attonitusque. Verum hæc alibi commodius copiosiusque disseremus,

bro demonstratum est: quod ubi facere negligit, amicitia, quam sibi debet, desertor est: jura ingenita violat.

§. XIII. De nostri adversus invasores tuitione prolixè disputari solet. Egit ea de re Grotius Lib. II. de Jure belli, & pacis, & Pufendorffius de Jure Naturali, & Gentium Lib. item II. Cap. V. Nostri defensio vel sine læsione invasoris agi potest, vel nonnisi cum ejus læsione, aut nece. Quin licitum sit vitam priorè modo defendere, territando nimirum, aut minitando, sine ulla læsione invasoris, nemo unquam dubitaverit. Id immo præceptum esse censeo: nam qui ita evitare mortem potest, nec efficit, is sui negligit custodiam, & amicitiam, ac proinde non minori crimine tenetur, quam qui se ultro interficit, aut qui amicum, quem servare potest, deserit. Quomodo & qui arcem, quam tueri facile potuit, inertia, aut panico timore deserit, & qui eam prodit hostibus, æque adversus Principem peccat.

§. XIV. De posteriori modo quæstio est aliqua. Quin autem & hoc modo licita sit nostri defensio, quum injuste invadimur, si principia rectæ rationis consulamus, vix dubitare possumus. Nihil enim magis in Natura perspicuum esse potest, quam licere nobis vi & armis ea jura defendere, quæ nobis a Deo tributa sunt, quæ profecto frustra datæ nobis essent, nisi tueri liceret. Naturam nobis primum conciliare ut simus, & bene simus, secundum nos, alios: generis humani amicitiam a nobis incipere: item a nobis incipere curam & custodiam societatis. Itaque nihil verius unquam scriptum fuisse censeo, quam illud, *vim vi repellere omnia jura sinunt*, quod ea lex non scripta sit, sed nata, ut præclare Cicero disserit pro Milone.

§. XV. Nec vero hoc jus me defendendi cum alterius nece, ejus scilicet, qui me injuste invadit, ab illius adversus me culpa nascitur, sed a natura ipsa mihi tribuitur, quæ statim ac natus est animans quilibet, illum sibi conciliat, & ut existat, & se custodiat. Idcirco si qui me invadit culpa adversus me vacet, non minus licitum est me adversus illum defendere, quam adversus feram irrumpentem. Hoc vero intelligendum

semper est cum moderamine inculpatæ tutelæ, modo scilicet ac modestia; quæ in eo posita est, ut si minimo possimus aut nostri, aut invasoris malo periculum amoliri, id potius efficiamus, quam ad necem confugiamus: id enim suadet lex amoris erga proximum. Quod moderamen qui non servat, potest etiam in ea defensione esse homicida, quæ pro sui custodia instituitur, quando scilicet ad eam custodiam agendam homicidium necessarium non erat. Præterea id non odio invasoris agendum est, aut vindictæ cupiditate, sed vitæ jurisque sui servandi amore. *Bellum habeat necessitas, pax voluntas*, inquit Augustinus. Nulla enim in re κακοπαθεια, pravi animi affectus, optimus legis interpret esse possunt.

§. XVI. Ut autem definiatur tempus licitæ defensionis, distinguendum est inter *statum civilis imperii, ac naturæ*. Brevius est in priori statu defensionis intervallum; quippe in quo statu ope civilis imperii quilibet sibi cavere potest. Itaque tempus licitæ defensionis occisivæ tamdiu in eo durat, quamdiu præsens periculum, idest ad breve admodum tempus. Scilicet in societate civili Principis est, non privati civis, tutela & vindicta; ut nemo possit præripere, quin adversus legitimum imperium perduellis sit. At in statu naturali durat tamdiu, quamdiu hostis non est eo rerum redactus, ut nequeat amplius nos lædere. Ut vero intelligatur, utrum ad hunc statum adductus sit, qui nos invasit, argumenta sumenda sunt aut ex sincera ejus protestatione, aut ex depositis viribus, aut ex datis obsidibus, seu pacis pignoribus, aut similibus argumentis. Ex his vero intelligitur, quum Principes, & Republicæ sint inter se in statu naturali, quousque liceat Principi, aut Reipublicæ adversus Principem, vel Rempublicam esse in armis, & se defendere. Hoc autem in loco & illud animadvertendum est, fieri posse, ut invasor transeat in locum ejus, qui invaditur, velut si qui invasit compum deferat, & veniam precetur, tu interea non desistas a persequendo; quo in casu habebit ille omnia ea jura, quæ sunt defensionis, præterquam si aliqua justa poena ob priorem invasionem dignus sit.

§. XVII. Porro ea defensio non pro vita tantum jure fit, sed etiam pro membris, & sanitate: item pro pudicitia tuenda: præterea pro bonis omnibus, aut magna eorum parte: tandem pro nostris consanguineis, amicis: ac tandem pro quocumque homine, qui non jure invaditur. Priorum propositionum ratio est, quod per naturam liceat propria jura, quæ vitam attinent, defendere: quod hujusmodi læsionem ego pati non teneor, ac proinde jure meo propulsare possim quoscumque injustos invasores. Nempe explorati juris naturæ est, *quod tu mihi facere non jure paras, me pati non tenere, ac omni modo ipsum per me propulsare posse, si locus non sit adeundi magistratum*. Nam natura nobis primum nos conciliat atque commendat; mox civitati. Postremæ vero propositionis ratio ex cura & tutela societatis proficiscitur: hæc enim tutela esse debet omnium adversus omnes. Hæc doctrina extendi potest ad quascumque alias atroces corporis injurias, quas quia pati non teneor, jure meo possum propulsare, non ut alium lædam, sed ut me ab injusto invasore defendam. Sed recolendum semper est, cum moderamine & caritate hanc agendam esse jurium nostrorum defensionem, præstareque interdum injuriam pati, quam facere (a).

§. XVIII. Ceterum hæc ita accipienda sunt, ut liceat tantum me defendere, ne quocumque modo lædar. At alia ratio est, si læsus sim: tunc enim in me nullum

(a) Pro vita tuenda, si nulla alia suppetat ratio, haud ego unquam negaverim licere invasorem obtruncare. Pro pudicitia (quam id in agrestibus gentibus usu facilius venerit, quam in politissimis) nonnihil dubito. Furem raptoremque bonorum ac abigeum interfici posse, & Hebræicæ, & Romanæ leges permittunt. Ego tamen ambigo, utrum privatis personis id ipsum juris competere possit, quod civitati ac summo imperio. Sed ne illæ quidem Draconis leges probari posse videntur, ut si quis teneros caules, aut rapas, aut pira, fuscusque subripuerit, morte in eum animadvertatur. Vide Plutarchum in Solone. Illa vero mihi intoleranda videntur, ac horrida, quæ nostri Casuistæ præceperunt, licere privatis vel drachmæ furem necare: vel gravis litis intentantem: vel infamie architectum haud facile eluendam. In quibus ignoro naturæ ne magis æquitatem, an christianam æquanimitatem, & patientiæ legem revellere voluerint.

nullum amplius jus est ulciscendi, dummodo qui læsit ab ulteriori injuria inferenda cessaverit, &, si quod mei jus læsit, refarcire sit paratus. Nempe jus illud me defendendi mihi competit, ut ne lædar, non vero in præteritam læsionem animadvertendum. Tum ut læsa jura recuperem, non ut iniquum puniam. Itaque ultio nec in statu civili, nec in naturali privato homini sui causa licet, quia non necessaria ad nostri custodiam. Quare non solum adversus Christiana dogmata, verum etiam contra regulas naturæ ii peccaverunt Casuistæ, qui docuerunt, acceptam alapam nece vindicari posse. Sed animadvertendum est, non comprehendendi sub hac vetita vindicta, si quis eum qui læsit, pœna aliqua cogat, aut ut læsionem refarciat, aut ut emendetur, ne se vel alios similiter deinceps lædat: Nam ea tantum est justa, & licita pœnitio, quæ rei emendationem procurat. Vide Grot. de Jure Belli, & Pac. Lib. II. cap. 20. Sed in civili imperio idem per magistratus procurandum: in Republica enim jus gladii ac vindictæ solus habet imperans. Quare probari non possunt Turcarum alicubi mores, qui homicidam læsæ parti dedunt ad noxam: severius enim sui quilibet injurias ulcisci paratus est, quam magistratus. Fertur, Platonem discipulo cuidam iratum, quum elevato ad feriendum brachio hæreret, rogareturque, quid rei ageret, respondisse, *pœnas exigo ab homine irato*, simulque Xenocrati, viro mitissimo, ut in eum animadverteret præcepisse. In statu naturali quilibet sui ac rerum suarum procurator est. Interim consulenda est recta ratio, non affectibus tantum auscultandum, ne qui ratione longe belluas excellere gloriamur, vita ipsa & moribus imitemur. Itaque Huttentotti tametsi nullo civili imperio contineantur, tamen ejuscemodi aut crimina, aut injurias, non læsis committunt, sed in communi seniorum concilio vindicant. Vide Kolbi.

§. XIX. Super duellis disputari solet. De provocante in civilis imperii statu nulla esse potest apud viros bonos, & legum naturalium gnaros controversia: tam enim non licet ob quascumque acceptas injurias alium provocare ad duellum, quam non licet privata vindicta:

Etā: est enim duellum, ita ut nunc accipimus, *privatum duorum bellum*: nam quod postea *bellum*, id *duellum* dixere veteres Latini. Plautus, *domi, duellique*, pro *domi, bellique*, ut postmodo suevit. Horat. *Gracia lento barbariae collisa duello*, idest Trojano bello. At jus belli, ut commodius docebimus, in civitate nemini, præterquam summo imperio convenit. Itaque privata certamina juris vel defendendi, vel experiundi, vel prosequendi, sunt usurpationes jurium imperantis. Omnis autem alterius juris usurpatio aut contrectatio lege naturæ vetatur. Quid, dicet aliquis, tota olim Europa permixta? Primum, ajo, usurpata privatis magis, quam permixta fuisse; idque velut vestigium antiquæ barbaræ ac agrestis gentium vitæ. Tum si lege & imperio permixta, non privata fuere judicia, sed publica: ea tamen ipsa temporum inconditorum vi extorta. Quid facies hominibus vim & naturam humanam solo corporum robore æstimantibus? At ejusmodi fuit illa ætas. In statu vero naturali, ubi nulum est ad communes Magistratus confugium, tum licet, quum qui læsit, aut datam injuriam resarcire nequit, aut adhuc inuasor est, idest adhuc perseverat in lædendo, nec alius modus superest, quo ejus pertinacia reprimi possit: id enim poenæ magis, quam ultionis rationem habet. Atque hæc est plerorumque bellorum legitima causa; qua de re loco suo.

§. XX. De provocato in diversas partes iverunt docti. Si res e suis principiis derivetur, certum est, si fuga non sine periculo sit futura, non teneri provocatum fugere, sed tuto expectare pede posse invasorem, atque se defendere: scilicet eo in casu nulla alia ratione justa nostri defensio agi potest; ac fugere, vitam est prodere; ad quod nemo natura tenetur. Id tamen intelligitur, dum repentine subitoque invadimur: nam si per internuncium, aut epistolam provocemur, nullo modo licet provocanti consentire, quandoquidem id esset non nos defendere, sed alterum invadere: esset inculpatæ tutelæ defensionem migrare, ut quum declinare periculum possimus, nos potius contra audentissimi pergamus. Excipio liberos populos ab aliis item liberis.

ris incitatos, qui si declinent, publica timoris & imbecillitatis professione se audacioribus prædam exhibere possunt, & bellum domi alere, quod prudentius foris egissent: sæpe enim severius agendum est, quo largius postea parcere possimus.

§. XXI. Quod si in repentinis invasionibus fuga sit quidem futura sine periculo vitæ, sed non sine periculo ejus existimationis, sine qua in societate vivere nequeamus; anceps, magis ob inductos vetustate mores, quam ob rem ipsam, casus doctis videtur. Nam quum hujusmodi fuga putetur conjuncta cum jactura ejus rei, qua vitam in societate sustentamus, tantumdem creditur esse fugere, quantum vitam deserere. Quocirca plures, nec illi indocti, depravata magis, ut puto, consuetudine abrepti, quam recta rerum ratione ducti, opinati sunt, jus nobis inesse, ad nos tutandum, dum id periculum alia via & ratione evadere nequimus, tametsi præstantius censeant, & homine Christiano dignius, provocatum cum ejuscemodi existimationis læsione periculum declinare. Quare milites, ajunt, qui provocati, si renuant, aut fugiant, a commilitonibus velut humana societate indigni evitantur, ut periculum sit ne militiam deserant, nullo naturæ jure obligari ad fugiendum arbitrantur. Ego repugno. Nam ea existimatio, sine qua in societate vivere nequimus, non tam ex corporis robore existit, quam ex animi virtute; quam tantum abest ut in his casibus minuamus, ut potius augeamus. Sentio enimvero, iis, qui non ex recta ratione, sed ex affectibus vitam instituerunt agere, ardua hæc & difficilia videri: sed sunt plerumque æque ardua & difficilia ea, quibus corporis sanitas procuratur, remedia, ut mirandum non sit aspernari nos & refugere animi medicamenta. De humanis officiis ex lege eorum directrice, non ex aut delicatis, aut concitatis animi affectibus differendum est. Quæ quum sint, magis quoque falsum est, & cum naturæ jure æque ac cum Evangelio repugnans, quod plerisque militum persuasum est, licere provocare ad duellum ob injurias acceptas, easque interdum non modo leves, sed iocosas, metu, ut ajunt, infamix: quum enim super-

est

est alia via vitam, & famam tuendi, contra leges naturæ est ad arma confugere. Ajunt, si ea ferocia militum animi denudentur, imbelles illos, timidos, & Reip. inutiles futuros, ut idcirco, inquiunt, Politici & Sapientis Principis sit eam alere potius, quam dele-re truculentiam.

Ego me non tam astutum, neque ita perspicacem esse, id certo scio.

*... In me quidvis harum rerum convenit,
Quæ sunt dicta in stultum, caudex, stipex, asinus,
plumbeus,*

In istos nihil potest: nam exsuperat horum stultitiæ hæc omnia:

nam hæc ego Terentiani Menedemi (a) lubenter usurpabo. Itaque, quod ajunt ejuscemodi optimi Reipublicæ status præmonstratores, id esse verum non puto: scilicet vera virtus militaris miscenda non est cum iis vitiis, quæ si adolescant, plus mali milites Reip. sint allaturi, quam subsidii. Labore potius indurandi, a luxuque distinendi, quam falsæ gloriæ imaginibus lætandi. Est certe militibus gloriæ stimulus ingerendus, quo nullus est ad virtutem progignendam aptior: sed docendi, gloriam esse, ut Cicero ait, famam meritum in Patriam. Nam Achillem agere, ac negare jura sibi nata, non hominum fuerit gloria, sed belluarum.

§. XXII. Quæritur hoc in loco, utrum hæc violenta defensio jure naturæ præcepta sit, an tantum permissa? Non hic loquimur de militibus in statione positis, aut in prælio justo decertantibus, custodibus, aliisque publico regimini præpositis, qui non possunt sui defensionem deferere, quin traditam custodiam deserant, ad quam jure perfecto, & præceptivo tenentur ex pacto; sed de iis, quos proprium dumtaxat periculum in sui defensionem excitat. De his igitur quæritur, an liceat invasori cedere sine ullo crimine desertæ sui custodiæ? Defensionem occisivam intra eos cancellos, de quibus diximus, licitam esse, sed minime præceptam, adeoque licere eam omittere, atque sinere se interfici, docet

(a) Terent. Heautont. Act. v. sc. 1.

docet Grotius de Jure Belli, & Pacis Lib. II. §. 8. & Pufendorffius Lib. II. de Jure Naturali, & Gentium Cap. IV. §. 2. Sed negat Zeiglerus ad eum Grotii locum, Auctor Libri *De Principiis justitiae, & decoris*, ac Henricus de Cocceii. Et Grotius quidem vix aliam doctrinae suae rationem profert, praeterquam propriam auctoritatem: Pufendorffius vero hanc, quod scilicet quivis possit privilegio suo renunciare, dummodo id non fiat cum damno tertii. Sed demonstrare oportebat jus nos custodiendi & defendendi privilegium esse, non praecipuum. Itaque Pufendorffii ratio nullius est momenti (a).

§. XXIII. Nos in Grotii sententiam imus, eamque sequenti ratiocinio confirmamus. Legis naturae finis non est conservatio & felicitas unius tantum partis generis humani, sed totius: non ita ergo mihi imperat mei defensionem, ut simul imperet alterius internecionem, ubi ego alia ratione conservari nequeo: ita enim contraria imperaret, quod non potest. Ergo dum mihi jus praestat ad me defendendum, jus permissivum dat, non praecipit.

§. XXIV. Idipsum confirmatur ex lege Evangelica. Ex ea enim lege perspicuum est, virtutum omnium maximam, esse, & quidem heroicam, quancumque injuriam pati potius, quam facere. Ea est sententia Christi Domini nostri, cum in aliis locis pluribus, tum in eo, *si quis te percusserit in maxillam unam, praebe ei & alteram*. Est autem haec inter christianos interpretatio juris naturalis *authentica*, quippe quae ab eodem Legislatore proficiscitur, qui legum naturalium conditor est. Quo magis miror in christianis ipsis adversantes offendisse; nisi si quis sibi persuadeat imperite impieque, opponi inter se, alteramque alteram antiquare, naturalem & christianam legem.

§. XXV.

(a) *Indiae Bramines donum esse Deorum vitam ajunt, nec invitis obtrusam, sed volentibus uti attributam. Quare non solum alteri cedere, sed ipsos sese interficere licere ajunt, si illa premar: est ea nempe natura donorum. Invito beneficium non datur, ait Paulus l. 69. de diversis juris R. Sed alia, inquam; ratio si acceptum sit, & a domino. Itaque libertas vel invito datur.*

§.XXV. Sed magna iterum exoritur quaestio, utrum hæc Evangelica doctrina consilium sit, quod pertineat ad eos, qui perfectam virtutem sectantur, ad *pusillum illum gregem* in divina philosophia consummatorum, an præceptum, ac propterea omnium? veteres quidam Theologi ita censuerunt, licere nos defendere adversus invasorem, sed sine ejus nece; adeoque doctrinam istam Evangelicam velut præceptum acceperunt, quod pertineat ad omnes. Sed non est simile vero id præceptum fuisse in Evangelio, ut nullo modo nos adversus invasores cum eorum nece defenderemus, ubi injuste invadimur; id enim si verum esset, leges Evangelicæ latronibus potius, & scelestis hominibus consulerent, quam viris bonis, quod dictu nefas est. Deinde iis everteretur jus naturale, quod immutabile suapte natura est. Tertio justum bellum prohiberent, quod non faciunt, nec Evangelio prohiberi veteres christiani senserunt: nam e novis sectis soli id sibi non permitti Anabaptistæ, ac Quackeri opinati sunt. Quocirca ex doctrina Evangelica virtus quidem erit heroica, sinere se interfici, ne alter pereat, etiam ubi defensio justa est; sed non est proprie dictum præceptum. Interim illud observandum est diligenter, etiam in justa defensione nihil agendum esse ex odio, sed cuncta ex caritate, & prudentia. Præclare Beatus Augustinus, *paterem*, inquit, *habere debet voluntas, bellum necessitas... Esto etiam bellando pacificus. Itaque hostem pugnantes necessitas, non voluntas perimat.*

§. XXVI. Jam non tantum vita custodienda est ex naturæ jure, sed sanitas quoque, quoad quisque scit, & potest: nam sine sanitate vitæ animalis vix alia officia rite præstari possunt. Regulæ autem pro sanitate custodienda nec plures nec difficiles sunt. Præcipuæ omnium hæ sunt, *temperanter, & sobrie age: natura enim paucis est contenta: iis bene se habet: superfluis premitur, & agitur: corpus ne otio & pigritia marcescere sinas: continenter illud exerceto.*

Vide ut vitium capiant, ni moveantur aquæ.

Eas regulas & natura ipsa nos docet, & celebratissimi Medici tradunt. Hippocrates in Libro de Morbis

potissimam sanitatis regulam esse scribit, *nunquam satiari cibis, & impigrum esse ad labores*. Idem præscribit Celsus Lib. I. Cap. 2. Lege & egregiam Plutarchi tractationem *de sanitate tuenda* (a). Ergo contra naturæ leges ii peccant, qui intemperanter vivunt, quique otio putrescunt. Enimvero quid interest ad homicidium sui, utrum quis lento veneno se necet, an violenter? Itaque sui homicidæ jure ii habentur, qui ingluvie, aut ebrietate, aut aliis voluptatibus, vitam suam breviant, aut macerant.

§. XXVII. De bonorum fortunæ, ut vocant, usu, quæ sunt necessaria vitæ animali conservandæ, hoc in loco pauca differamus. Sunt fortunæ bona vitæ animali ducendæ, servandæque, ut dixi, necessaria: itaque eadem lex naturæ, quæ præcipit vitæ nostræ conservationem, præcipit quoque, ut instrumenta omnia vitæ comparemus, comparata servemus: vulgatum enim & verissimum est illud axioma, *qui vult finem, vult & media*. Potest autem contra hoc officium tribus peccari modis, negligentia, avaritia, & prodigalitate.

(a) *Sanitatis tuendæ regulas paucis, ut solet, complexus est Celsus lib. I. cap. I. cujus prima admonitio est, cavendum ne in secunda valetudine adversæ præsidia consumantur. Quid igitur faciet sanus?*

Sanus homo, qui & bene valet, & suæ spontis est, nullis obligare se legibus debet, ac neque medico, neque jatrælepta egerere. Hunc oportet varium habere vitæ genus: modo ruri esse, modo in urbe, sæpiusque in agro: navigare, venari; quiescere interdum, sed frequenter se exercere. Siquidem IGNAVIA CORPUS HEBETAT; LABOR FIRMAT: ILLA MATURAM SENECTUTEM, HIC LONGAM ADOLESCENTIAM REDDIT. Prodest etiam interdum balneo, interdum aquis frigidis uti: modo ungi, modo idipsum negligere: nullum cibi genus fugere, quo populus utatur: interdum in convivio esse, interdum ab eo se retrahere: modo plus iusto, modo non amplius assumere: bis die potius, quam semel cibum capere; & semper quamplurimum, dummodo hunc concoquat. Sed, ut hujus generis exercitationes cibique necessarii sunt; sic athletici supervacui.... Concubitus vero neque nimis concubiscendus, neque nimis pertimescendus est. Rarus, corpus exultat: frequens solvit.... Idem interdiu pejor, tutior noctu: ita tamen, si neque illum cibus, neque hunc cum vigilia labor latim sequitur.

tate. Ac primum quum Deus præcipiat nobis nostram custodiam, procul dubio efflagitat a nobis omnem eam diligentiam, quæ ad bene vivendum necessaria est. Quocirca hanc diligentiam curamque negligere, est in iis, quæ ad vitæ custodiam pertinent; peccare. Id vero aut temerariam in Dei providentia confidentiam ostendit, aut apertam legis naturæ violationem. Accedit, quod huiusmodi homines non possunt alia ratione vitam sustentare, quam nefanda & injusta faciendo, aut patiundo. Itaque ego errone, generisque humani fucos, quasque abdomini suo natos, contra legem naturæ testimonium dicere ajo: genus hominum divitibus grave, laborantibus molestum, sperantibus infidum, quod in civitate nostra vetabitur semper, & retinebitur. Atque hoc officium quum ad omnes omnino homines pertinet, tum eorum potissimum est proprium, qui suo pacto, aut contractu aliorum curam gerere debent, quales sunt Patresfamilie.

§. XXVIII. Deinde non ita sectanda, & amanda sunt externa bona, tanquam in iis ultimus nostri finis positus sit: nam qui ita agunt, agunt adversus finem humanæ vitæ præcipuum, idest beatitudinem, quam in iis præcipue rebus collocant, in quibus esse nequit, atque idcirco adversus naturæ leges vivunt, quemadmodum alibi demonstratum est. Sunt igitur ea sectanda, & comparanda fortunæ bona, quæ vitæ animali ducendæ sunt necessaria, quæ nec multa sunt, nec difficilia paratu, ubi quis non ex cupiditate, sed ex ratione vitam instituit: sed ita conservanda sunt, ut præsto sint vitæ usibus, nec tantum nostræ, verum etiam aliorum, non ut contemplationi, velut pictæ tabulæ, ac statuæ serviant. Quare ea in re duo, ut dixi, extrema vitia cavenda sunt, nimia eorum bonorum cupiditas, quasi in eorum contemplatione posita sit tota nostri felicitas, quod vitium *avaritia* dicitur: & dispersio sine ulla ratione, quæ dicitur *prodigalitas*. Utrumque enim vitium contra ejuscemodi bonorum usum est, adeoque contra naturæ legem: sed magis primum, quam secundum: nulli enim avarus bonus est; quum sit prodigus. Quibus accedit, quod avaritia ac
lucri

lucris immoderata cupiditas cum nulli est utilis, tum civitates perdit. Sallustius egregie, *ubi cupido divitiarum invasit, neque disciplina, neque artes bonæ, neque ingenium ullum satis pollet*. Ea certe & Spartana olim Respublica, quæ frugalitate steterat, eversa, & Romana. Cic. de off. II. 17. *Itaque quod Apollo Pythius oraculo edidit, Spartam nulla re alia, nisi avaritia perituram; id videtur non solum Lacedæmoniis, sed & omnibus opulentis populis prædixisse*.

§. XXIX. Superior doctrina apertissime posita est in divinis christianorum Libris estque philosophiæ nostræ præcipua, ac palmaris (a). Matth. VI. v. 34. *nolite solliciti esse in crastinum: crastinus enim dies sollicitus erit sibi ipsi*. Id est nolite ita esse in crastinum animo occupati, ut idcirco cogamini cetera officia ob eam curam negligere. Et Paullus Apostolus in I. ad Timoth. cap. VI. v. 7. *Divitibus, inquit, hujus sæculi præcipe, non sperare in incerto divitiarum*. Quorsum quoque spectant verba illa ejusdem Apostoli, *denique qui utuntur hoc mundo, sint tanquam non utentes*. Hæc non significant, nisi, ut ne nimis præsentis vitæ bona amemus, æternorum & spiritualium, quæ sola immu-
Tom. IV. Q tabi-

(a) Itaque Paulus I. ad Timoth. VI. 10. φιλαργυριαν, avaritiam, ac lucris cupiditatem vocat ρίζαν πάντων των κακων, radicem omnium malorum. Plæ in Hipparco, φιλοκερδεις lucrificus, cupidus, πανουργος και πονηρος callidos, improbosque habet, attricome perfricat sale. Sed illud divinitus dictum in IX. de Rep. φιλοκερδεις carere judicii organo. O verum! Sed ad Apostolum redeamus. Chrysostomus hom. XI. in epist. ad Rom. item ab avaritia mala omnia proficisci graviter perorat. Quæcumque, inquit, inveneris mala, sive domi, sive in foro, sive in judiciis, sive in curiis, sive in regia, sive quocunque alio in loco, εντευθεν παντα οψει βλαστηνοντα, hinc omnia (ab avaritia) videbis nasci. Quin hom. XIV. in I. ad Corinth. παρεσαν γεενναν præsentem gehennam vocat avaritiam. Et in Psalm. XLIII. την ακροπολει των κακων, summum malorum apicem. Quod cum tetrum sit in omnibus vitium, æm, ut ait Cicero, in principibus Remp. gubernantibus teterrimum. Quid vero in iis, qui non humanas Resp. sed caelestem administrant? Utinam, inquit C. Pontius Samnis, ad illa tempora fortuna me reservasset, & tunc essem natus, si quando Romani dona accipere cœpissent! non essem passus diutius eos imperare. Cic. de offic. II. 17.

rabilia sunt & vera, immemores. Legatur Verulamii sermo de divitiis. O præclarus!

C A P U T IV.

De cultura animi.

§. I. **P**ostquam ea hominis officia, quæ vitam animalem attinent, per summa capita persequuti sumus, superest ut de cura animi, ejusque cultura dicamus, quæ tanto major & accuratior esse debet, quanto est animus corpore ipso præstantior, & animi vita vita animali nobilior. Accedit altera causa, ob quam primas & maximas curas animi vita a nobis exigit, quod nempe animalis intra breve temporis spatium contineatur, illa vero æternitatem spectet. Ergo quanto præstantiora sunt æterna bona præ bonis hujus vitæ fugacibus, tanto vitæ rationalis cura major & diligentior agenda est. Postremo ne vita quidem ipsa animalis ordinata & pacata esse potest, nisi sapiens, ordinatus, & pacatus animus eam moderetur: totum enim regimen vitæ nostræ animalis a mente pendet, ut perturbatum sit necesse est, ubi illa inepta est ad regendum (a).

§. II. Spectat vita animi intellectum, voluntatem, affectus, seu vim cogitandi, & vim appetendi, quæ præcipuæ sunt animi facultates, quibus ille vivit, & operatur. Ad utramque autem facultatem perficiendam nostri illa naturalis amicitia nos obligat, ac propterea naturæ lex: nam nos obligat lex naturæ ad jura nostra tuenda: ad recte nos amandos: ad felicitatem nostram semper intuendam & sectandam, adeoque ad ea omnia, quæ veræ felicitati consequendæ sunt necessaria. Ad felicitatem vero consequendam in pri-

mis

(a) *Plato in Menone.* Ουκ αν συλλαβειν, παντα τα της ψυχης επιχειρηματα και καρτηρηματα, ηγεμενης μεν φρονησεως, εις ευδαιμονικην τελευτην, αφορσυνης δ', εις τεχνικτιον, idest, ut breviter dicam, omnes animæ impetus conatusque, & quidem prudentia regat, ad beatitudinem tendunt; si imprudentia contra, miseriam efficiunt.

mis necessaria est emendatio & perfectio intellectus, ac voluntatis; tum ars quædam ac disciplina, qua affectus, ac naturæ impetus intra suos cancellos cohibeantur: nam experientia nos docet inter homines miserum non esse, nisi aut stultum, aut scelestum; quorum ille actiones aut omissiones ad calculum adducere nequit, ut pernoscatur; consentaneæ ne fini suo sint, an non: hic totum affectibus frænum laxat; ergo lex naturæ nos obligat ad intellectum & appetitum emendandum, perficiendumque. Emendatur autem intellectus, quum ab eo causæ ignorantix, & errorum continentur: appetitus, cum ab habitibus pravis purgatur: perficitur vero intellectus scientia; appetitus habitibus virtutum. Igitur lex naturæ præcipit, ut & causas ignorantix, ac errorum, præsertim quod spectat ad vitam moralem, ab animo removeamus, atque intellectum vera scientia instruamus; & ut voluntatem ab omnibus pravis habitibus purgemus, ac habitibus virtutum ornemus, quo naturæ impetus intra suos terminos continere possimus. Atque in his tota animi cultura posita est.

§. III. Omnium igitur primum ex lege naturæ cui-libet homini pro sua indole & conditione accurata cura gerenda est intellectus sui ac rationis. Nam quum intellectus sit veluti fons totius vitæ rationalis & moralis, nisi ille ea cognitione informetur, quæ ad vitam hanc recte transigendam necessaria est, perturbata & confusa tota erit vita rationalis, & moralis. Ad eam igitur scientiam, veluti ad medium fini nostro consequendo necessariam, suprema illa naturæ lex nos obligat. Ac vero si is, qui, quum possit, negligit vitam animalem curare, ac perficere, non recte nec vere se amat, ac insita sui jura violat; qui dici potest, eum, qui quum possit vitam rationalem perficere, negligit, rite, & vere se amare, idest ex recta ratione amare, atque sibi esse amicum? Qui æquum sibi esse? Sed nec aliis esse & æquus, & amicus, qui sibi non sit.

§. IV. Quæ ex re duo consequuntur. Primum obligari nos ad notitias bonorum, & malorum cum physicorum, tum moralium, comparandas: physicorum

quidem, quia obligamur ad vitæ animalis custodiam, quæ ut sine bonis physicis conservari nequit, ita a malis physicis plurimum timere debet. Hinc est obligatio artis alicujus addiscendæ. Moralium vero, quia obligamur ad mentem rationemque perficiendam, quæ bonis moralibus perficitur. Has scientias cuilibet necessarias esse pronuncio: ceteras aut statibus tantum quibusdam ajo (a), aut omnino indifferentes. Alterum est obligari quidem homines ad intellectum perficiendum, sed non æqualiter, verum quemlibet pro sua capacitate, & statu, ut idcirco non æqualiter adversus hanc legem ab omnibus peccetur. Intelligendum est esse cuilibet hominum vicinitatum & actionum veluti circulum quemdam, cui majorem, cui minorem: eo ab animo tanquam a centro hominis actiones pertingere debent ut bene beateque sit; ergo eo usque ejus mens quaquaversum pervidere, iisque artibus ac disciplinis animum subigere, quæ ei rei pares sint.

§. V. Quibus ex rebus omnibus intelligitur, nullum officium generi humano utilius a Philosophis præstari posse, quam propagationem earum notitiarum, de quibus locuti sumus. Ac felices quidem essent populi, si Philosophi quantum temporis in inutilibus questionibus frustra terunt, tantum intendere vellent in artes, & cognitiones generi humano necessarias publice augendas, & perpoliendas, ac parvis catechesibus comprehendendas, quo communitati sese utiles præstarent: catecheses autem dico Agriculturæ, Pastoralis, Artium reliquarum. In primis desiderandum esset, ut qui populos regunt, aut in iis principes sunt, curarent, ut plebeji quoque homines legere saltem, & scribere scirent

(a) Nam qui artes vitæ agitandæ negligunt, ac, ut ait Lucetius, sæcla ferarum vivunt, cum egestas ac vis naturæ imperat, rapto vivere debent. Ita agrestes gentes mutuis latrociniis vitam hominibus infestam faciunt. In utraque Continente quicunque artes aut ignorare, aut odisse reperti sunt, hoc genus vitæ ducunt, quod nostri Arabes. Idem urbes turbant, efficiuntque ut simus sæpe in Civitate velut olim genus humanum in agris.

rent (a) : vix enim dici potest, quantopere inde mores, & artes perficerentur. Itaque ego subirascor sæpissime iis opulentis hominibus, qui vana memoriæ suæ monumenta relinquunt, hæc vero officia, quibus vere immortales fieri possent, prætereunt. Veteres enim populi non aliam ob rationem Orpheum, Amphionem, Herculem, aliosque inter Deos retulerunt, nisi quia humanitatem barbaras gentes docuerunt. Sunt adhuc apud nos veteris vestigia ruris, quæ si qui excolere aggrediantur, illos ego inter Heroas meritissime retulerim.

§. VI. Jam vero excolendus est & appetitus, quo proprie vir bonus, aut malus quinquam est, & dicitur. Nempe finis legis naturæ est perfecta hominis beatitudo : media vero, quæ ad eum finem ducunt, sunt amicitia Dei, nostri, aliorum, virtutes nempe. Comitantur autem tres istas amicitias tria virtutum genera, Theologicarum, Monasticarum, & Politicarum; quarum primæ Deum, secundæ nosmetipsos, tertiæ societatem humanam spectant. Ad hæc ergo omnia formanda est voluntas, & tota natura assuefacienda, ut sit perfecta. Jam ea perfectio a tribus potissimum causis progignitur, temperamento, intellectu, & habituum moralium exercitio; tres ergo illæ causæ vehe-

Q 3

men-

(a) Scio id aversari Politicos quosdam. Ajunt artes deferri, quum delinimenta literarum libantur. Sed factis revincuntur. Illa vera, & tristia, & scholarum moribus vim ac virtutem puerorum infringi. Cur igitur nulla pene scholarum cura? Nam integris diebus sessitare paganos plebejosque pueros, garrere, pugnis & calcibus pugnare, ora radiis & libris sibi contundere; oscitantem, aut ineptientem pædagogum spectare, aut, veluti in triremi, sævis plagis tanquam in servos animadvertentem habere; absentes, ac venerandos viros proscindentem dictariis, longisque cachinnis, crapulam ructantem; grandia & sancta balbutientem; inurbane, aut obscœne boantem; hæc, inquam, quis præbet? Nec infinitas modo scholas exerrandas censeo, sed sublimes quoque ipsas corrigendas; ne vanis futilibusque disciplinis juvenes corrumpant. Nihilne nos pudet in hac tam polita ætate, non prius nos sapientes putare, quam barbære educari instructique simus? veluti si quis neget præclarum hominem esse posse quempiam, qui prius egregie bellua non fuerit.

menter excolendæ, & ad perfectionem nostram inflectendæ sunt.

§. VII. Cultura autem trium illarum naturalium causarum in his præsertim posita est: primum, agreste, & ferox ingenium cicurendum est, ut ne transversum nos rapiat, quum ad officia conamur. Deinde iracundum, inconstans, turbulentum flectendum paulatim, ut mitescat, & assuescat fræno. Tum præclaris iusti & honesti notitiis instruendus est intellectus, qui voluntatis lumen est. Tandem exercitatione ipsa virtutum ea acquirenda est indoles, qua quasi altera natura, recte, iuste, & honeste vivamus. Atque postremum hoc est illud, quo proprie appetitus & natura formatur: nisi enim continuato exercitio virtutis naturam bonam induamus, & præcepta honestatis in succum, & sanguinem convertamus, formari voluntas ad beatitudinem nequit. Ad hoc autem efficiendum juvat in primis exempla nobis proponere ad imitandum, eorum scilicet, qui justam, honestam, liberalem, magnanimam vitam duxerunt, quorum exemplorum copiosam segetem suppeditat historia sacra, & ecclesiastica: plura quoque subministrat historia ipsa profana; atque in hunc præcipue finem historiarum lectio suscipienda est. Eam ob rationem historiam vocat Cicero *Magistram vitam*. Sed quoniam ea de re in secunda parte dictum est copiose, quo in loco de virtute egimus, a longiori oratione hic supersedebimus. Unum hic addam, præsentem puerorum educationem & institutionem literariam eam non esse, quæ tam nobili animanti ad virtutem & felicitatem manuducendo omnium sit magis consentanea. Nempe descivimus jamdudum a naturæ simplicitate, eamque omnibus machinis alio fleximus, quam qua flectere debebamus. Totâ præsens educandi ars in hominis exteriora formanda tendit: animi vim, corporis sanitatem negligimus, ac ita, ut ad nos minime pertinere videantur. Ausim hic dicere, hominem nec tam ineptum gigni, nec tam pravum; quam vulgo putant, sed nostris machinis domesticis, publicisque, fieri. Dicam iterum, longe eos hominum educatores falli, qui quidquam egregii præ-

stare animos nostros putant, ubi infractum imbecillumque, seu nimium premendo, seu laxando nimium, evasit corpus. Velim ab his legi insigne super ea re Ballexferdi opusculum (a).

CAPUT V.

De affectibus, officiisque inde manantibus.

§. I. **D**isseramus nunc de ea nostri cultura, quæ ad affectus pertinet, quæque esse debet prima & præcipua: nam inde hominis tota beatitudo, aut miseria pender, unde vis est omnis agendi, cessandi-que, & principium. Horum natura generatim in tertia parte explicata est: hic eos singillatim expediemus, & de eorum in vita animali ac morali vi dicemus paulo copiosius. Cartesius *de Passionibus Animæ p. 2. art. 69.* ad sex primaria genera perturbationes animi omnes contulit, admirationem, amorem, odium, cupiditatem, lætitiā, mœrorem. Earum ordinem sic describit. Principio quum novum aliquod objectum, vel circumstantia aliqua nova modificatum nobis occurrit, ob novos motus in cerebro, rationis organo, excitatos, reflexivam animæ facultatem sistit, & in extraordinariam quamdam attentionem mentem rapit, quæ est admiratio, quam affectus omnium primum esse censet. Deinde si oblatum objectum anima attentius consideret, ejusque cum natura nostra relationes inspiciat, tum si quidem malum vel bonum reperiatur, amor, aut odium excitabitur. At si bonum hoc, aut malum fuerint præsentia, orietur lætitiā, vel mœror: si vero futura, cupiditas, vel timor.

§. II. Henricus Morus in *Enchiridio Ethicæ lib. 1. cap. 7.* arbitratur, numerum affectuum breviorē fieri posse, ut omnes referantur ad amorem, & odium, quorum duorum ceteri aut cognati sunt, aut effectus. *Quid enim, inquit, est desiderium, nisi amor porrectus*
Q 4 *versus*

(a) Editum Parisiis ann. 1762. præscriptumque. Dissertation sur l'éducation physique des enfans, par M. Ballexferd.

versus bonum futurum? Quid fuga, seu averfatio, & timor, nisi odium se avertens ab imminente malo, vel se contra ipsum muniens? Quid letitia nisi amor exultans præsentia boni adamati? Quid tandem mæror, sive mæstitia, nisi odium præfenti malo oppressum & implicitum? Manifestum est, in omnibus his semper amorem & odium varie modificari. Hæc ille. Fuerat hæc doctrina B. Augustini, quæ latius explicatur a Malebranchio in 5. libro de inquirenda veritate. Nec vero dubitare possumus hisce velis, amore, inquam, atque odio, totam hominum vitam agi.

§. III. Veteres Philosophi Platonici, Peripatetici, Stoici, & hinc Scholastici, partem animæ sensitivam, quam & inferiorem vocabant, in duas alias partiebantur, irascibilem nempe, & concupiscibilem. Quum autem affectus dicerent perturbationes inferioris animæ partis contra rationem, vel præter rationem, eos ad duas sedes referebant, concupiscibilem, & irascibilem. In quo illi minime errabant: nempe omnes affectus nihil sunt aliud, nisi varii modi concupiscentiæ, & excandescentiæ. Nam quum omnes nascantur ex opinione boni, vel mali, sive directa, sive reflexa, qui ex opinione boni gignuntur, sub concupiscentia continentur: qui vero ex opinione mali, sub irascibili. Videri potest Cicero, qui ex doctrina Stoicorum accurate super ea re copioseque disserit in 4. Tusculanarum disputationum libro.

§. IV. Possunt itidem affectus dividi in duas alias classes, & quasi sedes, ut alii rationem magis, alii magis sensum spectent. Affectus, qui ex contemplatione bonorum, vel malorum spiritualium, idest bonorum vel malorum rationis, proveniunt; vel ex ratione quidem bonorum; vel malorum corporeorum, non tamen directa, ut in sensationibus, sed reflexa; hi, inquam, ad rationem magis spectant, seu partem animi superiorem, quam ad sensum, & partem inferiorem. Affectus vero, qui originem ducunt ex bonis corporeis ope sensationum, sensum magis, quam rationem sequuntur. Atque postremi quoque isti affectus, si naturam rationis induant, quantum a sensu recedunt,

tantum ad rationem accedunt. Illud est inter utroque discrimen, ut posteriores turbulentiores sint, & mutabiliore; priores vero pacatiores & diuturniores. Non autem ignoro quantopere inter Philosophos concertatum sit, sint nec ne in ratione affectus; quam quæstionem perdiligentissime tractat Picolominus in secunda Philosophiæ moralis parte. Sed vix istud negari potest ab iis, qui naturam humanam paullo attentius contemplantur. Rationem porro quum dico, non separatam intelligo: neque enim me latet nullum esse in anima nostra motum, quin totam animalem naturam afficiat (a).

§. V. Sed illud præterea animadvertendum est, affectus omnes esse peculiare modos generalis in voluntatem propensionis, & aversionis a malo, quibus omnes animantes statim ac natæ sunt naturaliter concitantur; ut intelligere possimus, quemadmodum inclinatio, & aversio illa ex temperie naturæ nostræ procedunt, ita ex eodem fonte omnes manare affectus. Nempe quum generalis propensio erga bonum a bonis peculiaribus seu præsentibus, seu futuris varie modificatur, & determinatur, primam classem affectuum constituit, eorum scilicet, qui ex opinione boni nascuntur. Eodem modo naturalis aversio mali varie excussa, ac determinata a particularibus malis, seu præsentibus, seu futuris, alteram classem affectuum, eorum qui vel opinione mali progignuntur, efficit. Jam quum propensiones illæ ac repugnantia, non alia ratione in natura nostra locum habeant, nisi quia ita structi ac temperati sumus, ut nos & felicitatem nostram necessario amemus, eamque quum in nobis non habea-

(a). *Affectus sunt sensationes: at nihil in physica exploratius, quam sensationum omnium organum esse systema, ut aiunt Medici, nervum. Hoc si a causis externis, aut internis corporeis ullo modo convellitur, sensatio existit, ac voluptas, aut dolor: si phantasia, vel ulla animi ratio, pathemata, seu affectus. Si το καλον, bonum ipsum ac genericum, afficit, ille appetitus voluntas dicitur, ac rationis appetitus: si peculiaris, sensitivi motus. Horum vis tota magis in corporis temperie est, quam in animi ratione.*

habeamus, in omnibus extra nos objectis quæramus; & quidem impetu naturæ, idest affectu; perspicuum est, affectus omnes esse modificationes amoris proprii; adeoque tum esse vitiosos, quum amor ille proprius vitiosus est; quod fere semper vitiositate rationis fit:

Tentat enim dubiam mentem rationis egestas.

§. VI. Jam vero quum valde sit simile veri sensationem doloris præcedere in hominibus omnem voluptatis sensationem; quia infantes si nulla præcedat in eorum machinulis perturbatio, verisimile non est æqualis voluptatis statum persentiscere ac animadvertere posse; nec, nisi præcesserit dolor, voluptates gestientes; videtur affectus mortalium omnes a dolore, & ægritudine originem primam habere. Itaque omnes sunt naturæ voces, quibus commonemur, eam aut bene se non habere, nec in situ esse naturali; aut naturalem & consentaneum tandem situm nactam, sibi que perplacere (a).

§. VII. Qua ex re & illud sequitur, affectus esse non posse, nisi in natura finita, esseque argumentum manifestum naturæ & finitæ circumscriptæque & mutabilis. Scilicet sola natura finita hujuscemodi est, ut nec in se habeat totum illud bonum, quo esse possit perfecta atque beata; nec tanta potentia polleat, qua mala omnia propulsare possit, atque perpetuo in statu sibi consentaneo vivere. Hinc & inclinationi genericæ
erga

(a) *Quibus qui spoliari homines student, præterquamquod furilem inanemque operam aggrediuntur, omni nos naturæ voce orbari volunt, eaque vi ac natura privare, qua animantes sumus: hominem de homine tollere, ut ait eleganter Cicero. Quos ego opinor, cum divina humanaque alios superbe docent, se penitus ignorare;*

Quandoquidem sapiunt alieno ex ore petuntque
Res ex auditis potius, quam sensibus ipsis.

Sed valere jubeamus sententia Stoicos, opera Epicureos, ac affectus, quos nulla, nec naturæ potestas, nec doctrina revellere queat, discamus ad rationis sanctam virgulam componere. Id est enim sapere.

erga bonum velut in sui complementum ; & averfationi a malo , ac proinde affectibus , obnoxia est . Deus vero , qui & perfectiffimus est , fibique ad beatitudinem fufficientiffimus , & potentiffimus , nec rapi poteft in externa bona , velut in perfectiones naturæ fuæ , nec mala ulla timere ; itaque nullo dolore , nullaque geftiente voluptate , ac nullis adeo affectibus perturbari .

§. VIII. Igitur perfequamur quam breviffime præcipua affectuum genera , eorumque ufum & abufum in vita morali , ac civili paullo diftinctius demonftremus . Primus ordine & natura qui in nobis progignitur affectus , ex partitione Cartefii , eft admiratio , quæ ut fuperius diximus , eft conturbatio animi novitate & infolentia alicujus objecti perculfi , atque in eo contemplando attentiffime occupati . Itaque genus *καταληψως* eft , feu nervulorum contractio . Nempe quum mens fuis in operationibus ab impreffionibus in cerebro factis pendeat , fi nova quædam & infolita motio excitetur in cerebro , tota ab ea motione rapitur , ac veluti lethargo quodam corripitur , aliifque contemplandis inepta evadit . Sed duæ diftingui poffunt admirationes , altera quæ pendeat ab amore fciendi , altera , quæ a quadam cerebri torpedine nascitur . Illa rationalis vocari poteft , eftque eorum propria , qui & amore fciendi aguntur , & temperamentum habent aptum attentioni continuandæ : hæc vero dici poteft bruta , eftque argumentum ftupiditatis . Prioris indicium eft , fi quis poft admirationem ad inquisitionem excitatur : pofterioris vero , fi admirationem nulla fequatur perquifitio .

§. IX. Ufus admirationis infignis eft & multiplex . Principio nifi eo affectu natura noftra tangeretur , quafi ftupidi effemus , nec unquam excitaremur ad perquifitionem rerum magnarum , pulchrarum , & utilium , aut certe minori ardore ad illas investigandas aggredieremur , quam quo ea incitat . Quemadmodum enim corpora elastica quo magis premuntur , eo majori renifu repugnant , ita animus , quo majori admiratione percellitur , eo vehementius in inquisitionem veritatis enititur . Hinc Plato , & Aristoteles principium Philofophiæ fecerunt admirationem , qua primi mortales in-curioli-

tatem impulsu, rerum naturalium causas perquirere cœperunt. Qui historiam literarum & artium legerit, is discet quot, & quam præclara curiositas ex admiratione nata, aut vellicata in rempublicam quum civilem, tum litterariam invexerit (a), ut intelligere possimus, quam bruti sint ii, qui hunc affectum, quem alere & fovere magno studio in pueris deberent, extinguere conantur. Non sum nescius, plura quoque absurda aut pernicioſa inde excitata: sed hæc abusu potius humanæ libertatis naturæque humanæ imbecillitati, quam huic causæ tribuendæ sunt.

§. X. Deinde admiratio, ut alii animi affectus, non minimum memoriam nostram adjuvat, quemadmodum perspecte observat Cartesius: scilicet affectus omnes attentionem nostram acuunt, & intendunt: ex acuta vero & intenta attentione memoria firmatur. Ad hæc, admiratio animum eo in situ ponit, quo in situ, res attentius contemplari & vestigare potest, earumque cum natura & fine nostro relationes despectare, quod ii non facile efficiunt, qui hoc affectu non satis agitantur, quique proinde incuriosi sunt. Ceterum ut alii affectus, si fuerint frequentiores, indicium sunt naturæ nimium phantasticæ & mutabilis; ita admiratio nimia & frequens etiam ob res minime admi-

ra-

(a) *Primi mortales multo certe fuere illi in arvis durius, ut nunc America agrestes.*

Necdum res igni scibant tractare, nec uti

Pellibus, & spoliis corpus vestire ferarum:

Sed nemora, atque cavos monteis, silvasque colebant,

Et frutices inter condebant squalida membra.

Dolore igitur primum permoti vitæ commoda reperere. Hæc mox auxere experientia

Navigia atque agri culturas, mœnia, leges,

Arma, vias, vesteis, & cetera de genere horum,

Præmia, delicias quoque vitæ funditus omneis,

Carmina, picturas, & dædala signa polire,

Usus, & impigræ simul EXPERIENTIA mentis

Paullatim docuit pedetentim progredi, nteis.

Lucret. lib. v. Sed quis neget plurimos usus rerum admirationi tribuendos? quæ primum defixit animos; mox perculit; tum subagavit, & explorare coegit.

rabiles, argumentum est brevitatis, imbecillitatis, & stupiditatis mentis. Itaque videmus, nullos hominum tam frequenter, etiam ob res levissimas, admiratione tangi, quam ignorantes, præsertim disciplinarum naturalium, & historiæ humanæ, quarum rerum periti vix quidquam admirantur, nisi quæ admiratione etiam sapientium digna sunt. Quocirca ad stupidam admirationem vincendam nihil tam aptum est, quam historiæ naturalis & civilis peritia. Sed & si quis rerum novitate facile se percuti persentit, eoque in opiniones aut ridiculas rapi, aut iniquas, aut sibi statuique suo noxias (quod iis, qui peregrinantur, accidit interdum), animo suo recolat, hæc eadem, si familiaria evaserint, nullo sæpe in pretio esse, spernique adeo. Accidit idem iis rerum usibus, ac formis, quas in dies permutat luxus.

Sicvolvendo atas commutat tempora rerum:

Quod fuit in pretio, fit nullo denique honore . . .

Lucr. (a).

§. XI.

(a) Jam admirationem sæpe graves molestæque curæ sequuntur. Sequaces curas, & alatas, dixit Lucretius. Horat. od. 16. lib. II.

Scandit æratas vitiosa naveis

Cura, nec turmas equitum relinquit. *¶*

Sed & Regum scandit turreis, & doctorem subsellia. Teognis venuste lepideque, *προτυλές αἰσχροπῶν ἐλαχόν πτερὰ ποικίλ' ἐχέται*, mortalium curæ alas fortitæ sunt variegatas. Memini ego aurora boreali anni 1737. adeo plures e stupore in tremorem collapsos, ut ad imos talos frigidus sudor manaret, dissolvique mundi machinam brevî opinerentur. Quibus ecquod alexipharmacum propinabis, præter quam illud, disce sodes? Virg. II. Georg. 490.

Felix, qui potuit rerum cognoscere causas:

Atque metus omnes, & inexorabile fatum

Subjecit pedibus

Quid vero illi, qui summos fortune apices, tanquam beatorum sedes, mirantur, depereuntque? O genus infelix humanum!

. Quoniam ad summum succedere honorem

Certantes, iter infestum fecere viai,

Et tamen e summo quasi fulmen dejicit ictos.

Invidia interdum contemptim in Tartara tetra

o illud præclarum

Divitiæ grandes homini sunt, vivere parce,

Æquo animo; neque enim est unquam penuria parvi.

Lucr.

Sed

§. XI. Amor est affectus animæ , qui cum motione fluidi corporei calidiore excitatur ad se voluntate jungendum cum iis objectis , quæ naturæ nostræ consentanea videntur . In amore igitur ex sensatione , vel idea rei nobis nostroque fini consentanea , excitatur in sanguine calor quidam placidus , qui quum habitualis evaserit , magnum animi vigorem efficit . Itaque amantes alacres sunt & fervidi , ac plerique etiam natura paullo stupidiore eo affectu ad præclara facinora excitari solent . Quocirca hic affectus , nisi modum excedat , magnus esse potest stimulus ad virtutem .

§. XII. Amoris plures sunt species , quum pro diversitate objectorum & finium , tum pro intensiori , aut minus intensa sanguinis agitatione . Amor erga objectum natura nostra superius , & a quo speramus , vel metuimus , vocari solet amor devotionis . Is cum timore quodam conjunctus est ; est igitur affectus mistus . Amor erga æquale in natura nobis objectum triplex est , concupiscentiæ , amicitiae , & caritatis . Priori amore amamus propter voluptatem nostram ea omnia , quæ velut naturæ nostræ animalis bona apprehendimus , & in quæ excita natura incitat . Eo spectant amor venereus , cibi ac potionis desideria , cupiditas divitiarum , honorum ambitio &c. Altero amamus alios propter se : tertio eos , qui aut sunt nobis sanguine conjuncti , aut quos tanquam sanguine communique stipte conjunctos spectamus . Prior amor naturæ est animalis magis , quam rationalis : itaque & brutis animalibus communis est . Posteriores duo plus habent naturæ rationalis , quanquam & in animalibus eorum alia cernamus vestigia .

§. XIII. Amor , ut ceteri affectus naturæ humanæ , necessarius est & utilis , modo ratione regatur . Principio amore concupiscentiæ venereæ species humana ser-

.va-

Sed & illud Horatii nostri grave monitum Lib. II. 14.

. Æqua tellus

Pauperi recluditur

Regumque pueris : nec satelles orbi

Callidum Promethea

Re

vatur ; ut si demas , intra seculum hominibus deserta erit tellus . Itaque & in animantibus , ut dictum est , brutis locum quoque habet , magis incitante natura , quam ulla cognitione perducente , ut scilicet brutorum species conserventur . Præterea eodem amore humana industria & solertia fovetur , ut nisi ea concupiscamus , quæ nobis voluptatem aliquam , naturæque levare dolores , afferre possunt , inertes simus & crudilateres necesse est . Deinde amore caritatis & amicitiae primum continentur , & conservantur familiæ , quæ , ut eleganter Aristoteles appellat , sunt elementa civitatis : tum vincula majorum societatum junguntur . Nec sane hominum genus sine mutua caritate & amicitia esset aliud , quam ferarum multitudo sese mutuo horrentium , aut dilacerantium . Delirant igitur ii , qui hujusmodi affectum ex hominum natura evellere student . Cicero de Amicitia 7. *Quod si exemeris ex natura rerum benevolentiae conjunctionem , nec domus ulla , nec urbs stare poterit , ne agri quidem cultus permanebit . Id si minus intelligitur , quanta vis amicitiae concordiaeque sit ex dissensionibus atque ex discordiis percipi potest . Quæ enim domus tam stabilis , quæ tam firma civitas est , quæ non odiis atque dissidiis funditus possit everti ? Ex quo quantum boni sit in amicitia , judicari potest . Quibus adde , nullum esse animal homine imbecillius , eoque miserrimum , si a similibus amicitia ac cœtu distrahas .*

§. XIV. Interim in amore concupiscentiæ tum veneris , tum aliarum voluptatum , plurima inesse possunt vitia , & incommoda , nisi ex lege honestatis componatur . Paullatim enim agitata natura , & ratio opprimitur , & in omne vitiorum genus itur . Incommoda & mala hujus perturbationis quod ad voluptates venereas spectat , elegantissime more suo describit Plautus in prologo Mercatoris , quæ operæ pretium facient adolescentibus in hunc affectum proclives si attente considerent . Nam quemcumque hic affectus arripuit paullo vehementius ,

Magno atque solido multat infortunio ;

Nec potest profecto quisquam sine grandi malo

*Plurquam res patitur studuit elegantiae.
Sed amor accedunt etiam hæc, quæ dixi minus,
Insomnia, ærumna, error, terror, & fuga,
Ineptia, stultitiæque adeo, & temeritas,
Incogitantia excors, immodestia,
Petulantia, cupiditas, & malevolentia,
Inhæret & aviditas, desidia, ignavia,
Inopia, contumelia, & dispendium.*

§. XV. Nec minoribus malis ceterarum voluptatum cupiditates subiectæ sunt, nisi ratione, ac validissime, regantur; inde enim nasci possunt immania vitia, quæ & singulos homines, & integras civitates perdere possunt, cujusmodi immoderata divitiarum cupiditas, ferrox & stulta ambitio gloriæ, ingluvies, ebrietas, ceteræ. Scilicet in homine nulla ferme sunt alia vitia, nisi quæ ex abusu cupiditatum, depravata ratione, aut consuetudine, pullulant atque adolescunt: eaque ubi adolevere, non domos tantum, sed Remp. postremo perdunt (a).

§. XVI. Odium est ea animi perturbatio, qua incitatur ad nos separandos ab iis objectis, quæ nobis ingrata videntur, vel noxia. Odium non est simplex affectus, sed veluti mixtus ex ira habituata, & tristitia. Itaque ut arior rarefacit sanguinem, & æquabilem calorem gignit; ita odium adigit ad cor atque latiora vasa. Hinc pallor vultus. Quam odium refertur ad

(a) *Sallustius in Catil. 15.* Postquam (Romæ) divitiæ honori esse cœpere, & eos gloria, imperium, potentia sequebatur: hebescere virtus, paupertas probro haberi, innocentia pro malivolentia duci cœpit. Igitur ex divitiis juventutem luxuria atqueavaritia cum superbia invasere: rapere, consumere, sua quisque parvi pendere, aliena cupere: pudorem, pudicitiam, divina, atque humana promiscua, nihil pensi atque moderati haberi. . . . Sed libido stupri, ganeæ, ceterique cultus, non minus incefferat, viros pati muliebria, mulieres pudicitiam in propatulo habere: vesticendi causa terra marique exquirere. . . . Hæc juventutem, ubi familiares opes defecerant, ad facinorosa incendebant, animus imbutus malis artibus haud facile libidibus carebat. Est quisquam qui præterea miretur, tam corruptæ civitatis opes retro lapsas, postremo intercidiisse funditus? Quod illi tamen non semel atque iterum accidit, iisdem minantibus causis.

ad mala generatim considerata, odium appellari solet. At si referatur ad objecta deformia, dicitur aversio, & horror. Ceterum necesse est, ut natura humana hujus affectus sit patiens, quo possit se conservare: nam ut sine amore objecta naturæ nostræ consentanea minime consuetemur; ita sine odio infesta & pernicialia non caveremus. Est igitur odium in animantibus præcipue memoriosis & calculo utentibus: in stupidis vix ullum. Sed quemadmodum amor in vitium abit, si excedat aut intensitate, aut extensione; ita odium in vitium convertitur aut nimia extensione, ea scilicet objecta odio habendo, quæ amare debemus; aut nimia intensitate, nimirum plus odio habendo, quam par est; aut nimia duratione, nempe tum etiam odio habendo, quum objectum desinit esse malum. Huc pertinet illud veteris Philosophi, *non decet mortalem odia gerere immortalia*: excipio, nisi objecta perpetuo fuerint mala; nam aversio a malis natura fit, eaque quousque eadem naturæ nostræ cum objecto malo relatio perstat.

§. XVII. Sed magna hoc in loco suboritur quæstio, utrum in his affectibus amoris & odii animus mere, ut ajunt, *passive* se habeat, an etiam *active*, ita ut ii imperio libertatis sub sint. Ea profecto quæstio magni est momenti. Nam si animus in his affectibus mere passive se habet, in potestate nostra non erit amare, vel odire. Ex quo conficitur, ut leges præcipientes, vel vetantes hujuscemodi affectus id videantur præcipere, vel vetare, quod in potestate nostra nullo pacto esse potest. Ac quum affectus omnes sint commotiones naturæ humanæ ex opinione boni vel mali proficiscentes, videri potest, nullo modo eos imperio libertatis subesse, sed ex utilium infestarumque rerum phantasiis necessario existere; quomodo imperio libertatis subiectum non est, non sentire odorem ubi res odoriferæ nares rellicant, aut non videre lumen apertis ad lumen oculis. Affectus, inquiunt, natura constant, non voluntate.

§. XVIII. Cui quæstioni ita respondemus. Vigilius bonorum, vel malorum phantasiis, haud liberi su-

mus in amoris, aut odii, qui inde necessario nascuntur, affectibus persentiendis: sed possumus tamen curare, ut exquisitis aliis, & veris adspectibus boni, vel mali, quod vetamur amare, illud abhorreamus, aut amemus, quod prohibemur odio habere. Præterea efficere ne ultro temereque accendamus, quod stulti, pravique faciunt. Tum operam dare ne, quoad ii affectus durant, actionibus extrinsecis iis abutamur ad scelera quævis perpetranda, ad quæ ardentes illi suadent. Quantumvis enim affectibus agitemur, liberi adhuc sumus, si non in iis sentiendis, saltem in iis obsecundando. Quod si quæstio agitetur de homine ab affectibus adhuc libero, dum serena est ratio & purgata, omnem profecto habemus libertatem eas occasiones vitandi, ex quibus illi in nobis excitari possunt: primas illorum scintillas suffocandi, ne adulti ipsi nos suffocent. Atque ex his intelligitur, qua ratione interpretandum sit præceptum Evangelicum de amore inimicorum, quod cum natura pugnare quibusdam videtur. Nam & ipsum duplex bonum est: quippe plenam in nobis honestatem informat, & Deo, æque omnium patri, carum est. Tert. contra Scapulam: *amicos diligere omnium est: inimicos, solum christianorum*. Cur ita? quia christianis tantum vera plenaque imperatur virtus, animoque concreta.

§. XIX. Tertia classis affectuum ex Cartesii partitione continetur sub cupiditate. Cupiditas est affectus animi, quo fertur in bonum futurum. Sub ea comprehenditur etiam aversatio a malo futuro. Nempe quum absentia mali æque ac præsentia boni sit bona & concupiscibilis, in utramque fertur cupiditas. Ceterum si quis cupiditatem circa bona futura desiderium appellare velit, cupiditatem vero circa absentiam mali futuri, fugam & aversionem, nihil repugnamus: turpe enim est Philosophum de vocabulis concertare. Jam *amorem* quoque & *odium* eandem ob causam appellare possis.

§. XX. Inter cupiditates excellunt eæ, quæ ex amore sunt honestatis, horrore turpitudinis. Illæ magis ad amorem accedunt, licet non eo calore, qui in amore

sentitur, accendant, quippe natura animali celsiores: hæ vero similes sunt odio, & timori, eodemque pene modo atque odium & timor animum concutiunt. Inter bona autem, quæ maxime ad cupiditatem nos accendere debent, excellentissima sunt bona animi: ut omnium malorum nullum magis timendum sit viro honesto, quam animi vitium. Interim vulgo non ita existimatur. Animus enim magnæ hominum partis complacentia erga bona corporis, aut fortunæ magis abripitur, quam erga bona honesta. Magna in primis hæc hominis est insania, peritura curare, negligere æterna (a).

R 2

§.XXI.

(a) Cujus rei ea est causa, quod plerique omnes corporis voluptate magis, quam animi tanguntur. Nam est hæc sine ulla controversia pacatior: illa tamen incitatio vehementiorque. Brevius illa quidem conficitur, sed sapit penitius: hæc durabilior, sed permulcet leniter. Brevis, corporis voluptates animali sapidiores sunt: animis animi gratiores. Quotus autem quisque se animal nature non subinde sentit? animum pauci, iique sapientes, commeditantur. Quo pertinere puto, quod ait Apostolus, hominem animale ignorare ea, quæ sunt spiritus. Illud dignum hic quæstu fuerit, cum Stoici hanc nature perturbationem ac imbecillitatem a sapientibus abesse oportere præciperent, docerentque interea, eos nature convenienter vivere debere, ecquid illi hisce verbis, nature convenienter vivere, significaverint? Cicero de off. III. 1. Etenim quod summum bonum a Stoicis dicitur, convenienter nature vivere, id habet hanc, ut opinor, sententiam, cum virtute congruere semper: cetera autem, quæ secundum naturam essent, ita legere, si ea virtuti non repugnant. Ridicule: virtutem enim ante naturam constitui oportuit, aut natura insitam; quum illi tamen frequentissimi docerent longo ad eam itinere iri. Vis igitur dicam? ad nature præscriptum accipio. Ac præscribit quidem natura, cum dolore aut ægitudine imperat quidquam. Levare igitur dolorem: animi molestiam aut ægitudinem expellere: irritatam exasperatamque naturam placare: id illi nature convenienter vivere appellant. Virtutem igitur coluere, quod ea efficiens utilitatis hujus esset, quæ pacata natura continetur. Epicurei, dicet aliquis, fuere! Opinor, irato alioquin M. Tullio: verbis enim, non re, secernuntur; aut si quod est, quo distent, barba sola & pallio segregantur. Hic noster vehementer stultum fuit: nec tamen minus aut ambitiosus, aut opipararum coenarum appetens; aut villis superbisque edificiis excellere avidus. Sed abstinens alieni fuit, dicet aliquis. Id quidem fateor, spolia ac rapinas abstinuisse: clam habere si posuit, & honestis in speciem nominibus, baud adspersatus est. Na-

§. XXI. Ad cupiditatem autem referri solent primo quidem spes, metus, zelotypia, securitas, & desperatio: deinde etiam animi fluctuatio, animositas, audacia, pusillanimitas, æmulatio, & consternatio. Spes est animi affectus, quo ita efficitur, ut facile credat id eventurum esse, quod cupit. Quumque non evenire id, quod desideratur, sit malum; malum vero metuatur; hinc fit, ut nulla cum spe non metus aliquis sit conjunctus, nisi forte cum ea, quæ ob certitudinem rei futuræ, fiducia appellatur. Spes sanguinem rarefacit, ejusque motum expeditiorem reddit: metus contra condensat, atque impeditiorem ad motum reddit. Hinc spe lactati lætiores & opimiores esse solent; metu vero turbati exsanguies pallentesque. Sed & pallefcunt quoque qui ingenia magnorum inceptorum cogitatione vastant; quippe in quibus plurimum est metus (a).

§. XXII. Plerumque spes & metus oriuntur magis ex corporis temperamento, aut animi imbecillitate, quam ab objectis externis, eorumque actione. Hæc spes dicitur *falsum gaudium*, metus vero *panicus* (b).
Ob-

rura scilicet convenienter vivebat. Nam cum emere vellet in Palatio domum, & pecuniam in præsens non haberet, a Publio Sulla, qui tum reus erat (Catilinariæ conjurationis) mutuum sextertium vices (ducatorum millia 50 circiter) tacite accepit (Gell. Noct. Att. XII. 13.). Id primum in Senatu inficiatus est: detestatus postremo, irrisit velut ἀνορθόνοτος, sensus communis expertes, qui redarguebant. Hoc Stoici vocant, naturæ convenienter vivere. Sed nullo ævo ejuscemodi non desuere Stoici.

(a) Sallustius Catilinam paucis, sed vix imitandis, depinxit. Namque animus impurus, Dis, hominibusque infestus, neque vigilia, neque quietibus sedari poterat; ita conscientia mentem excitam vastabat. Igitur color exanguis, fœdi oculi, citus modo, modo tardus incessus: profus in facie vultuque vecordia inerat.

(b) Timores panici vulgo dicuntur, quibus nulla subest metuendi causa. Παν, Pan, ajunt, deus Pastorum perhibebatur: pineam coronam gestans in capite, cornutusque fingebar: pedibus caprimis instructus: altera manu fistulam septem calamis constantem, altera baculum inflexum tenens: jostudm̄ sese oblectans. Quum nulli sint magis avidi annicularum, ut ait Lucretius, quam agrestes simplicesque homines, affirmabant, si ceteribus credimus,

late sentiscere quom Pan
Pinea semiferi capitis velamina quassans,

Observatum est Aristoteli, homines & bruta, quorum cor habita ratione ad corpus, magnum est, timiditate laborare; quorum vero minus, audacia. Ejus rei ratio est, quod cor magnum minus sit aptum sanguini vegetando ac movendo: ejus enim fibræ quo longiores sunt, eo minus sunt elasticæ: deficiente in corpore sanguine, desit ejus vis necesse est: inde vero nascitur corporis habitus meticulosus. Contra vero homines, & bruta, quorum cor parvum est proportionē ad corpus reliquum, animosa esse solent & audacia, quia vi sanguinis majori sese valentiora persentiscunt. Præterea iidem affectus plurimum pendent a corporis totius temperamento & robore, fibrarum præcipue elasticitate. Hinc temperamento cholericō, aut sanguineo præditi, corpore quoque robusti, audentiores sunt, & fortiores: timidi contra & imbecilli, qui præditi sunt temperamento melancholico, aut phlegmatico, quique corpore sunt tenui & imbecillo. Tandem hujusmodi affectus pendent plurimum ab animi constitutione. Qui enim rerum, in quibus versantur, imperiti sunt, timore agitantur; qui autem periti, spe pleni, aut audacia esse solent.

R. 3

§.XXIII.

Unco sæpe labro calamos percurrit hiantes

Fistula silvestrem ne cessent fundere musam.

Cetera de genere ~~monstra~~ ac portenta loquuntur.

Huic igitur Pani, quem qui esset ignorabant, panicos tribuebant timores. Sed & Faunos pariter extimescebant,

Quorum noctivago strepitu, ludoque jocanti

Affirmant, volgo taciturna silentia rumpi,

ut ait ibidem (lib. iv. 586.) Lucretius. Igitur Lexicographi α παν, palco dictum πανα putant. Indocte. Servius ad Virg. Ecl. ii. 41. a παν, omne, derivat; siquidem natura totius partem aliquam in eo effingendo contulerant. Idem statuit Plato in Cratylō, qui duos Panas distinguit, verum, & falsum. xxi εστι, inquit, διπλος, αληθης τε, xxi ψευδης. Illum vult esse vim ipsam veri ac λογος divinum: hunc, falsi; ac illum αωδεν esse, celtus: hunc παναδεν inferius. Probat tamen. Namque sic accipio, ut Pan sit lex universæ, ac iusta dixis vaneis, qua & Deum, & inferos metuimus. Itaque Mercurii filius est: Mercurius autem λογος ratio ac sapientia Dei. Igitur timores panici ii primum dicti, quos non sensus excitaverat, sed conscientia, ac divinitus: mox pani per inscientiam ac socordiam, similiter nominati.

§. XXIII. Hæc, quæ adnotavimus, probe sunt unicuique perpendenda. Plerumque enim fit, ut a magnitudine animi decepti, aut ab ejus pusillanimitate exterriti, objecta externa majora, aut minora, quam vera sunt, æstimemus, atque hinc in mala gravissima præcipites ruamus. Dicamus hoc in loco semel saltem, quod omnibus scitu maximopere necessarium. Tota hominis tranquillitas in hoc est posita, ut veras relationes, quas cum rebus externis habemus, cognoscamus, dimetiamur, si fieri potest, atque iis consentanee vivamus. Hoc illud est, convenienter naturæ vivere: hoc το μετρον. Quotiescumque igitur contingit, ut hunc ordinem turbemus, quieti & beati esse nullo pacto possumus. Nihil hunc ordinem turbat vehementius, quam affectus falsi, qui scilicet rebus aut intensitate, aut extensione, aut duratione non satis pares sunt.

§. XXIV. Spes, quæ omnem metum excludit, dicitur securitas, &, ut dictum est, fiducia: metus vero omnem excludens spem, desperatio appellatur. Quod ad ejuscemodi affectus pertinet, observandum est primum, in rebus humanis nulla in re plena fiducia adharendum esse, nisi solis animi sui bonis: sola enim hæc sunt, quæ nunquam nobis deesse possunt, quum cetera nutent perpetuo, & magna fallant sæpe specie, quibus idcirco plene fidere nequeamus, si sapimus. Deinde nemini desperandum esse quocunque periculo, vel malo urgeatur: rerum enim eventus ab infinitis prope modum causis innexi pendent, quæ commutari, atque alia ratione copulari possunt, & in bonum verti. Tercio, neminem ad desperationem adigendum; potentissimus enim affectus est desperatio (a). Præterea neminem

(a) Itaque sapienter Themistocles, pontem, quæ in Græciam Xerxes trajecerat, devictis terra marique Persis, intercidi vetuit: sacrum enim eorum supererat adhuc; ut si in desperationem vergerent, totam possent funditus Græciā in delubrum. Quod etiam vide Plutarchum in Xerse. Ac vero tota vis hominis animalis in nervis est ac musculis: hos inflat tenditque ira: iram succendit desperatio. Animamantia timida alioquin & imbellia, nonnihil sæpe is affectus terribilia efficit. Postremo cuicumque semel decretum est mori, omne eripitur vi, ac solus, ac inultus moriatur. Quæ res devictos inter-

nem magis timendum esse, quam hominem spe & metu vacuum: hujusmodi enim homo omnibus feris truculentior est, nec ab eo quisquam, quantumvis potens, satis tutus esse potest. Perstant ejus rei exempla, luculentissima in tota humana historia. Exemplo sint duo Galliarum Reges, Henricus III. & Henricus IV. inter suos trucidati.

§. XXV. Zelotypia est metus perdendi bonum, quod impense amamus, & æstimamus, sed ex parvis suspirandi causis ortus. Itaque est excessus timoris, ac proinde naturæ imbecillis, quum temperamento, tum præsertim ratione. Est vero Zelotypia magnorum & plurimorum malorum causa, præsertim cum ea laborant ii, qui regimen quodvis gerunt: nam ut animi nimia securitate mala alioquin magna negliguntur, quæ proinde maxima evadunt; ita Zelotypia parva mala, quæ neglecta evanescerent, maxima interdum fiunt. Prudentis enim viri est ut non negligere, quæ alicujus momenti sunt, ita non magni ea facere, quæ minima sunt, nec ullius momenti, quæ esset utilis zelotypiæ natura. Sed agnosco hoc præceptum nisi naturæ & rationis robur accedat, inutile esse.

§. XXVI. Animi fluctuatio est metus errandi in electione mediorum. Audacia vero est animi commotio, qua determinatur ad promte & viriliter agendum. Animi fluctuatio plerumque ex magnitudine contrariarum rationum nascitur: plerumque vero ex infirmo temperamento & ratione imbecilli. Eodem modo audacia aut a temperamento existit, aut a magna & robusta ratione. Vir prudens, ne ab hujusmodi affectibus aut impediatur, aut præceps agatur, attentus esse debet continenter ad tempora consultandi, & tempora agendi. Est enim tempus, quo consultandum est, non agendum:

R 4

dum:

dum fugatosque exercitus victores fecit, dum nimium premendo metum mors certa excuteret. Sed & idem in populis verendum. Neminem præterquam pax esse, potestque tolerari, sine ingenti periculo vexaveris. Præterea igitur Plato (de Rep. II. pag. 428. Ficini Lugd.) ἀνικτὸν θυμὸν, invictum quid iram vocat; quippe ὁ παρώντος, ψυχὴ πάντα πρὸς πάντα ἀρβός τε καὶ ἀνικτὸς, quæ cum adest, animus totus imperterritus est ac domari nescius.

dum: est vero etiam tempus, quod non consultatione, sed mature facto opus habet. Qui tum agunt, quum consultandum est, quales ut plurimum, qui temperamento sanguineo sunt præditi, non possunt non in gravissima mala ob nimiam audaciam ire præcipites. Contra qui tum consultant, quum agendum est, ob intempestivum timorem rem omnem perdunt.

§. XXVII. Ex iis, quæ dicta sunt, intelligitur, quæ superius explicatæ sunt perturbationes, excessus esse cupiditatis, aut timoris, quæ oboriantur aut a temperamento, aut a ratione imbecilli, aut a prava, vel ruvida educatione. Quocirca qui ab iis cavere sibi vult, si non potest temperamentum corrigere, quod procul dubio difficillimum est, is saltem operam det, ut ratio, si fieri potest, emendetur & augeatur: ita enim, ut non omnino compescantur, saltem eo rediguntur, ut minus noceant. Emendatur autem augeturque ratio rerum experimentis atque intelligentia; quod & multo tempore indiget, & patientia. Quid? inquit aliquis: cum temperamentum corrigere nequeo, sola ratio inutilis est ad eos affectus intra suos cancellos continendos. Hobbes, ajunt, extimescebat larvas, quas fabulas esse prædicabat. Ita fieri quoque potest, ut quis speret, quæ sibi persuasit se consequi non posse. Respondeo principio, non omnem rationem ad id esse aptam, sed eam, quæ in succum & sanguinem evasit, quæ scilicet habitu constet. Deinde nego homines extimescere aut sperare ea, quæ sibi persuasere esse falsa, plurimumque discrimen esse ajo inter *velle sibi persuadere*, & *persuasisse*, ut inter *velle dubitare*, & *revera dubitare*. Illud molestius, quod sæpe stulta, aut imbecilla ratio corporis temperiem sequatur; ut, nisi hoc revulso, illi nullo pacto acies dari posse videatur. Sed ut in ceteris naturæ rebus, ita sunt in homine quædam, quæ postquam induruerunt facilius refeceris, quam emendaveris; nec est ars ulla aut disciplina, quæ de bruto hominem faciat, si natura resistat.

§. XXVIII. Interim hoc in loco animadvertendum est, spem & timorem esse affectus non solum utiles, verum etiam necessarios naturæ humanæ, cum primis

in coetu ac aliorum cum aliis societati viventibus. Itaque qui eos homini adimere studet, de homine latrem crudum facere conatur. Totam quoque vitam humanam, & societatem subvertere aggreditur. Primum spes non solum temperat praesentes molestias, verum etiam alas virtuti addit; ut si spe nulla tangi possint natura nostra, in eo, in quo est, statu, miserrima sit necesse est, quippe nesciens mollire praesentia ac dura, & nullo stimulo ad longinqua bona persequenda agitata. Deinde metus velut sepimentum est, quo mala arcentur, quum a natura singulari, tum a tota societate. Bellua nulla ferocior esset & infestior homine, si nullo metu tangi possemus, quod & superius adnotavimus (a).

§. XXIX. Quæsitum est, cur spe lactati homines, quæ tamen moderata sit, & sine æstuante desiderio, bene se habeant? Deinde cur qui timent, expallescant & contremiscant? Paucis ac eleganter explicat primam quæstionem Hieronymus Cardanus lib. 14. de rerum subtilitate. *Spes, inquit, sensum naturalem calorem diffundit. Unde inter omnes affectus animi sola spes hominibus utilis est; concoctionem enim, & dulces somnos parit, unde etiam corpus bene coloratum reddit & pingue.* Ex quibus intelligi potest, qui potuerint viri quidam sancti in summis angustiis corporis positi, dum tamen bona divinaque spe pleni expectarent beatam retributionem, pulchro oris adpectu videri. Ac vero cum totum

(a) Nihil æque cogit esse bonos: cupiditatem enim compefcit meus. Themistocles verebatur Aristidem, quo fiebat, ut ne ambitioni ac dominatui fræna laxaret: Cimonem Pericles: Germanicum Drusumque Tiberius; quibus occisis, quantum natura malignitatis regeret, patefactum. Quare sapienter Plato in v. de Rep. (pag. 462. Ficini Lugd.) magnos esse ait in Rep. ad arcendam injuriam custodes ac ministros deos τε καὶ αἰδω, metum ac pudorem. Quid, quod ejus, quæ vera est sapientia, metus initium est? Quapropter a Chrysostomo hom. xv. ad popul. Anthioch. timor dicitur τελευτῆς, καὶ ἀποφύγις, καὶ πύργος ἀντιστρατεύσεως, murus, munitio, turris inexpugnabilis. Horat. ad Romanum populum lib. III. od. vi.

Dis te minorem quod geris, imperas:
Hinc omne principium, huc refer exitum.

tum corpus cordis quasi explicatio & propagatio sit, ut docebunt Physici; cor vero afficiant commoveantque affectus; nihil æque sanitati confert, quam jucundis motionibus demulceri.

§. XXX. Quod spectat ad alteram quæstionem, causa in promptu est. In timore enim colligitur statim sanguis, & cogitur in interiores corporis partes. Quumque artus sanguine & spiritibus destituantur, tremunt timentes, vox aufertur, totumque corpus pallefcit. Sed qui fieri potest, ut subito timore canescant quandoque etiam juvenes? Scilicet quum magnus timor humorem, quo nervuli ac capilli virescunt (nam nervorum sunt propagines) retrahit, tum subitam canitiem inducit, non secus atque frigus dum succum nutritivum ex ramis plantarum retrahit ad vasa interiora, plantarum frondes arescunt.

§. XXXI. Superfunt gaudium & tristitia cum sua sobole. Bonum præsens perceptum, quod nos spectat, aptumque sit naturæ nostræ perficiendæ, conservandæ, beandæ, lætitiæ & gaudium excitat: malum vero præsens perceptum, quod aptum sit naturæ nostræ destruendæ, vel minuendæ, vel infelicitandæ tristitiæ seu ægritudinem parit. Positum est gaudium in æquabili quodam & tenui calore, qui paullatim sanguinem rarefacit, ac præterea in intensiori fibrarum & nervorum tensione. Nullus est affectus æque sanitati hominis conservandæ aptus; siquidem eo vasa fluidorum lente dilatantur, motus fiunt expeditiores, & expiratio, ac perspiratio liberior, quod plurimis observavit Sanctorius in Statica corporis humani medica. Hinc lætantes vegeto sunt & rubicundo colore, quoad temperamentum patitur. Tristitia consistit in retardatione motus sanguinis, & caloris quadam remissione: itaque videre est tristes squallido vultu & lurido. Quum in tristitia vasa fluidorum coarctentur, motus retardetur, respiratio impediatur, ~~appareret quædam sit causa, cur~~ tristes tam frequenter ægrotent (a).

§. XXXII.

(a) Itaque aut nulla, aut hæc sola est ars beate vivendi, se hilariter, ex animique sententia vitam agamus perpetuo. Hisce,
 ~~hæc sunt sententia~~
 ~~ais,~~

§. XXXII. Quemadmodum lætitia præfenti hominum statui utilis est, triftitia vero noxia; ita fi tota vita moralis fpectetur, nimia lætitia noxia est, parum triftitiæ utile. Nam nimia lætitia aut nos fuperbire facit; aut omnia contemnere; parum vero triftitiæ nos fingulis in rebus attentos efficit. Nihil unquam præclarius est a Tacito dictum, quam illud, *fecundæ res nos acrioribus ftimulis exagitant; quia miferiæ tolerantur, felicitate corrumpimur*. Ceterum fi triftitia modum excedat, quod contingit aut ob magnitudinem malorum, aut ob temperamentum melancholicum, aut ob alias caufas; nos in fanatiftimum præcipitat, atque ineptiffimos quum ad privatam, tum etiam ad civilem vitam efficit. Nam nimium triftes, & fecum ipfi perpetuo irati videntur, & in focietate civili fufpiciofi omnia turbare conantur. Refert Plutarchus in Cæfare, illum timuiffe neminem magis, quam Brutum Stoicæ Sectæ hominem & perpetuo triftem. Nec fine ratione timebat hominem ingentium fpirituum & inquietum, a quo tandem trucidatus est. Quare lætitia geftiens inepta est: magna triftitia periculofa; medius animi ftatus utiliffimus (a).

§. XXXIII. Sub capitibus fuperioribus plures alii continentur.

ais, noftris moribus, *quo in his magnorum affectuum officinis, quas urbes appellavimus? Ludovicianæ incolæ nihil nifi lætitiâ, admosque fua forte contentos expirare, noftri, cum eo delari funt, reperiunt. Seminudi, literis ineruditi, perpetuo infantes. Igitur & ludibundi perpetuo, & hilares. Itaque ego quoque Prometheæ fubirafci incipio, qui raptum æthereâ domo ignem tot curis nos oppreffit.*

(a) Sunt & gaudia turbida, ut vocat Horatius, cum bono, quo lætamur, aliquid immifceatur aut fufpicionis, aut mali. Virgilius = Lætitiâ metuque avidi = Claudianus = mixtoque metu perterrita gaudet = Neque alio, dum hic agimus, hominum gaudia. Animi igitur virtute, eaque unica, nobis gaudendum lætandumque; quippe ea, *fi radices jecit, duruitque, perpetuo confare poteft.* Horat. ep. x. lib. i.

Quem res plus nimio deleftavere fecundæ
Mutatæ quantent. Si quid mirabere, pones
Invitus. Fuge magna: licet fub paupere tecto
Reges & Regum viæ præcurrere amicos.

tinentur affectus, quos singillatim recenset Cartesius (a), & quorum physicam naturam, sine cujus cognitione ne moralis quidem eorum usus intelligi potest (b), diligentissime investigat. Nos ad majora festinantes, minuta quædam præmittimus, quæ industrii lectores aut ipsi per se intelligere possunt, aut aliunde petere: illa accuratius describemus, quæ nostra magis intersunt, quæ commiserationem, invidentiam, & iram spectant. Commiseratio est tristitia orta ex consideratione alicujus mali, quod ei accidit, quem eo malo indignum putamus. Coalescit hic affectus ex amore & tristitia sibi mutuo occurrentibus, ut nempe amore fervescat sanguis, tristitia torpeat. Atque hinc scire licet, cur fiat, ut nullo affectu tam facile illacrymentur homines, quam commiseratione: id enim evenit eodem prorsus modo, quo creatur in aëre pluvia. Videlicet quemadmodum pluviam efficiunt calor, qui aquas terrestres sublevet in vapores; & frigus aliquod, quo vapores illi in aëre condensentur, & coalescant; ita ut quis illacrymetur, necesse est, ut commotione quadam sanguinis excitetur calor, atque motus in cerebro augeatur, faciatque quasi vaporationem quamdam; deinde ut sanguis paullo refrigeretur, & vasa, ac glandulæ lacrymales comprimantur. Prius efficit amor, ex quo initium habet misericordia; alterum vero

(a) *Nemo tamen copiosius & accuratius quam M. de la Chanbre in opere prope dixerim divino, de natura & characteribus affectuum.*

(b) *Mihi & absurdi & perridiculi oppido ii videntur, qui Ethicas Politicasque disciplinas pertractandas aggrediuntur, omni prorsus Physiologiæ cognitione destituti. Nam si cui rei ejusmodi discipline sunt utiles (ac sunt enim vero) affectibus sunt componendis ac regendis; quorum nec naturam, nisi physiologus, intelliget; nec vim componet, moderabiturque, nisi qui, quibus aut delinimentis ferox hominum natura demulcetur, aut fulcris sustinetur, e physiologia acceperit. Neminem Pericli vetus Græcia parem, nec gerendæ Reipublicæ, nec hominum amos, quo veller, ducendo, peperit: sed eum nec morum quasiuncula fecere, nec inanes incomprehensibilium rerum disceptationes, sed Anaxagoræ summi physiologi disciplina ac consuetudo, ut perspecte judicavit Plutarchus, cujus Periclis vita hic perlegi volum.*

vero tristitia , quæ conceptio amoris supervenit . Inde quoque intelligitur , cur post lacrymas sereniori simus mente : scilicet ea evacuatione humoris liberior evadit motus fibrarum cerebri & fluidorum . Idem contingit & in ceteris corporis aut perspirationibus , aut evacuationibus .

§. XXXIV. Hic affectus utilis est & machinæ humanæ , si illacrymationem creet , nec tamen nimiam ; & societati hominum . Ac quod attinet ad posterius , quum potissimum societatis vinculum in hominum inter se communicatione & amore sit positum , ii affectus , qui hoc vinculum foveant , arctiusque efficiunt , omnium maxime hominum societati utilissimi sunt . Id quum efficiat commiseratio , satis aperte ejus utilitas intelligitur . Itaque jure ac merito eos efferatos & inhumanos habemus , qui eo affectu non tanguantur , quos inde potissimum cognoscere licet , quod ad hominis miserabilis præsentiam nec illacrymentur , nec oculos torqueant , nec colorem mutant . Ii omnino cavendi sunt tanquam infestissimæ feræ . Itaque quotiescumque Plautinum servum audio misero irridentem , *oculos habeo puniceos : nequeo exorare lacrumam* , stomachus commovetur . Illud verum , *siccoculum esse servorum genus* . At videndum , acceperimus ne tales , an fecerimus (a) ?

Ce-

(a) Qui , dicit forsitan aliquis , genus humanum , quo pauperius , eo clementius ac miserationis ? Quia nempe minus cupidum , &que liberalius . Qui igitur primi homines intra urbes coegerunt , luxumque docuerunt , humanitate exuisse videntur . Legi hæc in vita gestisque Christophori Columbi , quæ Ferdinandus Columbus litteris mandavit , versaque sunt italice = Tanto è la gente amorevole (in incolis Antillarum) , e senza avidità , trattabile e mansueta , che io giuro alle A. V. (ad Ferdinandum & Isabellam Castellæ Reges scribit) che nel mondo non vi è nè miglior gente , nè miglior terra . Amano questi il prossimo come se stessi ; ed hanno un ragionare il più dolce e mansueto del mondo , allegro , e sempre accompagnato dal riso . *Tante virtutis causas queret aliquis . At ille statim suppeditat* . Ben è il vero che vani nudi , ~~con costumi eguali come~~ , siccome son nati . Pur credano le A. V. che hanno costumi molto lodevoli , cap. 32. *Quid vero nos auro fulgentes & gemmis , severisque literis exculsi ? Subit animum præclarum Theognis dictum apud Platonem in Meno-* ne pag. 23. A. Ed. Lugd. Fic. . . .

Ceterum nimius commiserationis usus etiam erga illos, qui commiserationem nullam merentur, naturam arguit nimis imbecillam. Hujusmodi homines rerum humanarum regimini minus apti sunt: nam perpetuo sunt aut infantes, aut senes.

§. XXXV. Invidentia definita est a Stoicis ægritudo suscepta propter alterius res secundas, quæ nihil nocent invidenti: nam si quis doleat ob ejus res secundas, a quo ipse lædatur, magis vindicta, odium, ira, quam invidentia dicetur. Quum invidentia sit continuata & lenta ægritudo ac dolor, inde intelligitur illud Horatii,

Invidus alterius macrescit rebus opimis.

Ex quo sequitur alterum, quod idem Poëta scribit, quodque eandem habet rationem physicam,

Invidia siculi majus non invenere tormentum Tyranni.

§. XXXVI. Est invidia excessus amoris proprii & odii: itaque est animi parvi, & parvæ mentis: magnanimi enim & boni viri nulli invident (a). Quum porro invidia sit excessus tristitiæ, semper vitium est, invidenti non modo inutilis, sed etiam perniciofa, quippe propter quam in nefaria fertur. Tacitus quia magis quod fit, quam quod fieri nefas sit, videtur spectasse, in primo libro historiarum scripsit, *ita natura comparatum est, ut præsentem aliorum felicitatem agris oculis*

..... αλλα διδασκω

Ουποτε ποιητης του παλου ανδρ' αγαθου.

Neque enim docens

Unquam bonum feceris hominem qui pravus sit.

(a) Qui, dicet quispiam, & ubi terrarum, homines infinite mentis, atque animi? Sed & ob id ipsum nullum non invidiam animal, eaque maxime, quæ homini viciniora. Jam & civitates, & luxus invidiam exacuisse videntur. Quo spectare opinor, quod lepide Plato in Philebo scribit το τοιουν δε ρηθεν ονομα εδουε, novum esse & recenter injectum invidiæ nomen, rem potius, postquam nimirum tanta exstitit editorum iniquitas. Nam cui puerorum ignotum nihil in Homero ac Hesodo frequentius, quam verbum εδουεω? A cupiditate est invidia: illa a dominatu & luxu. Igitur recte invidia λυμη της ουσεως, pestis naturæ, a Chrysostomo appellatur.

oculis intueamur. Scilicet quanquam dubitandum non est, quin immoderato nostri ipsorum amore maxima hominum pars ita affecti simus, ut præsentem aliorum felicitatem non sine dolore oculorum adipisciamus; tamen totum hoc aut depravatæ fuerit naturæ omniaque stulte ad se trahentis; aut fortunatorum superbiæ ac immanitati tribuendum, qui tum insultant, quum beatos se opinantur. Vir ergo bonus & honestus ad præsentem aliorum felicitatem ita rationes inibit, ut seu alter felicitatem illam ob virtutem adeptus est, & ipse virtuti comparandæ studeat: seu ob malas artes, & gloriatur potius, non ita se esse comparatum, ut ejusmodi artibus virtutem scædet; seu ob *fortune temeritatem*, ut dici solet, & arcana providentiæ divinæ veneretur, quum nihil sit aliud, quæ dicitur fortuna, nisi Providentia divina, quæ nihil temere agit. Sed ex invidia magnas utilitates capere possumus, si sapiamus. Invidi enim sunt omnium oculatissimi exploratores virtutum & vitiorum nostrorum. Itaque non aliunde accuratius discere possumus vitia nostra, nec aliunde vehementius incendi ad virtutem. Præclara & magno Philosopho digna sententia illa est; oportere invidentes ulcisci profectu nostro. Hæc sola ultio viro honestatis studioso licita est. Legatur aureus Plutarchi Libellus *De utilitate ex inimicis capienda* (a).

§. XXXVII. Ita est libido ulciscendi ejus, qui nos videatur læsisse injuria. In ira sanguis subito ebullit, atque in vultu, & oculis cernitur. Existimat Hieronymus Cardanus, iram temperamentis pituitosis, & phlegmaticis esse affectum utilissimum, quod scilicet machinam suapte natura molliorem excitet, & faciat agiliorem. Sed in societate civili tum utilis est, quum

mo-

(a) *Sæpe aliorum aut felicitas aut gloria urit* = urit enim fulgore suo qui prægravat artes = infra se positas, ut ait noster Horatius. Itaque naturam vellicat, paritque emulationem: *emulatio & labor cunctantur, & artes perficiuntur*. Tametsi igitur invidentia vitium est, habet tamen aliquid effecti, quod laudare possis. Sed id utile, quousque malis moribus repagulum est aliquod: luxuriantibus illis, ac libere vagantibus, perversit id ipsum, in quod intentis tendit.

modum minime excedit : necessaria enim est , ut nos defendamus , & injurias propulsemus. *Elasticitas animalis* appellari potest. Sed si modum exceßerit, aut frequens fuerit, abeatque in habitum, nihil vitæ civili infestius. Hanc iram jure veteres dixerunt *brevem insaniam*. *Hominem nimium iratum, ruinis simillimum* dicit Seneca, quæ super illud, quod oppræssere, franguntur. Legendi sunt hujus Philosophi libri *De ira ad Novatum*.

§. XXXVIII. Postremo id etiam in affectibus observandum est, omnes ferme in vultu apparere, atque inde discerni posse. Id non sine Providentia divina fit. Primum enim si affectus sint noxii, ex vultu ejus, qui iis agitur, nobis cavere possumus. Deinde ex eodem vultu ceteri spectantes nobis conjunguntur ad defensionem, si fuerint affectus ex malo provenientes. Tertio si affectus fuerint amoris, & benevolentiae, iisdem signis adstantes concitantur, atque eodemque affectu commoventur. Itaque nulla ex re clarius intelligi potest, homines ad societatem, & vitam communem creatos esse. Qua ex re præclaras deinde consequentias deducere possumus (a). De conjectandis animi motibus ex vultus forma ac signis, scripsere plures, nec sine magna verisimilitudine. Scipionis Claramontii extat *Semiotica* : Portæ nostri *Physiognomia*. Mediocria. Ego his in rebus physicum, eumque Anatomicum, audio facilius, quam Ethnicum. Illi perspecta natura : huic *exprompta imaginatio*.

CA-

(a) Noverunt id Oratores, qui non aliam vehementiorem accendenda multitudinis artem habent, quam ut ita vultu, atque gestu concitentur, ut eos incendi volunt, ad quos loquuntur. Inde fuere illæ in vetustis Rebusp. turbæ : inde factiones. Ceterum nemo incendi potest, nisi *magarum* seu utilium, seu terribilium rerum imaginibus. Quo illæ & gradatioræ fuerint, & vividioribus depictæ coloribus, eo spectatores concitantur fortius. Cum nulla re penitus commoveamur, quam natura ipsa, præsertim si insolens sit : eam oculis spectatorum vel lectorum obijcere aut orator aut poeta debet, qui eos irasci, aut metuere, aut amare vult.

CAPUT VI.

De officiis erga alios perfectis, & absolutis.

§. I. **E**X iis, quæ in I. Libro demonstrata sunt, perspicuum est, hominem qua hominem debere aliis hominibus natura sibi æqualibus eadem jura, ac sibi; adeoque amicitiam non minorem, quam sibi ipsi, etsi non priorem. Ita ergo jure suo uti potest, ut nullo modo alienum invadat. Ea igitur amicitia duo exigit officiorum genera, alia ut ne quemquam lædamus; alia ut aliorum bona pro virili provehere, & amplificare studeamus. Quæ ambo ex natura amoris proficiuntur: nam qui amat, nec lædit, quem amat; & quatenus potest, juvat. Eadem ex lege efficiuntur Universi, *jus suum cuique tribue*. Priora officia justitiæ appellari solent, posteriora humanitatis, & beneficentiæ. Jam vero quum aliorum bona vel naturam ipsam humanam consequantur, ac nobiscum conata sint; vel sint extrinsecus arcessita ad nos conservandos, qualia præsertim sunt bona fortunæ; quæ officia spectant, ne priora bona deteriora efficiamus, *absoluta* consueverunt appellari: quæ vero pertinent, ne lædamus posteriora, *hypothetica* dicta sunt, quia hominum facta, & pacta conventa supponunt. Ut autem de iis omnibus via & ratione differamus, primum de perfectis & absolutis agemus; deinde de perfectis hypotheticis; tandem de officiis quæ ex humanitate, liberalitate, & beneficentia ducuntur.

§. II. Ac principio constituendum est, hominem homini natura, nempe qua homo est, esse æqualem. Nam quanquam intensitate qualitatum & perfectionum ejusdem naturæ humanæ alter alteri sæpe præstat, externaque forma, aut moribus ab altero differt; natura tamen ipsa non antecellit, nec differt: id est *essentialia* naturæ humanæ sunt in omnibus hominibus eadem, licet non eadem sint adventitia, quæ educatio, legislatio & regimen civile, ars, imitatio, exercitatio, clima, commercium, aliæque externæ causæ efferunt.

Quare iniquos censeo, qui scribunt, stupidos & barbaros homines plus specie a perspicacibus & cultis differre, quam ab hominibus stupidis animantia bruta perfectiora. Stupiditas enim aut perspicacia, ignavia aut industria, barbaries aut cultura, non sunt argumentum diversæ naturæ, sed tantum aut diversorum temperamentorum corporis, aut diversorum habituum, ex quibus diversitas tantum *accidentalis*, non etiam naturæ nascitur. Et quemadmodum idem est homo quod ad substantiam, infans, adultus, senex, licet non iidem sint in infante, adulto, & sene habitus intellectus, voluntatis, corporis; eodem modo homines indocti, stupidi, ignavi, & docti, ac perspicaces, non plures, sed eandem speciem constituunt, atque ad idem animantis genus pertinent. Nam quod censet Aristoteles, homines dispari conditione nasci, alios natura servos, ut barbaros stupidosque, ac ignavos; alios natura dominos, ut egregiæ indolis homines, gnavosque; id ita accipio, ut naturæ consentaneum sit, in societate civili prudentiores gubernare, stupidiores parere, quia regimen politicum est sapientiæ & prudentiæ opus.

§. III. Ceterum quum dicimus homines natura esse æquales, eas hominum proprietates spectamus, quæ omnibus naturales sunt, & insitæ: alioquin non levis, ut dictum, est inter eos diversitas ex proprietatibus adventitiis, & statibus humanis. Proprietates enim adventitiæ, modo secundum naturam, velut gradus quoddam perfectionum inter homines pariunt; qui idcirco diversa quoque jura invehunt, ac nova officia exigunt. Præterea diversi hominum status, quibus fit ut alii sint Patres, alii Filii, alii Senes, alii Juvenes, alii Magistratus, alii Populus, alii Imperantes, alii Subditi, alii Sacerdotes, alii Laici, atque innumerabiles alii; & ipsi non parvam differentiam inter eos constituunt; quam observare, & propriis officiis prosequi, æquum est; quia id secundum naturam est, & ad hominem ipsum servandum pertinet. De his autem statibus inferius dicturi sumus. Illam nunc naturæ æqualitatem consideremus, atque inde profluentia officia explicemus.

§. IV. Quoniam ergo omnes homines quod ad naturam sunt æquales ; idest æqualia sunt eademque ingenta cuique jura ; sequitur , ut in eo , in quo sunt æquales , ex æquo eos lex naturæ spectet , & ex æquo omnibus consulat , & ut sint , & ut bene , beateque sint . Ergo omnibus omnino præcipit , ne quemquam ullo modo lædamus , idest ne cuius perfectiones , seu naturales , seu juste acquisitas , deteriores efficiamus , neve cuius juri detrimentum ullum aut impedimentum afferamus . Nam si cuiquam liceret quemquam lædere , non omnes iisdem juribus præditi nasceremur ; nec omnes ex æquo lex naturæ spectaret ; nec omnibus ex æquo consuleret ; nec propterea omnes ut æquales haberet . Ipsa nos conscientia ejus præcepti admonet : nempe nemo est , qui non clare persentiscat egregiam illam naturæ vocem , *quod tibi non vis fieri , alteri ne feceris* , & , *quo jure alios tecum agere vis , eodem ut cum aliis agas* . Quin id e re nostra est ; nisi enim hæc lex obtineat , nihil cuique certum & salvum esse potest , ut perpetuo incerta sit vita nostra , fama , bona , necesse sit . Nulla major privata utilitas , quam in commune consulere . Stulti atque indocti , qui contra , quam hæc sancit regula , quidquam commoliuntur .

§. V. Præclare Seneca eam rem demonstrat ex natura societatis , in qua vivimus : *Nefas est* , inquit , *nocere patriæ : ergo tibi quoque : nam hic pars patriæ est : sanctæ partes , si universum venerabile est ; ergo & domini : nam hic in majori tibi urbe civis est . Quid si nocere velint manus pedibus , pedibus oculi ? Ut omnia inter se membra consentiunt , quia singula servari totius interest ; ita homines singulis parcent , quia ad cœtum geniti sunt : salva enim esse societas nisi amore & concordia partium non potest .* Hæc ille de beneficiis . Et certe cum eo , qui ne vilia quidem humanitatis officia nobis præstare paratus est , dummodo ne lædat , vitam socialem inire utcumque possumus , & sæpissime inimus : at cum paratis ad læsionem nullo modo sociari : quilibet enim quodam naturæ impetu ab eo cavet , qui lædere promptus est . Copiose hæc explicat Pufendorffius de jur. natur. & Gentium Lib. III Cap. I. §. I.

§. VI. Atque hæc adeo perspicua sunt, ut interfecta nationum omnium, saltem non omnino moribus effertarum, hoc maxima cura repetitum legamus, *quod tibi fieri non vis, alteri ne feceris*. Certe inter præcepta honestatis naturalis illud retulerunt Romani, *ne minent læde*. In eadem sententia explicanda atque inculcanda, & veterum Romanorum exemplis confirmanda, plurimus est Cicero in I. Lib. de Offic. Præclarum est & illud, quod de Alexandro Severo Lamprius refert in ejus vita, adeo nimirum placuisse ei sententiam istam, ut non solum jussit eam præscribi in Palatio, & in publicis operibus, verum etiam quum aliquem increparet ob illatam alteri injuriam, vel damnum, per præconem præceperit clamari, *quod tibi fieri non vis, alteri ne feceris*. Idipsum prædicatum apud veteres nationes, in primis apud Græcas, plurimis demonstrat Grotius. Plato, & Aristoteles, atque alii Græci Philosophi copiosissime idem dogma explicant, atque inde omnes leges justitiæ derivant. Observavi ego sæpe, infantes, cum validior eos aliquis sine ulla causa aut percuteret, aut terrefaceret, respondere solitos, *quum nihil tibi sit a nobis mali, cur verberas?* Quæ naturæ profecto vox est (a).

§. VII. Summum igitur cujusque jus omnes leges naturales lædere vetant. Id quod eo vel maxime servandum est, quod qui alterum lædit, ne ipse quidem tutus

(a) - Quid igitur causæ fuisse dicamus, ut cum hæc non solum non ignorent, sed ultro profiteantur agrestes indoctique homines, magnis in urbibus, nostrisque Achillis, ignavorum animorum ac degenerum, ignota esse videantur? Nempe eo tandem aliquando luxuriei venimus, ut quo cultiores, eo vehementius vitam agitemus ferarum; quibus, ut ait Hesiodus, hanc legem Saturnius dedidit Jupiter, ut sese mutuo capterent, vorentque. Itaque ea hodie sapientia est celebraturque maxima, ut, quemadmodum noster ait Horatius, si quis intelligentior est, tum sapit, cum

rara tendit retia

Turdis edacibus dolos,
Pavidumque leporem, & advenam laqueo gruem
Jucunda captat præmia.

Nempe hæc est illa pernicies, quod alios bonos, alios sapientes existimant. Cic. III. de off. 10.

tus a læsione esse possit, nec propterea tranquille vivere, ad quod omnes, nisi stulti simus, contendere debemus: Quum autem hoc cujusque suum jus ad varias perfectiones pertineat, animi nempe, corporis, publicæ existimationis, bonorum fortunæ; omnia hæc quocumque modo efficere in alio deteriora, est adversus primarias naturæ leges peccare, sequere ipsum infelicitare, aut cur misere sit, causas struere. Sed de singulis juris cujusque partibus singillatim differendum est. Ut autem initium ab animo faciamus, possumus alterius mentem lædere vel in ratione; vel in voluntate. In intellectu tripliciter: primo omissione culturæ, si aut natura, aut conventionem ad eam obligemur: secundo prava institutione: tertio pravis doctrinis.

§. VIII. Ac principio parentes, aut qui parentum sunt loco, tutores, curatores, pædagogi, doctores, pactis tenentur, eam liberorum curam suscipere, quæ eorum intellectus ea cognitione imbuatur, quæ naturæ & conditioni eorum est necessaria: quæ utilis sibi, aliisque. Hanc curam qui negligunt, aut non recte exercent, ii non minus adversus naturæ officia peccant, quam qui dedita opera alienas mentes depravant. Tum Magistri omnes omnium disciplinarum & artium ex conventionem obligantur rite atque recte commissos sibi discipulos erudire. Qui si aut minus sint ipsi in iis versati, aut artem docendi ignorent, & vel nimia prolixitate, vel ineptiis rebusque minime intelligibilibus fastidium creent, atque ab honestis studiis avertunt; vel nimia brevitate mentibus tenebras offundant: aut perturbatione doctrinarum & præceptorum rationem pervertant: aut tandem nimia severitate odium in literas artesque ingenerent in suis, vel nimia indulgentia lascivire sinant ingenia; gravissimo crimini sunt obnoxii (a). Et quandoquidem omnis læsio natura ipsa

S 3

re-

(a) Nec vero velim, ut quis arbitretur, in personas modo, familiarisve ab his peccari: in civitatem ipsam ac Remp. peccant; in qua, ut subtiliter, vereque disputat in III. de Legibus Plato, cum tria sint maxima vicia, mala, ignorantia rusticitasque, acerba civium, error, improbitas; omnia ab illo fonte, vicia utilium ignorantia, manant, probatque illud, quod & non

str

reparationem exigit; nisi illata damna resarciant quoad sciunt & possunt, in lædendo perseverant.

§. IX. Quid, inquit aliquis, si nec meliora sciant, nec melius? Nempe posteriores, idest magistri, cedere de instituto suo debent, quod sine crimine exercere nequeunt. Priores autem, idest parentes, nihil prius neque antiquius habere debebant, si sapere volebant, & honeste agere, quam, ut ait Plato, ea primum discere, quæ sunt ad educationem liberorum necessaria, quam nuptiis animum intenderent. Id si neglexerunt, atque brutorum animantium in morem non ratione, sed veneris stimulo in nuptias irruerunt, nec grandiores discere possunt; quoniam fieri nequit, quin patres sint, saltem sapientes institutores liberis dare debent; aut, si inopia prohibet, publicis committere. Nihil clarius ex jure naturali sequi video: natura enim exigit, ut homo homines generet & educet, non aut bruta, aut feras. Interim nihil latius aut frequentius negligitur. Publicum malum, ex quo pessimi quique mortalium proveniunt; & inquinatæ scelestis aut ineptissimis civibus civitates. Nihil ego hoc fœditus & nefandius habeo; quia civitatum seminaria inficit (a).

§. X.

stri dicunt, omne peccatum esse ignorantiam. Enim vero superbia, luxus, crapula, injuria, dolus, superstitio, impietas, quæque crimina urbes gentesve corrumpunt, ac postremo perdunt, huic causæ debentur omnia, quod, ut ait ille, cum pudendum est, non pudet; pudet, cum pudere non oportet.

(a) Id Lycurgus prospexit, qui sanxit, non privatam rem esse liberos, sed publicam, publicæque institutionis & discipline: itaque non parentibus, sed Reip. credidit, ab eaque educi, exerceri que voluit: qua de re vide Plutarchum in Lycurgo. Ac vero quam sumus rustici rerumque civilium imperiti, qui existimamus quidquam esse posse magis publicum, aut quod magis Reip. inter sit, quam sunt infantes! Quasi si aliud sit, ex quo Resp. coalescat, quam familiæ. Hoc ipsum in christianis civitatibus sapienter ac divinitus constitutum est: nam quam aliam partem in iis ecclesiastici gerunt, nisi educatorum, ac præmonstratorum virtutis & sapientiæ? Sed nescio quo fato factum est, ut postquam de imperio ac divitiis disceptari ceptum, acriterque contendere, pro virtute via, pro sapientia petulantis ignorantia proveniret. Quo in loco grave illud Hippocratis dictum usurpare quis possit, quæ juvare luerunt, si noceant, lethalem scito esse morbum.

§. X. Deinde gravius etiam multo adversus naturæ leges ii peccant, qui scienter & prudenter pravis vel disciplinis vel doctrinis aliorum mentes inficiunt. Nam & id lædunt dedita opera, quod est in homine præcipuum; & causas ponunt atque semina immensæ scelerum segetis: depravato enim semel intellectu non potest non & appetitus quoque corrumpi, atque inde per totam vitam scelera continuari. Scilicet ii tandem sunt omnium mortalium scelestissimi, qui ex statis animi sententiis & susceptis olim persuasionibus ad peccandum incitantur; quippe qui scelera perpetrent audentissime, & veluti præclara facinora turpissima crimina habent. Nam qui aut affectu aliquo prævalido, aut ignoratione delinquant, ii nec perpetuo mali sunt, & emendari facilius possunt. Argumento esse possunt tot persecutiones in Christianos ab Ethnicis excitatæ non aliam ob causam, quam ex falsa Ethnicæ superstitionis persuasionem: tot item fanaticorum sectæ, unde sæpe ad internecionem usque deletæ gentes. Itaque ego sic existimo, plus mortalium Orco dedisse falsas acresque persuasiones, præsertim superstitiosas, quam aut bella, aut pestes, aut ullam aliam naturæ calamitatem. Nulla igitur in Rep. res magis accurari debet, quam educatio: nullaque in re periculosius peccatur. Itaque Plato in vi. de Rep. eum, qui educationi præest, & omnium esse vult supremum magistratum, & sapientissimum, probissimumque, nec quinquaginta annis minorem. Quid igitur faciemus nostris imberbibus adolescentibus, qui pædago indigi alios procurant?

§. XI. Porro nec alterius corpus lædere fas est: itaque alium verberibus, plagis, aliisque injuriis afficere; vulnera infligere; membris aut membrorum partes mutilare; inedia, vinculis, tormentis excruciare; venenis aut extinguere aut inficere; res, quæ vitæ sustentandæ sunt necessariae, subtrahere, aut corrumpere dolo malo, quo alter damnum in vita animalī patiatur, & similia, jus naturæ prohibet, præcipitque, ut qui talia egerit, quoad potest, & scit, resarciat. Enim vero ejus ratio manifestissima est, quodcumque super

legibus naturæ adhibere systema placuerit : nam ex Grotiano & Pufendorffiano systemate id pugnat cum societatis custodia , cum socialitate , adeoque cum naturæ lege : ex aliis vero systematibus non minus adversus naturæ legem esse comperitur ; quia pugnat videlicet cum benevolentia communi : cum amore hominum reciproco : cum rerum ordine & relationibus : cum ingenitis naturæ humanæ juribus : cum nostris tandem ipsorum veris utilitatibus ; nemo enim potest in alios esse injurius , quin sibi invidiam iramque ceterorum consciscat . Quo fit , ut plus ovium pacifice vivant , quam Luporum , Vulpium , Tigrium .

§. XII. Quid , inquit aliquis , si hæc ad alterius emendationem fiant ? Respondeo non omnes homines æquale jus emendandi habere . Maximum enim inter homines habent Imperantes supremi : secundum locum obtinent Parentes : tertium Magistri : quartum ex officio humanitatis & societatis jure ceteri homines . Ergo prout cujusque jus est emendandi , ita magis , aut minus late illud exercere potest . Et Imperantes quidem supremi jus habent vitæ & necis , ut suo loco demonstrabimus : ergo habent jus corpus affligendi . Sed ut illud , ita hoc , tum demum jure exercent , quum nulla alia superest via , qua aut is , qui peccavit , emendari possit , aut damna societati illata reparare : alioquin proculdubio peccant , si cum alia suppetunt blandiora remedia , severissima hæc & atrocissima adhibent . Imitari oportet Deum supremum Mundi opificem , & sapientissimum gubernatorem , a quo jus omne imperandi derivatur : neque enim Deus statim ad extrema supplicia venit , sed monet , atque primum blandissima remedia experitur . Igitur patris potius nomine , quam Judicis appellari amat (a) .

§. XIII. Parentes vero vitæ & necis in liberos jus non.

(a) *Tacitus de Agricola* . Optimum quemque fidelissimum putare : omnia scire , non omnia exsequi : parvis peccatis veniam , magnis severitatem commodare : nec poena semper , sed sæpius poenitentia contentum esse . Officiis & administrationibus potius non peccaturos , quam damnare cum peccassent . *Cap. 19.*

Non habent, nisi quum Imperantes simul sunt, idest in statu naturæ. Quare tum demum uti pœnis corporis afflictivis adversus liberos possunt, quum & nulla adest alia emendandi ratio, & ita sunt moderatæ, ut nec sanitas, nec vita periclitetur. Quantumvis enim immorigeri sunt liberi, parentibus (nisi in statu naturæ, in quo sunt & Imperantes supremi) tale non inest jus, ut aut eorum sanitatem, aut vitam lædere per modum pœnæ possint: totum enim eorum jus ab amore & custodia proficiscitur: amor autem & custodia liberorum minime ad vitam attingit. Accedit quod hujusmodi castigationes, quæ bruta magis animantia, quam homines decent, nunquam animos meliores efficiunt, sed peiores: in pueris enim extinguunt mentem omnem, & naturalem pudorem, animumque humilem ac servilem ingenerant; in adultis vero odium, iram, ferociam progignunt. Nulla ego re homines peiores fieri expertus sum, quam nimia severitate, ac legitimæ libertatis compressione. Sunt hominum ingenia elastica, ut quo magis premas, eo vehementius dissiliant, ferocire prompta, nisi demulceas.

§. XIV. Idem dictum esto de Magistris (quo loco sunt & Ecclesiastici Pastores, ac Doctores (a)) nisi quod in his, qui animum efformare debent, quique propterea nullum habent jus puniendi, sed docendi tantum & exhortandi, tanto sunt indigniora verbera, corporisque alias severas castigationes, quanto ineptiora ad eum finem. Is tantum præceptoribus jus inest moderate castigandi, qui infantes educant, idque non quum intellectus emendandus est, ne studiorum doctrinarumque horror in iis ingeneretur, sed quum flectenda

(a) Eo pertinet præclarum S. Bernardi dictum serm. 66. in Cant. Fidem suadendam, non imperandam, Quod & Cassiodorus scripserat lib. II. ep. 27. Religio imperari non potest. Cujus rei rationem protulerat olim Lactantius lib. v. cap. 13. Quis mihi imperat necessitatem vel credendi, quod nolim, vel quod velim non credendi? Nempe a Deo, est persuaso: docendus igitur sum, non pulsandus. Itaque Christus D. N. tametsi naturæ auctor ipse, persuasione egit, non vi ac imperio, Petrumque coarguit, qui armis uti voluit.

da natura , naturæque appetitus regendus : hic enim tantum , non intellectus , modica castigatione corporis inflecti potest . Tandem in iis , qui jus imperandi nullum habent , castigationes corporis nullo modo probari possunt , nec ab injuriis , & læsione excusari . Solum Lacedæmone omnibus natu majoribus jus tributum patrium in minores ; lege tamen civitatis . At ubi non a civili imperio , sed a natura tribuitur , magna cum moderatione usurpandum : nam utilia alioquin remedia ac lenia non assuetis acerbissima videantur .

§. XV. Jam vero nec alterius existimatio lædi potest sine magno adversus naturæ legem crimine . Est autem existimatio duplex , altera *simplex* , altera *intensiva* . Illa est quum quis pro non malo habetur neque inutili ; hæc vero quum quis ob sua facta egregia , aut egregias virtutes velut excellens inter alios reputatur ac civitati perutilis . Ad utramque existimationem quilibet jus habet , usque dum publico suo facto ipse illam non corrumpat . Itaque alterius existimationem lædere adversus naturæ leges est , & quidem cogentes ; ut idcirco lædens ad refarciendum damnum teneatur : nemini jus suum impune eripi aut corrumpi potest . Sed idipsum potest facillime demonstrari ex utroque illo legis naturalis principio , amicitia nimirum & custodia societatis . Principio , bonorum omnium , quibus homo in societate frui potest , fundamentum est bona existimatio : inde enim est hominum inter se communicatio , ac cum ea , communicatio earum rerum quibus bene beateque vivere possumus ; ergo omnium dolorum intensissimus est is , qui nascitur ex læsa existimatione : eum autem dolorem alteri afferre est contra amicitiam , quam naturaliter cum omnibus hominibus habere debemus . Præterea hic dolor omnium maxime sanctissima societatis vincula dissolvit , hominesque adversus homines armat ; ergo est contra naturæ legem , quæ præcipit , *sancte societatem humani generis servandam tuendamque* .

§. XVI. Duobus autem modis lædi alterius fama potest , primo fictis ignominiiis , quod dicitur calumniari : secundo occulta & ignota aliis vitia vulgando , quod

appellant *diffamare*. Primum proculdubio contra officia justitiæ est, ut idcirco in perspicuis sit, eum, qui hoc modo alium læsit, ad reparationem teneri, etiam si ex ea reparatione ejus, qui læsit, infamia sit sequutura. Quemadmodum qui me læsit in bonis aliis, obligatur in priorem statum me restituere, etiam si de statu suo casurus sit: malum enim illatum omni modo reparandum est, si legi satisfacere velimus: ita qui læsit in fama. Nihil hic indulgendum est: aut servandæ sunt leges, aut totum genus humanum funditus evertendum. Illud quæritur, utrum quis obligetur ad reparationem existimationis, ubi vita sua periclitetur? Non putaverim, nisi læsio alterius famæ gravissima fuerit: modica enim læsio mille potest modis refici. At si læsio alterius famæ gravissima sit, & morte ipsa atrocior, nec superfit ullus alius modus famam ablatam restituendi, etiam si ejus, qui læsit, mors sequutura sit, efficiendum puto. Lex enim naturæ omnino reparationem existimationis exigit. Durum, inquiunt, est. Falso: non est dura lex, sed tuum te scelus ad id adduxit, ut duram putares. Si inceptemus indulgere, nihil sancti & tuti erit in humana societate. Solve, quum debes, sodes; tuque ipse reputato, quo solvas modo: sed solve tamen.

§. XVII. Quæ autem posteriori modo læsit, ex aliquorum sententia generis caritatem violavit, non etiam justitiam; ac consequenter non obligatur ad reparationem: scilicet famam non adimit, quæ jam alterius crimine læsa est, sed vulgat; id quod contra amicitiam, non contra justitiam esse videtur. Ego contra sic sentio, quemlibet habere jus ad bonam famam, quousque publico facto suo illam non amisit, adeoque qui occulta adhuc privata crimina detegit, eum id proximo adimere, quod ille adhuc possidet, ac propterea reparare teneri. Excipiamus tamen ea crimina, quæ Reipublicæ totius interest nosse; jus enim civitatis totius antiquius est, majusque, quam privatorum; itaque ea vera caritas, parcere patriæ. Ei rei & pactis nos nostris, cum convimus, adstrinximus. Porro cum publica sunt prava aliorum facinora, perque

que ora omnium, modo ne astu, malitia, odio, aut intendendo vera, remandantur, recoquanturque, eloqui profecto licet. Quin interdum utile est: famam saltem vereantur, qui legem in animo jam antiquaverunt.

§. XVIII. Jam vero læditur alterius fama dictariis, conviciis, gestis ironicis, scriptionibus satyricis, factis; aut quocumque alio signo, quo alter in suspicionem trahitur. Itaque homini honesto attente observandum est, quemadmodum loquatur, gestiat, scribat, operetur, præsertim ii, quorum magna est in societate civili auctoritas & fides. Idque eo vel maxime, quod mihi tam pronis auribus audiatur, aut tam jucunde spectetur, ut sunt hominum mores corruptissimi, quam obrectatio, & livor. Accedit quod quum nullius alterius læsionis reparatio sit difficilior, nullum alterum crimen tanto attentius cavendum est, quanto hoc, de quo differimus. Sed quoniam ex quo literæ inter homines adoleverunt, ut loquacitatem, ita alios mordendi pruriginem magnam adduxerunt; ut tum bene sapiant Literatorum scripta, quum amarulentiora sunt; de controversiis Literatorum ut pauca dicamus locus exigit.

§. XIX. Aliorum opiniones refellere, non odio personæ, sed veri amore, non modo licet cuique, sed est potissimum Philosophiæ, idest inquisitionis veri, officium: neque enim ex humana ratione sui fructus sperari possunt, quibus hominum vita melior ac beatior fiat, nisi errores publice grassantes, præsertim aut magnorum virorum auctoritate, quod sæpe fit, suffulti, aut rudi vetustate confirmati, deleantur, quo illa liberior sit, & expeditior hilariorque artibus humano generi utilibus perficiendis intendat. Sed intra modum honestatis & urbanitatis hujusmodi confutationes contineri debent. Primum doctrina impetenda est, non auctor; ne de Philosopho Satyricus fiat. Quocirca ferri vix possunt ii, qui tum bene alios refutasse arbitrantur, quum aut humiles & infames eorum genealogias contexerint, aut adolescentiæ impuritates amarulente descripserint, aut mores corruptos vel perridiculos gra-
phi-

phice depinxerint. Nam id præterquamquod solet esse argumentum injustæ causæ, animique imbecillis, & impotentis, ad rem quoque nihil pertinet. Neque enim idcirco minus verum est, *tres angulos trianguli duobus rectis esse æquales*, quod ab homine moribus depravato, aut vili loco nato dicatur. Veritas perpendenda est, non is, cujus ratione aut detecta est, aut involuta (a). Deinde ita confutandæ sunt aliorum sententiæ, ut argumentis, non verbis demonstretur, esse eas absurdas, & ineptas. Quare dictæ illa, auctores illarum sententiarum esse ineptos, perridiculos, pueriles, stultos, & similia, quæ comparata sunt ad aliorum existimationem minuendam, pugnant cum naturali honestate & iustitia: pugnant cum amicitia generis humani totius honestatis fundamento: pugnant cum urbanitate: postremo cum artium utilium incremento. Non possum hac in re satis laudare Beatum Thomam, veterisque alios scholæ philosophos, qui quum res gravissimas pertractent ad mores & pietatem pertinentes, non solum adversus imperitos auctores absurdarum opinionum, verum etiam Hæreticos, & Atheos, nullam unquam animi commotionem præseferunt, nunquam incenduntur; tantum abest ut pugnent conviciis, quibus deinceps, postquam humanioribus literæ perpolitæ sunt, refertæ Philosophorum scholæ fuerunt. Quamobrem & me, ut dixi, quoque piget, in iis opusculis, quæ junior edidi, aut ab ignea adolescentiæ vi, aut a consuetudine, cui veluti Fato cuidam interdum vel a sapientissimis paretur, quandoque ad falsa hæc dictæria abreptum. Aliorum igitur sententias aut falsas, aut pravas, aut perridiculas, non probare dicamus: refellamus audacter: *aliud nos sentire* profiteamur: ab injuriis omnino abstinendum, si iusti probique esse volumus.

§. XX. Quid de apophtegmatibus acuteque dictis dicere-

(a) Et me igitur pœnitet, licet iniquissime provocatum, plurimum interdum ironiæ tribuisse. Quod cum ego horream, nolim aliis exemplo esse. Ignoscant igitur, si possunt: sin accusare volunt, & me adversus me iudicem habebunt exorari nescium.

cernus? nam hisce sæpe ludere, ac pugnare interdum viri, in primis literati, sueverunt. Quin id adeo in delitiis haberi solet, ut ii homines, qui ea in re valent, prompti scilicet, alacres, perspicaces, acuti, homines ingeniosi vocentur. Est hæc præcipua aulæ professio. *Motteggiare*, & *motteggio* vocant nostri. Non eo inficias id fieri quandoque magna animorum voluptate, ac sine ullius injuria: quod quum fit, satis id ingenii laudari nequit. At non raro cum alterius aut oppressione, aut injuria ingeniosi homines ludere solent: quod & cum naturæ lege pugnat, & periculi plenum est. Nam ut qui corpore validior est non jure imbecillio rem premit; ita qui animo major perspicaciorque, ingenio & lingua promptior, abuti his nefas est ad alterum deprimendum. Ac sæpe evenit ut qui ingenio sese defendere adversus aggressorem nequit, manibus velit. Quin si neutrum possit, certus hostis est, premitque altum corde dolorem, paratus ulcisci, si occasio ferat. Id autem e re nullius est, & graves interdum turbas in civitate concitat (a).

§. XXI.

(a) *Illud querat quis, quid vir honestus & gravis adversus conviciatores, ac disertiis laceffentes efficiet? Socratis vox fuit, cum dilacerari se ab septem dicerent quidam, illi vero absentem & verberent. Zeno conviciatori, non didicit, inquit, bene loqui. Fabius Maximus, Romanis qui unus cunctando restituit rem, amicis hortantibus, ut se a calumniis, atque ignominiiis, quibus illud adversarii proscindebant, liberaret, neque taciturnitate aliquid eis concedere videretur, οὐτω μὲν τ' αὖν, inquit, δειλοτερος ἢ νυν ἐναι δοκῶ γενοίμεν, εἰ σκωμματα καὶ λοιδορίας σοβήδεις, συνεποιμι τῶν ἐμῶν λογισμῶν, h. e. næ ego, quam nunc videor, timidior simi, si probri & contumeliæ metu a rationibus abdicar meis. Plut. in Fab. Max. p. 177. tom. I. Sed illud in primis egregium, ac memoratu pulcherrimum, quod idem Plutarchus de Pericle rettulit. Namque cum aliquando magnus quidam ac impudentissimus conviciator a Comitibus ad domum usque eum infestatus fuisset, ac probra continenter ingessisset, & contumelias gravissimas, ille, tametsi in civitate princeps, ac præpotens, quasi si aliud ageret, ne torset quidem oculos, neque gradum celerabit, nec captos cum amicis sermones interruptit: domum vero cum sero venisset, videreturque ille aliquantum pausæ fecisse, fer, inquit, domestico, tædam (jam enim tenebræ erant) huncque revertentem comitare: nolo enim homo disertissimus offendant. Quorum in tota historia sunt similia plura magnanimatorum & ejuscemodi im-*
pro-

§. XXI. Sed de verborum usu & abusu in civili societate hic dicere res ipsa postulat. Sermo seu verba in usum societatis nobis a Deo data sunt: nam officia nostra nec adversus nos ipsos, nec adversus Deum, si homo solus in Tellure esset, verborum adminiculo indigerent. Est nempe sermo potissimum societatis ineundæ & conservandæ vinculum. Enimvero societas sine communicatione sensuum animi nulla esse potest: nec talis communicatio sine sermone, aut aliis signis, quæ vicem verborum gerunt, peragi potest. Ex quo fit, ut societas inter homines nec contrahi, nec stare possit, sine verborum usu, aut usu eorum signorum, quæ vocum vicem obtinere.

§. XXII. Duplex autem est verborum usus, unus Philosophicus, seu reipublicæ literariæ, alter Civilis, seu civilis reipublicæ. Ac primus est Philosophorum veritatem indagantium, aut docentium, de quo nunc non disputo: alter est hominum omnium in societate conviventium, atque inter se animi sententias communicantium, aut contrahentium & paciscentium, ad vitam civilem commode transigendam, de quo hic differendum est. Hic usus exigit, ut verba adhibeantur cum iis notionibus, quæ cum illis conjuncta sunt inter eos, quibuscum loquimur, tanquam ex communi
taci-

probitatum incuriosorum exempla. Itaque Antonius Muratorius, nostrarum literarum quasi novus in Italia parens, quem ego honoris veterisque amicitiae gratia libenter commemoraverim; is, inquam, ac tantus vir dicere solebat, multum sibi otii abs rebus seriis habere eos sapientiae studiosos, qui in se recipiant, omnibus, a quibus undecumque petantur, respondendi. Philosophus quantum fuerit vere dictum, ac jure, proficiet: cetera eodem loco habebit, quo cicadum clangores. Quid, dicet aliquis, si quis ineptias, aut inepte consarcinata vulgaverit? Exhibilat populus. Jure ne, an injuria? Jure, inquam. Nam ut in theatro amatorem senem, aut Thrasionem pyrgopolinicum, aut stultum servum videmus: ita inficetum perridiculumque in hoc ampliori mundi theatro, dum facietum se, sapientemque venditat. Nam id juris est, ut quisque eam gerat personam, qua est a natura præditus; quam ubi migrat, etiam invitis risus excutitur. Poscit tamen humanitas, ne quid inopie amarulente ac maligne fiat. Qui sic vero exhibilatur magnum sibi habet operæ pretium, ut dediscere discat, quod in vita, ut est communium commune, qui sapere volunt, ita optimum.

tacitoque pacto: Ejus ratio est, quia alioquin verborum finis, in quem consensum est, non obtineretur, sed frustraretur. Nummorum loco sunt verba, ut iis nemo sine dolo malo alium valorem dederit, quam quod valent apud eos, quorum civitatis effigiem impressam cernunt. Peccat autem gravius, aut minus grave, qui verba adhibet in usu civili cum alia notione, quam quæ recepta semel est, prout magis, vel minus jura societatis, vel singulorum lædit. Genericum jus est omnium, ne verbis ludificemur: igitur etiam si nihil aliud interfit, mentiri tamen nobis nolumus. Injuriae genus est, gratis decipi. Si quid aliud refert, eadem, proportionem crescit injuria, eoque mentientis crimen.

§. XXIII. Porro regulæ generales circa hunc vocabulorum usum ad duas sequentes referri possunt. Prima est, quum nullius interest nec jure perfecto, nec imperfecto me eloqui, tum tacere crimini verti nequit: jure vero crimini vertitur taciturnitas, ubi alterius interest me loqui. Ea regula demonstratur facillime ex fine pacti societatis. Hic finis est societatem autem animare, aut conservare, ut dictum est: at quum nullius interest, me loqui, nulla jura societatis aut ineundæ, aut conservandæ exigunt, ut eloquar; ergo quoniam in hoc casu, omnis cessat finis sermonis, cessat & pacti; nullo ergo jure cogor loqui. Quod si aliorum interfit me eloqui, tum jura societatis silentio lædo: publica pacta violo. Sed sciri velim, ibi esse societatis pacta, ubi communes voces.

§. XXIV. Itaque dissimulare, seu studiose animi sensu tegere, quum nullius interest neque ex jure perfecto neque imperfecto scire, licitum semper est. Scio Ciceronem pertinaciter contendere, dissimulare non esse viri boni. Cujus opinionis, nisi ita accipiatur, ut intelligatur ea dissimulatio, qua alter læditur, nullas video rationes (a): neque vero his in rebus tantum

au-

(a) *Ciceronis species sunt in III. de off. 8. Vir bonus Alexandria Rhodum magnum frumenti numerum advexerit in Rhodiorum inopia & fame, summaque annonæ caritate; si idem sciat, complures mercatores Alexandria solvisse, navesque in cursu frumentum onustas*

auctoritas valere debet, ut etiam sine ratione defendatur. Dissimulare vero, ubi agitur de bono aliorum vel non lædendo, vel promovendo, ad quorum primum jure perfecto obligamur, ad alterum jure imperfecto; non modo viri boni non est, sed scelerati: est enim contra justitiam; nam læduntur jura aut amicitiae, aut societatis.

§. XXV. Sunt quibus placet, non eodem modo omnes peccare, qui tacent, ubi aliorum interest, eos eloqui. Nempe contendunt eos, qui ex peculiari conventionem aut pacto loqui tenentur, veluti custodes publicos, Reipublicæ gubernatores, administratos, testes publica auctoritate interrogatos, ex justitia teneri ad loquendum, ut si taceant, vel dissimulent, indeque damnum nascatur aliquod, justitiam lædant, & ad reparationem damni teneantur: ceteros vero, qui loqui ex speciali fœdere non obligantur, si taceant, lædere ca-

Tom. IV.

T

rita-

onustas petentes Rhodum viderit; dicturus ne sit id Rhodiis, an silentio suum quam plurimo venditurus? sapientem & bonum virum fingimus Vendat ædes vir bonus propter aliqua vitia, quæ ipse novit, ceteri ignorent; pestilentes sint, & habeantur sanæ; ignoretur in omnibus cubiculis apparere serpentes; malæ materiata, ruinosæ; sed hoc præter dominum nemo sciat. Quæro, si hoc emptoribus venditor non dixerit, ædesque vendiderit pluris multo, quam se venditurum putarit; num id injuste atque improbe fecerit? *Quas ita persolvit cap. ix.* Non igitur videtur nec frumentarius ille, nec hic ædium venditor celare emptores de-
 misisse: neque enim id est celare: quidquid reticeas: sed cum, quod tu scias, id ignorare emolumenti tui causa velis eos, quorum INTEREST ID SCIRE. Hoc autem celandi genus quale sit, & cujus hominis, quis non videt? Certe non aperti, non justii, non viri boni; versuti potius, obscuro, astuti, fallacis, malitiosi, callidi, veteratoris, vafri. *Quæ tamen, nisi ullum illis subsit naturale jus, sunt vocabula, quibus, nisi in concione, nemo permoveatur. Quare illud videndum erat, quorum interest id scire: quid est istuc interest scire? Hoc nimirum, ut non mihi aliud ostendas, aliud vendas: id jus æqualitatis violat, quam ejuscemodi contractus suapte natura postulant. Quæ iniquitas est in ædium venditione manifesta: sed occultior in frumentarii dissimulatione; nec tamen minus est: quippe in frumenti copia tanquam in inopia vendere, est id pretium frumento constituere, quod requirit natura: pretia enim sunt in reciproca rerum quantitate. Itaque celare copiam est furti genus. Atque id INTERERAT emptores scire.*

ritatem tantum, nec idcirco obligari ad damnum re-
sarcendum.

§. XXVI. Hujusmodi autem doctrinæ posterior pars
est manifesto falsa; præsertim si agatur de iis rebus,
quæ ad publicam tranquillitatem & securitatem perti-
nent; omnes enim, qui in societatem convenerunt,
seu diserte, seu tacite, sese obligaverunt ad ea omnia,
quæ societatis intersunt; nam sine mutuis hujusmodi
pactis nulla societas nec iniri, nec conservari potest.
Inter pacta autem hujusmodi præcipuum est, ut in mu-
tuam tranquillitatem & securitatem conspirent omnes.
Quare in societate ex pactis primis ac insitis alter al-
terius custos esse debet. Ergo quicumque silentio suo
alterum perdidit, aut alterius bona lædi permisit, aut
effecit quominus justitia locum haberet cum publica
perniciæ; justitiæ leges violavit, ac proinde ad damnum
reparandum lege naturæ primaria obligatur. Illud ve-
rum est, neminem obligari cum suo damno vel periculo
ubi non jus perfectum, sed imperfectum loqui exigit:
nam jus mutui auxilii poscit quidem, ut alterius bona
procuremus, sed ita tamen, ut ne nos lædamus.

§. XXVII. Altera regula est, contra legem naturæ
esse, alterum verbis, aut aliis signis, quæ vicem ver-
borum gerunt, circumvenire, decipere, atque idcirco
lædere; & qui id efficit, reparare læsionem debere.
Generalis est ejus regulæ ratio, cum ex lege naturæ
primaria, quæ jubet, ut neminem lædamus; tum ex
fine sermonis, & eorum signorum, quæ vicem sermo-
nis gerunt, ut scilicet, ne illis utamur contra rece-
ptum sensum. Mendacium ergo, idest abusus vocabu-
lorum ad alterum decipiendum, atque ita lædendum,
jure naturæ primario prohibitum est. Ob eandem ra-
tionem jure naturæ prohibitæ sunt omnes *equivocatio-
nes, & restrictiones mentales*, ut vocant, ex quibus al-
terius jus perfectum aut imperfectum læditur. Quare
mirum est quum hujusmodi equivocationes damnave-
rint Ethnici ipsi Philosophi, imprimis severissime Ci-
cero, inventos esse Philosophos Christianos, qui eas de-
fendere potuerint, atque viam aperire infinitis modis
alios ludificandi ac defraudandi, moresque fictos pra-
vosque

vosque contra naturæ simplicitatem, & evangelica præcepta, in societates humanas invehendi.

§. XXVIII. Læditur autem alter sermone mendaci, quum ejus, ut dixi, jus perfectum, aut imperfectum violatur. Principio omnes Reipublicæ administri jus habent perfectum a nobis exigendi, & ut loquamur, & ne mentiamur, vel æquivocemus in iis rebus, quæ ad publicum regimen pertinent. Itaque si nostris mendaciis, vel æquivocationibus eos ludificemus, indeque damnum quodcumque in societate nascatur, contra naturæ legem peccamus, & damnum refarcire tenemur. Præterea omnes homines, cum quibus in naturali societate positi sumus, eodem jure pollent, ut ne a nobis in contractibus, conventionibus, promissis, lædantur. Quare si his modis læsi sint, jure ipso naturali reparationem exigere possunt. Ad hæc omnes homines jus habent perfectum, ut nullo modo quibuscumque in rebus fallaci oratione circumveniantur, ex qua quidquam damni eorum animo, vitæ, bonis externis, famæ inferri possit. Igitur si hujusmodi damna illata sint, reficere tenemur. Tandem omnes homines jure mutui præsidii exigere a nobis possunt, ut, quocumque modo scimus & possumus, eos juvemus; id si detrectemus facere aut mentiendo, aut equivocando, officia humanitatis violamus.

§. XXIX. De mendacio officioso, ut vocant, disputatum est olim acerrime, hodieque disputatur inter doctos. S. Augustinus ad Consentium hæc quæstionem vocat *latebrosam*, & inter doctos alternantem. S. Gregorius Epist. CCXVIII. hac in re se valde æstuasse scribit. Est mendacium officiosum, quum verbis utimur aut contrario, aut diverso sensu, quam quo recepta sunt, ut alteri prosumus, nullius jus lædendo. Recentiores quidam scriptores *falsiloquium* appellant, atque in eo distinguunt a mendacio, quod mendacium semper conjunctum sit cum violatione juris alterius. Sed & sic dicitur *mendacium officiosum*. Ut Ulpianus in L. 1. §. 3. ff. de dolo malo memorat apud antiquos & *dolum bonum dictum: veteres*, inquit, *dolum etiam bonum dicebant*, & pro solertia hoc nomen accipiebant.

Nam dolum malum definit eodem loco Labeo, *omnem calliditatem, fallaciam, machinationem, ad circumveniedum, fallendum, decipiendum alterum adhibitam*, quæ eadem locum habent in dolo mendacio.

§. XXX. Sanctus Augustinus in laudato loco negat mendacia officiosa esse licita. Eum sequuti sunt Theologi ferme omnes Occidentales. Duplici ratione utuntur. Prima, quod in scripturis sacris omne omnino mendacium prohibeatur. Altera, quod mendacium etiam officiosum cum Dei veracitate pugnet; quæ autem cum divinis perfectionibus pugnant vitia esse constat: nam pugnant cum perfectissima regula, ut obliqua sint necesse sit. Accedit tertia ratio, quod pugnet cum sinceritate viri boni; quæ cum sit nobilissima virtus; necesse est, ut quod ei adversatur, sit vitium. Præterea quærent, utrum cum mendacio officioso jurare possimus? Quum id nemo affirmaverit; concludunt, hæc mendacia conscientiæ dictamini refragari.

§. XXXI. Grotius vero, & Pufendorffius, ac quidam ex Theologis nostris, in contrariam abeunt sententiam, putantque nullo nec naturæ, nec positivo jure hujusmodi mendacia prohiberi. Principio, inquit, neque jura cujusquam lædunt, neque amoris aut erga Deum, aut erga nos, aut erga alios adversantur: quinimo amorem erga proximum continent præclarum. Ut, quum quidquam tibi debeo, non licet nummi alium valorem tribuere, quam qui ei publice tributus est: si vero nihil debeam, tibi que velim dono dare, quid causæ esse potest, ut nummo, quem do, id tribuam pretium, aut nomen, quod placuerit, modo inde nihil tibi damno inferatur? Tu rem non meis verbis, sed tuis sensibus æstima. Deinde verba sunt instrumenta societatis. Ergo licet iis uti in societatis beneficium, quocumque tandem modo adhibeantur, dum nullum nec Dei, nec hominis ullius jus lædunt. Accedit, quod non videntur posse damnari tot hominum honestorum exempla, ut Medicorum, & Administratorum Reipublicæ, qui ut secreta tegant, ad hujusmodi falsiloquia sæpe confugere solent. Tandem veteres aliquot, & doctissimi Patres, imprimis S. Johannes Chrysostomus in

Libris

Libris de Sacerdotio, non audent hæc falsiloquia damnare.

§. XXXII. Quod pertinet ad argumenta partis oppositæ, primo respondent, prohiberi in Scripturis mendacia perniciofa, nec ullum esse in iis verbum, ex quo possit intelligi, vetari etiam falsiloquia officiosa. Argumento vero a veritate Dei desumto reponunt, nimis illud probare; probat enim mendacia quoque jocosa esse contra legem naturæ, quæ tamen ipse Augustinus non semper damnat. Præterquamquod regula, inquiunt, actionum humanarum, quæ iustas efficit, & honestas, est lex a Deo lata, non vero Dei natura quanta quanta est. Nam homines quantumcumque continentur, nunquam possunt actiones suas ita componere, ut toti Dei naturæ omnibusque Dei proprietatibus sint consentaneæ. Quod pertinet ad tertium argumentum, ajunt sinceritatem tum esse virtutem, quum dissimulatio vel falsiloquium sunt contraria officiis, quæ Deo, aut aliis debemus: alioquin aliis omnia nostra secreta propalare esset virtus, quum ut plurimum magnum sit stultitiæ vitium: *os stulti in ore ejus: os autem sapientis in corde*, ait in Proverbiis Salomon.

§. XXXIII. Quarto tandem argumento respondent, jusjurandum non homines tantum spectare, sed præterea obsequium Deo debitum: esse duas leges distinctas ac duabus distinctis rationibus constantes, alteram *ne mentiamur*, alteram, *ne pejeremus*; ut possit quis contra unam peccare, altera salva. Addunt esse quædam quæ separata liceant, conjuncta non item.

§. XXXIV. Ego in quæstione ancipiti intelligo satius esse, ut ab iis quoque mendaciis vir bonus se abstinat: neque enim dubitari potest, quin iis uti levitatem quamdam contineat, & sinceritatis virtutem adumbret. Vitium est, ac imbecillitas, ut ut non sit crimen: quomodo blæso ore loqui vitiositas est, non delictum; quam tamen si vitare possis, præclarius te facturum ac pulchrius dicemus omnes. Nam licet in posteriori sententia aliquid sit rationis, plurimum tamen est in priori dignitatis. Videtur enim aliquid concedendum tot viris doctis, & honestis, qui priorem il-

lam amplexi sunt. Ceterum ubi quis hæc titubanti pe-
ctore falsiloquia admiserit, putare non debet ea ipsa
per se levem culpam excedere.

C A P U T VII.

*De officiis Justitiæ hypotheticis, ac primum de Dominio,
ejusque acquirendi modis originariis.*

§. I. **Q**Uæ officia hypothetica dici solent, ea omnia
ex duplici ferme fonte derivantur, dominio,
& pactis. De Officiis, quæ ex pactis profi-
ciscuntur, inferius differemus: hoc in loco de iis, quæ
ex rerum dominio nascuntur, quæ longe lateque pa-
tènt, & in quibus (ea est hominum cupiditas) sæ-
pius pertinaciusque peccamus, dum intra naturæ fines
vivere dedecori attribuimus. Certe non sine ratione
quidam philosophi dixisse videntur, maximam ac pri-
mævam corruptorum hominum causam fuisse dominium,
seu proprietatem (a). Nulla certe ex alia causa majora,
& atrociora hominibus mala accidunt, quam ex
hac, de qua loquimur. Quin historia docet, eas na-
tiones, quæ in quadam rerum communitate vivere re-
pertæ sunt, ceteris esse humaniores, & beatiores. Prius
vero quam id efficiamus, de natura ipsa dominii ejus-
que justis acquirendi modis secundum naturæ leges di-
cemus.

§. II. Dominium Philosophi atque Jurisconsulti dis-
crepantibus definitionibus definiverunt, superque ea re
non minus contentiose disceptarunt, quam super ipso
rerum dominio inter mortales concertari solet. Quo-
niam vero hujusmodi concertationes ex jure civili ma-
gis,

(a) Namque ea factum est illud, ignotum Kanadensibus, Hute-
tentortis, aliisque agrestibus, quod Horatius noster ait

At bona pars hominum decepta cupidine falso,

Nihil satis est, inquit Illud fœdus, nec ferendum,
ut ii hoc cupidius sequantur, qui non ignorant, se profectos, mi-
hi adhærere Deo bonum est. Pergitis

. . . . pugnancia secum
Frontibus adversis componere?

gis, quam ex naturali oriuntur; subtilitates vero ple-
rasque juris civilis natura ferme ignorat; hujusmodi
disputationes missas faciemus. Placet igitur hæc defini-
tio, *jus utendi, omnemque alium usu rei excludendi,
perpetuum, propriumque*. Uti autem hoc in loco pro
omnem omnino utilitatem capere positum est. Itaque
fit ut domini natura in duobus juribus posita sit, uten-
di, & excludendi alios.

§. III. *Dominium autem est vel proprietatis, vel
communione positivæ*: illud est jus utendi & omnes a-
lios præter nos ab usu rei excludendi. Hoc vero jus
excludendi ceteros, præterquam paucos. In illo res in
unius sunt potestate & usu: in hoc sunt in usu & po-
testate paucorum. Cum dominium sit *jus proprium*;
dum plures ejusdem rei sunt domini, velut pro una
persona morali reputandi sunt; quo in genere sunt in-
ter sese plures Respublicæ, aut Regna, aut Civitates.
Hoc & apud veteres quædam nationes obtinuit, quæ
majorem rerum partem in communione positiva habue-
runt, quales Germani quidam Populi, de quibus Ta-
citus de moribus Germanorum: & hodie apud nos in-
ter Monachos obtinet (a). Quæ vero res ita sunt in

T 4

medio

(a) *Priscis moribus singulis in diæcesibus communia Clericorum
& pauperum omnium Ecclesiæ erant bona: ac vero talia sunt et-
iamnum ex institutione. Igitur Oeconomi instituebantur, qui col-
ligerent, ac partirentur; ne ea cura sæculari Episcopi a diviniore
distinerentur. Canon xxvi. Calcedonensis = quoniam in nonnul-
lis Ecclesiis, ut sæpe a nobis auditum est, Episcopi absque Oe-
conomis tractant res Ecclesiasticas (ἐκκλησιαστικὰ πρᾶγματα, res
Ecclesiæ totius, idest congregationis fidelium, non Templorum tan-
tum); placuit omnem Ecclesiam Episcopum habentem ex pro-
prio Clero Oeconomum quoque habere, qui ex Episcopi sui sen-
tentia res ecclesiasticas dispenset; ut nec sine testibus sit Ecclesiæ
administratio; neque ejus res dissipentur &c. Sed erat & tertia
causa, ne divini pastores ac celestium doctores negotiari atque ava-
ritiæ servire occiperent. Ob divina regula! Quid, quod eadem fue-
rat prima Christianæ Civitatis forma? Nulli quidquam habere pro-
prii licebat: in commune omnia conferebant. Nemo igitur pauper,
nemo dives: nulla re alter alteri præminebat, nisi virtute, ac re-
gimine. Vide Act. iv. 31. Augustini Clerus ex illa eadem forma
fuerat expressus. Cum in ea (inquit de quodam suo Clerico) so-
cietate viveret, ubi nemini LICEBAT DICERE ALQUID SUUM, sed
essent illis omnia communia, Serm. 356.*

medio omnibus expositæ, ut nulli sit jus ullum ab earum usu excludendi, eæ in negativa communione positæ esse dicuntur. Vide Pufendorff. de jure naturali, & Gent. lib. 4. cap. 4. In hac communione si quis jus habeat rebus communibus utendi, nullum vero alios excludendi, non dicitur dominium habere. Quocirca duo sunt necessaria, ut dictum est, ut quis rei alicujus integrum habeat dominium, & proprietatem, jus scilicet utendi proprium, & jus excludendi omnes alios: alterum sine altero verum & certum dominium, ac proprietatem non facit.

§. IV. Ut igitur demonstrari possit, homines dominium rerum Telluris, in qua nascuntur, legitime habere posse, ostendendum est primum, eos habere a natura ipsa jus iis utendi. Deinde habere & jus quasdam res ita in usum suum traducendi, ut ab earum contrectatione jure possint ceteros excludere. Utrumque perfacile factum est. Principio Deus vult ut homines conserventur, quandoquidem vult ut existant. Quum autem ea sit hominum conditio, ut rerum externarum indigeant, queis aut nutrantur, aut contra ea, quæ ipsorum compagem destruere possunt, muniantur; profecto eas omnes assumendi, iisque ad vitam conservandam, & tutandam utendi jus a Deo habent: alioquin frustra illæ & hominibus vitam dedisset, & hujusmodi res, quarum pars major nullum alium habet usum, produxisset, earumque genera perpetuo conservaret. Consule Pufendorff. de Officio hominis & civis lib. 1. cap. 12.

§. V. Deinde quod possint homines res quasdam exhausti usus ita in potestatem suam redigere, ut ab earum usu jure alios arceant, sequentes rationes demonstrant. Prima quod quarundam specierum individua, aut sui exiguitate, aut brevi duratione, non possint nisi uni, aut paucis sufficere; ergo dum harum rerum aliquam occupavi, jus habeo utendi, & excludendi ab ea alios; quum nec possit pluribus esse satis, & in ejus usu qui prius occupavi ceteris præferri debeo. Secunda, quod quædam rerum genera sunt, quæ, nisi industria humana excolantur, aut nullius sunt usus,

aut

aut admodum exigui. Si igitur earum partem aliquam ita ego excolui, ut fructus mihi familiæque meæ necessarios vel utiles producat, habeo jus ceteros excludendi; siquidem natura ipsa fit, ut tam sit meum quod ex industria mea est, quam illa, ex qua est. Tertia quod utcumque communio negativa inter paucos homines commode & pacate servari possit; in tanta tamen humani generis multitudine sine continuis discordiis servari nequit; quas discordias proculdubio non amat Deus, cujus leges omnes ad pacem, unitatem, & publicam felicitatem tendunt; ut idcirco dubitare nequeamus iis facultatem fecisse, ab eo datis occasionibus discedendi, ac res quasdam proprias sibi faciendo. Quibus adde, licuisse pacisci super rebus communibus, seu expresse, seu tacite. Quando ergo omnibus ab ea communione discedere placuit, jus excludendi sat constitutum firmatumque est pactis (a).

VI.

(a) *Hujus rei vestigia quædam in utraque America videre adhuc licet: siquidem pars etiamnum nulla terrarum partitione utitur: alii vix aliquam, nec admodum veterem, habent. Sed & illud considerari velim, eos qui primi longas latusque bellorum expeditiones fecere, suis mox tellurem partitos. Ita Tartari Genghiscano Duce, Sinarum, Indiæ, Persidis provincias sibi diviserunt. Romani terras, seu quas vacuas occupassent seu quas victis populis rapuissent, coloniis partiebantur. Item Græci. Itaque hinc ego factum esse opinor, quomobrem Jovis, aut Deorum concilii decreta ποικίλῃς Parcæ nomine appellarentur ab antiquis Græciæ auctoribus: satis enim constat Titanum illam coloniam irrepsisse in Græciam adhuc silvestrem, sibi que terras attribuisse. Nec a vero abludivit eodem spectare, quod homines tam sæpe μεροπτεῖς Homero ac Hesiodo dicantur, quasi scilicet coloni, quibus sua cuique veteris telluris portio excolenda attributa esset. Quæ vox inde deflecta tam pugnantibus notionibus ab interpretibus usurpata est. Hoc ipsum corroborat historia sacra, in qua nihil antiquius, quam Chananitidis partitio. Postremo eodem spectare ajo Saturni fabulam, qui tripartitum imperium filiis fecerit: quam viri antiquitatum studiosi, cum primis Bochartus, Noëmo quasi ex veteri traditione aptam: nec animadverterunt, nullam fuisse gentem paullo vetustiore, quæ suum Saturnum non habuerit, Sinenses, Indos, Peruanos: jam Scythas, aliosque ad Septentrionem sitos. Itaque ad ejusmodi bellatores, terrarumque metatores; rem admodum verisimiliter referas. Ceterum cum ejusmodi, quæ memorantur, bellicæ expeditiones, ac velut reciprocantes nationum æstus, recentiores sint dominiis ple-*
risque;

§. VI. Quoniam ergo homines legitimum dominium bonorum Telluris habere possunt, illud superest perquirendum, natura ne in rerum dominio naturali sint, an pactioibus & justis factis a communione negativa in illud venerint? Melioribus juris naturæ interpretibus placuit, primos homines in communione negativa creatos fuisse, atque in ea mansisse, quamdiu genus humanum intra paucos extitit. Grotius ferme solus in communione positiva primos mortales procreatos opinari videtur, ut ceteri post illos modis tantum derivativis rerum dominium acquisiverint. Sed prior sententia probabilior profecto est: nisi ab altera solis vocabulis discordet. Enim vero quum Deus res Telluris in omnium animantium usum creaverit, non est credibile, ita primis duobus hominibus earum usum dedisse, ut jus quoque dederit ceteros omnes excludendi, si velent; præsertim, quum necessarium non fuerit. Vere ergo Cic. lib. I. de Offic. cap. 7. scripsit. *Sunt privata nulla natura, sed aut veteri occupatione, ut qui quondam in vacua venerunt, aut victoria, lege &c.* Sic quoque S. Ambrosius lib. I. de Offic. cap. 18. *natura, inquit, omnia omnibus in communi profundit: sic enim Deus generari jussit omnia, ut pastus omnibus communis esset, & terra foret quædam possessio communis. Natura igitur jus commune fecit, usurpatio jus fecit privatum.* Conferatur Pufendorff. lib. 4. de jure Naturæ & Gentium cap. 2.

§. VII. Nec vero dubitare possumus, quin in hoc statu homines per aliquod temporis intervallum permanerint. Est hoc conforme primævæ hominum naturæ, & magna veterum consensione firmatum. Nam principio non est verisimile paucos homines sanguine & primæva caritate conjunctos, quum bona Telluris non solum sufficerent, sed abundarent, atque nec dum luxus, & ex luxu cupiditas & avaritia natæ essent, ab ea communione voluisse discedere. Accedit eodem, quod post diluvium veteris illius communionis vestigia quæ-

visque; haud ego negabo, sæpe non jure, sed vi adversum jus terras fuisse occupatas. Quæ de re alibi dicitur.

quædam reperiamus in familiis Patriarcharum (a). Sed reperimus & inter barbaras ac efferas gentes utriusque continentis, quibus nil dum proprii, nisi quod manu cepere. Tandem idem tradidere plures veterum scriptorum, in primis Plato, Thucydides, Aristoteles, Lucretius, Horatius, Iustinus, Seneca, & illi, qui seculum aureum descripserunt (b). Huc pertinet locus Virg. lib. 1. Georgicorum vers. 125.

..... nec subigebant arva coloni,
Nec signare quidem, aut partiri limite campum
Fas erat: in medium quærebant: ipsaque Tellus
Omnia liberius nullo poscente ferebat.

§. VIII. Quibus autem ex causis a primæva illa rerum communione discessum sit, pluribus edisserunt Grot. de jure Bell. & Pac. & Pufendorff. Lib. 4. Cap. 2. Nec vero id explicatu difficile est: nam jure naturæ, quod *permisivum* dicitur, potuisse homines, ubi illa rerum communio minime apta esset vitæ pacate transigendæ, ab ea discedere, satis ostensum: totius enim juris naturæ finis, ut sæpe dictum est, publica felicitate & tranquillitate continetur: communionem autem rerum adulto humano genere publicæ concordie ac tranquillitati adversari, præsertim ut esse cœperunt hominum mores & affectus depravatissimi, cum per se manifestum est, tum barbaræ illæ nationes probant, quæ in statu naturæ viventes, in mutua etiam ac perpetua sunt rapina. Ergo jure suo homines ab illa communione discedere potuerunt. Illud videtur in quæstionem adduci posse, fuerit ne naturæ consentaneum, ut pauci immensa jugera & divitias occuparent, major pars nuda bonis cresceret; nisi exploratum esset, id non jure, sed cupiditate, nec ea necessaria, factum, positaque semina futuræ hominum improbitatis & miseriæ. Sed verterem hanc labem deflere licet, delere qui licet?

§. IX. Iam iusti modi, quibus & olim dominium pri-

(a) Vide & Tacitum de mor. Germ.

(b) Vicam primorum post diluvium hominum in montanis, ac στεροσι γλαφυροισι concavis antris, graphice, ac minutatim describit Plato in III. de Legib.

privatum inductum est, & potest etiamnum occupari, in *originarios*, & *derivativos* secundum Grotium dividi solent. Primi sunt *occupatio*, & *accessio*. Secundi vero *divisio*, *cessio*, *traditio*. Scilicet vel a communione rerum negativa usurpatione ad dominium transitur, & modus acquirendi dominii dicitur *occupatio*: vel rebus occupatis natura vel industria aliquid adjungit, & appellatur *accessio*. At res, quæ in dominio sunt, vel sunt in *communione positiva*, vel in *propriestate*. Si primum ad proprietatem devenire licet *divisione*, & *cessione*: si alterum, *traditione*. Paucis hæc nunc sunt explicanda, ut, quæ ex dominio nascuntur officia adversus alios, intelligi & dimetiri possint. Ac in hoc quidem capite modos originarios expediemus: in sequente de derivativis differemus.

§. X. Ex iis, quæ dicta sunt, patet, licere sub dominium nostrum conferre, quæ vacua sunt, hoc est in medio posita, & usus finiti: saltem tot ac tanta, quot vitæ nostræ ac nostrorum commode degendæ necessaria sunt: eo enim spectant communes generis humani pactiones. Ea dicitur *occupatio*. Justa autem est & secundum naturæ leges sola *occupatio rerum aut nullius, aut derelictarum*. Quare si res dominum habeat, sitque ab eo vel amissa, vel abducta furto, rapina, incendio, vento, flumine, raptu feræ, vel invite projecta, nulla *occupatione nostra* fieri potest: non dum enim dominus animum eam possidendi abjecit, nec propterea vacua est (a). Contra vero, si vel animi gratia

(a) Tenenda est his in rebus naturæ regula, nemo invitus jure suo spoliari potest, aut nisi arbitrio suo reus. At posse censuit Helvetius, nisi reciproco pacto teneamur, ne nos mutuo ledamur (De l'Esprit discours. III. cap. iv.) Cum vero gentes, saltem a se distitæ, nullo tali pacto teneantur; ita conficit, nulli prævalenti non licere alterius aut mobilia rapere, aut occupare terras, aut in servitutem adducere: justitiam a singulorum utilitate natam paulatim pactis conventis civilem evasisse: hinc gentium. Cujus ego viri ingenium cum plurimi faciam, ob idque maxime quod humani generis multam *οὐδυνόποντιον* præferat; mirari interim vix satis possum, causas ab eo latæ gravisque miseriæ necti, provehiæque longius, repugnante veritate. Quid est enim in hominum natura exploratius, & singulos homines sibi primum nasci, reliquis pro-

tia projecit, ut Polycrates annulum in mare, vel amissam sciens prudensque pro derelicta habeat, ea cedit occupanti; est enim vacua.

§. XI. Ex his sequitur, venationem, piscationem, aucupium esse species occupationis licitas, non modo in locis desertis, & vacuis, verum etiam in territoriis jam occupatis, sicubi tanta sit ferarum, piscium, aut avium multitudo, ut sufficere omnibus videantur. Nam quum eæ rerum species sunt ita copiosæ, ut inexhausti sint usus, semper in medio positæ censendæ sunt, præsertim si nullis locis cohiberi possint. Contra vero si sint talia rerum genera, quæ non omnibus sufficere queant, eaque locis claudi possint; jure enim occupari possunt, ut in iis venatio, piscatio, aucupium locum amplius habere nequeant; nisi si ita evaserint custodia, ut nulla domino sit amplius spes recuperandi: nam naturæ libertate quidquid nullius est, occupantis est, si vitæ serviat.

§. XII. Quæritur hoc in loco, possitne Mare occupari? Quæ controversia acerrime inter Grotium, & Seldenum, aliosque Belgas & Anglos, sæpe quoque inter Principes ferro & igne, disceptata est. Ejus controversiæ historiam contexuit Baeclerus ad Grot. lib. 2. de jure Bell. & Pac. cap. 2. §. 3. Placuit quibusdam Mare non posse occupari; quia corporali possessione re-

ti-

propter se: & sua ita habere propria, ut pugnet esse aliena; & justitiam pactis anteire; nec procreari, sed adversus vim firmari? Nam dicere nullam esse, nisi ex pactis, justitiam, tantundem est, ac si dicas, nihil nos proprii a natura habere: aut si habeamus, propria nihilominus non esse: quo quid absurdius? Igitur si habemus, justitiæ est, sua cuique tribuere. Id non pactis, sed naturæ debeo. Præclare Aristoteles Magn. Moral. lib. 1. cap. 34. Το δικαίον, inquit, ἐστὶ τὸ εἰς ἕτερον τὸ ἴσον: τὸ ἀδίκον, τὸ ἀνί-
στον ἐστὶν: justum est, quod est alteri æquum: injustum, quod iniquum. Igitur δικαιοσύνη μέσότης τις ἂν εἴη ὑπερβολῆς καὶ ἐλλεί-
ψεως, καὶ πολλὰ καὶ ὀλίγα, justitia medietas quædam est inter excessum & defectum, multum & parum. Nihil alteri tribuere, sibi, velut potentiori, omnia, ex ambobus lateribus iniquum est. At qui nihil tribuit, nisi ex pacto, nihil tribuit, nisi quatenus prævalidior vult. Ita justitiæ fundamentum pervertit, hominesque lege belluarum vivere docet.

tineri nequit : nam occupatio animo simul & corpore facienda est. Id falsum & ineptum jure censet Pufendorfius. Nam Mare navibus, portibus, propugnaculis, præsertim ad freta, & promontoria, non secus atque Tellus, corporali possessione coerceri potest. Quare aut non licet per naturæ legem quidquam occupare; aut si licet, & Mare quoque, quando in possessione non aliter atque Tellus esse potest. Dicere autem non licere quidquam, quod vacuum sit, occupare, est præsentem totius hominum generis statum, nec jure, nec ullam ob utilitatem, turbare velle. Distinguendi potius sunt duo marium usus; quorum alter sit navigatio, alter piscatio piscium, aliarumque rerum exhausti usus, cetorum, gemmarum &c. Primus usus natura liber esse debet (a): natura enim humana constitutum est, idque generis humani utilitas exigit, ut inter plures nationes commercium intercedat agiteturque. Atque inde factum est, quemadmodum præclare observat Grotius, ut non omnibus ferat omnia Tellus, quo nationes diffusæ necessaria communione inter sese jungantur. Hunc usum occupare velle contra naturæ legem est. Id tamen non vetat, quin si alicujus nationis navigatio possit esse infesta, vel perniciofa alteri, possit hæc altera illam impedire, non jure occupationis Maris, sed jure defensionis, quod ita nationibus adversus nationes convenit; ut hominibus singulis adversus singulos. Alter vero usus, idest piscatio, quum est rerum finiti usus, jure naturæ occupari potest; modo ne in iis sinibus, quos coercere possumus, coercemusque; nec licet adversus eos, qui semel occupaverunt, depugnare, ut de possessione ejiciantur: nemo jure suo, nisi inique, expoliari potest. Exceperim tamen, nisi qui occupavit, luxui magis, quam vitæ sacraverit; alter, qui quærit, tuendæ vitæ quærat: nam nullo naturæ jure homines ab usu vitæ excludere licet; terra omnium est patrimonium.

Nec

(a) Quod non vetat, ut si aliquid in eo commodi habeas, arvis, portus, tutelæ &c. & incommodo subjaceas alicui: nam hæc naturæ lex est.

Nec si facta repugnent, minus est id iniquum: non enim factis dijudicanda est iustitia, sed jure.

§. XIII. Illud etiam quæritur, an occupationum bellicarum iustitia ex iisdem principiis demonstrari possit? Ex quo tempore Martis furor homines adversus homines armavit, captis urbibus, aut direptis, capientium existimatae sunt non tantum urbes ipsae, & agri, verum homines quoque, *divina, humanaque omnia*, creditumque iustas esse hujusmodi occupationes. Historici omnes, quam ea narrant, *jure belli, jure Gentium*, ea omnia fieri victorum dicunt (a). Quum nulla occupatio iusta esse queat, nisi rerum vacuarum, aut non jure occupatarum, ut demonstratum est; res vero in bello captæ nullo modo dici possint vacuæ; quinimmo quædam, ut homines, ne per fictionem quidem esse possint nullius; sequitur earum rerum omnium occupationem non posse esse iustam ex eo principio, quod sit rerum vacuarum. Laborarunt igitur viri docti, ut tale invenirent principium juris naturæ, quo hujusmodi bellicas occupationes defendere possent a furto & rapina, ac belluinis moribus.

§. XIV. Pufendorff. de Jure Naturæ, & Gentium lib. 4. cap. 6. §. 14. sic rem componere studet. In bello res hostis respectu ad alium hostem evadunt dominio veluti vacuæ, non quod hostes per bellum ipso jure rerum suarum domini esse desinant; sed quia illorum dominium non obstat, quo minus victor res eas auferre sibi habere possit: quippe qui sibi mutuo bellum inferunt, videntur quasi ludo quodam pacisci, ut victi regnentur, omnique jure spolientur. Sed quando id facto ipso refellitur; non enim juribus suis cedunt, sed ne cedant, belligerant; hæc doctrina huc redit, eas res esse vacuas, quia alter hostis ob majorem potentiam haud difficulter auferre potest. Quod si verum est, *omnia sunt virorum sortium*, ut ille prædicabat; adeoque principium juris naturæ, idest iusti & in-

(a) Quemadmodum hoc belli jus intelligeret Gallorum dux, ac quo ex fonte duceret, differit Plutarchus in Camillo, loco prorsus egregio. Lege sis.

injusti criterium, positum est in armis & viribus; quod & a tota natura dissidet, & ne Pufendorff. quidem ipse dixerit.

§. XV. Ego rem sic explico. Occupationes bellicas non posse esse justas, nisi in bello justo, exploratum est. Bellum autem justum tum geritur, quum aut jura nostra defenduntur defensione inculcata, aut ablata repetuntur (a). In his casibus secundum principia superius demonstrata licitum est eo usque bellum protrahere, quousque hostis in eo statu constituatur, quo aut non possit amplius nos injuria lacerare, aut nostra nobis jura refecerit. Quod si ad hostem comprimendum necessarium sit ei vires incidere, urbes, divitias, homines auferre, quin id sit justum nemo dubitabit, non secus ac privato homini in naturæ statu licet auferre arma, quibus nos lædere sese parabat. Accedit quoque, quod justitia ipsa poscat, ut dum initur pax, tantum rerum hostilium retineatur, quantum sufficit ad justii belli impensas compensandas. Quare etiam in privatorum decretorum formulis usu obtinuit, *una cum impensis*.

§. XVI. Præterea licitum est in bello justo retinere ea, quæ reddita hostes, iterum adversus nos armare possint. Homines vero, nisi refractarii & perpetuo contumaces, nullo modo haberi possunt sub servitute, licet in custodia retineri queant ii, qui bello originem dedere; aut milites, donec res pace componatur: ne scilicet si restituantur, hostem adversum nos potentiorum efficiant. Sic enim statuo, totam Ethnicorum philosophiam, qui opinabantur, posse in captis urbibus homines omnes aut ad internecionem usque delere, aut

(a) Inter ablata jura & infamiam, contumeliam, calumniam atrocem, locum habere debent: reparationem enim poscunt. Tum exclusio a rebus communibus, quibus vita sustentatur. Ita si ingens populus peste, terræmotu, aliaque calamitate patrias sedes deserere compellatur, nequit naturæ jure prohiberi etiam in occupatis regionibus lares figere. Nam ei dicere, qui nihil habet, ne tango, perinde est, ac si dicas, morere. Quo vero jure tantum nefas imperare licet? Homo homini, quatenus homo est, nibilo præstat.

aut servare ad justam servitutem, iniquam impiamque omnino esse; nec locum habere posse, nisi in uno tantum casu, quum scilicet nullus alius modus superest, quo ad justam pacem ac obedientiam redigantur. Sed & imperium in homines in naturali statu viventes jure belli occupari nequit; nisi si occupetur, aut ad eos conservandos, ne videlicet illa naturali libertate abutentes in mutuam perniciem ruant; aut ad nos tutos reddendos ab eorum incursionibus. Horum omnium una est ratio, quod homines omnes liberi nascantur, nec liceat ullos in servitutem adducere, nisi aut ob talia crimina, quæ sola servitute expiari possint: aut ob eorum liberam deditionem: *nemo jure suo privari potest, nisi aut libera voluntate, aut crimine*. Ex his, quæ dicta sunt, dijudicari facile potest, an S. August. de imperio Romanorum disputans recte scripserit, *Romanis, si vellent esse justis, redeundum fuisse ad casas*. Quanquam & illud quoque in devictas gentes imperium tolerabile fuisset, si fuisset jure & legibus administratum: nam hominibus conservandis natum est imperium. At qua avaritia, qua crudelitate, qua superbia in victos sævitum sit, quando nemo nobilium Romanorum historicorum tacuit, supervacuum fuerit dicere.

§. XVII. Ad justam quoque occupationem pertinent Thesauri, de quorum prioribus dominis nullo certo argumento vel indicio constat: ii enim naturaliter sunt inventoris, veluti res nullius. Quanquam alter legibus quibusdam civilibus populorum constitutum quandoque est; id quod in antecessum fieri potest: nam potest populus, aut Princeps, cujus est territorii imperium, in antecessum propter publicas utilitates hæc sibi reservare, & quodammodo occupare; quo casu inventor nihil juris habet in hujusmodi res, ut qui publico pacto juri suo renunciaverit. Sed leges Populorum civiles super thesauris legi apud eos possunt, qui ea de re ex instituto differuerunt. In primis consuli possunt Grot. de jure Bell. & Pac. lib. 2. cap. 8. ibique commentatores, Seldenus lib. 6. Juris Naturalis & Gentium cap. 4. & Gotofredus tom. 3. Codicis Theodos. pag. 286.

§. XVIII. Veniamus ad accessiones. Alter modus, ut dictum est, acquirendi dominii originarius est accessio, per quam intelligimus jus ea, quæ substantiæ a nobis acquisitæ accedunt, incrementa nobis attribuendi, aut vindicandi. Quum autem res nostræ incrementum accipere possint vel naturæ ipsius beneficio, vel industria nostra, vel natura & industria simul; inde factum est, ut Jurisconsulti accessionem partiti sint in *naturalem*, *industrialem*, & *mixtam*. Sic, ex. gr. folius naturæ beneficio debemus foeturam animalium, accessionem per alluvionem, & similia; industriæ tantum speciem rei nostræ inductam, scripturam, sculpturam, picturam, omniaque artium artificia, quibus metalla, lapides, lanam, sericum, linum, ligna &c. in usum vitæ vertimus, cetera. Denique messem, vindemiam, aliosque fructus soli nostri, naturæ simul & industriæ debemus.

§. XIX. Quod autem pertinet ad justitiam ac probitatem hujusmodi accessionum, in naturali distinguendum putat Grotius, utrum res nostra tale ceperit incrementum, de cujus origine & priori domino nullo certo argumento constet; vel aliquid, quod in alterius dominio est, rei nostræ accesserit. Priori casu, quum res illa, de cujus domino nihil certi constat, pro re nullius merito habeatur, ea jure nobis cedit, veluti vacua, seu nullius. At in posteriori casu res habet dominum, qui alios usu rei suæ jure excludere potest; ea igitur nostra effici nequit. Quare si possit separari a re nostra, reddenda est priori domino: si non, dandum est pretium. Hæc omnia manifesto fluunt ex iis regulis, quæ superius positæ sunt. Bona fide modo agamus, omnique dolo malo remoto, nihil implexum esse potest. Illa si deest, nihil est plani apertique (a).

§. XX. Porro super accessionibus industrialibus, & mixtis sequentes regulas ex principiis juris naturæ statuit

(a) *Quam hoc divinum!* Non enim mihi est vita mea utilior, quam animi talis affectio, neminem ut violenti commodi mei causa. Cic. III. de off. 3.

tuit Heineccius de jure Naturæ , & Gentium lib. 1. cap. 9. Quum agatur de accessione rei alienæ ad rem nostram, nobis invitis , aut insciis , (nam si consenserimus , res utraque in communione positiva est) distinguendum est , utrum ea accessione res nostra evaserit deterior, vel plane inutilis, an vero melior, præstantiorque . Primo casu , qui id fecit, accepta re corrupta , ubi eam dominus concedere velit , tenetur ad omne damnum nobis refarciendum , idest ad restituendum non solum rei pretium , etiam justæ affectionis , verum etiam quicquid in bonis nostris læsit . Id sequitur manifesto ex regulis de nemine lædendo , quas natura omnibus præscripsit , quasque superius explicuimus . Aut enim nihil est inter homines justum ; aut si est (ac est enimvero) nihil alieni per dolum malum retinendum est .

§. XXI. In secundo casu iterum distinguendum est , possint nempe res junctæ sine notabili dispendio & damno separari , necne . Primo casu , quum utriusque rei domino jus sit alterum rei suæ usu excludendi ; id vero aliter fieri nequeat , quam rebus illis separatis ; conficitur eas esse separandas . Posteriori casu alteri addicenda est , qui alteri pretium rei suæ reddat . Addicenda autem est , ex regulis prudentium , ei , cujus pars nobilior est , & præstantior . Scio Jurisconsultos Romanos censere , ubi duæ res dolo malo junctæ sint, accessionem sequi dominum principalis , qualis est ædificatio in solo alieno . Si id sit ex legibus societatis civilis , idque in pœnam ejus , qui prudens ac videns rem suam alteri conjunxerit , non audeo damnare , dummodo ne res juncta sit magni pretii . At id ex lege naturali non sequitur ; quippe quæ æqualitatem spectat dati acceptique ; neque consentaneum est mutæ hominum caritati . Quibus ex rebus responderi potest infinitis quæstionibus , quas super his rebus Jurisconsulti , & Casuistæ excitaverunt : nos principia explicanda suscepimus , non singulas species definiendas . Ac opinamur , sæpe nimium secando , minutasque etiam quæstiones regulis comprehendendo , & legum fuisse

majestatem imminutam , & stimulum ingeniis conatumque ad magna ademtum .

C A P U T VIII.

De modis acquirendi Domini derivativis .

§. I. **Q**Uæ in dominio jam constituta sunt , vel sunt in communione positiva , vel in proprietate ut supra dictum est . A communione positiva ad proprietatem fit transitus , aut divisione , aut cessione . Divisione quidem , si quilibet partem rei juri suo æquam in proprietatem accipiat : cessione vero , si rem totam reliqui socii ei cedant . Res autem in proprietate positæ transeunt in alterius dominium libera traditione , cujus nomine intelligo omnem omnino liberam alienationem , quæ jure fit .

§. II. Alienationes dividi solent ab iis , qui hæc subtilius disputant , primo in voluntarias , & involuntarias , seu necessarias . Necessariæ appellantur eæ , quæ ex anteriori acquirentis jure proficiscuntur , quæ necessariæ dicuntur in effectu , non in causa : neque enim ulla alienatio in causa necessaria concipi potest ; quia nemo rerum suarum dominio exui potest , nisi aut voluntate sua , aut voluntario crimine . Voluntariæ vero sunt , quæ de novo decernuntur , libere consentientibus tradente & accipiente . Secundo dividuntur in puras , & conditionales . Primæ domini translationem nulla conditione suspendunt ; secundæ vero conditione aliqua vel circumstantia . Tertio dividuntur in alienationes de præsentī , & de futuro . Primæ sunt , quum vivi voluntate nostra rerum nostrarum dominium in alios transferimus : secundæ quum transfertur post nostram demum mortem . Jam consensus in futuram alienationem vel est expressus , & dicitur alienatio testamentaria : vel ex fine , intentione , & conjectura voluntatis colligitur , quemadmodum putat Grotius , & dicitur successio ab intestato .

§. III. Quum res in communione positiva est , jure naturæ , nisi aliud pactis constitutum sit , cuilibet

licet provocare ad divisionem, portionemque suam repetere, præsertim si ea communio minus sit ei commoda, ut nimirum dominium juris sui plenum habere possit. Nisi enim id liceret, inutile esset rerum dominium. Quid, inquit aliquis, si communio illa his legibus statuta sit, ut esse debeat perpetua (a)? Respondeo pacta sancte servanda esse: sed eas communionis illius leges non posse semper intelligi ita, ut etiam si perniciosa sit sociis communio, perpetuo retinenda sit: neque enim credendum est, socios his legibus communionem inire voluisse; quia natura fit, ut quisque statum sibi pernicialem aversetur. Quare ea pacta interpretationem aliquam admittere possunt. Id tantum vetat non pactorum modo fides, sed lex naturæ primaria, ne tunc a communione discedere velimus, quum fieri nequit sine aliorum sociorum damno: aut non ex gravi incommodo, sed ad libidinem confecto.

§. IV. Res autem communis vel dividua est, vel individua. Si primum, nihil magis æquum est, quam ut scindatur in partes, ac sua cuilibet addicatur. Si posterius, uni addicatur, qui ceteris sociis pro ratis portionibus satisfaciat: neque enim ad divisionem jure provocari potest, quippe qua res corrumpitur cum damno omnium. In addicenda uni præ aliis re indivisibili, aut eligenda est persona ex communi sociorum consensu; aut, ubi plures contendunt, sorti res committenda. Nam quod quidam docent, rem addicendam ei personæ, quæ prærogativa aliqua ab aliis distinguitur, id ex jure naturæ non est, quando agitur de Justitia commutatrice; quia in rebus ejuscemodi naturæ jure omnes sumus æquales.

§. V. Sunt res quædam pluribus communes, ad quas licet omnes simul jus perfectum habeant, nemo tamen habet singillatim, e. g. ad eleemosynas, quas montes Pietatis dicti elargiri ex legato debent, omnes pauperes jus habent acquisitum ex eorum legatis, qui

V. 3

hu-

(a) Etiam si pacto aliud conventum sit, adhuc societatem dissolvi posse Romanae leges statuunt.

hujusmodi montes fundaverunt : sed nemo habet singulatim jus perfectum . In his rebus attribuendis locum non habet perfecta æqualitas rei dividendæ , sed proportio Geometrica ; nec ex jure singulorum perfecto , sed imperfecto . Proportio Geometrica in hoc posita est , ut sit ratio ejus , quod uni datur , ad jus , ut ratio ejus , quod datur alteri , ad ejus jus . Ita si sit 6 ad 2 in ratione tripla , erit 12 ad 4 in eadem ratione . Quare in his rebus dividendis servandum non est illud , ut totum ad totum , ita pars similis ad similem , sed potius illud , ut sit datum X ad indigentiam , e. g. pauperis A ut est datum Z ad indigentiam pauperis B Explicemus hoc exemplo : Mille pauperes habeant jus ad mille aureos natum ex alterius benignitate . In his aureis distribuendis non est servanda prior illa proportio , ut singulis pauperibus dentur singuli aurei , sed hæc potius , ut si pauperi A cujus indigentia erat 6 datum sit 2 : pauperi B cujus indigentia est 12 detur 4 : ita servabitur proportio Geometrica . Eadem porro proportio servanda est in justitia distributrice , quum agitur de pœnis , præmiis , aut officiis ex cujusque meritis distribuendis , modo nihil præcesserit , quo jus justitiæ distributricis evaserit jus strictum justitiæ continutatricis . Ea vero quæ dicitur ab Aristotele proportio Arithmetica , quæ posita est in medio indivisibili & æqualiter ab utroque extremo distante , quale est 6 a 2 & 10 & 8 ad 10 , & 12 &c. locum in his rebus nullum habere potest , sed ne in iis quidem semper virtutibus , quæ nostri custodiam & culturam spectant , quod ipse Aristoteles animadvertit .

§. VI. Quæritur hoc in loco , quænam harum proportionum in pœnis infligendis servanda sit ? Distinguendum est : habent enim pœnæ duplicem finem , satisfactionem injuriæ alterius datæ , & publicum exemplum , ne scilicet similiter peccetur . Quod ad primum finem attinet , æqualitas servanda est ; agitur enim de jure alterius perfecto reparando . Quod ad alterum , Geometrica proportio locum habere debet : nam plerumque ob publicam utilitatem licet esse paullo severio-

riorem, seu gravius punire, quam crimen absolute consideratum meretur. Quandoque ob eandem rationem licet aliquid remittere de constituta poena, si id futurum sit in publicam utilitatem.

§. VII. Si res communis uni sociorum attribuat, ea vocatur cessio. Quum autem unus in reliquorum omnium locum succedat, sequitur eum succedere quoque in jura omnia eorundem, atque idcirco subire debere, ut omnia commoda, ita incommoda. Ex quo naturali principio recte deduxerunt Jurisconsulti Romani, easdem omnino exceptiones opponi posse cessionario, quibus adversus cedentem locus fuisset. Sed ex eodem principio sequitur, seu res dividatur, seu concedatur uni, intelligi traditum liberum dominium rei: ac propterea socios efficere debere, ut ne dominus in in eo dominio impediatur a causa aliqua antecedente. Id totum dicitur a Jurisconsultis *evictionem* rei praestare. Quocirca praestatio evictionis ex ipso naturae jure profisciscitur.

§. VIII. Veniamus ad traditionem. Homines rerum dominos dominium patrimonii sui, aut totum, aut ex parte in alios transferre posse, juris est naturalis post introductum rerum dominium: inest enim hoc jus in ipsa domini plenae natura, quae posita est in jure omnimodo re sua utendi. Itaque praclare Aristot. *proprietas*, inquit, *definitio est, ubi penes nos est jus alienandi*. Ceterum nulli dubium est, quin possit per societatem, aut eum, qui in societate summum habet imperium, constitui, ut nonnisi sub certis conditionibus dominium transferatur, quod rerum privatarum dominia non debeant ita administrari, ut publica civitatis felicitas laedatur. Quod ita statutum est, ad pacta publica refertur; servandum igitur ob privatam publicamque felicitatem. Quare jure prodigis alienare prohibetur: jure prohibetur alienare iis, qui nondum plenam rationem habent. Eadem de regula in quibusdam civitatibus prohiberi potest alienare in extraneos quaedam rerum genera. Ex autem prohibitiones naturae domini non adversantur: siquidem ipsa naturae lex praecipit, ut ita rebus nostris utamur, ut neminem inter-

ea lædamus, ne ipsis quidem nobis exceptis (a).

§. IX. Ex doctrina Jurisconsultorum, dominium traditione translatum non intelligitur, nisi rei possessione tradita. Apud plerasque etiam Europæ Gentes exigitur, ut traditionis apud Populum, aut Magistratum fiat professio, & relatio in acta. Quæ omnia ex jure sunt civili, prudenter licet statuta ad fraudes cavendas. Nam alioquin jus naturæ hujusmodi formas ignorat (b):
sufficit

(a) Eodem pertinent leges Judaicæ, ut ne quis extra familiam alienet: ut ne quis extra tribum. Hinc nuptiæ non extra tribum. Sed & ob eandem causam, vetitum ne Sacerdotes fundos occuparent: soli tributi fructus. Nam cum non admodum ampla esset Palæstina, si licuisset sacrare fundos, brevi tota uni tribui Levi cessisset. Eadem apud Romanos ratio: ne quis agrum sacro, ut est in legibus decemviralibus. Cum inter nos nullus occupandi finis legibus constitutum esset: inde illa fuisse sæpe bella, seditiones, schismata; eruntque, donec nullus flet modus. Ceterum illæ agrorum partitiones verisimile est, non prius obtinuisse, quam familie, missa vita vaga & agresti, agriculturæ studuerunt, cojeruntque in corpora politica. Ætate id Deorum factum fabulæ Græcorum docent, aut eorum, qui Deorum filii perhibentur. Nam Jupiter apud Æschylum v. 229. dicitur statim ac thronum adeptus est, δαίμονιν νέμειν γερὰ ἄλλοισιν ἄλλα, dona alia aliis diis distribuisse: sed nullam reliquorum hominum rationem habuisse. Quod ego sic accipio, optimatibus partitum agros, reliquos servos addictos glebæ habuisse. Quibus obstrxisse Prometheus fertur, velut in illa Titanum gente plebis tribunus, aut Ephorus, ac mortales a miseria liberasse. Eo factum, ut odio esset Patriciis. Nam ille, quem rapuit e sole, ignis, ἑστία, foci domestici sunt, qui in Republic. homines capita. Hinc quoque est, ut filius Themidos habeatur Prometheus, idest Telluris, justæ naturæ legis, qua agrorum constant jura

Ἐμοὶ δὲ μήτηρ ἄχ' ἄπαρ' ἑμὸν Θεμὶς,

Καὶ Γαίη, πολλῶν ὀνομάτων μορφή μιν. v. 209.

Quonquam in Græcia Herculis tempore adhuc incultæ essent & agrestes gentes, nulla terrarum partitione; quippe adhuc feri boves. Inde sunt illi Centauri in Hercule furioso Euripidis; quasi boves κεντρούντες, cornu ferientes, quos Hercules edomuit. Jam Theseus vites videtur Atticis, earumque culturam monstrasse; ex quo est ejus filia Πηνελόπειαν, item Σαρπλοῦς filius; & uxor Ariadna, res voluptuosa; quæ ad ejusmodi culturam spectant. Vide Plutarchum in Theseo. Quicquid ejus rei sit, cum civitatibus ac imperiis leges agrariæ invektæ, idque, ut in III. de Rep. opinatur Plato, plusquam mille post diluvium annis.

(b) Barbari adhuc omnes non aliter nobiscum commercia agunt,
quam

sufficit nempe nostra voluntas tradendi expressa per verba, aut alia signa externa, & consensus acceptantis item aliquo signo externo significatus: libera scilicet voluntate jura traduntur. Externa autem esse debent signa dantis, & acceptantis: nam solus actus internus non est congruens naturæ societatis humanæ. Vide Grot. de jure Belli, & Pacis lib. 2. cap. 6. ibique Cocceii.

§.X. Sed ut transferatur dominium necessarium quoque est, ut qui tradit rem aliquam, habeat, aut habere possit transferendi voluntatem. Quocirca ex commodato, deposito, locato non intelligitur dominium transferri: multo minus si res tradatur precario, vel alio titulo pro tradentis arbitrio revocabili: non enim qui tradit voluntatem habet alienandi. Præterea si animum tradendi vel alienandi habere quis nequeat, quo tempore tradit, ut infans, furiosus, mentecaptus, similes; nullo modo transfertur dominium: nulla enim voluntas constat sine ratione.

§.XI. Jam vero potest quis non integrum dominium transferre, sed sibi ex re sua commodum aliquod, aut utilitatem, reservare: potest ad tempus, aut sub conditione aliqua, vel obligatione transferre: id enim proprium est dominii pleni & absoluti. Inde natæ sunt servitutes, inde genera dominiorum, pleni & minus pleni, directi & utilis, de quibus diligentissime egerunt Jurisconsulti. Omnes hujusmodi alienandi species ex natura dominii consequuntur: nam qui dominus est, alienare jus suum potest utcumque ei libitum fuerit, modo ne alios lædat. Quare quum dominium rite acquisitum vim habeat ex lege naturæ; inde quoque hæc omnia vim suam trahunt; quæ proinde servari necesse est ab eo, qui naturalis honestatis & justitiæ amans est.

§.XII. Inter species alienationis usitatiores & testamentum recensetur. Sed illud inter doctos summopere controvertitur, utrum ex jure naturæ, an vero ex jure civili vim suam habeant testamenta: quæ controversia non parvi est momenti. Etenim si testamenta

jure

quam signis, ac brevi manu: nullæ aliæ solemnitates, nisi datio æque acceptio. Ex naturæ vox, si uterque consenserit.

jure naturæ rata sunt, nulla humana auctoritate aut rescindi, aut immutari possunt, sanctumque habendum est, quodcumque eum in modum statutum est. Contra vero si ex jure tantum civili vim suam nanciscuntur, ubi summus Imperans e re publica vel privata esse judicaverit, ea irritare jure suo potest, velut summus Reipublicæ moderator.

§. XIII. Ut ea controversia rite componatur, omnium primum constituenda est testamenti definitio, ut ejus constet natura. Grotius ex Romanis legibus lib. 2. de Jure Belli, & Pacis cap. 6. §. 4. testamentum sic definit, *alienatio universi patrimonii nostri in mortis eventum, ante eam revocabilis, retento interim jure possidendi, & fruendi*. At Pufendorff. lib. 4. de Jure naturæ, & Gent. cap. 10. §. 2. alique viri docti observarunt, Grotianam definitionem esse contradictoriam, seu constare ex repugnantibus: neque enim testamentum esse potest alienatio, ubi & revocabilis sit, & retineatur jus possidendi, & fruendi, ac consequenter alios excludendi. Hoc enim jus integrum dominium constituit, quod ubi non transfertur, ne alienatio quidem testamentum esse potest. Sane vero posita Grotiana definitione, rogant, quandonam testamentum alienatio sit, ante ne quam testator moriatur, an postquam obierit? non primum, quum adhuc retineatur dominium: nec alterum, quum jam dominio excesserit, quod idcirco transferre amplius nequit: morte enim rerum terrestrium finiuntur dominia, quæ corporeæ tantum vitæ necessaria sunt. Itaque Pufendorff. testamentum definit, *declarationem voluntatis nostræ circa successores in bona nostra post mortem nostram, quæ tamen ante mortem pro libito nostro sit mutabilis, & revocabilis*. Est scilicet hujusmodi declaratio pollicitatio quædam conditionalis, quæ nullum jus in heredem transfert: tales enim pollicitationes revocabiles esse ipse ostendit Grotius lib. 2. de jure Belli & Pacis cap. II.

§. XIV. Qua posita definitione, quæritur, an introducto legitime rerum dominio, ex ejus natura necessario consequatur, ut quis ita efficaciter testari possit, ut ejus testamentum jure naturæ vim & efficaciam ha-

habeat, quemadmodum omnis alia voluntaria alienatio; quæ inter vivos fit? Grotii mens est, testamentum, ut alios actus externos, qui societatem spectant, formam certam posse accipere a jure civili, secundam quam nisi instituantur, effectum nullum sint habituri: at substantiam ipsam testamenti cognatam dominio esse, eoque posito, esse juris naturalis. Sed dubia super ea re non levia movet Pufendorff. Henricus vero de Cocceii Commentario in eum Grotii locum; Samuel de Cocceii dissertatione 12. procemiali ad Grot. lib. 4. cap. 3. sectione 4. Heinecc. lib. 1. Juris naturalis & Gent. cap. 2. aliique viri docti rotunde negant testamenta juris esse naturæ (a).

§. XV. Nos sequentibus propositionibus rem expediemus. Prima est: *non potest jus naturæ rata habere testamenta tanquam alienationes privatas*. Primum, alienatio non fit nisi voluntate rationali, quæ volumus dominium transferre: quum autem testatores neque vivi dominium rerum suarum in heredem transferant, neque possint transferre postquam occiderunt, quia dominia morte finiuntur; sequitur testamentum non esse alienationem privatam, neque ut talem alienationem a lege

(a) *Dominia privata pactis conventis nationum inducenda fuisse: iisdemque pactis testamenta rata habentur. Hæc pacta nisi privatis Civitatibus, earumque utilitatibus adversentur, ex natura profecto vim suam habent. Nam ut nationes jus, quod e natura profuit, suis pactis antiquare nequeunt; ita nationum omnium pacta, quæ statu Civitatum anteriora fuerunt, non sunt existimanda abolita, nisi iis civilibus sanctionibus aperte renunciatum sit. Quod tantum abest ut cum testamentorum pactis actum sit, ut potius firmata sint. Ita testamenta, quæ ex iis conventionibus tacitis, seu expressis, originem habuere, vi ipsa naturæ facta testata sunt. Nec nego legibus totius Civitatis antiquari illa pacta ac rescindi posse. Illud ajo; quousque id factum non fuerit, Jurisconsultorum philosophia ac machinationibus fieri non posse. Querere vero, vivus ne alienem, ac mortuus, perridiculum fuerit: siquidem non ego tantum alieno, sed tota mecum Civitas, quæ hisce constat pactis. Quid si cum tota domo spondeam, hanc tibi auream pateram tradi, sed non prius, quam obdormiero; modo ne & hanc sponsionem, priusquam obdormiam, revindicem? Queres scilicet, dum me dormiente capis, vigilans ne dederim, an somno sepultus? Quod de somno dixi, de morte cogita.*

lege naturæ comprobari. Videntur hoc intellexisse Jurisconsulti Romani, qui ut huic difficultati obviam irent, ad fictiones confugerunt. Finxerunt enim momentum aditionis hæreditatis cum momento mortis testatoris idem esse, & hoc momentum unum idemque cum momento testamenti factionis. Sed hujusmodi fictiones alienæ sunt a naturæ simplicitate & veritate.

§. XVI. Deinde omnis alienatio, ut vim a natura habeat, exigit in alienante voluntatem dandi, in excipiente recipiendi; quæ in testamento defunt; quum nec testator *απλος simpliciter* alienare velit; & sæpius heres ignoret, se scriptum heredem. Tum dominium rerum terrestrium in usum præsentis tantum vitæ nobis concessum est; ergo morte finitur. Quare quum jus alienandi sequatur dominium, nullum nobis competere potest, postquam occidimus. Testator autem non alienat vivens, quia nullum jus transfert in heredem; ergo testamenti factio vim habere nequit ex naturali lege tanquam privata alienatio.

§. XVII. Altera propositio est: *consentaneum est juri naturæ rata servare testamenta velut alienationes publicas, ubi nihil reipublicæ interest: at si reipublicæ intersit, potest illa summus Imperans aut rescindere, aut permutare*. Ratio primæ partis est, quia interest tranquillitatis publicæ ita esse singulis persuasum, ut ex publicis pactis possint omni modo, jura sua alienare. Ad rem Quintilianus declam. 308. *Neque enim aliud videtur solatium mortis, quam voluntas ultra mortem, alioquin potest grave videri & ipsum patrimonium, si non integram legem habeat, & quum omne jus in id nobis permittatur viventibus, auferatur morientibus*. Tum interest, bonam fidem servare; quæ tum est integra, si publica pacta immota habeantur.

§. XVIII. Secundæ partis demonstratio omnium expeditissima est. Tota enim ratio, ob quam testamenta juri naturæ conformia pronunciamus, desumta est ex fine communium generis humani factionum, salute publica; ergo ubi ejusmodi sunt testamenta, ut publicæ utilitati & tranquillitati adversentur, nullo modo æquum est, ut civitatis pacta servantur rata. Jam ve-

ro quum judicium supremum earum rerum, quæ ad publicam civium utilitatem pertinent, in imperio civili sit summorum Imperantium; efficitur eorum juris esse ejusmodi species perpendere, & secundum publicam utilitatem definire. Nec desunt exempla apud veteres rescissorum testamentorum etiam secundum solemnitates juris civilis factorum, veluti quum testamentum Tiberii Senatus irritum declaravit, ut narrat Dio lib. 49. & testamentum Virgilii, quo constituerat, *sua rapidis aboleri carmina flammis*, invalidavit Augustus. Accedit, quod Romani ipsi Jurisconsulti & Imperatores non omnibus testamenti factionem concedunt. Ita e. g. deportatus non habet testamenti factionem, etsi retineat omnia, quæ sunt juris naturæ, L. 1. C. de bonorum possessione.

§. XIX. Quæ autem dicta sunt in priori propositione cum hac exceptione intellecta volumus, ut infinita illa testandi licentia, quam leges Romanæ induxerunt (a), quæ nullam aliam habeat regulam, nisi testatoris libidinem, non ex jure naturæ, sed civili tantum vim habeat (b). At liberorum, nepotum, aliorumque

(a) Lex XII. Tab. *sciscit*, Paterfamilias ipse super familia, pecuniave sua legassit, ita jus esto. *Eam legem ita intellexisse videntur legum Justinianearum collectores, ut Instit. de lege Falcidia, initio, dicerent, olim lege XII. Tabularum libera erat legandi potestas, ut liceret vel totum patrimonium legatis erogare. Quin de verborum signif. l. 120. his verbis, uti quisquam legassit de re sua, ita jus esto, scribitur, latissimam potestatem tributam videri, & heredes instituendi, & legata & libertates dandi, & tutelas quoque constituendi. Mox hæc interpretatione coangustata. Illud ego mihi non persuadebo, superioribus Reip. temporibus, agrestioribusque moribus, adeoque juribus familiarum vigenzioribus, eam patrifamilias tributam legibus potestatem, quæ luxuriantium temporum fuerit propria. Aliud igitur subsuisse existimo, quod non satis sequens ac luxuriosa ætas intellexerit. Equidem, non abnuo jura patrum regia priscis temporibus augustiora fuisse; quibus tributum aliquid videri possit: illud movet, cur hæc ipsa jura labefactare voluerint luxu testandi? Quid si primogenitorum superbiam retundere studuerint? Quid si liberorum avaritiam, liberalitatis jura fovendo? Sed non vacat hæc disceptare subtilius.*

(b) Nam illa quoque gentium pacta, quæ constituta fuere dominia, familias spectabant.

rumque in linea recta successio in bona paterna, vel avita, jure & ordine naturæ constat; quia ex jure & ordine naturali est, ut Parentes liberis, quos voluntarie genuerunt, provideant (a). Secundo quia in ordine naturæ est, ut Parentes in bonis acquirendis non sibi tantum, sed posteritati quoque suæ prospiciant, quo fine defraudaretur natura, si eorum posteritas ab hereditate excluderetur. Tertio quia tota linea recta, dum superstes est, una cum stipite in eorum bonorum possessione est, ut idcirco una occupasse videatur. Quarto quia familia est unum corpus artificiale, cujus caput natura ipsa est Paterfamilias, aut, eo deficiente, is, qui Patri conjunctior est. Quare ut in Imperio familiæ naturaliter succedit is, qui Patri est conjunctior, ita quoque succedit in bonorum possessione, quæ est ratio Samuelis de Cocceii. Hinc apud veteres quasque nationes non aliud ferme testamentum obtinuit, quam hoc, ut sui cuique liberi, aut sanguine conjunctiores, heredes essent. Apud Germanos, *heredes successoresque sui cuique liberi, & nullum testamentum* (b). Idem antiquitus observatum Athenis colligi potest ex Plutarcho in Solone. Idem factitatum apud Hebræos demonstrat Seldenus de successione ad leges Hebræorum cap. 24.

C A P U T . IX.

De officiis, quæ ex dominio rerum proficiuntur.

§. I. **Q**uemadmodum bona Telluris juste & honeste nostra efficere possimus, iisque adridente uti Nemese, *conscientia*, in superioribus demonstratum est. Nunc in id inquirendum, quæ super iis adversus alios officia servare oporteat. Officia, quæ adversus alios ex rerum dominio nascuntur, paucis regulis complexus est Pufendorff. de officio hominis & civis

(a) *Quia iis cautum agrorum divisione: familias enim servari volebant.*

(b) *Tacitus de moribus Germanorum cap. 20.*

vis cap. 13. Eas nos in medium proferemus, paucis adnotationibus additis. Prima regula est, *ut quilibet teneatur alterum* (non hostem, adversus quem bellum justum gerat) *pati rebus suis quiete frui, neque vi, aut per fraudem illas corrumpere, intervertere, aut ad se trahere*: qua regula furta, rapinæ, damna, injuriæ, fraudes, & alia crimina in res alienas tendentia, prohibentur. Ejus regulæ ratio ex omnibus systematibus juris naturalis desumi potest. Primo id exigit custodia societatis; ita enim societas sancte custoditur, si cuique sua jura servantur. Secundo id postulat amor, quo ex lege naturali omnes amare tenemur: is enim vetat cuique injustum dolorem inferre. Tertio non patitur contrarium natura dominii, quod, ut demonstratum est, leges naturæ probant. Tandem id gentium omnium leges civiles confirmant. Nam quanquam de Ægyptiis, & Spartanis contrarium tradant, quippe apud quos furta permissa fuisse dicunt; ea tamen, quæ dicebantur furta, proprie dicta furta non erant, cum omnes consentirent: quandoquidem quibus in casibus bona dominorum voluntate, veluti ludo, quadam, in medio sunt posita, nullum furtum admitti potest.

§. II. Sed quæri potest, utrum eadem lege prohibeantur usucapiones, ut præscriptio longi temporis, vel immemorialis, non sit firma exceptio, qua res alienas nostras facere queamus? Usucapiones longi temporis, vel immemorales, res alienas efficere nostras, legibus Romanorum civilibus statutum est. Quumque ex leges evaserint jus commune gentium Europeanum, hinc hujusmodi præscriptiones in tota Europa invaluerunt. Sed & apud Hebræos, & Græcos, aliasque antiquas Nationes idipsum approbatum legimus. Vide Grotium lib. 2. de jure Belli, & Pacis cap. 4. Cicero in 2. de officiis contra æquitatem esse pronunciat, *ut agrum multis annis, aut etiam seculis ante possessum, qui habuit, amittat*. Grotius idipsum sequentibus argumentis confirmat; quod scilicet & controversiæ nunquam finirentur; & omnium animi dominiorum incertitudine perturbarentur; & lites ex litibus sererentur, nisi longi temporis usucapiones res alienas faceret nostras.

§. III. At difficile est demonstrare ex principiis juris naturæ, usucapiones quantivis temporis justas evadere posse, nisi accedat voluntas legitimi domini: Ipse Grotius agnoscit, tempus suapte natura vim nullam effectricem habere: *nihil, inquit, fit a tempore, quanquam nihil non fit in tempore.* Efficere ergo tempus nequit, ut quod meum est, sine voluntate, aut facto meo, evadat alienum. Quod si leges civiles id constituunt, censendum est id efficere in pœnam, qua legitimus dominus ob suam negligentiam punitur. Ac vero, aut res, quæ usucapitur, a nobis sublata fuit furto, vel rapina, & tum lex ipsa duodecim tabularum negat usucapi posse, *Adversus furem aterna auctoritas esto;* aut casu vel fortuito in alienam possessionem transiit; & possessor posterior, quum legitimum ejus dominium non habeat, ne transferre quidem potest in alios, ut perspecte ratiocinatur Cujacius ad l. 2. de usucapionibus. Vide & Samuelem de Cocceii dissertatione 12. procœmiali ad Grotium lib. 4. cap. 3. sect. 5. (a). Sed has rationes evanidas publica pacta efficiunt. In his rebus quod publico fit consensu, juris naturæ est.

§. IV. Secunda Pufendorff. regula est, *quando res aliena ad nos pervenit nec nostro crimine, & bona nostra fide, eamque adhuc in nostra potestate habemus, tenemur efficere, quantum in nobis est, ut illa in potestatem legitimi sui domini redeat.* Scilicet id exigit natura domini, & generica illa naturæ lex, quæ suum cuique jus tribuendum præcipit. Ceterum non tenemur rem hanc restituere nostris impensis, si sine nostra culpa periit: nullo enim crimine eam habemus. Præterea si quas in ea servanda impensas fecimus, recte possumus reperi-

(a) Sæpe dictum, sed dicendum sæpius: quæ consensu totius gentis fiunt, modo ne naturæ adversentur, jure fiunt; quia patetis fiunt. Quin leges ipsæ Civiles nihil sunt aliud, nisi quædam pacta publica, etiam in Monarchicis Civitatum formis; constant enim Principum rogatione, ac populorum sponione. Cum igitur usucapiones seu consuetudine, seu civili lege ratæ habeantur, quis dubitat esse justas? Eo sunt in loco, quo Lacedæmoniorum furta, consensione omnium rata. Eadem cum nationum omnium approbatione teneantur, jure gentium valent.

repetere, aut tantisper, quoad illæ compenseantur, retinere. Ad restituendam porro rem tunc actu tenemur, quum nobis innotuit, rem illam esse alienam. Sed quod iusto titulo acquisivimus, non tenemur ipsi in dubium revocare, & velut publicæ denunciare, quousque solida dubitandi argumenta nos non sollicitent.

§. V. Et hoc quidem officium rem alienam legitimo domino restituendi prius est atque potius officiis ceteris, quæ ex peculiari contractu nascuntur, ut si collidantur, illud servandum potius sit, quam hæc. E.g. si quis rem furtivam, me imprudente, apud me deponat, & interim mihi innotescat dominus, teneor furi restituere ex peculiari officio depositi, domino vero legitimo ex officio generico domini: quum autem posterius officium sit potius & antiquius; efficitur ut nullus supersit locus officio peculiari, quod nascitur ex deposito. Neque necesse est distinguere inter jus civile, & naturale, quod efficit Triphoninus in l. 31. ff. de positi: Jus enim naturæ antiquius est & potius jure civili, ut si collidantur, prius servandum sit. Laudo ego Jurisconsultorum Romanorum sollicitudinem, qui his disputationibus bonam fidem inter cives firmare student: sed nego eam firmari posse officiorum naturalium violatione, ut civilia serventur (a).

§. VI. Regula Pufendorff. tertia est: *Si res aliena bona fide parta sit consumpta, officii est naturalis tantumdem restituere domino, quantum ex eo patrimonio nostro accessit, seu in quantum facti sumus ditiores, ne scilicet ex immerito alterius damno lucrum capiamus.* Eam tamen regulam sic intelligendam docet, ut restituere teneamur id, in quo facti sumus locupletiores aut ex ipsius rei substantia, aut ex rei fructibus naturalibus, non vero si ex fructibus industrialibus. Oppugnat hanc regulam Barbeiracius adnotationibus ad opus majus Pufendorffii, eo argumento, quod qui possidet bona fide, tantisper dum possidet loco domini est, ac propterea, ut dominus, omnem utilitatem ex re possessa jure capere

Tom. IV.

X

pere

(a) Potius, posteriora pacta, si anteriora elidant, irrita sunt, nulliusque obligationis.

pere potest. Sed, me saltem auctore; prævalere debet principium alterum, *neminem locupletari oportere inmerito alterius damno*. Videri possunt, quæ ad hunc locum Pufendorffii adnotavit Everardus Otto.

§. VII. Superiorem regulam sequentibus aliis idem auctor illustrat. Prima est, *possessor bonæ fidei non tenetur ad ullam restitutionem, si res perit, nec quidquam ex ea patrimonio nostro accessit*. Nulla scilicet ratio exstat, quæ eum obligare possit ad restituendum: jus non læsit.

Secunda, bonæ fidei possessor tenetur ad restituendam rem, si exstet, & simul fructus exstantes; naturaliter enim ad quem pertinet res, pertinent & fructus naturales: jus enim suum cuique tribuendum est. Licet tamen hujusmodi possessori detrachere omnes impensas in re ejusque cultura factas, saltem impensas necessarias, & utiles, ne alter jure nostro crescat.

Tertia, bonæ fidei possessor tenetur ad restitutionem fructuum consumptorum, si alias ex rebus suis tantundem consumpturus fuisset. Regula est Grotiana, super qua itidem cum Barbeiracio lis est.

Quarta, bonæ fidei possessor non tenetur compensare fructus, quos neglexit; quia nec re habet, nec quidquam inde rei suæ accessit: nec rei, quam suam ducit, negligentia pro culpa in alium haberi potest.

Quinta, si bonæ fidei possessor rem alienam sibi donatam aliis donaverit, non tenetur tantundem restituere, nisi omnino ex officio aliquo tantundem donaturus fuerat: tunc enim lucrum fuit rei suæ pepercisse.

Sexta, si bonæ fidei possessor rem alienam oneroso titulo acquisitam, veluti emtione, commutatione &c. quocumque modo alienaverit, non tenetur restituere, nisi quatenus ex ea lucrum fecerit. Ratio eadem est, quæ in superioribus.

Septima, bonæ fidei possessor etiam permutatorio titulo rem alienam acquisitam tenetur restituere, si exstet, neque dominum id quod pro ea erogavit pretii reposcere potest, sed actionem adversus illum habet, abs quo eam rem accepit. Cujus ratio est, quod nequeat una eademque res in duorum esse proprietate:
cum

cum sit in proprietate primi domini, nihil in ea juris habet alter.

§. VIII. Regula tandem Pufendorffii quarta generalis est hujusmodi, *qui rem alienam invenit, quam domino invito excidisse probabile est, non potest eam colligere hoc animo, ut domino repetenti deneget. Quanquam si dominus non appareat jure occupantis retinere potest.* Hujus regulæ ratio eadem est, atque superiorum. Singularis fuit super hac re Spartanorum lex, *quæ non posuisti, ne tollas.* Quæ tamen nullo pacto commendari potest, nedum in copiosis & frequentibus urbibus, sed ne in agris quidem; quum utrobique facillimum sit hujusmodi res jacentes corrumpi. Humanitatis potius jura docent, ut res jacentes tollantur, & loco depositi habeantur. Ex hac porro regula dijudicari potest, quid censendum sit de quarundam Nationum lege, qua res naufragorum Fisco addicuntur: eam enim esse contra naturam ratio disertissime docet. Pluribus adversus hujusmodi leges declamaverunt Bodinus de Republica lib. 1. cap. 10. Grotius lib. 2. de Jure Bell. & Pac. cap. 7. Jacobus Gothofredus de imperio maris cap. 2. aliique. Ac revera quid est aliud hominem adversa fortuna conflictatum jactatamque velut pro summa miseriarum spoliare?

§. IX. Quæri hoc in loco potest, ubi dominus non compareat, quid faciendum sit de rebus inventis? Quorundam Theologorum opinio est, res hujusmodi erogandas esse in pauperes. Nempe id est de alieno esse benignum. Itaque si ex jure perfecto id docent, errant profecto: quum enim tales res non sint pauperum, nullo jure perfecto cogimur pauperibus dare. Si vero pronunciant ex jure beneficentiæ, aut œconomico, nihil honestius: sed tum id faciendum est, nec cum repertis modo temere, sed cum nostris quoque, quum eæ res nobis necessariæ non sunt. Siquidem jura humanitatis a nobis incipiant oportet. Pertinet ad hanc rem illud Senecæ, *dabo egenti, sed ut ipse non egeam: succurram perituro, sed ut ipse non peream.*

*De pactis & contractibus, deque officiis inde
provenientibus.*

§. I. **H**ominum violentia ac dolus primam ut civilibus legibus, ita pactis, quæ sunt quasi privatæ leges, originem dedisse videntur: nam inter viros undequaque bonos, juris & honestatis amantes, ac propterea naturaliter & reciproce amicos, nullus nec legibus, nec pactis locus est; quia necesse non est. Præclare ab Aristotele observatum est, in locum amicitiae civilem justitiam successisse, quæ ut legibus contineretur necessarium non fuisset, si homines, ut natura esse deberent, ita rêvera essent sinceri alii aliorum amici. Contractibus vero commerciorum tres, ut mihi quidem videtur, causæ originem fecere, dominia, nostri immoderatus amor, & rerum ad vitam necessariarum non ubique eadem copia. Nam primum cum res in proprietatem hominum devenerunt, ab earum usu ceteri omnes, præterquam possessores, sunt exclusi: ergo ubi earum rerum indigent, ad commercium, & contractus confugere debent. Deinde si inductis dominiis tanta esset hominum erga homines caritas, ut nihil, quod egentibus deest, non statim a locupletioribus suppeditaretur, commercio, & contractibus locus non esset. Tandem *non omnis fert omnia Tellus*:

Hic segetes, illic veniunt felicius uvæ.

Ergo inde quoque factum est, ut diffusæ nationes rerum commercia inter se se instituerint, ut earum rerum, quibus ad usum vitæ indigebant, sibi copiam pararent. Scilicet nihil est aliud commercium, nisi rerum superfluarum cum necessariis permutatio. Videatur Grot. sub initium libelli *De mari libero* (a).

§. II.

(a) *Addo quartans, eamque omnium maximam, luxum. Nam rudi adhuc hominum ætate, paucissimis eramus contenti: desiderantibus mox moribus atque paulatim luxu, in immensam necessi-*
ta-

§. II. Sed quo commercia inter homines mutuo sibi diffidentes cum aliqua securitate haberentur, ad contractus, quæ jurisjurandi religione sanciebantur, ventum est, habuitque iis simplicioribus temporibus, etiam inter feroces homines, eam vim sola pactorum fides, quam nostrorum temporum, quum religio magno publico malo contemni cœpit, atrocissimæ poenæ non habent. Est autem contractus *duorum consensus de rebus operisve inter sese ex obligatione perfecta communicandis*. Itaque vis contractus nascitur ex mutua promissione, seu pacto; cui standum, nisi res commutentur, jus naturæ aperte docet: nam qui pactis & promissionibus non stat, jus ejus lædit, cui promissum est, quod lex naturæ vetat. Communicantur autem aut res cum rebus, aut operæ cum operis, aut res cum operis: nam hæc tantum sunt in commercio. Sed ut in hac commutatione nemo lædatur, instituitur comparatio inter res & res; operas & operas; res & operas. Et quidem comparantur hæc omnia quantitate, pondere, intensitate, utilitate, publica æstimatione. Ea omnia nomine *pretii* veniunt. Itaque pretio instituuntur commercia omnia.

§. III. Est autem duplex pretium, *vulgare*, & *eminens*. Vulgare est, cum singulæ res singulis rebus æstimantur, aut operæ operis, quod usu venit in permutationibus, in quibus aut æqualis quantitas, vel æquale pondus, spectatur, si fuerint res ejusdem generis: aut proportio tantum, si diversi: scilicet ut sint reciproce datum ad acceptum, ut genus acceptum ad genus datum (a). Eminens autem pretium est, cum electa una re, quæ sit nec nimis vulgaris, nec nimis rara, quæque non facile corrumpi possit, ea ceteræ æstimantur: talia sunt metalla. Dicitur autem eminens, quia continet pretium omnium rerum, quæ sunt

X 3

in

datum copiam venimus, quibus nemo ipse per se satis possit facere. Ita permutatione rerum operarumque alii aliorum indiguimus plurima, crevitque in magna copia inopia.

(a) *Ut si sit tota auri quantitas ad argenti quantitatem, ut 1. ad 16. erit auri pretium ut 16. ad 1. ad pretium argenti. Quare auræ uncia sexdecim argenti unciiis æquabitur.*

in commercio (a). Constituendum autem pretium, seu æstimatio rerum, a fine. Is finis triplex est, vitæ necessitas, utilitas, & voluptas. Primo loco spectantur res, operæque necessariae, idest eæ, sine quibus vita humana transigi nullo modo potest. Deinde utiles, sine quibus scilicet transigitur vita, sed cum incommodo, & ærumna. Tandem voluptuosæ, sine quibus commode quoque vivere possumus, sed sine luxu & superfluis voluptatibus. Quod spectat ad res necessarias, usus nationum ferme omnium est, etiam moratissimarum, majus, aut minus pretium iis statuere, & ex earum caritate, vel copia majori vel minori, & ex affectu ac desiderio eorum, qui eas res quærunt. Ita intenditur pretium, si aut qui quærunt magno earum amore teneantur, aut si earum rerum sit inopia: sin vero hæc fuerint contraria, pretium remitti solet.

§. IV. Sed quæritur, an ob hujusmodi rerum raritatem, vel quærentium copiam, jure intendi possit pretium, atque in ratione composita, reciproca rerum copiarum, directæ utentium? Id generatim fit etiam, ut dixi, inter moratissimas gentes. Sed, si ex natura vivere velimus, ita faciendum est, ut indigi non excarnificentur, avari vero ditentur: id enim neque jus naturæ perfectum probare potest, quod utilitati non paucorum, sed omnium hominum prospicit: neque patitur jus imperfectum humanitatis (a). Ceterum ut interest Reip. ne publico damno in rerum inopia nimis in-

(a) *Into res omnes esse olim nobis persuasum est, vicariamque rerum omnium vicem fecimus pecuniam. Postremo omnipotentiam ei quamdam attribuimus.*

Aurum per medios ire satellites

Et perrumpere amat saxa potentius

Ictu fulmineo Quin Danaen (virtutem, quæ dæmon, donum Dei) turri abenea inclusam, adulteravit adhuc

Converso in pretium deo.

Ita humana divinaque omnia sædavit, fidemque abstulit omnem. Ne catus Lycurgus, qui auro argentoque Lacedæmoniis interdixit.

(b) *Vir probus, cujusque interest probum esse (interest autem omnium) hæc duo secum reputet perpetuo. I. Tellurem esse commune hominum patrimonium, a quo neminem omnino arcere fas*

intendatur pretium; ita quoque interest, ut ne nihil intendatur. Cum enim res paucæ sunt, pretium vero vile, usu plures consumuntur, quam oportet: quo fit, ut caritas deinde major, atque inopia nascatur; quum intenso pretio rebus parcere soleamus. Præterea artes dejiciuntur; ex quo porro fit; ut inopia sequatur. Quantum vero intendi pretium, aut remitti fas sit, vel oporteat, ex rerum, temporum, locorum, personarum, circumstantiis viri prudentes dijudicabunt (a). Animadvertatur autem hoc in loco, me de privatis officiis disputare. Ceterum non ignoro causas physicas, quibus rerum pretia publice remittantur, aut intendantur, non ab hominum voluntate esse, neque a lege, sed a rerum natura; quod ego in Elementis Œconomix & Commericii, si vita suppetat, demonstrabo.

§. V. In rebus utilibus, sed non absolute necessariis, magis etiam licet pretium intendere, cum sine iis possit quidem vita sustentari, licet cum incommodo aliquo. At in voluptuosis nihil præcipi video jure naturæ, nec perfecto, nec imperfecto. Non perfecto, quoniam eæ nec necessarie sunt, nec majorem vitæ commoditatem faciunt; non imperfecto, quia amor generis humani neminem subigit, ut, alterius luxum sua opera faciat. Itaque in his rebus censeo, ubi aliæ causæ e publica, vel privata re nullæ subsint, id pretium constituere licere, quod cuique placuerit. Ita picturæ, sculpturæ, gemmis, aliisque rebus licet per legem naturæ id pretium ponere, quod placeat, modo emptores adsint. Interim si voce & fama publica hujusmodi rerum pretia constiterint, non licet, nec carius vendere, nec vilius emere cum iis, qui eam ignorant. In his enim casibus tam qui emit, quam qui vendit, ex publica hac regula emere aut vendere

X 4

sup-

fas sit. II. Telluris ejuscemodi bonorum nullum esse post mortalem hanc vitam usum.

(a) *Spektat hoc præclarum illud Platonis in iv. de Leg. p. 598. Fic. Ως θεος μὲν πάντα καὶ μεταθεῖ τυχῇ καὶ καιρὸς τῶν πραγμάτων διακυβεύουσι ἑυπραγνῆ, Deum, ac secundum Deum fortunam occasionemque gubernare omnia.*

supponit; quem proinde non licet circumvenire: nam vox publica ad publica pacta pertinet, quæ violare nefas est.

§. VI. Antiquissimis mortalibus, antequam nummus reperiretur, pretio vulgari commercia omnia agitantur (a): id quod & ex veterum nationum memoriis constat, & ex pristino hominum statu probari potest: nam cum veteres illi maxima ex parte in statu viverent naturali, difficillime omnes in eodem instituto convenire poterant, quod necessarium erat ad usum nummi introducendum (b). Aucto autem luxu, adeoque commerciis proVectis, necessitas, & utilitas commerciorum eos impulit ad pretium eminens instituendum: nam ita & facilius commercia omnia etiam cum exteris agere poterant, & singulos contractus expeditius ac commodius perficere. Scilicet permutatio, qua sola ante inventum nummum commercia omnia agebantur, nec semper locum habere potest, quum plerumque alter contrahentium earum rerum indigeat, quas alter non possidet; nec facile in dissitis commerciis semper observari. Sed perpendamus accuratius contractuum præcipuos.

§. VII. Simplicissimus, & antiquissimus contractuum omnium est, ut dictum, permutatio, idest rei nostræ pro re alterius datio. Id cum dupliciter fieri possit, primum ut neutra res æstimetur, idest certum ei pretium statuatur; deinde ut utriusque rei ineatur ratio, constituaturque præcisum pretium: prior permutatio, *simplex* vocabitur, posterior *æstimatoria*. Et illa quidem donationi reciproæ, hæc emtioni venditioni quodammodo similis est, quod Jurisperiti Romani agnovērunt in lege 1. §. 10. *de contrahenda emptione*. Quumque

(a) Sed & hodie agrestes gentes, idest plus quam dimidia telluris pars, quibus ignotus nummus. Porro quibus populi barbari adhuc nummi vice utantur, erudita diatriba enarrat Augustinus Calmetus, vir lectionis patientissimus.

(b) Germani, ceteraque ad Septentriones nationes vel Taciti ævo aurum argentumque ignorabant. Vide Tac. de mor. Germ. Quo videlicet, nec Phœnices devenerant, nec Græci, aut perpolitæ Asiæ, Ægyptique gentes.

que prior agitativissima veteribus & antiquissima fuerit ; intelligitur inde , quanto simplicius veteres mortales , tanto inter se amicissime vixisse . Cultis tantum nationibus id olim servatum erat , quod Horatius lib. 2. satyra 3. scripsit

..... Omnes enim res ,
Virtus , fama , decus , divina humanaque pulchris
Divitiis parent

§. VIII. In priori permutatione necesse non est , ut æqualitas servetur ; quoniam , ut ostensum est , suapte natura eam non exigit , sed reciprocae donationi similis est , censeturque alterum alteri donare , si quid res rem , aut opera operam excedat . Nemo præterea de læsione conqueri potest , nisi ubi dolus malus & circumventio intercessit , aut ubi , qui pretiosiores pro viliori permutavit , non gaudebat libera de rebus suis disponendi facultate . Contra in contractibus æstimatoriis , in quibus utriusque rei pretium instituitur , necessario observanda est æqualitas ; quia ea spectatur pacto seu expresse , seu tacito . Itaque in his , ubi læsio intercessit , tenetur , qui læsit , alterum indemnem facere , nisi læsio admodum exigui momenti fuerit : quippe hic contractus natura sua perfectam , ut dixi , æqualitatem spectat . Jure Romano enormis læsio censetur , si ultra dimidium pretii publice constituti seu lege , seu fama , sit , *lege xi. codice de rescindenda emptione* . Sed putaverim etiam læsionem infra dimidium enormem plerumque esse . Quod de permutatione dictum est , idem dicendum est de contractibus , quos innominatos dixere , *do ut facias ; facio ut des ; do ut des ; facio ut facias* , qui ad permutationem procul dubio pertinent . Scilicet distinguendi sunt in æstimatorios , & simplices : ac in primis perfecta æqualitas necessario servanda est (a) , non item in secundis .

§. IX. Contractuum alter , qui & ante & post num-
 mum

(a) *Hic το δίκαιον , το ισον , justum quod æquat , ait Aristoteles : αδικον , το ανισον , injustum , quod extra æqualitatem est . Inde sunt Latinis , æquitas , pro æqualitate ; iniquitas , pro inæqualitate .*

num inventum usum habere potuit, est commodatum, quo nomine intelligitur pactum cum obligatione perfecta conjunctum de re nostra alteri sub conditione restitutionis in specie gratis & ad præfinitum usum ac tempus præstanda. Ut officia circa commodatum explicentur distinctius, tria expedienda sunt: primum, an commodati substantia a solo contrahentium consensu pendeat, an etiam a rei traditione? Secundum, an aliquid accipi possit rei commodatæ causa? Tertium, si res commodata pereat fortuito, idest nulla commodatarii culpa, cui pereat? Quod ad primum attinet, dubitari non potest, quin si Jus naturale spectemus, commodatum substantiam suam a traditione rei capiat: antequam enim res tradatur, pactum potius commodati dici potest, quam ipsum commodatum.

§. X. Quod vero pertinet ad alteram quæstionem, vocatur quidem commodatum ab omnibus *contractus gratuitus*, quia scilicet ab origine sua talis est: sed usu receptissimum est, legibus civilibus non improbantibus, aliquid accipere; quo casu contractus commodati abit in locationem conductionem. Nec negari potest, si res commodata usu paullatim consumetur, ut vestes, aut similia, tantum posse nos jure pacisci, quantum usu ipso, pretii de re consumitur. Nam quamquam commodatum ad actus beneficentiæ pertineat, nullo tamen jure perfecto obligamur ad beneficentiam cum notabili diminutione patrimonii nostri: id virtutis est, non stricti juris; iisque in casibus locum habere potest, ubi qui petit nihil habet, unde suæ necessitati succurrat. Adde & excipere nos posse pretium commodi, quod præstamus: nam rerum pretia a commodo nata sunt. Estque naturale, ut qui habet commodum, sentiat incommodum. Sed excipiendus, ut dixi, casus summæ commodatarii necessitatis & inopiæ: inhumanum enim videri potest, ex paupere velle commodum suum facere. Quod autem diximus, ita intelligendum est, si agatur de rebus vitæ necessariis, aut summe utilibus: nam si res fuerint meræ voluptatis, atque ad luxum potius, quam ad vitam pertinentes, tantum censeo posse nos jure pacisci, quantum

tum alter paratus est dare (a). Quare in his casibus videri nequit adversus naturam, *commodatum in locationem* converti, omneque commodum emi.

§. XI. In tertia quæstione Jurisconsulti ipsi Romani non videntur sibi convenire, si credimus Heineccio. Nam Gajus *lege 1. ff. de obligationibus & actionibus* generatim pronunciat, commodatarium casum fortuitum non teneri præstare. At *lege 21. ff. commodati si res* commodata furto sublata fuerit, actionem *commodati* dari supponit Africanus. Sed Gajus eos tantum casus excipit, *quibus humana infirmitas resistere non potest, veluti incendium, ruinam, naufragium &c.* non eos, qui exactissima diligentia vitari potuissent, inter quos est furtum, quod nunquam omni vacat culpa. Quare ii Jurisconsulti minime inter se pugnant. Grotius lib. 2. de Jure Belli, & Pacis cap. XII. §. XIII. ita distinguit. Si res apud dominum similiter peritura erat, commodatarium liberari ab ejus pretio solvendo: contra si peritura non fuisset. Hoc ultimum probat ex natura beneficentiæ: non enim ea patitur dominum rei ex beneficio damnum reportare. Grotium sequitur Pufendorff. lib. v. de Jure Nat. & Gent. cap. iv. §. vi. Grotii argumentum invictum est, si aut culpa commodatarii res periit, aut si id inter paciscentes convenit. Contra vero si casu mere fortuito: cum enim ii casus a sola Providentia divina proficiantur, adeoque nemini culpæ possint imputari; nullo jure perfectio cogi potest commodatarius ad eos præstandos.

§. VII. Sequitur depositum, cui locus esse potuit etiam ante nummum inventum. Est autem hic contractus ex origine & natura sua omnino gratuitus: exigat enim humanitas ac beneficentia, ut, quocumque modo possumus, maxime cum parvo nostro incommodo, alterius bona conservemus. Nihil hoc contractu veteres habuere sanctius; quia deponens summam fiduciam in depositarii fide ac diligentia collocat: nihil

au-

(a) *Ut si auream vestem petas, quo Bacchanalia ludas: vel domum ad basilicæ cœnandum: vel aurea vasa: vel divitem supellectilem ad apparatus,*

autem turpius excogitari potest & a Jure naturali magis abhorrens, quam amicum ab amico amicitiae obtentu falli. Hinc insignis depositi religio non modo apud Hebræos (a), verum etiam apud Græcos, & Romanos. Vide Herodotum lib. vi. cap. lxxxvii. & Juvenalem sat. xiii. Præclare Cic. pro Rosc. Amer. *perditissimi*, inquit, *est hominis simul & amicitiam dissolvere, & fallere eum, qui læsus non esset, nisi credidisset.* Aristoteles in problematibus sectione xxix. quæstione II. & vi. pluribus rationibus demonstrat, majorem esse perfidiam depositarii, quam mutuatarii. Hanc religionem, & fidem depositi confirmarunt leges Romanæ, & sanctissime custodiendam præceperunt, ut cum ex aliis locis Pandectarum, tum præcipue ex titulo *Depositum* constat.

§. XIII. Quod pertinet ad officia depositarii, paucis illa complexus est Heinecc. lib. i. de Jure Nat. & Gent. cap. xiii. §. cccxlv. Primum depositarius tenetur ad accuratam rei depositæ custodiam, non tamen majorem, quam qua utimur in rebus nostris conservandis; cum id nullo modo ex jure beneficentiæ sequatur, cujus depositum est actus; nisi tribus casibus; si aut res sit pretiosissima; aut ex ea omnes deponentis fortunæ pendeant; aut si super ea expresse ita sit conventum. Quærit hoc in loco Pufendorffius, si in eo casu sim constitutus nulla mea culpa, ut aut rem depositam, aut meam perdere sit necesse, quid mihi faciendum sit? paucis ea quæstio explicari potest ex iis, quæ superius sunt dicta. Scilicet nisi aliud conventum sit, etiamsi res deposita pretiosissima sit, aut ex ea fortunæ omnes deponentis pendeant, nostra non tanti, sola jura beneficentiæ & magnæ amicitiae exigere possunt, ut illam nostræ præferamus: quod si æque nostra interest rem nostram conservare, ne illa quidem: nam neminem teneor amare plusquam me. Contra vero si te ad id pacto obligasti: id servare teneris.

§. XIV.

(a) Exod. xxii. cap. vii. c., Josephus Judaic. antiquitatum lib. iv. cap. viii.

§. XIV. Secundum officium depositarii est, ut ne depositum involucris aut vinculis exuat, neve sine consensu domini in usus suos adhibeat, nisi ubi ea adigat necessitas, ut improbus sit amicus, si usum deneget: depositarius enim est, non usufructuarius. Jus alterius violas, si præterquam conventum est, agas.

§. XV. Tertium officium est, ut rem depositam domino, quodcumque eam reposcit, reddat, nisi aliud recta ratio exegerit: nam alioquin *depositum* (inquit Philo Judæus de plantatione Noe,) *quod accepisti a sobrio, nec ebrio, nec prodigo, nec furenti reddideris proditio enim isthæc, non redditio est.* Vide & Tullium lib. III. de Offic. Senecam de Benefic. lib. iv. cap. x. & S. Ambrosium de Officiis lib. i. cap. ultimo.

§. XVI. Quartum tandem officium depositarii est, ut si sua culpa depositum sit amissum, ejus æstimationem restituat. Romanæ leges in duplum damnant eum, qui depositum miserabile, seu quod propter imminens periculum tumultus, incendii, ruinæ, naufragii, depositum est, fuerit inficiatus, aut dolose detrectaverit restituere. Vide *legem primam ff. depositi*: ibi Prætor edicit, *Quod neque tumultus, neque incendii, neque ruinæ, neque naufragii causâ depositum sit, in simplum: earum autem rerum, quæ supra comprehensæ sunt, in ipsum in duplum judicium dabo.* Id turpius furto recte pronunciat Aristoteles loco superius laudato: cujus ratio est, quia magis amicitiam oppugnat, cujus vi res deposita est. Quod autem amicitiam dissolvit, id Civitatem pervertit; quæ nequit esse vitalis, nisi, ut ait in III. de Legibus Plato, *αὐτῇ sit φίλη, sibi sit ἀμικα.*

§. XVII. Contractuum, qui invento jam nummo præcipue obtinent, potissimus est *emptio venditio*, de quo hoc in loco per summa saltem capita dicendum est. Est autem emptio venditio contractus de re pro certo pretio tradenda. Permutationi æstimatoriæ similis est, si rei substantiam spectes; in modo tamen differt, quod emptio venditio non perficiatur, nisi pecunia numerata ex Jure Romano; nam Jure naturæ quo-

cun-

cunque pretio perfici potest : nec propterea naturaliter a permutatione æstimatoria differt. Quanquam inter ipsos Romanos Jurisconsultos , Sabinianos , & Proculianos , acerrime super ea re disceptatum est (a). Nos controversias Juris Civilis ejus interpretibus omittimus.

§. XVIII. Præcipuum venditoris atque emtoris , & reciprocum officium est , ut utrique res , seu merces , & pretium sint probe nota . Proinde non modo venditor ejus qualitates , vitia , onera , cum in oculos , aliosque sensus non incurrunt , emtori indicare tenetur , verum etiam pati , ut hic rem lustret oculis , aliisque modis exploret , ac propterea ut rerum , quæ ad gustum pertinent , venditio non prius perfecta sit , quam facta degustatione ; rerum vero reliquarum , quæ exploratione indigent , non prius , quam facta sit exploratio (b) . Præclara sunt , quæ super hac re disserit Cic. lib. III. de Officiis . Quo in loco illud præcipue monet , longius Philosophi honestatem progredi debere , quam legum civilium vim . Nam leges civiles his in rebus eas tantum fraudes vetant , quæ sensibus explorari possunt : Philosophus eas etiam , quas ratio , & intelligentia ex naturæ lege comprehendit . Uno hæc omnia principio confirmari possunt , nullo modo licere alium decipere . Sed & illud addit idem Auctor , etiam patentia vitia nominatim dicenda esse . In quo Ciceroni adsentio , si alter aliud agat ; nemini enim licere arbitror ex alterius negligentia , vel stupiditate lucrum facere .

§. XIX. Illa hoc in loco quæstio inseri solet , penes quem sit periculum rei venditæ , nec dum traditæ ? Pufendorff. de Jure Nat. & Gent. lib.v. cap. III. §. III.

(a) Quid si de lana sit caprina ? Ac est enim vero . Permutatio est rerum inter sese : pecunia tam res est , quam quævis alia . Ne vero nummus pretium nactus , nisi quia res . Quia primum res quam nummus ; priusque auri ut rei pretium , quam ut nummi . Vide Oeconomiae Civilis Elementa lib. II.

(b) Eo jure & barbari vivunt , & strenue evincunt , sola naturæ simplicitate ac vi . Enimvero quis audeat obiectam ignorantique alteri rem obtrudere , nisi qui circumvenire ac fallere cupit ? omnem autem alterius deceptionem aversatur natura .

§. III. distinguendum putat, utrum traditioni certus dies constitutus sit, nec ne? deinde utrum elapsus sit is dies, nec non? Si sit præfixus, nec dum elapsus, venditoris vult esse periculum: contra vero si elapsus sit. Nam id pacta comprehendunt. Si vero non sit præfixus dies, distinguit iterum, utrum mora, quæ inter perfectum contractum & traditionem intercedit, sit necessaria ad rem in loco sistendam, an ea mora a venditore proveniat, an tandem ab emtore. Primo, & altero casu venditoris esse periculum docet: nam ut res, ita quæ rei sunt adnexa dominum sequuntur. Postremo vero emtoris tantum: id quod ratio manifeste comprobatur. Quod si emtor venditori tantisper rei venditæ custodiam commiserit, alter contractus instituitur, nimirum Depositi. Interim leges Romanorum generatim pronunciant, emtoris esse periculum omne, si jure emtio venditio peracta fuerit; quia post emtionem venditionem peractam res emtoris est; adeoque ei perit, modo casu pereat fortuito.

§. XX. Inter contractus, qui & ante, & post inventum nummum locum habent, censendus est contractus *mutui*, idest gratuita præstatio rerum fungibilium, ea lege facta, ut tantundem non quidem specie, sed genere restituatur. Dicuntur autem res fungibiles eæ, quas adnumerare, admitti, & appendere solemus: quarum ea est natura, ut nullus illarum sine abusu, idest sine consumatione, usus sit, accipiantque solutionem, sive in genere, sive in specie. Est autem manifestum ex ipsa mutui definitione, creditorem in mutuo alienare rem in specie (a), atque sibi cavere de genere, adeoque rei, quam alteri dat mutuo, dominium, & consequenter periculum esse penes eum, qui rem accipit.

§. XXI. Ex natura hujus contractus manifestum est, de-

(a) Nihil alienare mutantem ait Salmasius: in genere, inquit, suam retinet portionem. Quasi vero cum umbris ontologia contrahant homines, non cum rebus. Atqui accidit id sæpe superiori ætate, cum tota philosophia abstractis imaginibus concluderetur, ut civilitia gravissimas res corrumpere, facerentque philosophos vel idiotis deridiculos, grammaticos operibus.

debitorem obligatum esse ad tantundem, non modo ratione quantitatis, sed etiam qualitatis, reddendum. Quæsitum est, si pecunia mutuo data fuerit, ejusque valor postea vel auctus sit, vel imminutus, in ea restituenda cujus temporis ratio esset habenda, ejus ne, in quo est credita, an ejus in quo restituitur? Et temporis ejus, in quo pecunia accepta est, rationem habendam esse pronunciat Grotius, eumque viri plures docti sectantur. Sed id difficultate non vacat; quia nimirum qui accepit se obligavit ex natura hujus contractus ad tantundem restituendum pretio, non quantitate naturali. Quare posteriorem opinionem æquiorē putaverim (b).

§. XXII. Cum mutuum instituatur in eorum commodum & utilitatem, qui accipiunt, dubitari non potest, esse contractum gratuitum ex jure humanitatis & beneficentiæ proficiscentem. Sed observatum est superius, & alios contractus ex eadem beneficentia natos, refrigercente paullatim caritate, onerosos evasisse, idque certis in casibus jure fieri. Ita de mutuo quoque factum est, ut plerumque ultra sortem creditor aliquid sibi stipularetur, propter commodum; quod mutuuario præstat: hoc usuræ nomine venit. Celeberrima jampridem agitur quæstio, an lex naturæ hujusmodi usuras omnes vetet, ac semper? Tum an saltem eas usuras vetet jus divinum positivum? Ingens super ea re volumen paucis ab hinc annis edidit Broederfen Parochus Delphensis. Sub idem tempus Italica lingua doctum & eruditum opus procudit Maffei Veronensis, quod inscripsit *Dell'impiego del danaro*. Auctores ejuscemodi post Grotium Commentariis in Lucam cap. vi. Salmasium de usuris, Pufendorff. aliosque, id ex instituto agunt, ut probent, non omnes usuras esse prohibitās, sed eas tantum, quæ aut nimis exuberantes sunt, aut extorquentur a pauperibus. Cum occasione operis Maffejani Pater Concina doctus Domi-

(a) Imo ab omni exceptione immunem: nam accessiones domini sunt. Statutum vero est, proprietatem pecuniæ mutuæ penes mutuatarium esse.

minicanus, opinionem hanc exagitasset, & opus Masfei confutare adgressus esset, exortique essent rumores haud spernendi; Benedictus XIV. Pontifex Maximus docta atque accurata sua decretali Epistola ad Episcopos Italiae data ita rem composuit, ut negaret *ex mutuo vi mutui* ullas accipi posse usuras, quod is contractus suapte natura gratuitus sit, ac propterea perfectam æqualitatem inter datum & acceptum exigat: concederet vero posse accipi ratione aliorum *contractuum* aut *titulorum* cum mutuo conjunctorum, modo ne fictitiorum (a).

§. XXIII. Nos rem sequentibus propositionibus explicabimus.

Propositio I. Pecunia est in commercio, ut res ceteræ in usum humanæ vitæ factæ, ideoque negotiatione frugifera est. Est hæc propositio propter continuata commerciorum experimenta tam perspicua, ut mirum sit Aristotelem (liquidem ejus mentem tenemus) pecuniam sterilem vocare potuisse. Scilicet pecunia physice quidem sterilis est, idest nullos fructus naturales progignit; at civiliter fœcunda est, progignitque fructus uberrimos, seu potius instrumentum est uberrimorum fructuum & commodorum.

Propositio II. Commodum omne pretium suum habet: nam pretium & est commodum, & a commodo. Scilicet eas res, quæ nullam nobis utilitatem, nullum commodum præstant, nihili æstimamus: parvis facimus quæ parvam utilitatem afferunt: plurimi, quæ multam. Hinc quod dicitur *pretium*: quid enim hoc vocabulo volumus significare, nisi æstimationem? Qua ex re fit, ut omnis res, opera, actio, quæ alteri commodum præstat, pretio, idest æstimatione, sit digna.

Propositio III. Jus naturæ non prohibet usuras ex pecunia mutua, quæ negotiationi data frugifera est, modo non exigatur vi mutui. Id agnoscunt leges omnes, quæ concedunt usuras accipi posse ex aliis contractibus negotiosis, aut aliis titulis cum mutuo con-

Tom. IV.

Y

jun-

(a) Si negotiationi des: aut si tum, cum emere aliquid paratus eras, emptionemque, quo mutuum dares, abstinuissti.

junctis . Revera id nec vetat amor justitiæ , nec beneficentiæ . Principio , qui ex negotiosa pecunia aliquid sibi stipulatur , nullo modo alium lædit , qui lubentissime partem lucri , quod ex aliena pecunia comparat , alteri est concessurus . Deinde quid vetat de accessionibus patrimonii nostri aliquid alteri promittere , qui nos ad eas faciendas quocunque modo juvat ? Quod si libentissime promittimus , alter sine ulla injuria accipere potest , modo ne confictis titulis res tota peragatur . Tum nec contra beneficentiam est , quæ spectat egenos , qui sumptam pecuniam non negotiantur , sed in privatos usus consumunt , & quibus mutuum præstare lege beneficentiæ tenemur , non eos , qui novis accessionibus ditari volunt . Quæ enim ratio nos cogere potest , ut beneficii simus iis , qui nostris beneficiis non indigent (a) ? Quod si beneficentia non poscit , ut non indigis beneficiamus , ne mutuum quidem beneficentiæ erit quæ ei ad negotiationem pecunia præstatur , nec proinde ab eo acceptæ usuræ vi mutui accipientur . Nam hoc *vis mutui* , & *mutuum* quæ *mutuum* nihil aliud significat , nisi eas præstationes , quas alteri vi humanitatis & beneficentiæ debemus . Quando igitur tales obveniunt casus , in quibus hos beneficentiæ actus tribuere alteri debeamus , id *mutuum* est quæ *mutuum* , quod in alium contractum convertere non licet , nec proinde usuras ex eo ullas aut percipisci , aut accipere .

Propositio IV. Jus naturæ prohibet usuras ex pecunia mutuo data ei , in cujus manibus non est frugifera ,

(a) Quique , ut Homeri verbis utar ,

αλλοτριον βιοτον υποποιον
 ἡδουσιν ? quæ aliorum vitæ sustentandæ destinata sunt cibaria impune comedunt ? Μνησθες proci non privatarum familiarum , sed urbium , ut infinito sunt hodie numero . Quibus hæc posita esse debet lex , aut pæce , aut indura , aut da , ut detur . Nec tamen quis putet , me avaris , qui mortalibus excarnificandis , velut anthropophagi , nati sunt , quidquam concedere : quorum ego sænora velut impia exhorreo . Sed artibus , & industria hominum , ac commercio concedendum est aliquid , quando ad hæc tempora , quibus , ut ait ille , nec vitia nostra , nec remedia , pati possumus , perventum est .

ra, idest data pauperi, qui in usum vitæ statim est elargiturus, etiamsi fictus negotiationis titulus affigatur. Primum id esset exigere usuras ex mutuo ipsius mutui vi, idest beneficium converteretur in contractum minime gratuitum, quod contra naturam est. Deinde usuræ illæ ex alterius patrimonio acciperentur, non ex fructibus pecuniæ; adeoque alterius patrimonium deterius efficerent; quod est contra jus naturæ perfectum, ut adeo, qui tales usuras accipiunt, obligentur ad restitutionem (a).

Propositio V. Scriptura Sacra aperte prohibet usuras, saltem in sensu superioris propositionis, idest quæ ex mutuo vi mutui, seu ex beneficio exiguntur. Nam Exod. xxii. v. 25. aperte scriptum est: *Si pecuniam mutuam dederis populo meo pauperi, qui habitat tecum, non urgebis eum, quasi exactor, nec usuris opprimes.* Similia leguntur Levitici xxv. v. 36. & 37. Deuter. xxiii. v. 19. & 20. David quoque in Psalmis beatum prædicat eum, qui pecuniam suam non dedit ad usuram. Nec dicat quispiam hujusmodi leges spectare Rempublicam Hebræorum, atque tempus ejus Reipublicæ, quemadmodum leges omnes civiles: non enim aut cæremonias spectant, aut formas judiciorum, quæ tantum leges cum Republica Hebraica & Sinagoga sepultæ sunt; sed mores, quæ leges æternæ esse debent. Præterea Lucæ vi. vers. 35. legitur, *mutuum date, nihil inde sperantes.* Nam quanquam Textus Græcus, atque superiorum sententiarum contextus videantur non loqui singulariter de usuris, sed generatim de omnibus officiis beneficentiæ, quæ præstanda

Y 2

sunt

(a) Quid, inquit aliquis, licebit eodem in casu lucrum cessans, aut damnum emergens excipere, ac in tantundem sibi cavere? Nulla controversia. Nec tamen ego usuræ nomine id appello. Aliud est, quo re mea utare, usuræ pretium solvere: aliud me indemnem servare. Ajunt hoc rigore refrigerari commercia. Ajo. Qua, peto, ex causa? Nempe quia una negotiatoribus lex, sua utilitas: nihil pensi ducunt, quo loco res stet publica. Eo credo factum, cur Plato Civitatem procul a mari condi voluerit, ne videlicet commerciis sædarentur mores. Minus auri, argentique, & gemmarum, rerumque aliarum, quæ ad nos effeminandos pertinent plus virtutis.

sunt illis etiam, a quibus *mutuum*, idest paria & reciproca officia expectare nequeamus; tamen Patrum omnium veterum consensus efficit, ut de usuris sit locus iste interpretandus, præsertim quum inter cetera beneficentiæ officia, & mutuum locum habet (a).

§. XXIV. Quæsitum est hoc in loco, utrum usuræ ex pecunia mutua, quas exigere solent *Montes*, qui *pietatis* dicuntur, sint licitæ? Usus horum *Montium*, ut appellantur, cœpit in Italia sub initium sæculi XVI. aut XV. exeunte, nec cœpit sine gravissimis Theologorum ejus temporis querelis. In primis Card. Cajetanus doctum super ea re opusculum evulgavit, in quo hujusmodi usuras improbat. Idem fecere alii gravissimi Theologi, donec Leo X. P. M. an. MDCXV. in Synodo Lateranensi hujusmodi usuras hac lege probavit, ut moderatæ essent, & quatenus infervirent locorum administris alendis. Nec eas improbare possumus, dum binas istas condiciones habeant, ut & moderatæ sint, & exigantur titulo administrationis, seu sustentationis ministrorum: adde tertiam, pro commodo nempe, quod præstant, modo ei commodo sint proportionales, idest in ratione eorum pecuniæ fructuum, qui pro datis temporibus obtinent. Sed quoniam tres hujusmodi condiciones in majori horum locorum parte hodie desunt; nam & immoderatæ usuræ exiguntur, majores scilicet præsentibus pecuniæ fructibus; & hujusmodi loca in immensum divitiis aucta sunt, ut non egeant usurarum pro alendis administris;

non

(a) Sed illa lex Exodi duplicem videtur habere exceptionem: alteram ex τω pauperi: licet ergo, dicit quispiam, a non paupere. Alteram ex τω fratri; ergo licet ab alienigena. Hæc posterior diserte extat Deuteronom. xxiii. 20. fœneraberis alienigenæ. De priori vide quæ adnotat Clericus in eum Exodi locum. Quem vero ego dicam pauperem, libro 1. cap. ultimo demonstravi; eum nimirum, qui a natura indiget, non a luxu. Ab ejuscemodi paupere nihil licere accipere ajo. Hanc propositionem videri arduam scio iis, quibus & naturæ humanæ jura ignota sunt, & lex evangelica contentui. Mibi certum decretumque est, hoc esse viri boni & honesti officium. Lex quidem civilis eas præstat. Sed sæpe dictum, dicendumque sapius, longius ire oportere honestatem rationis & intelligentiæ, quam quod civilibus sanctionibus cavetur.

non video , qui consentire possint cum Jure Naturæ , atque Legibus Evangelicis . Certe nisi æquioribus conditionibus exigantur , difficile est illas a turpissimo sceleris crimine defendere .

§. XXV. Jam & illud quæri potest , quibus modis a pactorum obligationibus honeste solvi possimus . Pactorum omnium , contractuum & conventionum finis una est fides , idest promissorum , conventorumque constantia & impletio . Quum hæc facta est , simul pactis satisfactum est . Hinc illud Jurisconsultorum *facta solutione cessat omnis obligatio* . Intelligitur autem fieri solutionem , si integre fiat , si personæ cui debeamus , aut alteri ex consensu principalis , si cum omnibus circumstantiis pacto adnexis . Atque hic est primus modus , quo obligationes ex contractibus & pactis naturaliter cessant .

§. XXVI. Alter modus est compensatio . Si is , cui debeo , undecumque tandem tantundem acceperit , cessat in me obligatio solvendi , nisi forte pretium affectionis supersit . Non intelligitur autem facta compensatio , si quis alteri invito velut in solutum obtrudat , quod ei a tertio debetur : juris enim mei nemo , me invito , permutator esse potest : est enim is actus domini .

§. XXVII. Tertius modus est condonatio , quum is , cui debeo , jure suo ultro se abdicat . Parum autem refert , verbis ne , an factis , veluti redditione , vel laceratione chirographi , aliisque , mentem suam exprimat creditor : modo tamen hæc laceratio non fiat veluti per furorem , aut animo novas tabulas scribendi .

§. XXVIII. Quartus modus est mutuus dissensus : quandoquidem nihil tam est naturale , quam ut eodem modo quidque dissolvatur , quo colligatum est (a) . Intelligitur autem hoc , modo ne aut rei natura , aut publica utilitas , aut tertii jus huic dissensui obstant . Itaque matrimonium , quoniam ex natura sua individuum vitæ conjunctionem spectat , ad proles procreationem & educationem , ac jura quoque natorum comple-

Y. 3

ple-

(a) *Lege XXXV. Dig. de Regulis juris.*

pletitur, quanquam mutuo consensu contractum, non potest tamen, quum consumatum est, solo mutuo dissensu dissolvi.

§. XXIX. Quæritur, utrum alterius perfidia mihi jus det discedendi a pacto? Dubitari nequit: pacta enim mutuo consensu stant: itaque altera parte dissidente, liber sum. Perfidus tamen, si alter pacto non renunciaverit, adhuc obligatus remanet; quia generatim nequeunt pacta dissolvi unius tantum partis dissensu: nemo mei sui que juris dominus esse potest.

§. XXX. Præterea si tempus constitutum præterierit, aut appositæ conditiones deficient, aut alter paciscentium moriatur, solutum est pactum; nisi ita conventum fuerit, ut in rebus esset, & ad posteros obligatio demandaretur. Quæ omnia sunt per se manifesta.

§. XXXI. Ad hæc, mutato rerum statu, in quo pactum inædificatum fuerat; aut re, de qua pactum initum erat, pereunte, pacti quoque obligatio cessat: stare enim nequit pactum, pacti fundamento destructo. Atque hi ferme sunt modi omnes naturales, quibus obligatio ex pactis cessat. Modos vero civiles alios Jurisconsulti docebunt.

C A P U T XI.

De Officiis adversus alios, quæ imperfecta dici solent.

§. I. **O**fficia juris perfecti, ut vocantur, duobus illis regulis continentur, *Neminem lade: Suum cuique jus tribue, ac integrum servato*. Ad ea jure stricto & perfecto obligamur, ut si violaverimus, eodem jure stricto damnum resarcire teneamur. Ea qui observaverit, *justus dicitur*: neque enim ultra ea quidquam aliud adversus alios nobis justitia præcipit. Sed nondum tamen ad plenam honestatem pervenit, neque dum plene vir bonus & socialis est. *Quantillum est*, inquit eleganter Seneca, *alterum non ledere, cui prodesse debeas*? Itaque ad plenam honestatem efficiendam & hoc quoque necessarium est, ut & amice cum aliis

aliis vivamus, & humani, atque liberales & beneficimus. De his ergo adversus alios officiis nunc disputaturi sumus.

§. II. Dicuntur autem officia hæc *imperfecta*, non quod eorum omissio, quum adest occasio ea tribuendi, naturæ morali & rationali non imputentur, sed quod ad ea præstanda non possimus a quoquam jure stricto cogi, quemadmodum ad priora; sed jure humanitatis tantum & caritatis impellamur. Præterea perfectorum officiorum violatio ad damni reparationem nos obligat, non item posteriorum (a). Sed tanto est turpius posteriora non præstare, quum possumus, & occasio adest, quanto minus illa juri coactionis subsunt. Itaque quum in præstatione priorum officiorum homo dicatur justus, quia alterius jus non violavit; ob præstationem posteriorum bonus & honestus dicitur, quia aliis quocunque modo potest, prodesse studet, solo generis amore impulsus.

§. III. Officiorum juris imperfecti regula fundamentalis est, *quodcunque ab aliis tibi fieri vis, id tu aliis facito* (b). Quumque ea, quæ nobis ab aliis fieri volumus, duorum sint generum, *humanitatis* scilicet, seu *innocentiae utilitatis*, cum sine ullo facientis detrimento nobis succurritur; & *liberalitatis*, cum aliquo benefacientis detrimento nostra sit utilitas; utrumque aliis præstare debemus, si gloriari velimus, nos esse homines, nihilque a nobis humani alienum esse, ac si miseriam cavere, quæ, ut alias dictum est, perpetuo & naturaliter stultitiam & improbitatem comitatur: siquidem ita natura comparatum est, ut nemo cum tru-

Y 4

cu-

(a) In foro, ajunt, nec externo, nec interno. Ego baud nibil ambigam: est enim inter homines naturalis quadam cognatio: ad animum quod spectat, quid interest, hominem protensa manu perdidideris, an complicata? Mibi igitur illud verius videtur, & inhumanitatem ad injustitiam pertinere, si humanus quis & liberalis esse potuit & debuit. Id Evangelica lex firmat, divina ac veneranda, quæ æternis pœnis non homicidas modo destinat, latrones, patriæ proditores, reliquosque impios ac iniquos, sed inimicis quoque, ac inhumanos, Matth. xxiv.

(b) Vide interim ut hæc constituimus lib. i. cap. ult.

culento ac immisericordi humanus ac misericors esse amet. Hanc doctrinam omnia principia legis naturalis suadent. Principio, Deus ad colendam societatem, mutuam concordiam, amorem, benevolentiam, naturæ ipsius voce nos exhortatur: nam cognationem inter nos naturalem constituit, neminemque ita prævalentem procreat, ut non altero indigeat sæpe: similitudo autem naturæ, naturalisque cognatio, quæ inter omnes est homines, ac communis omnium imbecillitas & indigentia mutuam amicitiam expostulant. Tum tranquillitatis & utilitatis nostræ causa hæc officia aliis præstanda sunt: nam, iis denegatis, cognatio illa ac societas humani generis distrahitur; & ipsi, qui nullo amoris vinculo cum aliis jungimur, nec tutam, nec tranquillam vitam agere possumus. Qui enim sperare possumus alios futuros nobiscum beneficos, qui cum omnibus inhumani simus (a)?

§. IV. Præterea id abhorret non a natura tantum humana, sed belluina quoque, nullo beneficio inter se homines devinciri, quum videamus mutuam sibi opem in periculis feras etiam præstare. Turpissimum autem est, & contra naturam ipsam, homines ad nobiliorem societatem genitos ipsis esse animantibus brutis efferatioribus. Quamobrem ut nihil est, quod magis homines efficiat illitres, & per omnia ora celeberrimos,

(a) *Ajunt, homines sola sui utilitate capi: ea metiri amicitias. Quam ubi nullam prospiciunt, tametsi ingentibus ab aliis beneficiis affecti, nihilo tamen minus in illos ingrati erunt. Nempe, ut dici solet, occidentem solem colit. Quæ stulta sunt, atque a veris nostris utilitatibus aliena multo. Non enim tam reputandum est, quid ab eo, qui miser est, sperare possis, quam quo animo, quoque sensu alii ejuscemodi animi crudelitates spectent, quoque in gradu apud reliquos homines is futurus sit, cujus perspecta sit mentis crudelitas. Itaque tametsi concedamus (quod concedi nullo modo potest) sola utilitate honestatem metiendam; tamen ii, qui cum miseris, a quibus nihil sibi promittere possunt, crude agunt, satis rerum humanarum indocti sunt, neque integras vitæ humanæ rationes computare instituti. Quo in loco occurrit animo præclarum Platonis dictum, ac divinum. Αληθεα, inquit, παντων μεν αγαθων θεοις ηγεται, παντων δ' ανθρωποις, veritas & diis, & hominibus omnium est bonorum dux. v. de Leg. p. 605. At veritas computatione calculoque elicitur.*

mos, quam humanitas, & beneficentia, ut recte Cicero gloriam definiverit *samam meritorum in patriam, & genus humanum*; ita nihil, quod magis dehonestet efficiatque execrabiles, quam truculentia, morum ferocitas, avaritia, & odium in genus cognatum. Itaque barbarus sit oportet, & feris animantibus, quam hominibus, similior, qui aliis officia utilitatis innoxiae deneget, idest, qui sine suo detrimento, quum id facere potest, alterum, vi, aut consilio non juvet, ejus res non servet pro virili portione, errantem non revocet in viam, sitienti aquam profluentem, algenti ignem, peregrino hospitium neget, aut similia detrectet, quæ aliis profunt, nobis vero non admodum detrimento sunt.

§. V. Præclara sunt, quæ super ea re veteres sapientes scripsere. Cicero in 1. de offic. cap. 7. utraque humanitatis & liberalitatis officia accurate ex natura ipsa humana ducit: *Sed quoniam, inquit, ut præclare scriptum est a Platone, non nobis solum nati sumus, ortusque nostri patria vindicat partem, partem parentes, partem amici; atque, ut placet Stoicis, quæ in terris gignuntur, ad usum hominum omnia creari, homines autem hominum causa esse generatos, ut ipsi inter se aliis alii prodesse possint; in hoc debemus naturam ducem sequi, & communes utilitates in medium afferre, mutatione officiorum, dando, accipiendo, tum artibus, tum opera, tum facultatibus devincire hominum inter se societatem.* Ex iisdem principiis ratiocinantur alii Philosophi antiqui. Philo Judæus in Libro *Quod Deus sit immutabilis*: *Abominandi, inquit, sunt homines, qui propriam tantum utilitatem captant, contemptis ceteris, tanquam sibi solis nati, non item innumeris aliis, patri, matri, uxori, liberis, humano denique generi.* Eandem rationem urget Marcus Antoninus Lib. III. §. 4. *Cognatum est, inquit, rationale omne, & natura ipsius humane ratio ab unoquoque hoc exigit, ut quorumvis hominum curam habeat.* Seneca quoque quum alibi, tum præsertim epistola LXXXV. ad Lucil. *Membra, inquit, sumus unius corporis magni.* Sed illud imprimis egregium, quod societatem humanam lapidum fornicā-

cationi simillimam dicit, *quæ casura, nisi lapides invicem obstarent, hoc ipso sustinetur.*

§. VI. Jam vero dubitare non possumus, quin hoc ipsum præcipuum sit divinæ nostræ Philosophiæ dogma. Proximum enim nostrum sicut nos ipsos amare oportere Christianæ Religionis Libri docent. Dicitur in iis *ex amore Dei & proximi universam legem pendere*. Paullus caritatem vocat, *complementum legis, & summam legis*. Eam præfert etiam Fidei, & Spei, quam horum trium caritatem majus vocat. Alibi idem Apostolus scribit, hominem sine caritate, etiamsi tantam habeat fidem, ut montes transferat, esse nihili, esse sicut *as tinniens*. Addit præterea omnes alias virtutes & corporis castigationes, etiamsi, quis se injiciat in ignem, sine caritate nihil valere. Scribens ad Colossenses cap. III. v. 14. postquam enumerasset pleraque alia officia hominis Christiani, concludit, *super omnia caritatem habete*. Totus quoque in ea doctrina prædicanda est Johannes in epistolis suis: ejus prædicationis perpetuum thema est, *diligite alter alterum filiioli*: nam qui diligit legem implevit. Brevi, tota lex Christiana nihil est aliud, nisi caritas. Qua igitur fronte ii Christianos se esse profitentur, quibus vel hoc vocabulum *caritas* antiquatum est & frigidum? Eo videlicet luxus, avaritia, cupiditas, ambitio, aliæque sæculi foeditates perduxere! Quid interest, lege super ceteros mortales gloriari, vitam agitare belluinam? O tempora! o mores!

§. VII. Quo autem hoc efficere possimus, danda est opera, ut animum nostrum, corpus, atque alia bona ita excolamus, ut aliorum commoda facere possimus: velut si ingenii solertia talia reperiamus, quibus vita humana reddatur instructior, quum in literis & artibus, tum in iis omnibus, quibus ad commode & pacate vivendum indigemus: aut saltem si mercaturis, aut aliis modis publicam felicitatem juvemus. Perspecte Pufendorffius lib. III. de jure natur. & gent. cap. III. §. II. pronunciat, *in legem naturæ peccare eos, qui nulla honesta arte se excolunt, sibi que ignavi, aliis graves, animam pro sale habent, ne putrescant, aliorum*

rum fruges consumere nati. Vide eundem de offic. *Homini*, & *Civis* lib. I. cap. VIII. §. II. ibique *Everardum Ottonem*.

§. VIII. Sapienter ignavis & inutilibus hominibus extirpandis e Civitate apud Ægyptios quondam cautum erat, ut omnes nomen suum apud Magistratum profiterentur, una indicantes quo proventu, & vitæ genere victum sibi quisque compararet. Voluntarii mendici, aut injustum quæstum agitantes, mortis pœna puniebantur. Vide *Diodorum Siculum* lib. I. cap. LXVII. Similem legem apud *Sardos* recitat *Ælianus* lib. IV. *histor. var. cap. I.* Apud *Massilienses* mendicis, qui vitam inertem mendicando agebant, portæ claudebantur, ut tradit *Valerius Maximus* lib. II. cap. VI. Recenti memoria gravissimæ leges in mendicos & vagos tota Europa latæ sunt. Sed id desiderandum esset, ut quoniam nec possumus, nec, si possumus, fas est, eos e Tellure ejicere, qui nihil habent, quo vivant; qua cura qui mendicam vitam agitant e sapientibus *Rebuspublicis* ejiciuntur, eadem ad artes & commercia adhiberentur: inutiles enim futuræ sunt omnes ejuscemodi leges, nisi prospiciatur accurate, quo genere vitæ hujusmodi mendici & vagi sibi ac societati esse possint utiles, atque in eo genere subigantur (a).

§. IX. Contra vero apud easdem veteres nationes

ce-

(a) *Sunt homines perpetuo sæpe infantes, ut manu potius, quam præceptis regi velint. Illud pejus, quod ne præceptis quidem rite instituuntur. Cui enim usui leges, quæ & gubernare omnes debent, & notæ non sunt nisi paucis? Judei ad hoc in primis Sabbathum segregaverant: legis studio docti, indoctique, nobiles, plebei, operam dabant; eoque, ut ait Josephus, tamdiu incolumis stetit Resp. Nobis leges aut Græcæ Latinæque, ac doctæ: aut doctorum occupatio. Reliquum hominum genus ut extra litterarum Remp. ita sibi & naturæ relictum. Jura sua ignorant, nisi quatenus sensu persentiscant, aut manu teneant. Ego ita predicatorum civilium quoque legum esse velim, ut Christiani rudimenti: nam utrumque ad Deum auctorem referri debet. Quæ stultitia, rem omnibus destinatam regendis, privatam putare, intraque eruditos parietes claudere? Inde illam scelerum flagitiorumque segetem, quæ non jure lamentamur: siquidem ego homines non tam pravos scelestosque, quam utilitatum suarum ignorantes crediderim, eoque improbos.*

celebratissimi semper fuere, qui utilia vitæ humanæ per solertiam excogitarunt, quique non sibi tantum retinuerunt, sed cum aliis communicaverunt, ac Deorum concilio adscripti fuerunt; quia scilicet utilibus inventis, aut salutaribus institutis vitam humanam reddiderunt instructiorem, & feliciorē. Vide Ciceronem in I. de nat. Deor. Virgilius in VI. Æneidos Libro ex eadem persuasione iis apud Elysios locum fecit peculiarem,

Inventas qui vitam excoluere per artes,

Quique sui memores alios fecere merendo.

Hujus humanitatis cum liberalitate conjunctæ egregia quædam antiquorum instituta leguntur. Plutarchus in quæst. Symposiacis lib. VII. quæst. 4. quærit, cur antiqui Romani aliquid in mensa semper reliquerint, neque lampades extinxerint? Atque inter præcipuas rationes hanc promit, ut nempe humanitati & beneficentiæ assuescerent (a): super qua re deinceps præclara quædam commentatur. Inter Pythagoræ præcepta existat illud, *arborem fructiferam neque corrumpendam, neque violandam*, ne scilicet commodum aliorum, quod inde nasci potest, præcludatur. Errant nempe qui censent, jure suo res, quæ utiles aliis esse possunt, sibi vero inutiles sunt, quum in proprio dominio sunt constitutæ, odio generis corrumpere posse; quasi Naturæ res utilitati tantum nostræ progignat. Platonis lex est lib. VIII. de legib., *nec spicilegium in messe, nec racemationem in vindemia faciendam*, quo scilicet habeant pauperes cives unde paupertati suæ succurrant. Eadem lex data fuit Hebræis, quemadmodum legitur Levit. cap. XIX. v. 9. & cap. XXIII. v. 32. & Deuteronom. cap. XXIV. v. 19.

§. X.

(a) Inde Lacedæmone & Athenis stasa ac religione consecrata symposia, quas ἐμῖλιαι quasi conversationes vocabant; quasque & probat Plato in sua Rep. & sancit. Idem Minois lege sancitum Cretæ. Apud primos Christianos eodem spectabant ἀγάπαι, amoris jucundiori nomine junctæ, divinæque originis. Quæ omnia sanctæ instituta celebrataque, luxus, avaritia, imperii ambitio funditus abolere.

§.X. Ceterum si officia humanitatis nobis noxia sint futura, aut nostris cognatis, amicis, civibus: aut si pluribus noxia, uni tantum utilia: aut cuicumque tandem noxia, ea præstanda non sunt; veluti peste laborantem admittere in Civitatem, ne pereat: labori natos, ac aptos, pascere, revocareque ab artibus: nutrire peregrinos, liberos vero cognatosque spoliare &c. nec, si præstentur, beneficia, sed maleficia appellanda sunt. Nam principio nemo tenetur alium amare cum sui ipsius perniciæ. Deinde nemo tenetur amare extraneum plus quam civem, aut cognatum. Tandem non licet alterum odisse, ut alterum ames. Non nego, quando de rebus nostris agitur, quandoque omnium virtutum heroicarum maximam esse, alterius vitam, aut commodam, vitæ & utilitatibus nostris præferre. Sed nulla naturæ lege, nullo jure nec perfecto, nec imperfecto ad id obligamur, nisi fortasse quum de totius Reipublicæ salute agitur; quo in casu potius est ut pars, quam ut totum intereat; siquidem ea magna sapientia, prospicere civitatis potius utilitati, & incolumitati, ex qua singulorum incolumitas pendet, quam privatæ, quæ totam civitatem servare nequit (a). Hinc intelligitur, licere dedere civem innocentem, ne tota civitas pereat; quia scilicet is civis ipse se tradere debebat, si civis officia omnia implere volebat; quod quum neglexit, dignus evasit, qui traderetur.

§. XI. Atque hinc sequitur in bello ex parte nostra justo licere officia innoxie etiam utilitatis hostibus denegare, si ea præstita validiores efficiant ad nos lædendum. Itaque prohibere ab aquisitione, corrumpere commeatus, pabulum, aut alias commoditates intervertere, si id fiat, ut hostes debellantur in bello justo, licitum est. Vide Grotium lib.II. de jur. Bell. & Pac. cap. 2.

(a) *Pericles apud Thucyd. II. 60.* Εγώ γὰρ ἡγέμαι πολὺν πλεονεξίασαν ὀρθομένην ὠφελεῖν τῆς ιδιωτῆς, ἢ καθ' ἑκάστου τῶν πολιτῶν εὐπράγασαν, ἀβροῶν δὲ σφαλλομένην. 1. Ego enim existimo, civitatem, cujus universus status manet erectus, majorem utilitatem privatis hominibus afferre, quam si singulorum civium felicitate privatim floreat, ipsa vero universa jaceat afflicta. *Quis vero non ita existimet?*

cap. 2. In his enim casibus denegationes hujusmodi officiorum spectandæ sunt velut media, & arma, quibus nos adversus hostes defendamus, aut velut punctiones injusti alterius belli. Quod si ea officia præstita minime sint nobis nocitura, tum insignis esset inhumanitas denegare.

§. XII. Hoc ipsum tenendum est ubi humanitas, & beneficentia illi ipsi, cui in præsens placet, postea non leve damnum sit allatura, veluti pectore laboranti frigidam ministrare, quæ inde ei sit nocitura, aut solidum cibum febricitanti. Ratio semper eadem est, quod scilicet nemini malum faciendum est sub quocumque boni prætextu. Atque id etiam in officiis justitiæ obtinet: alteri enim jus suum tribuendum non est, tum, cum damno esse potest. E. g. non est reddendum domino depositum, si redditum ei nociturum sit. Vide ut hunc locum copiose pertractat Cicero in III. de offic.

§. XIII. Præterea officia humanitatis (idem de liberalitate dictum est.) ordinem quemdam requirunt, ut quum omnibus præstari nequeunt, iis primum præstentur, qui nobis sunt aut natura, aut loco conjunctiores. Primum parentibus, filiis, aliisque sanguine cognatis: deinde amicis interioribus: tertio populis nostris: tandem reliquis, si iis locus sit ullus. Qui sine ulla ratione hunc ordinem turbat, stulte adversus præceptum amicitiae peccat. Præscribere hæc veteres in *carmine aureo*, quod Pythagoræ tribuitur, apud Stanlejum in *histor. Philosophiæ* part. VIII. cap. IV.

Primum immortales Divos pro lege colunto,

Et jusjurandum; Heroas clarum genus inde:

Dæmones hinc terris mixti sua jura ferunto:

Inde parentis honos sequitor: tum sanguinis ordo:

Post alii sunt, virtus ut maxima, amici.

§. XIV. Jam quum officia humanitatis non debeantur aliis ob ulla illorum erga nos merita, sed tantum ob naturæ æqualitatem, ac propterea ob naturalem omnium cum omnibus societatem & cognationem, qua fit; ut alios non minus, quam nos ipsos amare oporteat; inde sequitur iis etiam tribuenda esse, aut qui nullo modo essent paria relaturi, aut qui nos odio

habent, modo ne inimicum nostrum adversus nos potentiores efficiant, aut arment. Cavendum igitur est, ne in hujusmodi rebus non secundum rationem ac naturalem honestatem, sed secundum affectus judicemus. Præcise hanc doctrinam præcipit divinus noster Legislator Matthæi V. & Lucæ VI. Sed Philosophi ipsi id cognoverunt. Extat præclarus Hieroclis locus: unde fit, inquit, ut recte dicatur, virum bonum odisse neminem, solumque bonum & amicum existere. Quum enim bonum diligit, non eum, qui malus sit, putat inimicum. Sin autem virtute præditum quarit ad societatem, ex omnibus eum diligit, qui probus sit. Atque in amicitia legibus Deum ipsum imitatur, qui nullum quidem solet odisse, sed eum potissimum, qui bonus est, amplecti, & diligere; Dignum Christiano homine iudicium! Sed pervulgata erat hæc apud veteres sententia, totam Philosophiam esse imitationem Dei, atque principium virtutum omnium esse hoc, Deum imitator, & sequitor. Vide ut hæc explicat Samuel de Cocceii in Introductione ad Grotium Dissert. XII.

§. XV. Accedit, quod multæ sunt utilitates, quæ ex ipsis inimicis nostris capi possunt: quo in argumento luculenter versati sunt Aristoteles ad Nicomachum lib. VIII. Plutarchus de Utilitate ex inimicis haurienda, & Cardanus in egregio opere de Utilitate ex adversis capienda lib. III. cap. 13. Ego paucas attingam. Principio observandum est, neminem in societate Civili sine inimicis esse posse, non magis quam sine amicis; nisi fortasse qui adeo abjectus sit & ignotus, ut misericordiæ potius, & contemptus, quam æmulationis, invidentiæ, odii objectum sit. Nam homines, præsertim illustres, si boni fuerint, necesse est ut omnes malos habeant inimicos, quod gloriosum est inimicitia genus: si vero fuerint mali, æquum est, ut aversos habeant omnes bonos.

§. XVI. Deinde inimici necessarii sunt ad virum bonum ac illustrem efficiendum: stimulos enim adjiciunt virtuti, atque animi aciem intendunt: *marcet sine adversario virtus*, inquit eleganter Seneca. Ac vero quis sine lucta corpus ad labores induruit? Quis ani-

mm

num ad scientiam & virtutem sine contentione exercuit? Itaque inimici nostri, si sapimus, pædagogi nostri esse possunt, tanto utiliores, quanto minus adulari parati. Experientia docuit adversarios illustrem esse magnorum virorum scholam: quietem vero & perpetuam felicitatem homines etiam virtuosos corrumpere. Tertio, inimicitiae hoc quoque viris bonis utilitatis afferunt, ut iis omnes virtutis amicos concilient, omnesque adjungant inimicorum suorum inimicos. Quarto si quis ulciscendi animum habeat, in promptu est illustre vindictæ genus, ex inimicorum calumniis aut detractionibus in melius semper proficere, atque sic, quæ sunt vitia, emendare. Quinto si quis gloriam ex virtute quærat, quæ sola vera gloria est, nulla est illustrior virtus, quam animi mansuetudo, ut non solum inimicis generose parcamus, verum etiam ut iis liberalissime beneficiamus.

§.XVII. Jam transeamus ad officia beneficentiæ (a), quæ gradum amicitiae continent sublimiorem, quam officia innoxiae utilitatis. Obligari autem nos ad hæc quoque officia, & natura ipsa humana, & conditio societatis demonstrat. Primum, quum reciproce homines in hujusmodi officiorum indigentia reperiantur, aut possint reperiri; si volunt ea in his casibus sibi ab aliis tribui, necesse est, ut & aliis vicissim tribuant: reciproca ergo hominum utilitas exoptet. Deinde talis est societatis natura, ut non possit illa esse perfecta, & tranquilla, nisi reciprocus sit bonorum inter omnes influxus, nisi scilicet bona omnia & commoditates vitæ, quoad fieri potest, cum iis communicentur, qui indigent. Quum vetera occupationum pacta, inæqualia hominum ingenia, aliaque causæ inæqualem bonorum possessionem fecerint; studendum est, ut ejusmodi largitionibus res quodammodo æquentur, quo minus sit apud majorem generis partem invidia, eoque tranquillior

(a) Utraque enim vero beneficia sunt, eoque vocabulo pertractat Seneca in opere de beneficiis, quod haud satis laudaverim commendaverimque lectoribus. Sed placuit secernere, quo gradus beneficentiæ perfectos haberemus.

lior ac dulcior possessio, sine qua, quid aliud sunt fortunæ bona, præterquam perpetui nobiscum atque adversus alios belli cura? Ad hæc, vetus proverbium est, *Amicorum omnia esse debere communia*; oportet autem ut vir bonus in societate existens neminem odio habeat, idest ut omnibus sit amicus; ergo adversus omnes beneficus ac liberalis pro ratione graduum amicitiae.

§. XVIII. Hæc bonorum communicatio *beneficium* appellatur, & studium benefaciendi, *beneficentia*. Quare definiri solet beneficium *res, vel actio alteri profutura, quam ei sine animo restitutionis, aut retributionis præstamus*. Ac dicitur quidem *actio vel res alteri profutura*, ut explicetur essentia ipsa beneficii: nisi enim beneficium alteri prosit, non est beneficium: ut si lædat, maleficium est. Dicitur *sine animo retributionis*, non quidem, ut excludatur spes gratitudinis, sed ut caveatur, ne ea spes præcipua causa sit beneficii impulsiva, aut ne ea spes in conditionem veniat, sub qua beneficium præstatur. Sunt enim hæc beneficia mercenaria, eaque ad commercium potius pertinent & mercaturam quamdam, quam ad liberalitatem. Vide Senecam lib. 6. de beneficiis cap. 14.

§. XIX. Ut autem beneficentia sit virtus, possitque merito imputari, proficisci debet ex directa voluntate alteri utilitatem deferendi: quæ si desit, aut indirecta tantum sit, beneficium inter virtutes recenseri nequit. E. g. si quis ludens, nolensque mihi benefacere, impellat me ad agrum meum effodiendum, atque in eo thesaurum inveniam, non potest ille pro beneficio mihi facto imputare. Nec beneficium est, si quis me ad dignitatem aliquam (quod est studium Aulæ præcipuum) promoveat, ut locum vacuum ei relinquam ad majorem, quam ille ambit. Minus quoque beneficium est, si quis volens me lædere, magnam mihi afferat utilitatem. Quare Josephi fratres non poterant illi pro beneficio imputare, quod eorum opera ad summam in Ægypto dignitatem evaserat. Elegans est super ea re Phædri Fabella. Mustela ab homine prehensa rogat, ut sibi parcat, quia molestis muribus purget domum. Cui villicus

Faceres si caussa mei,
 Gratum esset, & dedissem veniam supplici:
 Nunc quia laboras, ut fruaris reliquiis,
 Quæ sint rosuri, simul & ipsos devotes,
 Noli imputare vanum beneficium mihi.

§. XX. Jam ut natura beneficii præstationibus & largitionibus conveniat, prudenter sapienterque dispensandæ sunt; prodiga enim rerum elargitio sine dispectu eorum, quibus præstantur, ac sine graduum amicitiae distinctione, beneficium non est, sed stulta profusio. Discernendi igitur sunt in beneficiis tribuendis necessarii ab extraneis, intimiores a remotioribus, indigentiores a minus indigentibus, digniores a minus dignis. Itaque ceteris paribus præferendi sunt necessarii extraneis, intimiores minus intimis, indigentiores minus indigentibus, digniores minus dignis, ii qui non suo merito miseria laborant, iis, qui merito suo in eum statum prolapsi sunt. In primis vero toti civitati consulendum est: nam beneficia & iis utilia esse debent, quibus præstantur, & publicis utilitatibus non adversa. Quare perspicendum est, ne beneficentia plurimorum alat ignaviam, qua fiat, ut in societate homines nihili, aut scelesti multiplicentur cum maxima Reipublicæ pernicië. Quæ benefaciendi prudentia nisi adhibeatur, hujusmodi largitiones maleficia potius dixerim, quam beneficia. Quocirca & vere dictum est a Philosophis, nullam esse virtutem sine prudentia, de beneficentia potissimum dicendum est (a).

§. XXI. Inter cetera autem liberalitatis officia locum

(a) Hanc si quis in plerisque publicorum nostrorum operum consideret, eum sapientem habeo: sapius est naturæ cuidam mollitudini obsecundatum, quam publicis rebus consultum: ita vix est alia in Europa natio, ubi nihili homines, erronei, omnique flagitio conspurcati, plus multiplicati sint, majusque & artibus & moribus debonestamentum attulerint. Quos velut examina quædam insectorum alere pietas, atque amor vocatur: nec intelligitur, nec amorem esse, nec pietatem, quæ & eos perdit, quos ad vitia nutrit, & Civitati est noxia. Sed, ut ait Plato, *συνεσι πολλὰς μυριας λυγρὰς εὐνοίας, ἁδὰμως εὐπορον*, tot myriadum linguas cohibere, difficillimum.

cum præcipuum sibi vindicant ea, quæ dicuntur *elemosynæ*, seu beneficia, quæ ei præstantur, qui non suo merito miseria laborat, ac propterea commiseratione nobis cor tangit. Inter hæc hospitalitas, idest peregrinos & viatores indigentes in domum admittere, mensæque participes efficere, omnium nobilissimum est, & magis secundum finem legum naturalium: finis enim legum naturalium, ut alias dictum, est κοινωνία, mutua conjunctio & caritas, ex qua tantum ea esse potest hominum beatitudo, quam in terra habere possunt, naturalis, ac civilis. At ex omnibus virtutibus humanis nulla est, quæ arctius vinculum, & stabilius amicitiae & caritatis efficit, quam hospitalitas, qua velut religione quadam sibi homines devinciuntur. Vide ut super ea re præclare differit Aristoteles lib. 2. magnorum moralium cap. 2. (a)

§.XXII. Egregia sunt judicia & exempla hujus virtutis apud eas nationes, tum antiquas, cum recentes, quæ barbaræ a nobis solent appellari. Omnis vetustas ethnica credidit, & Deos plerumque peregrinari, & hospites omnes esse a Jove, ut ex tota Homeri Odyssæa, aliisque veteribus scriptoribus discimus. Ex iis principiis sibi persuaferunt, omnium virtutum humanarum hospitalitatem præcipue colendam. Ex fragmentis veterum historiarum Gentilium, atque ex Historia Moisaica illud etiam discimus, homines diluvio Noëtico viciniores nihil tam impense coluisse, quam hospitalitatem: quo vero ab illis temporibus longius discesserunt, & civilius vivere cœperunt, eo magis aucto vitæ luxu, imperii ambitione, aurique cupiditate (b),

Z 2

minus

(a) *Homerus in Odyssæa nullam virtutem studiosius describere ac depingere voluisse videtur, quam hospitalitatem, easque, quæ hospitalitatem comitantur. Illud in primis & elegantia, & urbanitatis insigne, quod veteres hospitum neminem, qui esset, unde veniret, quid peteret, interrogarent, nisi balneo, ac prandio prius recreassent.*

(b) *Nam tribus hisce causis totam eam generis humani depravationem attribuerim, quæ excultis, ut vocantur, sæculis, supervenit. Quartam addere possis nationum feritatis, inhospitalitatis, mutue insectationis, internecionisque, religionem, deorumque di-*
ver-

minus humanos evalisse. Persæ publica habent hodie constituta hospitia, & passim per totam gentem, in quibus magna caritate viatores excipiuntur, quemadmodum narrant Petrus Vallenſis, & Chardinus in Itinerariis Persicis. Relatum est, & in tota Tartaria sæpe viatores sola hospitalitate nutriri.

§. XXIII. Jam vero quidam fuerunt Populi, qui legibus latis hospitalitatem præceperunt, ut peregrinis consulerent. Ælianus lib. 4. historiæ variæ cap. 1. hanc legem Lucanorum recitat, *si sub occasum solis venerit peregrinus, volueritque sub tectum alicujus divertere, & is hominem non susceperit, mulctetur, & pœnas luat.* De antiquis Slavis Hermoldus in Chronico Slavorum lib. 1. cap. 82. profert eorum hanc legem, *ut si quis peregrinum hospitio non excepisset, sed ejecisset, ejus domum vel facultates incendio consumere liceret.* Et jure quidem Populi isti de servanda humanitate solliciti fuerunt. Sed optandum fuisset, ut homines sponte sua nullis legibus coacti ejuscemodi officia præstarent. At hæc agrestibus gentibus relinquenda erant, quas tamen nos sævas barbarasque habemus (a).

§. XXIV. Sed & hospitalitas passim quoque commendatur in scripturis sacris. Isaïæ cap. 68. vers. 7. *Frangere esurienti panem, & egenos, vagosque induc in domum tuam.* Jobus cap. 31. inter ceteras virtutes suas recenset, *foris non mansit peregrinus, ostium viatori patuit.* Paullus Apost. ad Rom. 12. vers. 13. *hospitalitatem sectamini.* Petrus item Apost. epist. 1. cap. 4. vers. 9. *hospitales estote alii erga alios.* Christus Dominus noster Matthæi 21. vers. 36. inter ceteras causas, ex quibus sententiam salutis prolaturus olim est in die judicii extremi erga Electos, hospitalitatem refert: *Peregrinus, inquit, sui, & excepistis me.* Secundum hæc præ-

verſitatem. *Vix equidem crediderim, diluvia, pestes, fames, bella, terremotus æque in nos ferocire, ut falsas religiones, torque animas immanius excindere, atque dimittere orco. Quæ in re illud pessimum, hæc Deo esse cara credere, eoque audacius, quasi eo imperante, exsequi.*

(1) Vide Othier Voyage au North, Mallet Introduction a l'Histoire de Danemarq chap. 1.

præcepta primævi Christiani, antequam luxus, dominatio, & avaritia, ac cetera sæculi vitia, in nos invassissent, vitam suam instituerunt, ut ex tota historia Ecclesiastica patet (a).

§. XXV. Vitium huic virtuti oppositum est *inhospitalitas*, quæ & Naturæ, & Evangelio juxta repugnat, ut ex superioribus manifestum est. Veteres Poëtæ, ut hoc vitium plene depingerent, finxerunt, Lycaonem de homine in lupum fuisse transmutatum, quod peregrinos hospitio exceptos necaret, aut expoliaret. In duo autem capita hoc vitium dividitur: primum est hospitio peregrinos non excipere, quum adest occasio: alterum, postquam exceperis, violare. Et utrumque quidem inhumanum est: sed posterius procul dubio inhumanius, quia sanctæ initam amicitiam lædit. Ovidius,

Turpius ejicitur, quam non admittitur hospes.

Inhospitalitatem severissime Deus ulciscitur. Ejus rei exempla habemus in Sodomitas (b) & in Beniaminitas (c).

§. XXVI. Alterum & præcipuum eleemosynæ officium est, ut diximus, omnis actio misericordiæ. Et

Z 3

gene-

(a) Plato de Leg. VIII. pag. 644. cum duo Græcarum Rerump. vivium genera discrevisset, *φύσιν κοσμίαν, καὶ αὐδραγῆς*, natura modestos, & viriles ac generosos; utrosque, ait, *σάδα* divitiarum cupiditate depravatos a natura descivisse: ac illos quidem ad mercaturam, navigationem, viliaque ministeria, omnesque fraudes conversos: hos autem ad furta, latrocinia, sacrilegia, insidias, sceleraque tyrannica: idque totum prave educationi attribuit; hanc negligentiam legum: quippe cum res publica, non privata, esse debent puerorum educatio, illæ privatam ferme ubique esse sinerint. Ego & huic causæ, & regnandi in primis libidini acceptum rulerim: nam ambitionis furor equem non de homine belluam faciat? Anglus ille de Romanis apud Tacitum in Agricola 30. & 31. Quorum superbiam frustra per obsequium & modestiam effugis, raptores orbis, postquam cuncta vastantibus desuere terræ, & mare scrutantur. Si locuples hostis est, avari: si pauper, ambitiosi: quos non oriens, non occidens satiaverit: soli omnium opes, atque inopiam pari affectu concupiscunt: auferre, trucidare, rapere falsis nominibus IMPERIUM; atque ubi solitudinem faciunt, PACEM appellant. *Proh scelera αἰὲν εὐρυτά!*

(b) Genesis cap. 19.

(c) Judicum cap. 19.

generatim quidem eleemosyna significat quidquid liberalitatis, aut humanitatis in proximum nostrum ex commiseratione conferimus. S. August. in Enchirid. ad Laurentium cap. 72. eleemosynam generatim acceptam sic describit: *Dare esurienti cibum, sitienti potum, nudo vestitum, peregrinanti hospitium, fugienti latibulum, agroto, vel incluso visitationem, captivo redemptionem, debili subvectionem, caco deductionem, non sano medelam, erranti viam, deliberanti consilium, & quod cuique necessarium est indigenti.* Igitur cum significet eas elargitiones, quæ alteri indigenti fiunt ex commiseratione; sequitur non mereri hoc augustum nomen largitiones, quæ fiunt ex vanitate, non indigentia. Ad eleemosynam autem elargiendam nos obligari, ex iisdem principiis intelligimus, quæ nos admonent, ut aliis ea omnia faciamus, quæ volumus ab iis nobis fieri.

§. XXVII. Scripturæ divinæ passim eleemosynas præcipiunt, atque in iis tantam vim inesse dicunt, ut per eas ingentia crimina dimitti pronuncient. Extat super ea re S. Cypriani libellus *de opere & eleemosynis*. Sub initium ejus libri postquam dixisset vir sanctus sordes post baptismum admissas eleemosynis ablui posse, addidit: *Loquitur in scripturis divinis Spiritus Sanctus & dicit, eleemosynis & fide delicta purgantur* Idem denuo dicit, *sicut aqua extinguit ignem, sic eleemosyna extinguit peccatum.* Deinceps recitat testimonium ex cap. 2. Lucæ, *date eleemosynam, & ecce munda vobis omnia.* Vide & S. August. cap. 37. Enchirid. Eadem jam Patrum omnium vox: eadem Christianorum. Sed & vocibus æquata opera, antequam luxu corrumpemur. Ea ex Christianismi substantia sunt: sic enim veteribus persuasum erat, neminem sine vera caritate dici oportere christianum; quia Christus non præceperat nisi amorem Dei & hominum.

§. XXVIII. Sed hoc in loco animadvertendum est primo, non divites tantum, eosque qui rebus abundant obligari ad eleemosynam, sed etiam eos, qui licet non multum possident, habent tamen, quod pro modulo suo erogare possint in pauperes. Id intelligitur primum ex naturæ ratione: nam in omnibus ho-

minibus talis inest natura, ut ad alterius miseriam misericordia tangatur. Hunc vero affectum qui omnibus illa dedisset, nisi voluisset, ut non affectu tantum omnes omnium misererentur, verum etiam re, quoad possent, omnibus opitularentur? Suadet idipsum naturæ æqualitas, & natura societatis, quæ virium, bonorumque exigit communicationem. Idem privata cujusque utilitas: nam in amicitia omnium cum omnibus civilis felicitas haberi potest. Deinde idipsum colligitur ex doctrina Evangelii, quæ extat cap. 21. Lucae. Extat locus egregius S. Basilii Homilia *in siccitatem, & famem: licet*, inquit, *unus tantum tibi sit panis, ad fores autem mendicus adstet, deprome unicum illum ex cella penaria.*

§.XXIX. Deinde animadvertendum est, in elargienda eleemosyna distinguendum quidem esse inter pauperes digniores, & minus dignos: non ita tamen, ut reputetur legitima causa denegandi eleemosynam, quod is, qui petit, indignus ea sit, quæ fuit quorundam Casuistarum opinio: eleemosyna enim indigenti datur, non moribus indigentis. Illud enimvero sedulo distinguendum est, utrum is, qui petit, ex ignavia in eo statu sit, an vero ex necessitate. Primo casu jure eoque denegatur, quo non constat, miseriam non esse voluntariam; ne scilicet nostra elargitione alterius ignaviam, & vitia alamus. At contra omne jus denegatur alteri. Confer Giceronem lib. I. de Offic. cap. 15.

§. XXX. Præterea cavenda est & altera quorundam Casuistarum opinio, non esse dandam eleemosynam cum ullo nostro detrimento, sed tantum de mere superfluis. Ea doctrina cum altera conjuncta, nemini quidquam esse unquam superflui, comparata est ad omnem caritatem & beneficentiam funditus ex animis humanis extirpandam. Enimvero si ex iis superfluis danda est eleemosyna, quæ cupiditatibus nostris supersunt, quoniam nulla iis supersunt, (libidini enim nihil est unquam satis) nihil unquam erit, quod detur. Itaque non naturæ, nec Dei ea doctrina est, sed ab dominis, luxuriei, ambitionis, ac libidinis ab omni & naturæ honestate, & divina sanctione alienæ.

De amicitia.

§.I. **P**ostquam de Officiis humanitatis, & beneficentiae, idest universalis erga genus humanum amicitiae, disputavimus, operæ pretium est, perpauca de arctiori illa amicitia differere, qua maximus benevolentiae & conjunctionis gradus inter homines continetur. Egit ea de re præclare & sæpe Plato, tum Aristoteles in octavo ad Nicomachum, & Cicero in Lælio. Ac quanquam magis eam, quæ esse inter homines deberet, quam quæ aut est, aut esse potest, amicitiam exornent; juvat tamen plurimum earum etiam virtutum elegantissima descripta habere exemplaria, quas cogitatione magis, quam opera complecti possumus: habent enim illa nescio quam vim, occultam quidem, sed prope divinam, ad animos permovendos atque incitandos: quæ si non licet semper assequi, sæpe utilissime, tametsi procul, imitamur. Quare quanquam ea est mortalium natura, ut nihil videantur sincere amare posse præter seipsos, propterque se suasque utilitates amare cetera, ac idcirco ejus amicitiae, quam philosophi tam pulchris divinisque coloribus depinxere, minus sint patientes; intelligent saltem qui hujusmodi amicitiae veræ præcepta legent, ad eam se quam proxime accedere oportere, si ea voluptate tangi velint, quæ ex reciproca animorum communicatione est, qua nihil ego jucundius, nec optabilius putaverim. Non ignoro fuisse plerosque viros eruditos & acutos, qui magnam industriam & diligentiam in eo posuere, totamque suam adhibuere eloquentiam, ut omnem humanæ naturæ foeditatem, omnia vitia retegerent: eam ad veram amicitiam & virtutem obstipam & contumacem demonstrarent, eaque in re nos longe brutis animalibus esse deteriores ostenderent, in quibus non exemplaria modo virtutum, in primis amicitiae, sed virtutes ipsas, tanto pulchriores, quanto sine vitiorum mixtura,

mixtura, inesse opinantur (a). Qui si id efficiunt, quo in nobis comparatione cum deterioribus verecundiam concitent, eoque nos ad veram virtutem impellant, minus illi peccant: sed peccant tamen. Nam & falsi philosophi sunt; & tædium tam malignæ naturæ in nobis ingenerant: ac, quoniam ut alii aliis diffidamus nos instruunt, omnia societatis & communionis inter nos vincula abrumpunt. At enim, φιλαυτία,

Quæ nunc nos coquit & versat in pectore fixa,
prohibet quo minus alios sincere amemus: ita fit, ut eæ virtutes, quæ adversus alios sunt, speciem virtutis habere possint, naturam non possint. Qui æquo subtilius philosophantes non videntur id intellexisse, quod maxime cupiebant. Scilicet eas sibi excogitavere virtutes, quibus ad totum genus humanum perdendum nulla sunt vitia aptiora, quæque si hominibus concedantur, irato Deo genitos clamabimus. Nam si veræ virtutes ab omni nostro amore & cura esse sejunctæ debent, miseros esse eos oportet; qui virtutis studiosi esse volunt; immo ne esse quidem, quia nec ut sint beati, nec ut sint, cogitare aut curare debent, quo iis exornentur virtutibus, quæ nullo modo ab utilitate aut felicitate nostra proficiantur. Quod si probare nequeunt, fateantur, veram virtutem, ut non potest, ita ne debere quidem a nostri-amore & utilitate esse se-

(a) Locum hunc Ethicorum communem, quem & Poetæ ornaverunt sæpe, & Oratores adhibuere, ac Philosophi passim, totum in falso versari, acute ac minutatim ostendit jam Belius in Dictionario Art. . . . Ac vero ejuscemodi declamationes odio potius humani generis, quam rei veritate nituntur. Sæpius dixi, hisce in rebus perinde peccare eos, qui bestiis nos accensent, aut, quod horridius, infra locant, quam qui nimium ad astra tollunt. Sed illi tamen ex eorum ferme numero, quibus nunquam dia Eudæmosina adrisit: hi, quos vexat enthusiasmus. Vir sapiens utramque ridebit: animans enim ratione præditus est homo: sed animans tamen, naturæque animalis legibus subiectus. Utinam quæ est indole, quove tendit, regere tandem aliquando discamus. Cui bono disteria? Manu ducamus: opitulemur, id operæ pretium. Sed ea est hujus ævi sapientia, ut cum juvare, seu consilio, seu opibus, seu manu necesse est, declamemus, non vides, bellua, non sentis, quæ sit hominum frontis tyæ querela? At tu dexteram porrigeres, mutus licet. Quid opus conviciis? — Bel, Art. Coſtance.

separatam, in eoque esse virtutis præstantiam positam, ut nequeat nostri felicitatem efficere a felicitate aliorum sejunctam. Quamobrem in eo potius operam ponant suam, ut demonstrent, ita esse homines a Natura comparatos, ut tum se recte & sapienter ament, ac sui beatitatem sequantur, quum pro virili portione & aliorum felicitati student: cum privatam utilitatem minime a publica abstrahunt: cum se sibi, ceterisque omnibus genitos reputant.

§. II. Sed inde, unde exorsi sumus, redeamus. *Amicitia est benevolentia mutua & manifesta, qua alter alteri utriusque causa bonum cupit.* Quanquam autem sine benevolentia nulla esse possit amicitia, non tamen omnis benevolentia est amicitia. Est enim quædam benevolentia non mutua: quædam non manifesta alteri: quædam denique plane otiosa, hoc est non conjuncta cum desiderio convictus, neque cum cupiditate gratificandi alteri: quorum utrumque in vera amicitia requiritur. Ex eo vero oritur amicitia, quod alter in altero, vel re ipsa deprehendit, vel inesse credit ejusmodi bonum, quod amore, & benevolentia dignum sit, ac arctiorem cum eo nexum & conjunctionem exigit. Hæc enim persuasio impetum illum, quem natura nobis ad amicitiam indidit, excitat, ac promovet. Nam homines natura ipsa ad se mutuo amandos, ut sæpe dictum est, geniti sunt: quia nempe sine mutuo amore non solum nec beate, nec bene esse possunt, sed ne esse quidem.

§. III. Sunt autem bona omnia, quæ amicitiam parere possunt, tria omnino, ut observat Aristoteles, *jucundum, utile, honestum.* Ex solo autem honesto stabilis, & vera nascitur amicitia: nam cum duo illa priora facili mutationi subjecta sint, necesse est ut amicitia dissolvatur, ubi illa cessaverint. Præterea, qui alterum amat jucunditatis tantum suæ, vel utilitatis ergo, se potius solum amat, quam alterum, ut idcirco ubi voluptas, & sui utilitas cessat, amor quoque omnis perit. Adde, quod in hac amicitia perfecta animorum conjunctio & fides mutua, sine quibus amicitia consistere nequit, nullæ esse possint. Contra ve-

ro, quæ virtuti & honestati tribuitur amicitia, ex quibus maximum nostrum bonum, animi cura, exsistit, & vera est, & æterna. Nam etiam si contingat partem alteram deteriorem fieri, amicus ejus vitiis irascetur quidem, sed amicum constantissime amabit, quem emendatum, non vero nullum volet.

§. IV. Amicitiam & in omni fortuna, & in omni ætate atque statu hominis esse necessariam, accurate prorsus demonstravit Aristoteles lib. 8. ad Nicomachum cap. 1. Itaque egregie pronunciat Cicero, *non aqua, non igni pluribus nos uti locis, quam amicitia: & Solem e mundo tollere videri, qui amicitiam e vita tollunt*. Enimvero in secunda fortuna duabus potissimum de causis opus est amicis. Prima, quia sine iis fructus bonorum propemodum perit, beneficentia, inquam, & liberalitas illa, quæ in amicos maxime exercetur. Præterea nullius boni sine socio jucunda esse potest possessio, ita ut in maximis opibus colloquium & convivium amicorum omnes homines desiderent. Secunda, quia opus est custodia, & tutela bonorum, quæ quo majora sunt, eo plures nanciscuntur aucipes, & ægrius custodiuntur (a). Quocirca qui plus possident, plures quoque & majores veros amicos habeant necesse est. Sed veros, inquam.

§. V. In adversa fortuna opus esse amicis, cum solatii, tum perfugii, & auxilii gratia, nemo ignorare potest, nisi qui nihil unquam adversi in vita expertus est. Eleganter hæc omnia complexus est Cicero in eodem libro: *Cui, inquit, potest esse vita vitalis, ut ait Ennius, qui non in amici mutua benevolentia conquiescat? Quid dulcius, quam habere, qui cum omnia audeas sic loqui, ut tecum? Quis esset tantus fructus in prosperis rebus, nisi haberes, qui illis æque ac tu ipse, gauderet? Adversas vero res ferre difficile esset sine eo, qui illas gravius etiam, quam tu, ferret*.

§. VI.

(a) Horat. sat. 1. v. 76.

An vigilare metu exanimem noctesque diesque
Formidare malos fures, incendia, servos,
Ne te compilent fugientes; hoc juvat? horum.
Semper ego optarim pauperrimus esse bonorum.

§. VI. Porro in omni ætate pernecessariam esse amicitiam est exploratum. Nam, ut ab incunabulis exordiamur, in infantia nobis opus est amicitia & tenero parentum educatorumque amore, quo rite educari possimus: est enim hæc tenella ætas non corporis tantum vitiis, sed cum primis animi obnoxia, ut idcirco sinceri & magni educatorum amoris indigeat. Itaque ita divina Providentia institutum est, ut natura ipsa omnes homines tenerrimo erga liberos reliquosque infantes ferantur amore. Hunc amorem aufer, quid nisi aut brevi deserta Tellus, aut impiis & nefandis latronibus esset oppressa (a)?

§. VII. Quod ad adolescentiam attinet, ei etiam amicis maxime est opus. Primo propter imbecillitatem judicii: secundo ob affectuum vehementiam: tertio ob rerum imperitiam. Itaque nisi adolescentes amice instituuntur, artibus ingenuis erudiantur, moribus imbuuntur honestis, revocenturque a vitiorum illecebris, ac sicubi exorbitare cœperint, moneantur, & in viam retrahantur, profecto aut crudi proveniunt lateres, aut indomitæ feræ. Quocirca nihil habere prius & majus adolescentes debent, quam ut viros probos, rerum peritos, prudentesque & doctos in amicitiam adsciscant. Incredibile dictu est, quam rite, & vehementer hac via proficiant. Hac arte educabantur nobiles juvenes Persæ (b): ea Spartani (c): ea
Pla-

(a) Non proprios tantum infantes amamus, sed' quoscumque. Ita servatus Moses a Pharaonis filia, ac liberaliter eductus: ita Romulus & Remus a Faustulo: ita infiniti ab aliis. Ajunt, in his, spei, ambitioni, vanitati, jucunditati, ingenio nostro servire. Non litigo. Serviamus: sed amemus tamen alterum, ac servemus: id erat agendum: id operæ pretium.

(b) Vide Xenophontem in Educatione Cyri. Διχαμοσυνον totam eam educationem, quasi si dicas, omnigenæ justitiæ scholam studiumque, eleganter appellabant: nam ea præclara, eaque in primis necessaria schola, in qua discas, quid cuique debeas, ac ita discas, ut a pueritia exercere assuescas, quod, ut idem docet Xenophon, egregium erat in Persarum educatione. Itaque Cyrus, adhuc puer, quod male judicasset, castigatus a senioribus. Cum nos tamen garrire, seque mutuo scindere proscindereque, ac lingua & manibus esse petulantes doceamus. (c) Plutarch. in Lyncurgo.

Plato cives suos erudiri vult (a).

§. VIII. Sed & viri opus habent amicis, cum ad rerum cognitionem, tum maxime ad actionem. In cognitione quidem, & ad consilia ineunda, & ad ea exequenda: nam plus vident oculi, quam oculus, ut est in proverbio. Deinde ad res gerendas non medio-cre præsidium est in amicorum benevolentia. *Virtutum*, inquit, Cicero, *amicitia adiutrix a natura est data, non vitiorum comes: ut quoniam solitaria non posset virtus ad ea, quæ summa sunt, pervenire; conjuncta & sociata cum altera perveniret.*

§. IX. Jam vero nulla ætas magis amicorum indiget, quam senum. Senes enim ob mentis & corporis imbecillitatem neque se, neque sua recte curare possunt, neque eas res obire, quæ aut animi, aut corporis robur aliquod exigunt. Præterea quoniam hæc ætas quasi solitarios homines efficit, nisi convictu amicorum recreentur senes, vitam minime optabilem vivant necesse est: otium enim in solitudine mors quædam est hominis viventis. Sed cum aliquid in amicitiiis & suscipiendis & servandis sibi utilis petant omnes, difficile est senem, omnibus aut ingenii, aut morum, aut bonorum præsidiiis destitutum, amicos invenire, ac irretire & retinere. Itaque quicumque eam ætatem spectat, aliquem apparatus struat, quo pascat amicos, oportet. Locupletes, cœnis, munusculis, reliquaque liberalitate devincire sibi amicos possunt: reliqui sapientia, & anteaactæ vitæ experientia. Atque hoc præcellit: nam opes, nisi & sapientia adsit, & incorrupta probitas, insidiatores pro amicis paraverint. Legi meretur Pomponii Attici vita; cui ego vix ullum ex tota vetustate in parandis tuendisque amicitiiis æquiparaverim.

§. X. De privata amicitiae utilitate hucusque disseruimus: publica nunc paucis demonstranda est. Ac publice amicitiam esse non modo utilem, sed necessariam, inde facile perspicitur, quod ea tanquam vinculo civitates contineantur, & ad magnitudinem, & felici-

(a) Vide VII. de Leg.

licitatem suam perducantur. Efficat enim publica amicorum amicitia, ut alii aliorum commoda promoveant, ad præclara facinora se se mutuo adjuvent, communibus viribus hostibus resistent. Itaque vetusti legumlatores plus in amicitia inter cives concilianda, quam in constituenda iustitia adlaboraverunt, quemadmodum perspecte adnotat Aristoteles: quod scilicet non ignorarent, constituta amicitia, iustitiam sequi sponte sua: cum e contrario posita iustitia, non necessario sequatur amicitia. Præterea rerum publicarum gubernatores cum sciant quantum momenti ad tranquille civitatem regendam in opinionum etiam concordia positum sit, illud quoque curarunt, ut una esset in republica religio, una lex, uni mores, ut eodem modo & cogitarent omnes, & agerent. Quare Plato (a) cum nihil tam Reip. incolumitati adversum existimasset, quam ullam morum vetustorum mutationem, ne musicam quidem veterem moveri permittit: ne novæ subinde voluptates novas libidines, hæque subversionem civitatis progignant.

§. XI. Quæ cum ita sint, videamus modo, quæ sint præcepta amicitiae, aut ineundæ, aut conservandæ, aut etiam dissolvendæ, ubi opus est. Ineundæ amicitiae potissima præcepta sunt duo. Primum, ne statim quemvis in amicitiam adsciscamus, sed probe prius mores ejus, ac fidem exploremus, cum quo arctiorem contrahere amicitiam volumus: imprudentis enim est ei te, & tua concedere, quem non probe prius novisti. Vide Sen. Epist. 3. Huc pertinet vulgatissimum adagium, *multos salis modios una esse edendos, donec amicitia penitus coalescat* (b).

§. XII. Exploratur autem futurus amicus quinque præcipue modis, secretis, pecuniis, & lucro, honoribus, adversa fortuna, & anteacta cum aliis amicis vita.

(a) Lib. VI. de Leg.

(b) De cujus intelligentia vide Erasmum. Ego, qui sepe truncus sum, ita intellectum hic volo, ut vulgo nunc etiam adhibetur. Doctas commentationes otiosas integras relinquo. Hominem primum instruimus, non philologum.

ta. Principio, *commissa tacere qui nequit, hic niger est, hunc tu Romane caveto*, quod præclare inquit Horatius: quantumvis enim quisquam natura bonus sit, tamen si garrulus fuerit, in arctiorem amicitiam admittendus non est; nam consistere nequit vera amicitia sine animorum perfecta conjunctione: nec perfecta conjunctio haberi, ubi altera pars levis est & garrula. Discimus autem alterum esse garrulum, primo si ultro sua, & suorum patefaciat secreta: secundo si verbosus sit, & fabulator: tertio si percunctator molestus: hinc illud, *percunctatorem fuge: garrulus idem est*.

§. XIII. Deinde quoniam inter affectus vehementiores, quibus homines agitari solent, connumerandi sunt avaritia, seu lucri cupiditas, & ambitio, idest dignitatis immoderata cupido; qui amici causa lucrum, & dignitates contemnit, ut se non patiat ab iis abstrahi & separari ab amicitia, procul dubio, si ceteræ adsint dotes, in amicitiam adscisci potest. At si lucri cupidus fuerit, aut nimis ambitiosus, omnia lucro & dignitati postponet. Itaque omnium hominum ad amicitiam ineptissimi sunt avarus, & ambitiosus. *Est enim amicitia*, inquit præclare Cicero, *nihil aliud, nisi omnium divinarum humanarumque rerum cum benevolentia & caritate summa consensio*. Qui autem hæc consensio cum avaro, & ambitioso esse potest? Atque id in primis animadvertendum est, ambitiosum, si intelligat, te aptum ambitioni suæ instrumentum esse posse, mirifice amicitiam simulare: neque enim inter omnes homines quisquam est ambitioso magis adulator (a). Accurate igitur hæc adulatio perpendenda est, & ab amicitia; cui simillima est, discernenda. Exstat super ea re egregium Plutarchi opusculum, *quomodo discerni queat adulator ab amico*.

§. XIV. Sed nulla magis in re exploratur animus ad veram amicitiam compositus & aptus, præterquam in adversa fortuna: in eo enim hominis statu aperte in-

(a) *Ambitiosi amici ex eorum ferme sunt genere, de quibus Tacitus hist. 1. 2. quibus deerat inimicus per amicos oppressi. Idæque Aulæ præcipuum debonestamentum.*

intelligitur , quantum quisque se , quantum amicum amet . Inde illud est proverbium , *Amicus certus in re incerta cernitur* . Nam qui amicum in re incerta deserit , is magis fortunæ , quam personæ amicus fuisse videtur . Quocirca minime amici putandi sunt illi , de quibus Ovidius ait ,

Tempore felici multi numerantur amici .

Sed ii tandem veri amici sunt , qui in adversa fortuna constantissime adhærent . Prudentis autem hominis est , priusquam intimas amicitias contrahat , hujusmodi confingere casus , qui incerti & dubii videantur , ut ita , ficta calamitate ; exploret quid sperare liceat in vera .

§. XV. Præterea omnium tutissima & compendiosa explorandi amicos ratio est inquirere , quomodo illi adversus alios amicos se gesserint , aut adhuc gerant . *Talem* , inquit perspecte Isocrates , *erga te fore amicum intellige , qualis erga alios fuit* . O pulchra ! Exploratio autem hæc , de qua in hoc primo præcepto locuti sumus , ad amicitix stabilitatem plurimum facit : quia quem explorasti , ei non diffides , non male de eo suspicaberis , nec ab eo metues , non facile conquereris , nec aliorum de ipso querelas admittes , quæ amicitias disturbare solent . Lege Ciceronem de amicitia , & Senecam in Epistola III.

§. XVI. Secundum præceptum inoundæ amicitix est , ut tot tibi copules amicos , quot una tecum , atque inter se familiaritatem colere commode possint , & libenter velint , ac quorum usibus inservire queas . Utrumque enim horum jus veræ amicitix postulat . Non probo igitur magnum intimorum amicorum numerum . Primo , difficile est unius hominis mores explorare : quid plurium ? Secundo , cum omnibus convictus , & frequens conversatio haberi nequit ; unde est necesse , ut brevi tempore amicitix evanescant . Tertio omnibus inserviri non potest , quod amicitix jura exigunt . Quare quisque sui , ac conditionis suæ rationem inire debet , ut intelligat , quot sibi amici interiores esse queant . Intimiores dico : nam vulgares qui dicuntur amici , quorum tamen amicitia ad animi penetralia

non pertingit, multo plures haberi possunt, seu potius hanc amicitiam non modo cum omnibus iis, quibuscum versamur, percolare debemus, sed toti hominum generi præstare.

§. XVII. Præcepta amicitiae colendae & conservandae ad sequentia conferri possunt. Primum, ut in amicitia amor fervorem habeat, & constantiam. Amoris fervor in hoc primum dignoscitur, ut alter alteri optima quæquæ cupiat non secus atque sibi, & ut ea consequatur amicus, sedulam det operam. Deinde in eo, ut alter alterius rebus secundis æque lætetur, ac suis; adversis autem æque tristetur. Demonstrabit vero amoris constantiam, si nulla de causa patiatur ab hoc erga amicum amore divelli, non lucro, non honore, non labore, & periculo, non temporis diuturnitate, non locorum distantia (a).

§. XVIII. Secundum præceptum est, ut maxima sit inter amicos voluntatum consensus. Hæc consensus in eo primum manifestanda est, ut amicus amici studiis, & propensionibus, modo nihil turpis contineant, non solum non adversetur, sed ultro concedat, & iisdem delectari se ostendat. Secundo, ut sententias ejus & consilia non carpat, sed vel approbet, vel, si non rectas putet, modeste ac urbane repugnet, ac flectere potius blande amicum studeat, quam vi, aut jurgiis alio rapere. Præterea, ut non acerbe, non ambiciose, nec pertinaciter opiniones suas adversus amicum propugnet: omnium enim hominum amicitii inaptissimi sunt, qui dicuntur contradictores perpetui, & acerbi. Tandem amicus amicum aliqua in re dissentientem æquo ferat animo: quædam enim indulgenda sunt constitutioni animi, vel corporis, loco, tempori, aliisque

Tom. IV.

A a

cir-

(a) Sunt qui ejusmodi amicitiam velut poeticam derident. Haud ambigam, rem esse repertu difficillimam: ceterum non vacat exemplis. Tacitus hist. 1. 3. Non tamen adeo virtutum sterile sæculum, ut non & bona exempla prodiderit. Comitata profugos liberos matres, secutæ maritos in exilia conjuges, propinqui audientes, constantes generi, contumax etiam adversus tormenta servorum fides. Vide & Plutarch. in Dione.

circumstantiis. Sed cavenda est scurrilis assentatio. Perbelle Horatius lib. 1. Epist. 18.

*Ut Matrona meretrici dispar erit, atque
Discolor, infido scurræ distabit amicus.*

§. XIX. Tertium præceptum est, ut officiorum sit inter amicos vicissitudo, & paritas, quoad utriusque fortuna, conditio, ætas patitur. Observabitur autem hoc præceptum, si tales in amicos nostros nos esse satagamus, quales eos in nos vellemus. Quæ autem amicus amico officia debeat, ex iis, quæ superius de beneficentia dicta sunt, intelligi potest: est enim amicitia maximus & reciprocus benevolentiae gradus. Possunt autem amicorum officia ad duo potissimum capita conferri, consilium, & auxilium. In consilio promittitudo, & sinceritas eluceant. Quod ad auxilium pertinet, illud amico in dubia, aut adversa fortuna præcipue debemus. Inter auxilia vero maximum est, & quod amicitiam heroicam constituit, ut minime vereamur bona, libertatem, & vitam denique pro amico in causa iusta & honesta impendere. Hinc laudatur in Evangelio huiusmodi amicitia: *Nemo maiorem caritatem habet, quam ut animam suam ponat pro amicis suis.* Quæ res non modo inter Christianos, præsertim veteres, sed ne inter Ethnicos quidem vacat exemplis; ut qui hæc præcepta comica ducunt (a), & in natura humana non admodum^a, & in historia nihil versati videntur, omniaque sua ex indole, suisque moribus æstimant.

§. XX. Quartum præceptum est, ut sæpe & libenter cum amicis conversemur, & colloquamur, coram quidem, si præsentibus sint, per litteras vero, si absentes. Qui hoc officium transgrediuntur, ostendant se amicitiae poenitere, aut amicum negligere; quo fit, ut amicitia paullatim frigescat, ac postremo intercidat. In conversatione autem cum amicis sequentia sunt observanda. Primum in sermonibus veracitas, candor, & fides: simulatio omnis, & assentatio abesto. Sed & parva mendacia a conversatione amicorum abesse debent:

ea

(a) *L'Esprit Discours III. cap. 14.*

ea enim efficiunt, ut paullatim amicus amico diffidat. Secundo comitas, suavitas, & elegantia morum: vitanda ergo est rusticitas, incompta asperitas, & quidquid hominibus politioribus grave esse potest. Tertio taciturnitas: capitale enim in amicitia est non solum secreta referare, sed etiam familiares sermones vulgare (a). Nam ea est amicitiae natura, ut amicus cum amico velut cum altero se agere possit. Duo hæc amicorum officia præstantissima binis versibus complexus est Horatius in Epistola superius laudata,

*Arcanum neque tu scrutaberis ullius unquam;
Commissumque teges & vino tortus & ira.*

§. XXI. Quintum est præceptum, ut ne facile sinistris de amico suspicionibus aures accommodemus, neve ejus virtuti, ac fidei temere diffidamus: nam multi fallere docuerunt, dum timent falli, & aliis jus peccandi suspicando fecerunt, quod præclare observat Seneca in laudata Epistola tertia. Non quælibet amici dicta, aut facta, quæ incauto fortassis exciderunt, in crimen trahenda sunt, quasi in nostrum contemptum dicta, aut facta. Æquitas in judicando adhibenda est, atque omnia in meliorem partem interpretanda, quousque clare non pateat, alterum ab amicitia discessisse, ac nos lædere voluisse.

§. XXII. Sextum præceptum est, ut ne criminationes, aut querelas de amicis facile admittamus, sed eorum, præsertim absentium, famam summo studio ac fide contra calumniatores defendamus. Præterea ipsi amicos nunquam criminemur, nec facile apud quemquam de iis conqueramur. Si quid vero contingat, de quo amicos velimus admonitos, illud servemus vetus dictum, *secreto amicos admone, lauda palam.*

§. XXIII. Jam septimum est, ut nemo reprehensiones, atque admonitiones amicorum spernat: ut nemo illis monentibus succenseat: ut recte monentibus libenter pareat: ut salutaria consilia & quærat apud a-

A a 2

mi-

(a) Nepos in Epaminonda postquam egregias alias ejus virtutes expressisset, in primisque, inquit, commissa celans; quod interdum non minus prodest, quam diserte dicere.

micos prudentiores, & avide arripiat. Enimvero qui hoc præcepto continetur præcipuus est amicitiae & pulcherrimus fructus, scilicet amicorum reprehensionibus, admonitionibus, consiliis in melius proficere (a).

§. XXIV. Octavum præceptum est, ut si quos amicus habeat naves, quos deterere non possimus, quique tanti non sint, ut amicitiam ideirco dirimere debeamus, eos æquiori feramus animo. Præterea, ut ejus in nos delictis lubenter ignoscamus, dum non constat, ea ex adverso animo proficisci: ut dissimulemus ea, quæ salva virtute & honestate dissimulari possunt. Atque hoc præceptum iis potissimum observandum est, qui cum amicis paullo iracundioribus, aut morosioribus agunt, quales in primis solent esse senes (b).

§. XXV. Postremum tandem conservandæ amicitiae præceptum est, ut consentaneum amicis honorem exhibeamus: ut eos in honoris significatione prævenire studeamus: ut omnia, quæ eorum contemptum demonstrare possent, diligenter vitemus. Ceterum inter amicos fugienda est nimis anxia cæremoniarum, ut vocantur, superstitio, quæ adulantis potius est, quam amici. Danda est opera, ut in vultu, voce, ac gestu familiaritatis, & fiduciæ mutuae inter amicos signa existent.

§. XXVI. Hæc autem, quæ recensuimus præcepta, amicitiam inter pares potissimum spectant. Sed quoniam amicitia inter inferiores quoque & superiores esse potest, amicorum imparium officia paucis nunc sunt comprehendenda. Principio in dispari amicitia, qui opibus, aut alio bonorum genere abundant, quod in inferiorum amicorum usum convertere possunt, id libenter efficiant: in hoc enim præcipue amicorum com-

mu-

(a) *Eo spectabat Persica atque Spartana Schola, ex quibus tot insignes ac memorandi extitere alumni.*

(b) *Compenset senum vitia sapientia. Itaque Pericles Anaxagoræ aliquanto agresti ad ultimam usque vitæ auram fidus hesit: Epaminondas Lysi Tarentino tristi alioquin & severo seni, ut ait Nepos: Socrati iracundo ac summo irrifori Xenophon atque Plato. Matres adhuc tristes, morosas, stridulas pueri, qui lactantur, ament tamen oportet.*

munitio posita est, ut quoad rerum natura patitur, omnia inter amicos æquentur. Secundo, ut ii, qui dignitate antecellunt, si se ad inferiores amicos demittant, comitate, facilitate, modestiaque sua eos erigant, non vero supercilio, ac nimia gravitate deterreant. Tertio, ut quocumque possunt modo amicos, quos virtus, aut sapientia commendat, honoratiorēs semper reddant, illis dignitatem suam quodammodo communicantes.

§. XXVII. Inferiores vero superioribus amicis hæc debent officia. Primum, ut ne iis invideant id, quo superiores sunt. Secundum, ut perpetuo honorent & colant, caveantque, ne ob familiaritatem, modestiam, & humanitatem eorum, illos contemnant: sed cum illis facilitate, modestia, & verecundia certent. Verecundia enim cum ceterarum omnium virtutum, tum in primis amicitiae custos est. Tertium, ut si superiores amici jure regendi præsent, justum iis semper obsequium præstent, nec amicitia abutantur ad criminum impunitatem, neve inflentur, atque adrogantes impudentesque (quod stultis familiare) fiant. Quartum, ut eorum beneficiis, cum paria referre nequeunt, gratum semper memoremque animum ostendant.

§. XXVIII. Quanquam autem naturæ veræ amicitiae, quæ virtute nititur, & conservatur, postulat, ut sit æterna: tamen hujusmodi casus intervenire possunt, quibus necesse sit, omnem amicitiam dissolvere. Ac plures proferri solent dissolvendæ amicitiae causæ, quæ non omnes justæ, aut honestæ sunt. Sed una est in primis honesta, & iusta, si amicus ad insanabilem improbitatem deflexerit: si nos criminum comites obstinate velit. Amicitia enim adiutrix virtutum a natura data est, non comes vitiorum, scelestissimique sunt, ii, qui ne amicitiae renuncient, amico in crimina & vitia vires suppeditant. Ceterum omnia primum blande sunt pertentanda, ut ad bonam frugem amicum perducamus. Ubi nihil succedit, palam amicitiae nuncium mittendum est. Quod ita est intelligendum, ut ab amicitiae vinculo dissiliamus; non ut veterem amicum oderimus: neminem enim odisse ex naturæ lege

licet; minus vero, quocum olim juncti fuimus. Memorandum illud, quod superius admonuimus, virum bonum odisse neminem, amicitiam vero cum iis tantum copulare, qui itidem boni sunt. Sed legatur Aristoteles, & Cicero.

C A P U T XIII.

De Statu hominis sociali, deque variis officiis, quæ ex variis societatum generibus proficiuntur, ac primum virorum & uxorum, parentum & liberorum.

§. I. **A**Ggrediamur nunc ad hominem velut a nemonibus antrisque retractum, ac in civitatem adductum, in hoc sociali statu contemplandum, atque in eo ad officia probi civis formandum; quod nos hoc capite summatim, quatenus elementorum angustia finunt, efficiemus. Societatum ab Aristotele tria statuuntur genera, minimarum ac simplicium, mediarum ac paullo compositiorum, & magnarum, seu Civitatum ac Regnorum. Minima societas posita est in unione maris & foeminæ per legitimas nuptias contracta. Hæc omnium societatum simplicissima est & prima. Itaque idem philosophus eleganter nuptias appellat *Elementa Civitatis*: ut enim, ait, atomi primæ sunt corporum physicorum elementa, ita nuptiæ politicorum. Mediæ societates sunt familiæ, quæ paullo compositiores sunt, quam primæ illæ, constantque ex patre & matrefamilias, liberis, atque servis. Hæ societates si extra majora imperia civilia vivant, cum civili imperio sunt monarchico: pater enim velut princeps familiæ & rex est, ac familia tota parvum regnum. Id & antiquis mortalibus notum fuit, ut ex regimine Patriarcharum discimus; & non uno in loco indicat Homerus Ethnicorum omnium scriptorum antiquissimus, atque alteris mundi originibus vicinior, dum Cyclopum mores describit in *Odyssæa* (a). Societates majores sunt Civitates,

(a) *Lib. ix. v. 113.*

tes, Regna, Imperia, quæ ex pluribus primi & secundi generis conflantur.

§. II. De causis, ut vocant, impulsivis societatum minorum haud valde disputatur inter doctos. Nuptiarum enim duas incitantes causas reperimus, unam *internam*, appetitum Veneris, quo animantia ipsa Bruta ad sobolem procreandam impelluntur: alteram *externam*, Deum nempe, qui primas nuptias, quæ essent exemplar ceterarum, & constituit, & benedixit, atque fecundavit; quod nos & Historia Sacra docet (a) & primæ atque divinæ mundi origines. Secundum Nuptias vero provenere Familiæ, quæ societates sunt secundi generis. Eæ procul dubio tribus causis ortum debent, *necessitati*, *naturali* cuidam erga parentes *obsequio*, & *gratitudini*. Nam principio infantes, & pue-

A a 4

ri,

ΑΛΛ' οὐγ' ὕψλων οὐσων ναιεῖσι κερήυα
 Εὐ σπερσι γλαφυροῖσι. Θερμίσυει δὲ ἐκκς
 Παιδῶν ἢδ' ἀλοχῶν. ἔδ' ἀλλήλων ἀλεγῇσι.

Sed ipsi cælorum montium inhabitant cacumina

In speluncis cavis: jus autem dat unusquisque

Liberis atque uxoribus: neque alter alterum curat.

Quod ait, ἔδ' ἀλλήλων ἀλεγῇσι, non ita capi velim, ut interpretes omnes, neque se invicem curant, sed ita potius ut ἀγορὰς comitia concionesque non habuerint communes, neque in commune consuluerint. Id & verbum ἀλεγῶ satis indicat, & ipse admodum aperte Homerus, qui supra versu 112. dixerat iis nullas fuisse ἀγορὰς βεληθόρας, comitia, in quibus in commune consulerent, velut apud politas Græciæ nationes. Sed & Euripides in Cyclope pulchre quid ea tota res sit quatuor oculis demonstrat, ἀκκα, inquit, ἔδεν ἔδεις ἔδεν, nemo nemini ulla in re obsequitur, tanquam imperanti scilicet. Αυτονομίης in familiis suis dicas. Quæ & olim maximæ hominum partis vita, agrestis ac indomita, ne Græcis quidem exceptis, ut ostendit in I. libro Thucydides: nec Latinis, quod demonstravit Dionysius Alicarnassensis, item in I.; & est hodie haud spernenda, præsertim tota ferme America, atque Europa Asiaque Septentrione. Vide de populis Septentrionalibus Mallet. Introduction a l'Histoire de Danimarq.

(a) Platonica lex VIII. de Legib. Si quis cum aliis mulieribus commisceatur, πλὴν τοῖς μετὰ θεῶν καὶ ἱερῶν γαμῶν, præterquam iis, quæ diis auspiciis, sacratisque nuptiis domum venerunt, infamis esto &c. Itaque nulla natio non divinis auspiciis nuptias aut celebravit olim, aut nunc celebrat, ipsi barbari agrestesque. Vide Kolbi hist. cap. bonæ spei.

ri, dum in minoribus sunt, ad omnia officia vitæ animalis ac civilis majorum indigent auxilio, & institutione. Itaque hæc necessitas parentibus illos arctissime conjungit. Deinde omnes homines cum naturali quadam erga parentes veneratione (a) educari necesse est: inde item unio cum parentibus; atque parentum ergo amor inter semet. Tandem beneficiorum acceptorum memoria gratos liberos erga parentes efficit. Ea tertia unionis causa.

§.III. Sed de causis impulsivis Civitatis, atque Imperii civilis, magna est inter doctos disceptatio. Sunt qui putant, opus Naturæ esse Civitates & Imperia civilia, ut Joannes Fridericus Hornius de Civitate lib.I. cap.IV. §. VI., quod scilicet naturali quodam, atque a Deo disposito rerum ordine, & consequutione naturæ, primum sint natæ, hodieque nascantur civitates, & Imperia civilia. Nimirum primi mortales, ex quo totum genus humanum fuit propagatum, amore conjugali captum fuit ad nuptias: inde vero natura ipsa soboles naturali erga parentes amore iis adhæsit: hinc familiæ paullatim multiplicatæ manserunt inter sese conjunctæ, expertæ commoda, ac voluptates vitæ civilis: quæ postmodo auctæ integras gentes constituerunt, quod Sacræ Historiæ consentaneum est: hunc enim in modum illa docet plerasque Asiæ & Africæ gentes coaluisse. In Arabia notæ adhuc tribus, triumque eadem origo atque Hebraicarum (b). Notæ Tartaris (c). Non igitur, nisi commentum habet, quod

(a) Quæ tamen divinitus hausta veteribus omnibus habita. Hinc *æsecrandi inferisque devoti parricidæ*. Itaque Alcmeoni Amphiarai filio, qui matrem occiderat, redditum Apollinis oraculum, ut eam in regionem aufugeret, quæ extra omnem Tellurem a sole id temporis illustratam, cum matrem necaret, esset. *Thucyd. lib. II. 102.* Id quanquam aliter captum, ita tamen accipiendum puto, quasi tota Tellure ei interdictum esset atque πῶρος αἶδρ (ubi nemo eide, videt) ad inferos damnatum. Planam enim Tellurem veteres existimabant, solamque superiore Sole circumiri, & habitari. Ad inferos igitur damnat, quos sub Terra esse opinabantur.

(b) Bolenvilliers vita Muhara.

(c) Historia Genghis-Kan,

quod Thucydides, Plato, Aristoteles, Cicero, alique veterum retulerunt, olim genus humanum per silvas vagam, ac solitariam vitam ferarum more egisse; quod id commentum in eorum tantum Philosophorum, systemate locum habere potuerit, qui homines e Tellure genitos sibi persuasere, alioquin confectarium esset sine principio. Ac vero gentes omnes; quæ nuper orbi nostro innotuerunt, aliqua inter se civilis societatis imagine conjunctæ sunt repertæ (a); Vide Kolbi in descriptione *Capitis bonæ spei*, & Itineraria Americæ recentissima.

§.IV. Alii vero, ut Plato, & Cicero, ut ne quid dicam de Philosophis Epicureis, quum constituissent, homines magna parte olim vagam & ferinam vitam agitalle, (id quod qui negat, in nationum originibus hospes sit necesse est (b)), censuerunt indigentia & uti-

(a) *Societate tamen precaria utuntur, quæ nihil derogat juri ac libertati familiarum.*

(b) *Tacitus de morib. Germ. 46. Fenni, seu Finni Scandinaviae populi sic depinguntur. Fennis mira feritas, foeda paupertas: non arma, non equi, non penates. Victui herba, vestitui pelles, cubile humus. Sola in sagittis spes, quas inopia ferri ossibus asperant. Idemque venatus viros pariter & feminas alit: passim enim concitantur, partemque prædæ petunt. Nec aliud infantibus ferarum imbriumque suffugium, quam ut in aliquo ramorum nexu contegantur. Huc redeunt juvenes, hoc senum receptaculum. Id beatus arbitrantur, quam ingemere agris, illaborare domibus, suas alienasque fortunas spe metuque versare. Securi adversus homines, securi adversos deos, rem difficillimam assecuti sunt, ut illis ne voto quidem opus sit. Hæc eadem dimidiæ prope ætæ immensum Telluris imago. Cyclopes Homeri. Odyss. IX. v. 108.*

ΟΥΤΕ ΟΥΤΕΥΕΤΙ ΧΕΡΣΙ ΟΥΤΟΥ, ΣΤ' ΑΡΩΣΤΙΝ,

Neque plantant manibus plantam, neque arant.

Licet, ut hodie Tartaris, ac Huttentotiis, pluribusque aliis Africanis, πολλά μὲν, οἷς τε, καὶ αἰγες, plurima pecora, oves, capræ; ικνετκον, quiescebant; ut intelligamus pastores fuisse, eaque pecora non fera, sed cicura. Itaque Thucydides (I. 6.) cum eam fuisse olim Græcorum vitam demonstrasset, recte prudenterque conficit, τῶν ποτε καὶ ἐς πάντας ὁμοίων διατημάτων, apud omnes peræque gentes eadem fuisse instituta, Cujus rei & illud habet egregium argumentum ac præclarum, quod omnes olim gentes armatæ incederent, nec nisi sero arma deposuerint. Quid enim attinisset, nisi ferinum in morem vixissent, cum telis & arcibus

utilitate motos fuisse ad Civitates, & Imperia civilia statuenda, quippe a quibus ea commoda haberent, quæ aliunde frustra sperarent. Pufendorffius genuinam hanc ponit coëuntium in civitates hominum causam, ut scilicet præsidia vitæ sibi compararent contra mala, quæ homini ab homine imminēt. Sunt qui putant, nefarios primum homines Imperia civilia inter se constituisse ad bonos opprimendos, bonosque impulisse ad idem efficiendum quo se tuerentur. Plerasque Græciæ civitates ita coaluisse docet Thucydides lib. I. *de bello Pelop.* In primis vero ingeniosum est Vici nostri dogma, qui ex ferino statu tonitru homines ad nuptias, & hinc familias, impulsos fuisse contendit. Inde vero partim amore naturali, partim nefariorum metu natas Civitates, Imperia civilia, Ordines (a). Ego sic sentio, ex omnibus hisce causis aliquas natas civitates, civiliaque imperia, quod nos veteres nationum historiæ condocent. Præclare Cicero lib. II. de Offic. cap. 6. *atque etiam, inquit, subjiciunt se homines imperio alterius & potestati pluribus de causis. Ducuntur enim aut benevolentia, aut beneficiorum magnitudine, aut dignitatis præstantia, aut spe sibi id utile futurum, aut metu, ne vi parere cogantur, aut spe largitionis promissionisque capiti, aut, ut sæpe in nostra Republica videmus, mercede conducti.*

§. V. Jam societatibus omnibus, cujuscumque eæ sint generis, id commune est, ut sint veluti *personæ morales & artificiales*. Scilicet qui in societatem coeunt, in hunc finem consentire omnes debent, ut sese mutuo juvent, atque defendant, quemadmodum in persona naturali partes omnes in unam conspirant harmoniam. Atque ut ex harmonia personæ naturalis ejus salus existit; ita ex concordia in iisdem mediis, atque con-

antris ac cavis prodire? Idem hodie mos Kanadensibus, idem Tartaris, idem Arabibus. Sed & veteris ruris ampla adhuc apud Europæos plures vestigia, qui etiam in copiosis urbibus, tanquam in obsidione, armati procedunt: res barbara, ac magnorum facinorum fons. Verum vitia politiae, si semel vestigalia evaserint, haud facile refecaveris.

(a) *Vico Scienza nuova.*

conspiratione in eundem finem, eorum, qui societatem constituunt, nascitur, & conservatur salus. Itaque singulorum in societate coëuntium quasi unus esse debet intellectus, atque una voluntas; neque enim aliter inter eos concordia ulla esse potest. Hæc autem unitas intellectus, & voluntatis a legibus seu naturæ, seu civilibus, aut a pactis progignitur; quæ leges decretis eandem in omnibus civilem sapientiam ingenerant; sanctione vero ad idem volendum permovent. Ita nullo modo esse potest civitas, ubi aut leges, aut pacta homines non omnes ad eadem velle, eadem nolle incitaverint. Ex quo illud sequitur consociarium curatissime observandum, omnes socios teneri ad actiones suas fini societatis conformandas, legesque societatis ac fidei vinculum sancte servandas: nisi enim efficiant, dissoluta sit societas necesse est: nam το πῖσον, ut ajunt Græci, *fides*, sine qua nulla civitas, legum reverentia continetur. Itaque ex fine societatis officia sociorum sunt deducenda. Officia autem dico, quæ societatem ipsam spectant: nam de officiis societatis adversus societatem idem omnino dicendum est, quod de officiis hominis adversus hominem præcepimus, quoniam singulæ societates, seu magnæ, seu parvæ, velut personæ morales sunt, quarum jura intacta servanda sunt. Quare non justa est tota ille Legatorum Atheniensium apud Thucydidem tractatio, ita perpetuo comparatum esse, ut imbecilliores civitates a potentioribus coercerentur (α), seu regnerentur (αρχεσθαι): usurpatio id facit, non jus.

§. VI. Ut autem per summa capita præcipua societatum officia prosequamur, initium faciemus a simplicibus, idest a conjugio, & familia, quæ sunt majorem

(a) Lib. I. 43. pag. 51. edit. Amst. 1731. Οὐδ' αὖ πρῶτοι τὰ τοιαῦτα ὑπαρξάντες, ἀλλ' αἱ κατεστώσιν τὸν ἴσῳ ὑπὸ τῆς δυνατότερας κατεργασθαι. Néque vero nos primi hujus exempli auctores fuimus: sed perpetuo NATURÆ JURE est constitutum, ut imbecillior a potentiore coerceatur. Quo in loco το naturæ jure de suo jectore addidit interpres, sententiamque Atheniensibus affricat non iniquissimam modo, sed minus etiam doctam. De facto agitur, cujus ratio non tam a natura desumitur, quam ab eo, quod ut plurimum fit.

jorum cœtuum & civitatum seminaria. Ita autem hæc officia expediemus, ut cum iis, quæ ratio & jus naturæ præcipiunt, leges etiam christianorum sacras conjungamus aliquando: philosophamur enim, sed Christiani, & inter Christianos, quorum philosophiam nec Platonica comitas modestiaque æquaverit; nec Aristotelis vincet subtilitas; nec ullius hominis ingenium plene unquam, nisi Theodidacti, assequutus fuerit. Utinam per mores sæculumque integram habere liceret, nec eo dementiæ venissemus, ut falsis utilitatibus jucunditatisque causis capti, hanc vitæ fœditatem, placidæ illi, incorruptæ ac beatæ antepone, felicitatem vocassemus, vitiorumque patrocinium (infandum!) Philosophiæ pensum fecissemus. Conjugii, seu nuptiarum naturales fines duo statui possunt, procreatio educatioque prolis, & vitæ socialis voluptas; quos fines & ratio naturalis dicat, & aperte docet Scriptura, quum alibi, tum præcipue initio Geneseos. Enimvero sine conjugio genus humanum & *unius esset avi turba*, ut ille eleganter dixit: & fas non est, ut qui sunt ratione præditi, ferocia, ut ait Plato, animantia in civitatem invehant, quales futuri essent homines sine cultura, & educatione. Quare non ut generent solum liberos, sed & ut educant excolantque, mas & foemina nuptias ineunt. Sed & societas conjugum, præsertim si mores & temperamenta utriusque sibi sint concordia, vitam efficit lætiores & jucundiores, habetque vim amicitiae incredibilem, quum in prospera, tum in adversa fortuna, quod ex iis, quæ superius de amicitia differuimus, facile intelligitur, ut hic tertius vitæ conjugalis finis constitui possit. Quod autem ajunt quidam, & veneris usum nuptiarum esse finem, non possum probare: impetum enim veneris velut instrumentum procreationis nobis Natura indidit, ut medium sit potius nuptiarum, quam finis. Nam quod Apostolus ait, *propter concupiscentiam unusquisque habeat uxorem suam*, id sic accipio, ut quoniam omnes homines hoc naturæ stimulo incitantur; nec possit ei satisfieri sine nuptiis, quin aut hominum procreatio omnis impediatur, aut omnes Civitatis ordines perturbentur;

bentur ; nuptiis potius fiat , quam ullo alio modo . Ita autem fit , ut ad sobolis procreationem , & vitæ pacem , ac tranquillitatem ordinetur .

§. VII. Ex iis finibus deducenda sunt officia virorum & uxorum , quæ nos paucis hic indicabimus . Ac principio viri debent amare uxores suas . Eum enim amorem & natura conjugii postulat , quod amicitiaë genus est arctissimæ ; & Scriptura divina præcipit (ad Ephesios cap. V. 23. ad Coloss. cap. III. v. 19.) II. debent eas curare , ut seipsos , earum saluti , incolumitati , prosperitati studere , tanquam si essent una persona : qua ratione intelligendum est illud Dei verbum in Genesi , *quamobrem relinquet homo patrem & matrem suam , & adhærebit uxori suæ , & erunt duo in carne una* . III. Debent eorum malis succurrere . IV. Omnia externa amoris testimonia ipsis dare . V. tribuere illis honorem , ut infirmioribus , quod præcipit Apostolus epistola I. ad Corinth. cap. III. v. 7. VI. Imperium suum in eas ita moderari , ut pateat eos cum ipsis cohabitare , tanquam cum amicis , non tanquam cum ancillis . VII. Nævos tolerare , si corrigi non possint . VIII. Non eas excipere verbis asperis , aut minacibus , ac ab humanitate abhorrentibus , non vultu austero , moroso , torvo , & iram , odiumve spirante , non factis ab ira , & odio profectis , non verbis , aut gestu , quibus contemptus significetur : sunt enim hæc amicitiaë contraria , quæ inter conjuges esse debet & arcta & sincera . IX. Debent ipsis servare fidem tum quia eam promiserunt , tum quia , quoad illæ vivunt , non sunt domini sui corporis , ut monet Paullus Apostolus I. ad Corinth. VII. v. 4. & 5. Virorum itaque virtutes esse debent , Dei amor , prudentia , mansuetudo , ac lenitas , vigilantia , diligentia , animus fortis . Horum omnium una ratio est , quia nec vita hæc socialis pacata & tranquilla sine his virtutibus esse potest , nec ulla prolis procreatio & educatio inter dissentientes atque improbos conjuges .

§. VIII. Officia uxorum sunt . I. Debent subjici maritis in omnibus , quæ a Deo prohibita non sunt : quia viri naturæ ipsa prærogativam quasi principis gerunt in fami-

familia: quocirca nullo modo uxores auctoritatem sibi usurpare in maritos fas est (a). Vide ut hæc inculcat Scriptura I. Petri v. 3. cap. I., ad Ephes. V. v. 4., I. ad Timoth. cap. II. v. 12. I. ad Corinth. cap. II. v. 8. II. Quod ex antecedente sequitur, revereri debent maritos, & ut verbis Petri Epist. I. cap. III. v. 6. utar, *colere, ut Sara Abrahamum*. III. Tenerrimo amore complecti, & omni obsequio legitimo ipsorum benevolentiam sibi conciliare. IV. Fidem ipsis inviolatam servare. V. Eorum malam indolem sua mansuetudine, & prudentia vincere. VI. Condonare ipsis, si quid duri adversus eas præstiterint. VII. Eos sedulo curare, & iis opem ferre in omnibus. VIII. Eorum bona, vel pessima œconomia, vel malis artibus nunquam dilapidare, & consumere. IX. Eorum saluti æternæ sermonibus piis consulere. Præclare quidem ad hæc significanda veteres Germani, ut ex Tacito discimus *de moribus Germanor.* consueverant in nuptiis mariti juxta & uxores dona hæc sibi mittere, boves jugatos, hastam, equum phaleratum (b). Virtutes igitur necessariae in mulieribus sunt lenitas, castitas, fides, diligentia, prudentia,

(a) *Hinc apud omnes peræque gentes custoditum, ut uxores in domus virorum concederent: nam Regna Amazonica vix ullibi, ac per morum quandam lasciviam, aut si hereditas invitet, reperias.*

(b) *Platonis lex est in VII. de legibus. Ne dimidia generis humani portio marcescat inutiliter, pereatque, iisdem tam masculis, quam foeminæ artibus exercitiisque subigantur. Itaque & arma quoque tractare vult mulieres. Sed Civitatem militarem adornat. Nostri hisce moribus & nobiles ubique adolescentulæ, & in urbibus magna quoque plebis pars, nihil ferme aliud sibi a natura pensi datum persuasum habent, quam sese comere, amare, potare, omnique modo lascivire, insanire postremo. Ubi igitur MULIER FORTIS? Hinc illæ familiarum lacrymæ: hinc domuum prostitutio. Totam itaque puellarum ac puerorum institutionem ac disciplinam reficiendam ego puto iis, qui bonas, castas, prudentes uxores petunt. Tacitus loco laudato cap. 18. Nec se mulier extra virtutum cogitationes, extraque bellorum casus putet, ipsis incipientis matrimonii auspiciis admonetur, venire se laborum periculisque sociam, idem in pace, idem in prælio passuram, ausuramque. Hoc juncti boves, hoc paratus equus, hoc data arma denuntiant. Sic vivendum, sic pereundum.*

dentia, modestia, œconomia, pietas (a).

§. IX. Porro officia parentum erga liberos sunt.

I. Parentes debent amare liberos ; tantum non stulte deperire : nam eorum amor necessarius est & ad societatem familiæ pacate conservandam, & ad probam educationem : stultus utrique rei adversatur. II. Honestè educare. Complectitur autem honesta educatio quum rectam atque honestam intellectus & voluntatis institutionem, tum exercitia, alimenta, & cultum corporis. Exercitium corporis continuum esse debet ac durum ; alimenta, liberali homine, ac puero digna. Vitanda itaque sunt. pigritia, luxus, & sordes, quæ extrema sunt educationis vitia. III. In veritatibus Christianis accurate eos instruere, Dei in illis amorem, & pietatem instillare, horrorem vitii ingenerare, non solum verbis, & adhortationibus, verum maxime exemplo vitæ suæ : dici enim vix potest quantopere animi puerorum ab exemplo majorum commoveantur : sunt enim infantes & pueri molli ceræ simillimi, in quibus quidvis vultu, gestu, verbis, actione quacumque facile imprefferis. IV. Castigare, quum est opus (b), licet non ultra modum : neque enim id natura, neque prudens institutio exigit : quippe nimia pœna ingenium liberorum obtunditur, & de liberali sit servile. Ceterum ut severius in liberos imperium paternum non est secundum naturam, ita nimia ejus imperii diminutio, quæ apud eos sensim veteri disciplinæ successit, rectæ liberorum educationi adversatur. Ac quemadmodum veteres nationum leges nimia severitate peccarunt, ita

re-

(a) *Sed castitas in primis* : neque enim, ut ait ille, mulier, amissa pudicitia, alia abnuerit. *Quam tamen ecquæ servet iis in gentibus, in quibus vitia ridentur, ac corrumpere & corrumpi sæculum vocatur ? Tacitus ibid.* Severa illic (apud Germanos) matrimonia, nec ullam morum partem magis laudaveris septa pudicitia agunt, nullis spectaculorum illecebris, nullis convivorum irritationibus corruptæ Paucissima in tam numerosa gente adulteria ; quorum pœna præsens, & maritis permessa. Accisis crinibus nudatam coram propinquis expellit domo matitus, ac per omnem vicum verbere agit. Publicatæ enim pudicitiae nulla venia : non forma, non ætate, non opibus maritum invenerit.

(b) *Salomon in Proverb.* Qui parcat disciplinæ, odit filium suum.

recentia instituta nimia indulgentia. V. Nullis eorum vitiiis blandiri, ne pueri sibi persuadeant & majora licere. VI. Affectus eorum, quum erumpunt, reprime-re, sed rationibus & facili mechanica, non injuriis, in quo imprudentes patresfamilias plerumque peccant. VII. Eos non irritare, vel honesta atque æqua illis denegando, vel nimis severe eos tractando, vel imme- rentes verberando, vel nihil condonando. Nam illud, summum jus est summa injuria, & huc quoque per- tinet.

§. X. Porro VIII. parentum erga liberos officium est, nunquam iis aliquid mali præscribere; ita enim auctoritate parentum scelesti fieri occipiunt, ac dein- ceps vix ulla medicina corrigi possunt. IX. Eorum nævos tolerare, quum corrigi nequeunt. X. Ipsius com- parare bona necessaria: impelluntur enim eo a natura ipsa, quæ non tantum affectum erga commoda libero- rum in parentibus ingenerat, verum etiam aperte do- cet, quoniam liberum fuit parentibus abstinere a con- jugio, liberis non perinde nasci, ut eorum sustentatio- ni prospiciant. Scilicet postquam voluisti finem, ne- cesse est ut & media velis. XI. Arte aliqua, pro cu- jusque conditione, erudire: nihil enim nec pejus, nec infelicius homine. Omnis artis rudi, & nihili (a).

§. XI.

(a) Illa mihi quæstio perardua semper visa est, oculisne, an au- ribus formentur pueri. Ac plerisque nostrum video persuasum, au- ribus: inde sunt illi μακροὶ λόγοι, longi sermones: illa alta lon- geque petita consilia: tam multa & parentum, & pedagogorum oburgationes. Nugæ. Ego oculis factisque instituendos formandos- que pueros existimo; quod præterquamquod sat ostendit ratio, longo quoque didici experimento. Frustra, imbecillis adhuc animis sapien- tiam nudis dictis inculcaveris, factis stultitiam, luxum, petulan- tiam, iracundiam, avaritiam, prodigaliteriam, superbiam, obscæ- na flagitia, otium, totamque illam ac opimam vitiorum segetem, quæis magnæ urbes, ac polita, ut vocantur, secula conspurcantur. Quæ si emendare aut nequimus, aut nolumus, qui depravatam stultamque juventutem lamentamur? Pudet me, cum veterum Per- sarum instituta moresque apud Xenophontem (Κυρὸς Παιδαγωγὸς lib. 1.) lego, nos, qui ceteris barbariem alto supercilio exprobramus, & sa- pientia & moribus ab illis vinci. Nam illi hos in primis cura- bant, ut pueros communi civitatis consilio, ac factis, non nudis dictis, ad justitiam & honestatem erudirent.

nos quoque pertinet. IX. Precibus Deo commendare.

§. XII. Officia fratrum & sororum sunt. I. Ut mutuo se amore prosequantur; is enim amor ad concordiam, familiæ necessarius est; neque quidquam familias magis dissipat, ac evertit, quam hujusmodi inter fratres bellum civile. II. Ut nunquam sibi invicem invideant, quæ causa fuit primi, quod in Tellure contigit, fratricidii, unde tot mala in secta Cainitarum pervenere. III. Ut delatoribus aures non præbeant: sunt enim inter homines quidam ita comparati, ut gaudeant discordias serere, quo in turbido sibi consulant. Itaque cum hujusmodi referuntur res a malignis hominibus, prudentiæ & amoris, ac sinceritatis, fratrum erit statim aperire blandis verbis, ne occulta gliscant mala, sed patefacta evanescant. Est enim animus corporis tumori similis: nisi scilicet evacuetur, perpetuo inflatur, usquedum perrumpat. IV. Ut mutuis commodis invigilent, & sibi auxilium præstent. V. Ut ad virtutem, & pietatem se mutuo excitent, atque adhortentur. VI. Ut minores majoribus deferant honorem: majores vero blandissime cum minoribus agant. Eorum omnium una semper est ratio, quia scilicet id poscit & ipsa hominis natura, & finis familiæ, cui contraire est jus & ne naturæ pervertere.

§. XIII. Jam pertinent ad familias & servi. De servorum adversus dominos officiis nihil interest quidquam hic præcipere: iis enim non scribimus (a). Dominorum vero officia uno verbo comprehenduntur ab Apost. ad Coloss. IV. v. 1., ut scilicet *æquitatem servis exhibeant*. Quam vero dicit æquitatem in sequentibus consistit officiis. I. Ut nihil, nisi justum, & æquum præcipiant, nihil, nisi honestati consentaneum, nihil, nisi cujusvis viribus, ætati, ingenio adaptatum, & in his præcipiendis non utantur verbis asperis, vultuque torvo, sed blandis, ac subridenti. Maxime enim prudentiæ est, cum amore aliquid a servis exigere possis, ne modis petas, qui odium pariant. Nihil pulchrius est dominis, quam amari a servis; ita familiæ concordia

(a) Vide *Elementa juris naturæ*.

diæ & paci prospicitur: ita familia ex hominibus honestis, atque ex virtute viventibus conflatur. Ad rem Cicero lib.II. de Offic. cap.7. *rerum omnium nec aptius est quidquam ad opes tuendas, quam diligere, nec alienius, timeri. Præclare Ennius. Quem metuunt, odierunt: quem quisque odit, perisse expetit. . . . Malus enim custos diuturnitatis metus: contraque, benevolentia fidelis est vel ad perpetuitatem.*

§. XIV. Alterum dominorum adversus servos officium est, ut ne in eos absolutum ac despoticum imperium exercent, nec sibi ullo jure permissum imaginentur; sed dominium limitatum (a), cujus rationem reddere debeant Deo, ut Domino communi ipsorum, & servorum, quemadmodum docet Paullus Apost. ad Ephes. III. v. 9. Despoticum enim imperium manifesto contrarium est naturali hominum æqualitati, de qua superius dictum est. II. Ut iis suppeditent humanissime, quæ ad eorum victum, & vestitum pertinent. III. Ut eos instituunt in doctrina religionis, & morum: in quo officio exercendo, vix dictu est facile, quam sint hujus ævi domini pigri, atque immemores, quantaque eam ob rem improborum & perditissimorum hominum colluvie majores urbes inquinatæ sint. IV. Ut erga eos sint humani & lenes, non cum ipsis tanquam cum pecudibus agentes, in quo item publice peccatur. V. Ut ab iis immoderatos labores non exigant. VI. Ut eos mercede justa non fraudent. VII. Ut in morbis aut senectute eorum rationem habeant: poscit enim id & gratitudo, & peculiaris societatis dominorum, ac servorum amor: ita ut jure inhumanus is habeatur, qui in hujusmodi necessitatibus servos dejicit, aut deserit. VIII. Ut protervos corrigant, & eorum contumaciam blande primum, mox etiam severe, curent, inemendabiles autem expellant domo. IX. Ut non patiantur

B b 2

tur

(a) Tacitus de Mor. Germ. Cæteris servis non in nostrum morem descriptis per familiam ministeriis utuntur (Germani): suam quisque sedem suos penates regit. . . . Verberare servum ac vinculis & opere coercere, rarum. Hæc barbari. Romani, imperio æquo regendis populis nati, loco pecorum habuere.

tur eos ignavos, ebriosos, blasphemos, aut erga alios injuriosos.

C A P U T XIV.

De jure Imperantium, tum de Subditorum officiis.

§. I. **D**ivisio statuum hominum in societate civili viventium præcipua nascitur ex ratione imperii, ut alii scilicet sint Principes, alii Subditi, alii Magistratus, alii Populus. De quorum officiis nunc eodem compendio, quo superiora sunt explicata, dicemus (a). Sed primum paucis expedienda est origo summorum imperantium. Duo sunt in summis imperantibus considerata, persona, quæ imperat, & jura, quibus imperat. Personæ electio a familiis fuit, quæ si ve expresse consenserint, ut ea potius quam altera regnaret, ut in regnis electivis; si ve semel regnatricem familiam elegerint, ut in regnis hereditariis, perinde est. Quod pertinet ad jura summorum imperantium, ea duum sunt generum, *interna*, & *externa*, ut vocant. Interna sunt, quæ respiciunt internam constitutionem & pacem imperii: externa vero, quæ spectant externam securitatem. Utraque a Naturæ fontibus profiscuntur, adeoque jura sunt divina. Atque hoc sensu, opinor, Paullus Apost. in Epist. ad Rom. c. XIII. scribit, *qui potestati resistit, Dei ordinationi resistit, quia non est potestas, nisi a Deo*. Hinc fit, ut in istiusmodi juribus principes soli Deo subsint (b), ac propterea ut a nemine in eorum exercitio impediri queant: non enim a subditis, quorum in obsequio tantum gloria relicta est: nec ab aliis Principibus, cum quibus sunt in statu naturæ, adeoque æqualitatis. Ita igitur sunt *capita politica*, ac *corporis politici moderatores*, ut ca-
put

(a) Nam ea de re acturi sumus copiose in opere, quod superius commemoravimus, De jure, & officiis, quæ ex lege naturæ sequuntur, libri IV.

(b) Hinc Homero emphaticè dicti διοτρεπες βασιλεις, Jovis a-

put corporis physici. Qua ex re fit, ut quemadmodum in corpore physico nullum membrum non imperio capitis paret, ita in politico nulla familia, ac nulla persona Civitatis non uni eidemque imperio parere debeat: alioquin Regnum in Regno erit, totaque Civitas biceps ac sibi inimica.

§. II. Porro jura majestatis interna sunt. 1. Leges jubere. 2. Earum effectum imputare, poenam scilicet, vel præmium civile. 3. Magistratus constituere. 4. Tributa, aut vectigalia imponere, si id Reip. salus exigat. 5. Invigilare circa commercia, adeoque mensuras, pondera, rerum qualitates, monetas, ut scilicet: & copia, & justitia in civitate cunctis modis regnet. 6. Tutelam religionis suscipere, summoque imperio uti in omnes, per quos Reip. salus turbari potest. Hæc ex civitatis, cui præest, fine intelliguntur, nempe publica salute & felicitate. Externa sunt. 1. Jus militiæ. 2. Jus belli & pacis. 3. Jus legatorum mittendorum. 4. Jus foederum feriendorum, ac cetera, quæ spectant externam securitatem civitatis. Ex fine civitatis officia Imperantium deduci debent, quæ his duobus continentur. 1. Omnia efficere, quæ ad tranquillitatem, prosperitatem, & securitatem civitatis necessaria sunt. 2. Ab iis omnibus, quæ civitatem deteriores efficere possunt, cavere: alioquin Deo aut negligentiae, aut injuriæ datæ poenas reddituri sunt acres. Sed de his differere politicæ scientiæ est, quam hoc in loco tradere non vacat (a). Populorum ergo, quod nostra interest, officia explicemus.

§. III. Primum itaque populi officium est Principes honorare, quia eorum jura, & potestas divinæ sunt originis, ut ex superioribus constat. Diserte id quoque præcipit Scriptura sacra Prov. VIII. v. 13. ad Rom. XIII.

B b 3

v. I.

(a) *Sequentes libri plene eam rem tradent, Platonis libri de Legibus XII. plane, aurei: Aristotelis libri Politicorum VIII.: Bodini Opus de Republica: Menochii, & Bossuetii Politicæ: Institutio Principis Dughet: Gordon ad Tacitum: Huberus de Jure Civitatis: Montesquieu in opere illustri L'Esprit des Loix. Ex his alios discere non est difficile, hujus præsertim ætatis, in qua nulla de re nec copiosius, nec accuratius pertractatum est.*

V. I. Nam quemadmodum Episcopi sunt ministri Dei in iis, quæ ad Religionem & pietatem Christianam pertinent, quos *Spiritus Sanctus posuit rectores Ecclesiæ*; ita Principes sunt Dei administri in regimine politico, ut ordinata, ac pacata sit hominum vita. II. Amare eos, ut patres populi, a quibus multa commoda ad nos redundant. Amare porro non tantum amore amicitiae, velut homines nobis natura æquales, verum etiam amore obsequii, qui scilicet cum timore filiali sit conjunctus, vel ut statu superiores. Hæc duo officia ex ipso publico societatis fine demonstrari possunt. Nam quoniam imperantes Reip. bono constituti sunt, quidquid officii in eos a subjectis præstatur, in bonum publicum confertur. Præterea veneratio, amor, ac timor communis civitatis Patris ac Principis in membra ipsa politici corporis diffunditur: probi enim & obsequiosi erga Principem cives se mutuo quoque verentur ac amant; ex quo reciproco amore publica fluit felicitas. III. Iis obedire in omnibus, quæ Naturæ non obstant. Nam jure naturæ imperant, cui contraire sine crimine nequimus. Docet idipsum aperte Paullus Apost. in Epist. ad Rom. cap. XIII. ut intelligere possimus falsam esse & seditiosam quorundam Casuistarum doctrinam, *Leges civiles non obligare in conscientia*; quæ locum habere non potest, nisi iis in gentibus, ubi publico judicio constat, eas leges non esse publicas, sed esse privata esse utilitate. IV. Iis solvere tributa; nam ea seu expresse, seu tacite pacti sumus: neque vero sine iis Principes onera imperii portare possunt. Præcipit hoc ipsum idem Paullus eodem loco. V. Iis servare fidem, non fovere seditiones nec perduelliones: sunt enim hæc omnia contra obsequium, quod principibus debemus. VI. Precari Deum pro iis (a). Nec refert, si quandoque minus sint honesti, ac just; nostri enim non est, sed Dei id dijudicare, quum Deum tantum in terris superiorem habeant Imperantes. Sed & discimus ex Tertulliano, aliisque veteribus Christianæ religionis apologistis, priscos illos Christianos

Deum

(a) 1. ad Timoth. cap. II.

Deum precatos fuisse etiam pro iis Romanis Imperatoribus, qui Christianos exquisitis modis vexabant. Accedit, quod eorum, si quæ forte sunt vitia, magnis commodis, quæ inde in civitatem redundant, compensatur. Tum egregium illud Taciti memorandum est, *toleranda regum ingenia, nec usui esse crebras mutationes.*

§. IV. Quæri solet, qui sint Imperantibus subditi. Respondeo I. Quicumque jus civitatis habent: nam imperans civitati præest. II. Qui lares in civitate fixerunt, etiamsi jus civitatis adepti non sint: ad corpus enim pertinent. III. Peregrini quousque in civitate versantur, in iis, quæ ad totum corpus spectant. Brevi, nulla nec familia, nec persona non supremo imperio subiecta est: alioquin civitas partim imperio regeretur, partim agresti libertate vagaretur.

C A P U T XV.

De Officiis Magistratuum.

§. I. **D**icamus nunc de officiis Magistratuum. Quantopere Reip. intersit ab optimis Magistratibus gubernari, nemo est qui non intelligat. Nihil enim juvat ad publicam felicitatem bonos habere Principes, ac sapientissimas leges, nisi Magistratus quoque, qui præsumt, idonei sint, & boni, sapientes scilicet, ac moribus integri: sunt enim Magistratus non tam ministri legum, earumque interpretes, &, ut Jurisconsultus ait, *Sacerdotes justitiæ*, quam vivæ leges, aut vivæ legum voces, quemadmodum eleganter vocat Marcianus *lege 8. ff. de justitia, & jure*; ex quibus proinde totus Republicæ ordo pender. Itaque optimi, & sapientis Principis est non solum civitatem sanctissimis legibus ornare, sed in primis prudentes scientesque juris Magistratus ei præficere. Pertinet huc Platonis illud vulgatissimum, *felices Respublicæ, in quibus aut Philosophi regnant, aut Reges philosophantur.* Philosophos autem dixit non eos, qui in sterili contemplatione versantur, sed qui in mundo agunt hominum, quique didicerunt & hominum mores, & quæ

civitatibus utilia, quæ noxia sint, quique ipsi viri boni sint, idest & in jure dicendo incorrupti, exprompti, fortes, & aditu faciles, & in rebus gerendis multæ patientiæ. Itaque in Magistratibus amplissima cognitio, & *incoctum generoso pectus honesto*, & magnus animus ac fortis exigitur.

§. II. Primum igitur officium Magistratus est, ut legum scientiam habeat, ita ut in eo ignoratio sit semper culpa, eaque gravissima; in Reipublicæ enim vergit perniciem. Qua in re animadvertendum est, non sufficere eam legum scientiam, quæ ex compendiolis discitur, quæ sunt hodie Legum & Politicæ studia ferme omnia, sed necessariam esse omnigenam prudentiam civilem, & politicam, quæ sive ex natura ipsa hauritur, sive ex doctorum hominum commentariis, sive ex historia nationum, sive ex legibus & moribus propriæ gentis. Alterum officium est, ut prudentiam, solertiam, vigilantiam, maximamque animi attentionem adhibeant in hominum actionibus expendendis, & ad præscripta legum regendis. Tertium est, ut se liberos contineant ab omni affectu amoris, iræ, odii, avaritiæ, metus, &c. neque enim bene judicare potest corruptus judex. Quartum officium est, subditorum salutem consulere, eamque pro viribus curare, tum Religionem veræ patrocinando, tum pacem & tranquillitatem civilem conservando, tum Principi suppeditando sapientissimas leges, & secundum eas prudenter, fortiter, & incorrupte jus dicendo. Plura sunt super ea re a Jurisconsultis Romanis egregie tradita, quæ Tribonianus collegit in primo digestorum libro a titulo IX. ad ultimum, quæ si ut lectu dignissima sunt & leguntur a pluribus, ita opere ipso exigenter, næ eæ felices Resp. quibus hujusmodi præessent mortales. Sed & præclare eadem de re disputatum est sæpe graviterque a Platone in opere aureo de Legibus, & ab iis Auctoribus, quos superius laudavimus.

§. III. His dotibus, & virtutibus qui fuerint destituti ad Rempublicam gerendam accedere sine gravissimo crimine non possunt. Quid enim est aliud eam personam velle gerere, quam nescias? Quid autem
Reip.

Reip. illudere? Quid aliud Deum, & homines contemnere? Nam non idem est magistratum gerere, atque vilissimas quasque artes mechanicas, in quibus sive excellas, sive sis mediocris, aut ineptus, haud magno publico fit malo: est enim nobilissimam Reipublicæ partem manu tenere, &, si nescias, totam pessumdare (a).

§. IV. Officia populorum erga Magistratus sunt, primum, iis obedire in omnibus, quæ naturalia & divina jura non lædunt: nam & vices Principum gerunt, quibus ex jure naturæ obedientia debetur, & contra naturæ jura nihil mortalibus permissum. Secundum, timere, revereri, honorare velut administratos Dei in regimine politico. Diserte id docet Paullus Apostolus in sæpe laudata Epistola ad Rom. cap. 13. Tertium est, iis resistere (b), si aut Religioni Christianæ quidquam adversum jubeant, cum oporteat obedire Deo magis, quam hominibus; aut leges Reip. fundamentales improbo conatu evertere moliantur. Ratio est, quia tunc Magistratus non sunt, sed Reip. hostes clandestini, eoque nocentiores. Non est autem difficile, reliqua capita officiorum nostrorum adversus Magistratus ex his paucis principiis derivare.

CA-

(a) *Subit hic mentem egregium Periclis verbum: ego, Athenienses, domestica magis nostrorum civium peccata pertimesco, quam hostium consilia: πολλον γαρ πεφοβημαι τας οικεας ημων αμαρτιας, η τας των εναντιων διανοιας. Thucyd. lib. 1. 144. Quæ cum omni in Civitate vera sunt, tum in iis verissima, in quibus corrupti jam pridem mores, pro sapientia somnum & crapulam induxere; proque juris scientia Robularum studium.*

(b) *Cum dico resistere, cave ne armis putes, aut ulla vi: sola patientia reliquæque animi virtutes Christianorum sunt arma. Preces igitur adhibenda; & ubi inutiles, indurandum,*

*De Officiis, quæ ex variis animi aut corporis statibus
proficiuntur, ut senum & juniorum, divi-
tum & pauperum, agrorum
& sanorum.*

§. I. **S**unt quædam alia hominum officia, quæ proficiuntur ex diversis statibus animi, ætatum, bonorum fortunæ, & corporis; de quibus hic eodem compendio differemus. Ac principio senum officia enumerabimus. Præclara sunt, quæ de iis præcipit Cic. in lib. de senectute: qui liber curate legendus est. Nos paucis, ad exitum hujus libelli properantes. I. Senum officium est, ut sint graves: ea enim gravitate auctoritatem sibi apud juniores conciliant. Posita est autem gravitas in sermone, & gestu. Sermo esse debet parvus, & sententiarum plenus: gestus rarus, nec ludicrus: nihil enim turpius esse potest sene scurruli. II. Debent esse sobrii; quod præter rationes Naturæ, quas protulit Cicero in laudato libello, Scriptura quoque sacra docet in Epist. ad Titum cap. 2. v. 2. III. Oportet ut sint patientes, nec facile in iram erumpant, quod officium major pars senum prætergrediuntur, atque ita odium sui in minoribus excitant. Præstat ad hanc patientiam acquirendam sæpe memorare, quæ nobis adversa, aut aliis, in antea acta vita acciderint. IV. Affectus suos debent moderari; perridiculi enim sunt in senibus juveniles affectus, non secus atque vestes juvenum: quumque præcipuus senum affectus sit avaritia, omnibus modis conari debent, ut avaritiæ moderentur; præsertim quum absurdum sit eo tempore rebus parcere, quo brevius iis utendum est. Itaque ob hanc rationem tolerabilior videri posset in adolescente in longam spem a natura genito, quam in sene, omnia mox relicturo, avaritia; nisi in iis affectibus partem majorem temperamentum haberet, quam ratio. Nam temperamento fit, ut adolescentes lætiores, eoque liberales sint: senes vero tristiores, eoque iracundi,

di, & avari. Sed potest plurimum in temperamenta procul dubio ratio, eaque cum omnibus, tum senibus præcipue utendum.

§. II. Non esse debent queruli de vitæ brevitate: idem enim dici posset & ab eo, qui octingentesimum annum vixisset; quia nempe præterita ætas quamvis longa, quum effluxit, nulla consolatione permulcere potest stultam senectutem. Quocirca oportet recte, & sapienter vixisse eum, qui sapienter mori velit. Quibus enim nihil opis est in ipsis ad bene beateque vivendum, iis (inquit Cato apud Ciceronem) omnis gravis est ætas. Qui autem omnia bona a se ipsis petunt, iis nihil potest malum videri, quod naturæ necessitas ferat. Sed certe sunt hac in re hominum mores ac judicia prorsus perridicula. Iidem enim nos, qui sæpe de vitæ brevitate conquerimur, quum aut otium est grave, aut vel levissimæ molestiæ angunt, aut spes agitat, temporis quasi æternitatem lamentamur. Ita fit, ut ne ipsi quidem sciamus qualis sit optanda ætas. V. Instruere juniores in vitæ præceptis, ac regulis, ac in eo efficiendo & ætatis auctoritate, & veterum rerum memoria uti. Sed in eo cavere debent a vitio senibus prope communi, loquacitate, & acti temporis laudatione, insectatione præsentis: id enim aut a rusticitate provenit, aut ab indignatione non iusta erga præsens, quod statim sunt relicturi. Quocirca omnia ratione, & maturo iudicio expendere debent. VI. Petere a Deo quotidie peccatorum suorum veniam, scientes quoniam vitæ humanæ terminus appropinquat.

§. III. Officia juniorum sunt sequentia. I. Studiose vitare juveniles cupiditates, quæ hanc ætatem transversum agere solent. II. Audire rationem in omnibus, & monita sapientum, ac seniorum, quam suos privatos affectus. Nisi autem id quotidie perpendant, natura paullo fervidiore, atque exemplis corruptorum juvenum, facile a virtute abstrahuntur, atque in vitia eunt præcipites. III. Deo sancte incorrupteque sacrare florem juventutis, nec expectare, ut postquam juventam per scelera omnia traduxerint, fecem senectutis divæ virtuti offerant. IV. Revereri seniores, &

iis obsequi : senectus enim non gravitate tantum , verum etiam experientia vitæ , longe venerabilis est . Pudet me , quum juvenum Spartanorum & Sinensium reverentiam ac obsequium erga senes animo volvo , præsentis juvenum nostrorum impudentiæ , & immodesticiæ (a) . V. Ambitionem , prodigam effusionem , otium , luxuriam , quæ suevere esse juvenum vitia , summo studio compescere , aut vitare . VI. Fugere multiloquentiam , & jactantiam , in quæ item vitia prona est juvenus . Egregium illud est , & memoratu dignissimum , quod de Zenone Stoico retulit Diogenes Laërtius . Quum enim adolescens jactabundus & loquax per multam horam caput obtudisset graviorum Philosophorum , tum Zeno gravissime , vidi , inquit , ut natura duas aures nobis tribuit , oculosque duos , unum autem os , ut nimirum audiremus , ac videremus multa , loqueremur vero paucis . Tu igitur cave , ne cerebrum per os effundas (b) . Digna Philosopho vox !

§. IV. Est & aliud hominum status respectu bonorum fortunæ : nam alii divites sunt , alii pauperes . Divitum ergo officia sunt . I. Divitiis suis non efferri , nec superbire . Quam enim stolidum est , ea re superbire , quæ repente abire potest ? Iis enim rebus homo fit vere magnus , quæ non extrinsecæ sunt , sed quæ intrinsecæ , idest ratione , & virtute . Vide , ut hoc ipsum

(a) *Xenophontis libri , De institutione Cyri , facile decedunt , & quid facto opus sit adolescentibus , & quam nos vel a Barbarorum , ut Græci quidem vocant , disciplina defecerimus .*

(b) *Itaque Homerus non Telemachum modo σοφρον modestum prudentemque , ac ab omni verbositate sibi timentem , sed omnes ferme alios juvenes Heroum filios summa arte expressit , quo perpulchra lectoribus exempla suppeditaret . Atque illud est lib. iv. 27.*

Ἀνδρῶν δύο , γενεῇ Διὸς μεγάλῳ εἰκτόν ,

Viri duo , qui proli Jovis magni similes sunt .

Erant vero v. 21.

Τηλεμαχὸς δ' ἦρώς καὶ Νηστωρῶ ἀγλαὸς υἱός ,

Telemachusque heros , & Nestoris inclytus filius ;

qui non forma tantum atque indole minime servili , sed animi virtute , quæ sese vultu , gestu , sermone efferebat , Jovi similes dicuntur ; moratis enim temporibus , atque apud honestas gentes , ea usitata erat laudandi formula ,

ipsum monet Paullus Apostolus in 1. Epistola ad Timotheum cap. VI. v. 13. II. Expendere accurate, an bonis artibus divites evaserint; nisi enim id sit, aliena consumunt. Quod eo libentius moneo, quod pauci sunt mortalium, qui postquam ad summa fortunarum evaserunt, retro respiciant. III. Non collocare in divitiis fiduciam suam, sed in uno Deo vivo, quod præcipit Apostolus in eadem Epistola ad Timoth. Ejus officii duæ sunt rationes. Prima quia incerta est divitiarum possessio, atque esse potest Nisus, qui modo Cresus erat, ut eleganter ait Ovidius. Altera quia nec vitam præsentem tranquilliorē, & diuturniorē efficere possunt sine virtute, nec animum expolire, & instruere. Hinc illud Salomonis: *Quid prodest stulto habere divitias, quum sapientiam emere non possit?* Proverb. XVII. Accedit, quod in Scripturis Sanctis fiducia in divitiis vocetur idololatria (a) dicanturque divitiæ esse obstaculo salutis nostræ (b). IV. Non nimium gloriari ob possessionem divitiarum, siquidem non meliorem reddunt animum, nec corpus ab innumeris malis liberant. Itaque præclare Horatius,

..... valeat possessor oportet,

Si comportatis rebus bene cogitat uti.

V. Divitiis non abuti ad luxum, comotationes, atque ad frænum affectibus reliquis laxandum. Nempe earum finis unica est, vitæ sustentatio & commoditas: quocirca qui alium in finem divitiis abutuntur, incite naturæ adversantur. VI. Nunquam contemnere pauperes, in quod vitium divites pronissimi sunt, quod se una cum divitiis metientes, majores pauperibus, erroneo judicio, esse putant, basim scilicet cum statua conjungentes, ut eleganter Nicolius inquit. Esse ergo debent cum pauperibus liberales, eorumque amantes. VII. Iis uti ad honorem Dei, in publicos usus, & ad veræ pietatis promotionem: scilicet inter officia vitæ humanæ præcipua illud locum tenet, *omnia in gloriam Dei facite* (c), ut docet Apostolus. VIII. Contenti esse

(a) *Ad Ephes. V. v. 5.* (b) *Matt. XIII. v. 22.*

(c) *Istuc autem verbum, in gloriam Dei, sic accipi velim, ut*
tum

esse debent iis, quas possident, divitiis, nec immoderata cupidine novas acquirendi cruciari. Sane ex sapientum omnium scitis, nihil inter homines stolidius est, quam dum novis semper bonis studemus, nihilo magis præsentibus uti, quam si non adessent.

§. V. Officia vero pauperum sunt. I. Non murmurare adversus Divinam Providentiam, nec despondere animum. Qui enim sibi persuasit, Deum sapientissime, & effusione maxima suæ bonitatis omnia gubernare, intelligere facile potest, Deo justas esse rationes, ob quas nos in paupertate constringit: scilicet, aut ut irritamenta & illecebras peccatorum nobis eripiat: aut ut fidem, & constantiam exploret: aut ut castiget, quod suis donis abusi sumus: aut ut ab amore mundi nos divellat: aut ut formet ad patientiam. Uno verbo, ita divina providentia comparatum est, ut paupertas & miseria natura ipsa fere semper aut proles sint erroris ac malitiæ, aut sepes. Elegantissime Plautus in Trinummo *Luxuria* sororem germanam esse voluit *Inopiam*. II. Apud se reputare plurimas secum utili-

tum in Dei gloriam factum aliquid existimemus, cum Deo auspice propterque Deum officium fecerimus: cum legem servaverimus; quia id Deus ab homine postulat. Suntque ii & mendacissimi & iniqui, qui cum injusta aut inhumana perpetrant, se Dei gloriam ampliare velle distant. Quæ enim est alia Dei gloria, nisi & eum habere præ oculis perpetuo, & ne latum quidem unguem ab ejus legibus desciscere? Hanc prædicat gloriam David: In lege tua meditabor die ac nocte: hanc Paullus: Mihi absit gloriari, nisi in Christo, cujus ille & præcepta pandebat, & perficiebat in corpore suo: hanc postremo prædicat Natura. Nam si Deus Rex est ac Pater hominum, nihil tantæ majestati placere potest, nisi justitia, caritas inter sese, hominum commiseratio. Illa vero, gentes excindere, Tellurem ferro & armis vastare, ignorantes, aut ambitioni resistentes in pecorum conferre rationes, quæ hominum sunt & scelerata, & infamia, gloria ne etiam esse possunt Dei? Proh facinus! Illud Salomonis ab ejuscemodi velim sæpe ad animum revocari: ABOMINABILES SUNT DEO HOSTIÆ IMPIORUM. Tum hoc Homeri:

..... ΔΕΩΝ Δ' ὑποδάτῃσι μῆνιν
Μῆτι μετὰ σφωσὶν ἀγῶταί μενοι κακὰ ἔργα.
Hom. O. B. 67. Et Virgilii

Sperate Deos memores fandi atque nefandi.

tilitates paupertatem conjunctas habere : gravissimis nempe ac molestissimis affectibus , quibus solent angī divites , nos paupertas liberat . Egregium est , quod de Cresō Lydorum Rege retulit Herodotus lib. 1. tantum enim abest , ut ei Solon immensas divitias inviserit , ut potius beatiorē illo reputaverit pauperem quendam Atheniensem . III. Victum sibi comparare honesto labore . IV. Ob paupertatem suam , dummodo a vitiis non processerit , nec vitiis alatur , non erubescere . Poplicola , qui primus Romanorum Consul fuit , in tanta paupertate obiit , ut de publico ærario deferri debuerit : neque interim ea paupertas tanto viro de parva gloria quidquam detulit . Phocion , quum a Rege Philippo munera magnæ pecuniæ repudiaret , legatique hortarentur accipere , simulque admonerent , si ipse his facile careret , liberis tamen suis prospiceret , quibus difficile esset in summa paupertate tantam paternam tueri gloriam , his ille : *Si mei similes erunt , idem hic* , inquit , *agellus illos alet , qui me ad hanc dignitatem perduxit : sin dissimiles sint futuri , nolo meis impensis illorum ali , augerique luxuriam* . Nepos in Phoc. V. Non debent esse superbi : pauper enim superbus intolerabilis est . VI. non abuti eleemosynis ad intemperantiam , & luxum , quod qui faciunt , graviter peccare censendi sunt contra finem eleemosynarum . VII. Non mendicare , si aliter sibi victum quærere possunt : est enim id manifestum furtum in Civitatem . VIII. Pre-
~~ari~~ Deum continenter , ut ipsis det , quo patienter ferre paupertatem possint .

§. VI. Ratione corporis alii homines sunt fani , alii ægroti . Sanorum officia sunt . I. Incumbere quantocius virtuti , dum valent , neque expectare , ut Horatius eleganter dicit , *dum defluat amnis* . Id enim est temere de vita longæva judicare . Præterea nemo certus esse potest se postea commode facturum , & difficilius fit , quum vitiorum habitus profundas jecerint radices . II. Nunquam sibi blandiri , sed quotidie se mori posse cogitare . Digna lectu sunt , quæ super hac re passim præcipit Seneca in Epistolis . III. Sua negotia omnia , dum bona valetudine possunt , ita disponere ,
ut

ut nihil eos turbet instante morte : est enim id prudentiæ œconomicæ . IV. Frequentibus precibus omnia ad bene moriendum subsidia a Deo implorare .

§. VII. Ægrorum autem sunt . I. Reputare secum Deum ipsis morbos immisisse , quibus aut purgaret a vitiis , aut præpararet ad virtutem . Dici vix potest , quantopere ægrotos levet , atque constantiores efficiat hæc cogitatio . II. Deum benedicere , quemadmodum sanctus Job , nec murmurare ; illud secum cogitando , quod Salomon dicit , *meliora sunt vulnera diligentis , quam oscula odio habentis* . III. Quin gratias Deo agere , qui quum jure severius possit animadvertere , tam leviter puniat . IV. Vitam suam , quum præsentem , tum veterem accurate expendere , num singulari aliquo crimine eum morbum meruerint . V. Remedia necessaria non negligere , ne videantur obistere Divinæ Providentiæ , saltem dum remedia non sint magis intolerabilia , quam mors . VI. Non quærere sanitatem malis artibus . Itaque velut impia rejicienda est eorum opinio ; qui docent , si morbus sit ex maleficio , licere maleficio maleficio dissolvere . VII. Se ad mortem sponte componere . Quid enim turpius , & Christiano potissimum homine indignius , quam expectare ut ab aliis vix ei disponatur ad mortem , ad quam continenter tendimus ?

C

ADHORTATIO

AD STUDIA LITERARUM,

Habita in Neap. Lyceo, in solemnī Studiorum
instauratione an. 1749.

I.



*U*i hodie, *A*uditores, ad *l*iterarum *s*tudia aggrediuntur, ac eorum quoque *p*le-
*r*ique, qui longius sunt progressi, ita de
*h*umanitatis *D*isciplinis differunt, ut
*h*abere illas videantur quasi distractas,
*q*uæque ipsæ per se constare possint, *h*u-
*m*anæ rationis particulas, natura & constitutione diver-
*s*as, officio, & fine discrepantes, ac domicilio tantum,
*n*on secus atque plantas, quæ communi solo committun-
*t*ur, cognatas copulatasque. Quam late hæc opinio perma-
*n*averit, scire hinc licet, quod ex tanta hominum copia,
*q*ui litteris animum applicant, vix unum, aut alterum
*r*eperiamus, qui tota earum spatia percurrat, quique tunc
*d*emum se in singulis profecisse agnoscat, quum omnes
*u*no veluti vinculo, & , qua sunt a natura factæ, con-
*c*atenatione junxerit. Reliqua turba & Philosopho-
*r*um plebes id sibi pensi datum credunt, ut ceterarum
*i*ncuriosi, partem quampiam decerpant, seu quam sors
*o*btulerit, seu quam domestica rationes suaserint, seu præ-
*j*udicata veterum auctoritas probaverit, atque in ea, ni-
*h*il de communi earum fine & officio solliciti, utcumque
*s*ese exerceant, suæ, ut pecora utilitati, aut voluptati ad-
*d*icti, generis humani publicæ obliti. Accedit altera, ut
*m*agis quoque falsa, ita pestilentior, non discentium mo-
*d*o, sed quorundam etiam Doctorum, vetus persuasio,
*l*itteras ita menti acuendæ, augendæ, informandæ natas,
*u*t præter earum sit officium, aut animum quoque attinge-
*r*e, ac ad honestatem componere, aut in Civitatem de-
*s*cendere, artes & instituta humana perfecturas. Itaque
*r*ite, ac sancte quoque, si Diis placet, tradi illas, aut

disci etiam in summa morum pravitate arbitrantur: suntque nonnulli, qui tam perbelle sibi plaudunt, tanquam egregie profecerint, quum impudentiores in criminando, in laceffendo audaciores, in humanis divinisque rebus permiscendis promptiores evaserunt. Hinc Scientiarum distraetio, discidium, vasticies venit: hinc tot in litteraria republica seditiones, & singulorum adversus singulos machinationes: hinc doctrinarum quarundam primum contemptus, mox etiam averfatio, & odium: hinc alii super alios congesti ad stupendas moles libri, partim inepti, & perridiculi, partim avitæ religionis, aut antiquorum morum turbatores, ut ad veram sapientiam contendentibus non solum periculi plenum, verum etiam implicitum & undequaque obseptum iter esse videatur: hinc tandem tot monstrosi errores, quibus a fine suo revocatae litteræ, sæpe in publicam perniciem sunt conversæ. Atque unde, queso vos, Auditores, plurimorum animis hæc nuper incessit suspicio, plusne utilitatis, an damni, generi humano litteræ afferant? Unde quidam ut ne cohererent absterriti, non pauci abalienati, ne tuerentur? Intelligo nunc, Auditores, præclare & sapienter majores nostros egisse, qui sanctissimis legibus constituerunt, nemini ad summos honores in Scientiarum Academiis aditum patere posse, qui supra morum probitatem, primum per universum litterarum curriculum non fuisset ipse manu ductus, tum singulas earum partes magna cum laude docuisset. Scilicet experimento didicerant, & inutile esse disciplinas, nisi humanitatem, honestatem, justitiam importent; & unum esse Scientiarum omnium quasi corpus, ut nisi partes ejus omnes sibi mutuo opem præstent, ac officia reciprocant, continuo alias ab aliis præcisas distrahi, & dissipari, atque a fine suo longissime aberrare. Quamobrem hanc ego sapientum præcipuam esse debere diligentiam censeo, ut in id operam ponant omnem, quæ opinioniones illæ ex vulgari Philosophorum animis tandem aliquando eradicentur. Sublata enim eorum malorum, quæ vulgo litteris tribui solent, causa, ecquis præterea usque adeo futurus est iniquus, ut litteras, ac litterarum studiosos homines criminetur? Nam earum in rempublicam non solum utilitatem, sed necessitatem quoque

(III)

satis demonstrant & Rationis humane natura, & natura Legum ac imperiorum, & necessitas atque utilitas Arrium. Sed quoniam ea nunc de re mihi dicendum est, ut nobiles adolescentes, qui huc frequentes convenerunt, intelligant, nulla in re se utilius operam suam collocare posse, quam in ea, qua una sibi, patriæque cari vivant: vos oro, atque obtestor, sapientes, publicæque felicitatis amantissimi viri, ut quando ego tanta causæ dicende nec ingenii viribus, nec eloquentia ullo modo par esse possim, ipsi iudicio ac favore vestro, quasi mihi succenturiati, adsitis.

II. Rationem, idest insitam illam animo vim, qua sentiamus intelligamusque, quæque quæ percepta, & comprehensa sint, conferamus inter sese, & ad calculum adducamus, hanc, inquam, pervigilem, actuosamque vim & facultatem in communem generis humani utilitatem nobis a Deo esse datam, eo minus dubitari potest, quo maiorem illa & ampliorem finem spectat, quam cuiusque est privata utilitas. Nam quid adinuisset nobis tam longe lateque circumspectantem tribuere, nec præsentia modo comprehendentem, sed & remotissima prospicientem, antecedentia cum consequentibus connectentem, & communes causas ac fines indagantem, si privata cuiusque utilitati, privato abdomini tribueretur? Neque enim Deus supervacua machinatur. Certe in brutis, quæ neque in societate omnium cum omnibus a Natura creantur; neque ^{quoque} ~~quæque~~ ineunde dotes ullas habent, tam late cognitio patet, quam sensus; tam vero late sensus, quam finis, idest suus cuiusque venter. Nulla apud ea generalis communium causarum & finium, nulla reciprocorum officiorum, eorumque regulæ & mensuræ, nulla abstracta, & ab omni corporearum rerum ambitu segregata cognitio: humi prona fingit Natura, & ventri obedientia, ut necessarium non sit vitæ agendæ & tuendæ instrumenta habere patentiora. Aristoteles vir in primis acutus & doctus hominem ad communitatem generari sic colligit, quod inter tot animantium genera is tantum præditus sit sermone, quo animi sensa distinguere possit, notare, & cum aliis communicare. Quorsum, inquit, hæc, nisi cæcum & societatem spectarent? At idem, ac magis etiam ne-

cessario , ex ratione , cujus sermo apud alios interpret
quidam est , colligere potuisset . Nam aliorum intellectus
ergo loquimur , & continuo conticescimus , si id esse su-
pervacaneum sentimus . Accedit , quod ubi nulla etiam
nostri utilitas agitur , loqui tamen aliquid , vel audire ve-
limus . Quæ sollicitudo & curiositas , quæ in iis ani-
mantibus , quæ ad societatem non sunt facta , nulla esse
deprehenditur , satis , ut opinor , perspicuum argumentum
est , rationem humanam non ad nostri tantum & priva-
tam utilitatem , sed ad generis humani publicam pertine-
re . Quomodo si oculi differere possent , illi intellige-
rent profecto , se non sui tantum , sed totius corporis cau-
sa in eo esse constructos : neque enim nisi ita esset , tam
late ac longe intueri oporteret , nec in eo esse positos lo-
co , unde totum corpus modico flexu moderari possent : ex
quo illud efficerent , tum rite se videndi munere persan-
gi , quum toti corpori vident , ac videndo toti consulunt .
Qua ex re conficio , si quid cerno , & rationem commu-
nitatis ergo nobis datam , & tum recte & sapienter ea
nos uti , quum non nobis tantum scimus , sed parentibus ,
patriæ , amicis , toti denique hominum generi , quocum
naturali quadam cognatione amicitiaque continemur . Quæ
in re sic ego judico , Auditores , eos omnes , qui non
hoc sibi rationis munus proponunt , ratione , invita ipsa ,
indignanteque , abuti , atque Naturæ ipsi vehementer ad-
versari , sibi que aliisque gravis miseriæ causas struere ne-
cessereque .

III. Sed quæ erit via , dicit aliquis fortasse , recte
ratione utendi , ut ne ea extra munus officiumque suum
evagetur ? nempe aut nulla omnino , aut sola veræ litte-
ræ , disciplina nimirum & institutio sapientiæ . Est enim
ratio formanda , est augenda , est instruenda arte & re-
gulis . Formatur autem & instruitur præceptis , habitu-
que ratiocinandi : augetur rerum notionibus . Has velut
materiem rationis ; illam artem dicere possumus . Nempe
Naturæ simplicem nobis , nudamque sentiendi , cogitandi ,
intelligendi facultatem tribuit : materiem studio & indu-
stria comparandam præcipit : artem exercitio contrahendam .
Jam quæ Artium aut Scientiarum est , quæ in rationem
aut instituendam & formandam , aut augendam ac emen-
dan-

claudam non aliquid conferat ? Nam inveniendi & ratiocinandi, tum differendi & docendi facultatem, Logica, Rhetorica, Poetica efficiunt : accuratius etiam subtiliusque demonstrandi & concludendi Geometria & Algebra. Materiam Naturæ suppeditat & hominum historia: hanc in artem effingunt Physica, Astronomia, Ethica, Theologia, Jurisprudentia. Sed & necessarium est rationi formandæ augendæque, ut cum aliis communicemus quæ didicimus, & ab aliis vicissim sua accipiamus, quo ex omnium mentium humanarum velut confluentibus rivulis sapientia coalescat. Eo comparata sunt Grammatica, & Linguarum studia. Quæ quum sint, quam Scientiarum, quam Litterarum partem contemnemus, quum nulla sit, a qua humana ratio non excolatur, informetur, augeatur ! Aut potius, quum nihil aliud sint Scientiæ omnes, nisi una formata & adulta ratio, hominumque utilitatibus intenta, qui illas aut negligamus, aut oderimus, quin non toti tantum hominum generi, sed nobis irati insensique simus ? Est enim, per Deum immortalem, qui pejus sibi conciliatus esse videatur, qui vehementius utilitati, & felicitati suæ adversetur, quique solemnius insaniat, quam qui intellectum & rationem, communis & privatæ vitæ instrumenta, sibi invideat ? Quamobrem, Auditores, nisi pœnitet, nos non belluas, sed homines, idest rationales & sociabiles animantes esse natos, intelligamus, naturalis esse officii, summis studiis litteras percolere, sine quibus, ut agrestes barbarique vix rationis participes, ita ne homines quidem ac sociales esse queamus.

IV. Non sum autem nescius, esse qui clamant, a Diis iratis homini rationem esse tributam, quæ cum exiguo campo, tum undequaque fallaciis septa, non modo nullam utilitatem nobis afferat, sed summas inducat calamitates. Quid ? nulli ne ii nati esse vellent ? an stipites & bruti ? an constante infinitaque rerum comprehensione præditi ? an potius cum ea, qua gignuntur, ratione, sed ab iis malis, quæ pravus rationis usus haud dubium peperit plurima, immunes ? Detur optio. Est quisquam, qui diu deliberandum in re minime perplexa atque ancipite arbitretur ? Neque enim eo insane eva-

dere nos posse puto, ut aut nulli, aut stipites ac bruti, aut Dii nati esse velimus. Nam & ut non sumus, & ut Dii simus, idest undequaque perfecti atque absoluti, cum tota pugnat rerum natura, quippe extra genitarum rerum conditionem: itaque ut non adpetere, nisi stulte, ita super iis deliberare sapienter non possumus. Non ergo rationem accusare isti videntur, si recte adhibuerimus, sed rationis abusum; quum maxima sint, & in singulos homines, & in totam societatem rationis utilitates, modo ne ea positas a natura regulas adrogans impudensque transiliat. Quis autem ignorat, tum maximos esse rationis abusus, ac maximas hominum ab hominibus calamitates existere, quum neglecta ratio brutescit? Necessesse est enim, ut, inculta ratione, sensus & adfectus dominantur, ex quorum imperio cuncta, quae patimur, mala derivantur. Nam sic natura ingeneratum est, ut, quum adpetitus sint vehementes praeter, aut contra rationem animi commotiones, tum irrumpant lymphati ac imperent; quum ratio paret, parituri, ubi illa imperet. Ac quemadmodum generosus equus imperat, nisi pareat: ita nisi ratio a sensibus sese extricet, & se sibi vindicet, ut alteram hominis partem cohibere possit, fieri nequit, quin in vile servitium a libidine rapiatur. Una ergo via, una ars est huiusmodi mala averruncandi, rationem excolere, atque loco & dignitati suae restituere; quod qui efficere negligunt, non ii insane rationem accusent, sed suae aut ignaviae, aut libidini irascantur. Et vero ad rationem perficiendam, ac adfectus intra suos ^{limites} ~~limites~~ ^{coercendos} ~~coercendos~~ date sunt leges, non tantum antiquiores illae, quae naturales dicuntur, & a quibus sunt ceterae aut expressae, aut contrivatae, sed haec etiam populorum tam multiplices, & variae, quae civiles appellantur. Sed quid quaeso vos, Auditores, sunt leges, nisi scita sapientum? qui earum finis, nisi ut rationi praesidio sint? Nam quum in omni lege Decretum sit, & Sanctio; illo mens efficitur & informatur ratio; hac velut freno, compescitur cupiditas. Utrumque autem quantae intelligentiae, providentiae, sapientiae opus esse putabimus?

V. Sed quando ad res humano generi propiores me detulit oratio, efficiam, ut ex hoc imprimis loco intelli-

gatis, Auditores, quantopere toti Reipublica necessariae sunt litterae. Nullam esse societatem, ac ne latronum quidem & piratarum, quae sine legibus aut primum coire, aut deinde se conservare possit, id equidem neminem ignorare arbitror, Auditores. Nam unus esse debet sociorum omnium finis, una mens, una officia: nulla hominum communitas, ubi singulis sui privatiue fines, ubi alii ab aliis dissident, vitalis esse potest. Ut si unumquodque corporis humani membrum sensum hunc haberet, ut posse putaret se valere, etiam a reliquis praecisum, quapropter seditionem ab illis faceret; debilitari, & interire totum corpus necesse esset. In tanta autem hominum varietate, tamque multiplici decretorum & opinionum copia, quae esse potest ratio & via, qua in concordiam adducantur, qua idem sapiant, idem velint omnes? Nempe aut nulla, aut lex, ut ea quasi quadam virgula divina omnes regantur. Haud inscite igitur quidam sapientum dixere, non societatem tantum, sed omnem eam humanitatem, qua in Civitatibus perfruimur, & qua a belluarum vita discernimur, descriptis legibus deberi acceptam. Quis enim vestrum ignorat, ita naturam rerum tulisse, ut quodam tempore homines juris naturae incuriosi, civili nondum descripto, fusi per agros, ac dispersi vagarentur, tantumque haberent, quantum manu & viribus per caedem ac vulnera eripere aut retinere potuissent? Atque inter hanc vitam perpolitam humanitate, & illam immanem, nihil interest, quam jus, atque ius; necesse enim est, ut vis imperet, ubi lege homines non aquantur.

VI. Quae quum ita se habeant, ubi nulla etiam adsint alia argumenta, quibus litterarum in rempublicam necessitatem & utilitatem demonstramus, certe est hoc palmare, non constare sapientiam sine litteris, nec sine sapientia leges, nec porro sine sapientissimis legibus rempublicam consistere. Quod adeo verum est, ut praecclare veteres esse leges munus Deorum dixerint: quod ego sic accipio, non ut mendacio legibus auctoritatem ac maiestatem conciliare voluerint; sed ut ostenderent, inter curas humanas nullam esse debere consilii, rationis, sapientiae pleniorum, neque idcirco aliam Deo digniorem, quam

legislationem . Scilicet quum leges populis in societate condendis continendisque , ac securis & beatis efficiendis dentur , non illæ esse possunt ratione destitutæ , sed potius expressæ a natura ipsa populorum , locorum , temporum vitæ regulæ . Ac quemadmodum quæ moventur & aguntur machinæ naturis & constitutionibus suis consentaneæ aguntur , frangunturque citius , quam permoventur , ubi contra impulerimus ; eodem modo nisi natura & constitutioni singularum societatum , tum populorum moribus & temperamentis ; viribus quoque & opibus ; loco præterea & tempori ; tandem finibus & ordinibus leges adaptentur ; populis sunt graves , principibus molestæ , plenæ discriminis , & ubertissimæ irarum , bellorumque causæ . Quid quod ne supremus quidem ille ac omnipotens Deus rerum omnium opifex & moderator , nisi ex rerum ipsarum natura velut manantes , leges ullas intelligit , aut sancit ? quippe nihil illa suprema majestas , nisi mente & ratione sancit . Itaque qui res Naturæ contemplantur , ii non sine incredibili quadam animi voluptate animadvertunt , iis esse singulas legibus constructas , iisque gubernari , ut nihil aptius , nihil sapientius , nihil præstantius excogitari possit .

VII. Quapropter intelligitis , Auditores , ut nihil tam vitæ & societati hominum necessarium , quam jura describere ; ita nihil esse inter homines , quod majorem sublimium rerum intelligentiam , plurimarum & diversarum prudentiam , mentem perspicaciorem , & ampliorem , adeoque Artium omnium & Scientiarum opem desideret , nequam propriis quemque populum legibus moderari . Quod nisi verum esset , qui tanta doctorum hominum consensione dicere Plato potuerit , tum beatas fore respublicas , quum aut Philosophi regnant , aut Reges philosophantur ? Certe inter omnes nationes ea opibus , imperio , & publica felicitate semper præcelluerunt , quæ sapientioribus legibus gubernatæ sunt , ut olim Ægyptii , Judæi , Græci , Persæ , Romani ; nunc vero maxima Europæ pars . Atque ; quod præcipue animadvertendum est , ex ipsæ gentes , quarum imperium sempiternitatem spectare videbatur , non primum imperium & libertatem amiserunt , quam quum vetustis legibus nullus apud lascivientes ju-

niores honos esse cœpit , nulla dignitas , nullus amplius locus . Adeo illud verum est , quibus primum fundamētis res humanæ increverint , iisdem stare , nec cadere , nisi quum illa prœlabuntur ! Oro autem vos , Auditores , quid erant tot populorum leges , nisi veluti succus sapientiae ac temporis diuturnitate consummata intelligentia ? Quid nisi Philosophiae partus ? Alioquin cur non eo quoque imperii & felicitatis venire penitissimi Scythæ , & Lapones , Peruviani , Brasiliæque , Caffari , aut interiores alii Africæ populi , moribus & vitæ consuetudine efferati , litteris ac legibus destituti , ac una pene dixerint forma effigieque corporis a belluis discriminati ? Quod si quidam venire , aut longa domi bellicę schola edocti venire , ut olim Romani , nunc Rutheni : aut ab iis , quos belluina vi devicerant , absorpti , & paulatim exculti fuerent , ut penitissimi Scythæ ; aut quasi turbines repente dissipati sunt & dispersi , ut Gothi ; aut non Regnum , sed vis , & immanitas eorum fuit , ut Turcarum . Nam Turcæ impetu primum & robore corporum proruperunt : tum nostrorum lascivie , atque superbia , scilicet iis , quæ secundæ res amant , ferociiores facti , dominationem constituerunt : sed eam qua vi bruta occupaverunt , eadem retinent . Quumque nihil tyrannidi tam sit contrarium , quam sapientia , leges , iustum imperium ; omnia discriminanda putaverunt , quæ rationem perpolire possent , metum populis detrahere , ac libertatem , opes , felicitatem importare . Non corpora tantum , sed ingenia hominum fecerunt mancipia , ut una armorum vis , unus regnaret metus . Itaque ut sibi imperium firmarent , tot gentes ac populos in miseram servitutem dedere , perpetuis opprimunt ærumnis , atque pecorum indolem induere cogunt . Est quisquam , qui ubinam gentium hanc rempublicam exoptet ? Est qui hanc populorum felicitatem vocet ? Est ergo perspicuum nec imperium esse posse , ubi nullæ sunt litteræ ; & si quod est , id non populis beandis , sed iis opprimendis , vexandis , extinguendis aptius esse .

VIII. Nec vero ob id tantum litteræ in publicam felicitatem influunt , quod sapientiam legislatricem gignunt , aluntque , sine qua respublica aut non esse , aut nonnisi discors , & in seipsa ruens esse potest , sed eo etiam plu-

rimum, quod Artes humanae vitae necessarias aut pariunt, aut acceptas provehunt longissime, aut repertas perpoliunt, efficiuntque faciliores & utiliores. Atque utinam pro ejuscemodi argumenti dignitate nobis aut oratio & facultas, aut tempus suppeteret. Sed Adolescentibus ingenii acumine ac diligentia praestantissimis vel rerum capita indigitasse satis superque erit. Artium alias esse humano generi necessarias, alias longe utiles, alias ad commoditatem ac vitam ornatum & decus conferre, in perspicuis est ac confesso. Necessarias Natura ipsa, eorum, sine quibus esse non possumus, alacris indagatrix, excogitavit; utiles hominis sollertia; reliquas amor voluptatis invexit. Quaedam quoque sunt, quas fortuna cuidam & casui debeamus. Quae sitis quas litteris? sunt haud dubium suae. Sed ubi nulla sint, parva ne Ars est sollertia & sapientia ipsa, quam litterae & efficiunt & alunt? Est enim ceterarum omnium suprema quadam Ars & regula, sapientia. Ac ut Artes suis quaque instrumentis opera perficiunt: ita sapientiae instrumenta sunt Artes. Ea perpoliuntur; ea perficiuntur: una illas regit sapientia: una agit, ac quasi animat. Sapientiae est, quod paucioribus instrumentis, & usu faciliores, quam olim, utantur Artes: quod paucioribus viribus & breviori tempore indignant, uni debemus sapientiae: a sapientia didicimus Artes ad ea adhibere, ad quae apud veteres minime pertinebant: eadem usque Artium antiquioribus ignotos adinvenit. Ita factum est, ut & publice sint apud nos pervagata, & populares, ut ~~ita~~ ^{ut} dicam, evaserint. Inde privatis quoque opes tanta, quantas vix integrae olim gentes habuerunt: inde commoditates ac voluptates eae, quibus si majorum nostrorum vita comparetur, videri possumus, non modo a summa inopia ad summam copiam, sed ab immanitate ad humanitatem translatis. Artium harum pleraque antiquis nota: nota barbaris; at quotus eorum quisque, quo ire possent, perspexerat? Quotus quisque omnes earum usus comprehenderat? Itaque quum illi, tum isti etiam in Artium apparatu, vita dulcedinem, cui illic efficienda nata sunt, ignoraverunt. Nempe quia nec litterarum apud illos commercium, nec ratio adulta & perfecta, Nam ex quo

Typographice artis (quam ego de Cælo delapsam semper putabo) beneficio factum est, ut rationis humanæ cogitata & inventa inter dissitas terra marique regiones tam facile communicarentur, atque ex singulorum intelligentia, veluti ex collatis succis, cujusque mens succresceret; incredibile dictum est, quantum augmentum Artibus omnibus, quanta facilitas, quanta promptitudo accesserit: incredibile quam illic longe lateque defluerint: quam uberes fructus, ac quantas vitæ commoditates adduxerint. Quis ignorat, eo intra bina sæcula ventum esse opum & voluptatum, quo per infinita antea acta minime veneramus? Equidem, Auditores, mecum ipse quandoque præ lætitiæ illacrymari cogor, dum præsentem totius Europæ quum faciem atque habitum, tum in primis interiorem spiritum & mentem, tacitus meditor, & cum veteri Europa contendendo. Nam olim obsideri tantum, nunc tandem habitari & coli mihi videtur. Orbem, quos Oceanus a nobis determinaverat, junximus: terras ac maria emensi sumus: iis quoque, quæ superna nobis sunt, & quorum admirandorum tantum causa natum se dicebat Anaxagoras, Cælo & Astris, ad commercia agitando, devehendas opes, & pretiosiora quæque ultimarum gentium in Europam deportanda, usi sumus. Debemus hæc navigationi: hanc Nauticæ & Geographicæ: has Opticæ & Astronomicæ; istas Geometriæ: omnes Philosophiæ, idest amoris & studio sapientiæ. Quo igitur ego alio argumento totius Philosophiæ idest litterarum omnium in rempublicam utilitatem demonstrabo, quum videam ita populorum felicitatem cum sapientia esse conjunctam, ut altera alteram perpetuo sequatur? Culmen attingisse videntur hæc nostra ætate litteræ: eodem evasere commercia, artes, vitæ commoda, opes, voluptates. Humiliores illæ superiori jacebant: minor erat Europæ ubertas, minor publica felicitas: supererant adhuc antiqui ruris vestigia. Si vetustissima tempora respiciamus, nullas reperiemus, aut modo natas. Sed videre quoque possumus homines quasi terris prorepentes, propter glandem & cubilia unguibus & fustibus pugnare. Cur ergo, totam hanc Europæ felicitatem litteris non retulerim acceptam?

*IX. Sed audiamus litterarum vituperatores. Ii non
unius*

unius sunt generis , nec ex eodem omnes loco in nos in-
 petunt . Nani quidam sunt , qui rerum ignari humana-
 rum perverridiculos eos vocant , & homines reipublicæ inu-
 tiles , qui tota vita in Cælo & Astris contemplandis in-
 tenti sunt . Hos ego morabor ? Qui si sciant , nec sine
 Astronomia Geographiam , nec sine Geographia Nauticam ,
 nec sine Nautica ingentes , quibus jam luxuriamur , opes
 esse posse , minus illi , puto , leves & inconsiderati sint .
 Alii sunt , qui in Mathematica studia magis etiam in-
 vebuntur . Hos ego humane vitæ peritos dicam ? Qui
 ignorant quantum tota Mechanica emolumentum humanis
 laboribus afferat ? Qui commerciorum scientiæ , quæ no-
 bilissima est & utilissima , sunt expertes ? Qui & Bel-
 licæ , & Architectonicæ artis sunt inscii ? Qui fortassis
 et Musica quidem capiuntur ? Alioquin qui ignorare pos-
 sunt , has omnes Artes a Mathematicis disciplinis esse
 progenitas , ab iis ali , iis propagari , expoliri , perfici ?
 Jam sunt alii , qui adversus Linguarum , & Antiqui-
 tatum studiosos debacchantur , quasi homines sibi nimium
 arrogantes , intempestive loquaces , intempestive arcanos ,
 nugigerulos , reip. fucos . Sed secernamus , amabo vos ,
 hominum mores a litteris : neque enim illud nunc agi-
 tur , ut quorundam litteratorum vitia , si quæ sunt , de-
 fendamus . Rerum antiquarum studia & publico regimi-
 ni , & Artibus conferre , is dubitare potest , qui histo-
 riam quoque omnem inutilem esse censeat . At qui non
 ignorat , quantæ sint in totam humanam vitam , ~~eiusque~~
 partes omnes , historiæ utilitates , quanta accessu Artibus
 ex veterum , aut peregrinorum repertorum collatione sit
 facta , is eam diligentiam quam viri antiquitatum stu-
 diosi in antiqua aut peregrina historia e tenebris eruenda
 collocant , non modo utilem , sed necessariam quoque sa-
 teri cogetur . Ac vero non intelligo , Auditores , quid sit ,
 ut vetustatis rudera quædam , nummos , picturas , sta-
 tuas , harumque rerum fragmenta tantopere aestimemus ,
 ac veluti sacra veneremur , & invideamus plurimis , ni-
 hilque non faciamus , quo possidere possimus ; eos vero ,
 qui inde hominum , rerumque seriem longa ætate turba-
 tam restituerunt , qui , quousque majores nostros imitari
 possemus , docuerunt , contemnimus ? Alii tandem Phy-
 sica

sic studia, velut incerta, atque idcirco inutilia traducunt. Sed ut nihil dicam de eorum, quum in alias Artes, tum præsertim in Medicinam utilitate, parum ne illa privatae publicæque felicitati conferunt? Hæc enim nos quum ceteras res plurimas, tum, quod est difficillimum, docuerunt, ut nosmetipsos nosceremus; hæc ut Deum contempleremur: hæc ut humanitatem & justitiam coleremus. Nam quum Cælum, Terras, Maria, rerumque omnium Naturam perspexerimus, eaque unde generata, quo modo obitura, quid in iis mortale, & caducum, quid divinum æternumque sit viderimus, ipsique omnia moderantem & regentem Deum pene prebenderimus, nosque non unis circumdatos mœnibus populares alicujus definiti loci, sed cives totius mundi, quasi unius urbis agnoverimus: in hoc conspectu & cognitione tum totius, tum nostræ præsertim naturæ, quam ipsi nos moderamur, quam justitiæ & pietati obsequentes sumus, quam denique beati? At enim minutiora sunt quandoque hæc studia, quam ut iis ingenuum hominem, & communi bono natum incumbere par sit. Mores sunt isti hominum, non litterarum, Auditores. Qui quod ad nullius rei summam, nisi parvis præcedentibus initiis perveniri potest? Teritur quoque minutis quibusdam, & ab hominum commercio velut semotis questionibus, ingenium acuitur, ac ad severiora exercetur. Tum nonnulla hujusmodi cum sublimioribus aut utilioribus dogmatibus quasi necessariam habent concatenationem, et non posse videatur ad hæc deveniri, nisi illis emensis. At ubi cetera desunt, genus quoddam sævitæ est, postquam quis majorem curarum partem in seria contulerit, prohibere, ne & suo ingenio indulgeat, neve aliquando, quod Thebanus Epaminonda solitus erat, equitet in arundine longa. Detur hæc naturæ venia: sint animorum quedam diverticula, in quibus, veluti soluti & liberi, spatiamur.

Sunt igitur, si quid confeci, litteræ omnes hoc etiam nomine reip. utiles, quod & Artes perficiunt, sine quibus illa esse nequit; & peregrinas important; & feros emolliunt mores, ac societatem faciunt jucundiores. Quod si qui sunt, qui præterea non solum ut inutilis, sed

sed publice etiam perniciosas eas accusare pergunt, eos oro, ut quoniam aut rerum ignorance peccant, aut morum quadam ferocia, suæ in primis nature studiosiores esse velint: tum in Civitatum, & Imperiorum indolem, Legum, & Artium necessitatem diligentius inquirere. Intelligent ii profecto, nisi stipites sint & bardi, & rationem, qua a Deo ornati sumus, totius generis humani felicitatem natura sua spectare: & tum ad id esse idoneam, quum adulta est, idest litteris formata & corroborata: & nullam hominum societatem, ut non sine Legibus, Artibus, Religione coalescere primum, tum consistere posse; ita non sine litteris & sapientia, sine quibus nec Leges, nec Artes, nec Religio, qua nihil carius habere debemus, esse & conservari possunt. Me quod attinet, Auditores, id nunc unum a Deo optimo maximo optaverim, ut quandoquidem consueta fastidimus, nec bona, nisi quum amiserimus, aestimare suevimus, in barbaras terras, ac ultra Oceani fines repente transvehamur, indeque, quasi de specula quadam, res humanas contempleremur, ac nostra cum feris nationibus conferamus. Tum enimvero animadvertere possimus, quanta sit earum nationum felicitas, ad quas tantum Dei beneficium, quantum sunt litteræ & sapientia, delatum est: tum sentire quanta sit immanitatis, factum esse, ut quod natura, & majestate sua barbarorum quoque admirationem & amorem excitat, apud nos egeat patroni; illud nempe, quod si gentibus non omnino stupidis exprobremus, rem suapte natura amabilem, utilitatis & commodi plenam, qua una belluis præcellimus, exceptam semel avidissime, determinatam velle, nullam illæ atrociorē sibi factam injuriam putent: tum tandem intelligere, nullum esse inter Dei munera quod gratiori animo excipere debeamus; quod vehementius percolare; quo magis letari.

Vos nunc, generosi Adolescentes, appello. Vos reipub. seminarium: Vos tolerandis & agendis sortibus & magnis natos: Vos præclara, & inter omnes nationes præstantissima indole genitos. Ea ætas vestra, qua nondum cupiditates adolescentiæ effugistis: itaque anxios esse oportet, quo tandem erumpant. Ac ego quidem nihil nisi bonum auguror, tanta est indolis vestræ animique penes
me

(XV)

me aestimatio. Ceterum nisi eo inclinatis, qua ad virtutem & gloriam vocent, pro scientia stultitiam, pro gloria ignominiam, pro felicitate miseriam estis reportaturi. Id ne accadat etiam atque etiam curare vos moneo: curabitis autem quantum vobis & virtutis ac sapientie amor, & labor, & duri ac antiqui mores perplacuerint. Eo tenditis, ubi nec voluptas, nec molles mobilesque mores pertingunt. Heu igitur: pergite qua cœpistis. Quod acrius incitamentum expectatis? Si qua gloria nominis: si qua patriæ caritas; si quis vestri fortunarumque vestrarum amor: si incredibilis animi voluptas vos tangit: ite, defensate litteras, Imperii rectrices, altrices Artium, tutrices Pietatis. Eo vos parentes, eo tota vocat Italia. Italia gentium olim domina: Italia artium, legum, humanitatis altera quondam propagatrix. Agite dum: & postquam fortunante Deo Regem & Imperium recuperavimus, nobis vindicate & litteras: sancte colite: alacres, quo tendunt, ducite.

F I N I S.

I N D E X

C A P I T U M

P A R S IV.

*De principiis legis naturalis ac de officiis,
quæ inde manant.*

- CAP. I. **Q**uod homo, qualis nunc est, solis naturæ
sux viribus nequeat esse plene beatus,
quodque egeat ope entis intelligentissimi,
potentissimi, optimi, ut possit ad hanc beatitudinem con-
tendere. pag. 35
- CAP. II. Existere Ens aliquod intelligentissimum,
& potentissimum, ab eoque universum procreari, & in
eo beatitudinis nostræ spes omnes esse figendas. 43
- CAP. III. De summa Dei Bonitate, qua vult omnes
beatos, deque legis natura, & necessitate generatim. 49
- CAP. IV. Lex naturæ explicatur distinctius, atque ad-
versus profanos homines iterum asseritur. 59
- CAP. V. Systema legum naturalium Thomæ Hobbesii
enarratur. 71
- CAP. VI. Hobbesianum systema excutitur: principia
falsa consutantur, Leges ex se spectatæ atque e veris
principiis ductæ veræ ac pulchræ. 78
- CAP. VII. Enarratur & refellitur systema Spino-
zæ. 90
- CAP. VIII. Grotii doctrina super principiis juris na-
turæ expenditur. 99
- CAP. IX. Systema Pufendorffii enarratur. 107
- CAP. X. De principiis legis naturalis ex Cumberlan-
di mente. 114
- CAP. XI. De Heineccii systemate super principiis le-
gis naturalis. 120
- CAP. XII. Superius systema nova ratione adornatur,
ac inde notiones primæ & genericæ legis naturæ moralis
iter

I N D E X

<i>iterum exponuntur.</i>	127
CAP. XIII. <i>Wollastoni & Ashley Syckes de lege Naturæ dogma exponitur.</i>	138
CAP. XIV. <i>Christiani Wolfii atque Henrici Koëhleri de principio legum naturalium uno & adequato doctrinæ exhibetur.</i>	148
CAP. XV. <i>Veterum sententia, jus suum cuique tribuendum, e novis fontibus expromta, novoque habitu exornata.</i>	160

L I B E R A L T E R.

Quemadmodum ex legibus naturæ hominum officia ducantur.

CAP. I. D E natura actionum moralium, tum de conscientia, libero arbitrio, & imputatione morali.	pag. 197
CAP. II. <i>De officiis erga Deum.</i>	210
CAP. III. <i>De officiis Hominis adversus seipsum, ac primum de iis, quæ cum toti homini, tum corpori debent.</i>	221
CAP. IV. <i>De cultura animi.</i>	242
CAP. V. <i>De affectibus, officiisque inde manantibus.</i>	247
CAP. VI. <i>De officiis erga alios perfectis & absolutis.</i>	273
CAP. VII. <i>De officiis Justitiæ hypotheticis, ac primum de Dominio, ejusque acquirendi modis originariis.</i>	294
CAP. VIII. <i>De modis acquirendi Domini derivativis.</i>	308
CAP. IX. <i>De officiis, quæ ex dominio rerum proficiuntur.</i>	318
CAP. X. <i>De pactis & contractibus, deque officiis inde provenientes.</i>	324
CAP. XI. <i>De officiis adversus alios, quæ imperfecta dici solent.</i>	342
CAP. XII. <i>De Amicitia.</i>	360
CAP. XIII. <i>De Statu hominis sociali, deque variis officiis, quæ ex variis societatum generibus proficiuntur,</i>	

I N D E X

*eur, ac primum virorum & uxorum, parentum & li-
berorum.*

CAP. XIV. De jure Imperantium, tum de Subdito-
rum officiis. 374

CAP. XV. De officiis Magistratum. 388

CAP. XVI. De Officiis, quæ ex variis animi aut cor-
poris statibus proficiscuntur, ut senum & juniorum, di-
vitum & pauperum, agrorum, & sanorum. 394

